



عريس يا مامي

أحمد مسلي

الفهرس

3.....	مقدمة
5.....	عروسة للبيع
9.....	دبدوبة التخينة
13.....	بنت الباشا
18.....	الثلاجة
24.....	شريفة أوى أوى
29.....	أمضى يا أشول
34.....	عروسة للبيع
39.....	مفرش السرير
45.....	عروسة للبيع
49.....	تيس مستعار
54.....	بفلوسي يا كلاب
59.....	بلاها نادية
64.....	فلافيلو
69.....	العتبة الخضراء
74.....	الحب في زمن السيكنشن
78.....	غراب البين
82.....	جاي في السريع
87.....	سحلية أوكراي
93.....	أمنية
98.....	هذا جناه على أخي
103.....	قل ما جمع
108.....	حماتي ملاك
113.....	بيت النتاش
118.....	هاتولي راجل
123.....	وبالوالدين إحسانا
127.....	المراية
132.....	معالي الوزير
137.....	سو.. وات؟؟
142.....	الفيمينست
147.....	خطبتنا
151.....	وختامها مسك

مقدمة

الحلقات دى اعتبرها اقل ما كتبت جودة وابعدهم عن قلبى تماما رغم انها اكثرهم جذبا للجمهور واسخنهم في التفاعل.. كتبت قبل كده سلسلة ممتازة كان فيها مجهود مرعب عن الاغتيالات في مصر والوطن العربي اتكلمت فيها عن 40 شخصية قتلت في ظروف مجهولة لكن كان وراء حوادث القتل 1000 علامة استفهام.. 40 شخصية اغلبيهم غير معروف بالمره.. بعض الشخصيات قابلت ورثتهم فعلا.. وبعضهم كان خارج مصر واتكلمت مع اهلهم مكالمات دولية طويلة عن طريق اصدقاء مشتركين جمعتمى بينهم الصدفة لا أكثر.. سلسلة كان فيها مجهود مرعب في البحث والتقصي والاستنباط والمصادر.. ومع ذلك مكانش حظها زى حظ عريس يا اماي.

كتبت اكثر من 500 مقال في التاريخ - الاحب والاقرب الى قلبى - عن شخصيات وأماكن واثار واحداث في داخل مصر وخارجها.. كتبت سلاسل لم تكتمل عن جنكيز خان والحملات الصليبية ومحمد على.. كتبت في السفر والسياحة اكثر من 100 مقال عن اكثر من 20 دولة من ضمن ما زرت في حياتي.. كتبت اكثر من 1000 مقال عن احداث او مواقف او اخلاقيات او ترند.. كتبت كثير وقليل في أيام الحساب السابق الأكثر شعبية بمراحل من الحساب ده.. ومع ذلك مفيش حد فاكرلى حاجه اكثر من السلسلة دى.

لا أنكر انى كرهتها في يوم من الأيام.. كرهتها بسبب رد فعل الناس.. كرهتها بسبب انى مكنتش حاب اتحبس جواها.. كرهتها لأنى مكنتش مخطط ولا حاب أبقي أسامة منير الى غصب عنى يقوم بدوره لحد دلوقتى.. كتير اوى كتبت ان دى تجارب زيتها زى كل تجارب الأحوال الشخصية لا تخص الا صاحبها.. الخطأ كل الخطأ هو إنك تحكم على صاحبها من وجهة نظرك.. الخطأ كل الخطأ إنك حتى تبدى رأى في الموقف.. الخطأ كل الخطأ إنك تاخذ اى انطباع من موقف قريته.. لا انت صاحب التجربة ولا حياتك حياته ولا ظروفك ظروفه ولا حتى تعرف التفاصيل الى وصلت للموقف ده.. الحكايات كلها كان المقصود منها شيء واحد بس حبيت اوصله للناس..

أحسنوا الاختيار.. أحسنوا الاختيار.. أحسنوا الاختيار ..

لو المادة سبب لتعطيل الزواج او افشاله.. يبقى انت اخترت غلط.. قصداك اهو تجارب لشاب كان عنده كل شيء.. ومع ذلك اتجوز وهو عنده 32 سنة بعد 6 خطوبات وطلاق.

الموضوع ده مفهوش صح وغلط.. كل انسان غير التاني ومستحيل صنع قالب وقواعد لعلاقات هي نفسها بلا قواعد.. في حاجه اسمها انا عاوز كده.. وطالما لم تتجاوز حدود الحلال والحرام يبقى كل الى انت او انتى عاوزينه من حقكم ووطظ كيبيبيبيبيبيرة اوى في اى شيء واولهم الطنطانات "جمع طنط" قبجهم الله جميعا.

ولما لقيت ان الرسالة مش واصله والناس مصره تتعامل مع الموضوع من منطلق إطلاق الاحكام او طرح الآراء.. وقفت.. انا كنت مخطط اعرض كل التجارب.. وهما بالظبط 101 تجربة.. 101 بيت دخلتهم علشان اشوف الأمانة بتاعى الى عندهم..

100 بيت دخلتهم وخرجت منهم زى ما دخلت.. تجارب فشلت ما بين زيارات او تعارف او ارتباط خفيف..

التجربة 101 كانت زواج كامل ثم انفصال سريع..

التجربة 102 رشقت ومش عارف اخلع منها لحد النهارده.. دخلت البيت لقيتهم عاملين مقلوبة فلسطيني.. كلت من هنا ومضيت على العقد من هنا.. ومن ساعتها يا مؤمن وانا اموت واعرف مين الى زقنى..

مع طلبكم المتزايد عليها.. لا مفر من إعادة نشرها.. خصوصا انى في حالة كسل الأيام دى عن الكتابة بصورة معدتش عليا قبل كده.. وحيث ان محدش بيتعلم ولسه العيال عماله تتجوز.. يبقى خلاص بقي.. قدر رينا.. انا حذرت ومحدش بيسمع الكلام.. يستاهلوا.. اهو برضه مبقاش انا اخر حمير هذا الكوكب.

عموما.. دول 30 تجربة مريت بيهم في طريقي للبحث عن الست الى هتدينى كيس الزبالة وانا نازل.. مهم جدا تعرف ظروف بطل الحكايات وقتها كانت عاملة ازاى لانها ممكن جدا تتشابه او تختلف مع ظروفك علشان لو حبيت تاخذ درس او خبرة ما من اى حكاية فيهم.

بطل الحكايات هو انا.. بدأت رحلتي للبحث عن بنت الحلال في اخر سنة من سنين الكلية.. كان عندي 22 سنة.. مكانش عندي اى مشاكل مادية من اى نوع.. كل متطلبات الزواج متوفره.. اشتغلت قبل ما أخلص دراسة.. وبعد التخرج انتقلت بين اكر من وظيفة كلها تعتبر وظائف ممتازة.. تقدر تقول انى كنت من الطبقة المحظوظة جدا.. لما اخدت البكالوريوس سنة 2000 وقتها مجال ال IT في مصر كان اخضر تماما واى حد بيدخل فيه بيتعامل على انه الخير الأجنبي.. الشغل كان بالهبل والفلوس كمان.. كان صعب اوى باب يتقفل في وشي علشان مستقبلي.. المستقبل باين من أولها اهو.. فل الفل الفل.

خرجت من اسرة فوق المتوسطة ماديا.. اسرة معروفة في بلدنا "طنطا".. ابويا كان نائب وزير الكهرباء.. انا تالت جيل من المهندسين في اسرتنا بعد ابويا وأبوه.. اسرة حسنة السير والسلوك والسمعة.. جدي السابع "حامد بك أبو مكية" كان كاشف بلد اسمها شربين في الدقهلية.. ده كان من امراء الممالك.. كان راجل غنى جدا وعنده مكتبة شديدة الضخامة ورثناها منه وورثنا معاها وصية بخصوصها ما زلنا محافظين عليها لحد النهارده.. لما جه الفرنسييس على مصر جدي العبقري صفى كل املاكه وراح يحارب في جيش مراد بك بدل ما يحارب مع بتوع الازهر.. انقطعت اخباره في الصعيد بموت مراد بك.. ومشغناش من فلوسه المتلته دى ولا دينار حسبى الله فيه.

كنت مقبول الشكل العام.. امى - زى اى ست مصرية اصيلة - حماه صعبة جدا.. ميمي شكيب في نفسها اوى.. كانت مصرة انى خسارة في البنات كلهم من منطلق ان القرد في عين امه غزال.. ابويا كان شايف ان الجواز بشكل عام في اى وقت ما هو الا تدمير لمستقبلي كله.. اخواتي كلهم بنات أصغر منى مكانوش شايفين من جوازي كله الا انهم محتاجين فساتين يحضروا بيها فرحى أحسن من فساتين صحباتهم.

جدي لأمي رحمة الله عليه كان بطل الحكايات معايا.. رجل فرفوش وكوميدي جدا.. كان وسيم وملون وشديد النشاط والحيوية ولا يمكن ابدأ تديله سنه.. عاش 88 سنة ومات وهو ببشتغل.. لا عمره عرف مرض ولا عمره قعد في البيت.. عاش مع جدتي 62 سنة ورفض تماما انه يتجوز بعد وفاتها.. مكانش في حياته الا بيته وعياله.. خلف 8 أولاد وجوزهم كلهم وجوز 7 من احفاده.. تولى تربية أولاد خالتي الكبيرة بعد وفاتها هي وجوزها في نفس السنة.. جوز عيالها الأربعة كلهم.. كان شايف ان العيل طالما بلغ يبقى لازم يتجوز.. كل انسان فلح او نجح في الدنيا يبقى اكيد السبب كان الجواز.. كل ستات العالم مزز وبيأدوا نفس الوظيفة طالما عندهم جينات XX.. الجواز في نظر جدي كان طريق سهل وسريع للجنة.. اى شاب مش متجوز في نظره هو زنديق او عايز يتزندق او يبحث عن الزندقة.. إنك توصل لسن 20 سنة من غير جواز فهذا لا يعنى في نظر جدي الا إنك عيل بتاع كوباية وعمايز تتصرمح حتى لو كنت ربيب المساجد.. الرجل في نظره لا يصبح رجل الا لو كان رب اسرة.. ملكش رأى ولا كينونه ولا يصح تقعد مع الرجالة في اى تجمع عائلي الا لو كنت متجوز.. طول ما انت عازب.. يبقى مكانك مع الحريم تحضروا الاكل.. كان من النوع اللين جدا في اى اتفاق.. كان شايف ان اى طلب لأهل العروسة مهما كان فهو لا يساوى ابدأ الى انا هأخده منهم.. هو نفسه اتجوز وهو عنده 16 سنة.. امى وجدتي كانوا حوامل مع بعض وخالتي الصغرى أصغر منى سنا.. جدي أصبح جد لأول مره وهو عنده 35 سنة.. عندنا صورة كوميدية جدا لفرح واحدة من خالاتي.. العروسة قاعده في الكوشة جمب عريسها وقصاها اختها "امى" وأمها والانتين حوامل.. لك ان تخيل نظرتة ليا وانا عندي 30 سنة ولسه بدور.. لم يعترف جدي بالخطوبة ابدأ.. كان بيتقبل على مضض فكرة انى لازم اشوف العروسة وهي تشوفنى.. كان يسمع ان فلان عنده بنت في سن الجواز فيقولى نروح ان شاء الله الخميس الجاى نقابل أهلها ونطلبها منهم ونكتب الكتاب بالمره.. اى طلاق في نظره هو فشل يستاهل أصحابه الحرق.. مكانش في الدنيا سبب يقنعه ان خلاص الأمور وقفت لحد كده ولازم تنفصل.. كان شايف ان الراجل لازم يعيش علشان ولاده والست الى تخرج من بيت جوزها علشان تشتري خضار للبيت تبقى ست ملهاش اهل ومشافتش تربية.. الراجل الى يشتم اهل بيته او يضرهم يبقى مش راجل ولا يستحق ابدأ الا الضرب بالكرباج.. 62 سنة جواز لم يختلف فيهم مع جدتي ابدأ ولا عمرنا سمعناهم صوت.. الراجل الى يشتكى من مراته كان يستنقصه جدا.. والست الى تغضب جوزها تبقى ملعونة.. الراجل والست عموما في نظره ربنا مخلقهمش الا علشان يتجوزوا ويخلفوا.. تنظيم الاسرة بدعة والحرمة الى تخلف 4 عيال بس تبقى حرمه بتدلع.

دى الظروف العامة لسير الحكايات.. مهم جدا تعرفوا انى مش عارضها لتقبل الاحكام.. اجدد حكاية فيهم عمرها اكر من 10 سنين.. يعنى اى نصيحة هتفكر فيها اكيد هتبقى غلط.. لا الظروف هي الظروف ولا الوقت هو هو.. والاهم من ده كله.. انت مش انا.

خد العبرة من الحكايات وسيبك من الراوي حتى لو شايف انه أخطأ.. خليك انت انصح منه ومتكرش نفس الخطأ.

نبدا الحكايات.. وربنا يستر.

عروسة للبيع

اتخرجت سنة 2000 بلا اى نوع من انواع التجارب النسائية.. مكنتش مركز مع البنات الا فيما يخص الألش عليهم.. كنت بتقزز جدا من منظر العيال الملزقة الى قاعدين تحت الشجر وماسكين ايد بعض وهات يا رغي.. بيقولوا ايه العيال الرخمة دى.. نفسي اقول للبنت من دول اهرب يا سيمبا.. انى دلوقتى جاهزة للجواز وهو لأ.. حتى لو اتجوزك بعد التخرج.. ال 20 سنه الجاين من عمركو هو هيكون بيظبط حياته.. على ال 40 هيكون استقر ماديا ولسه شغال وينفع يبقى محاميجو.. بينما انتى هتكونى سلمتي نمر بفعل الخلفة والتربية.. ساعتها هيدور على بنت صغيره تعوضه عن سنين الشقا والحرمان وانتى يتقالك اوريفوار مون امور.. نلتقي فى عالم أفضل..

ظلم؟؟ جيروت؟؟

و مين قال ان الحياة عادلة؟؟

انتى نفسك لم تكونى عادلة معاه لما كان فى اول مشواره وطحنى عظام امه بشبكة ومهر وقايمه ومؤخر وطلبات فوق طاقته.. انتى نفسك لما تكونى عادلة معاه لما استدان علشان يرتبط بيكى.. مش بقول ان ده نوع من أنواع الانتقام او أن الكلام ده صح.. اطلاقا.. ولكن ده الى بيحصل.

قضيت فترة المراهقة والدراسة وحيد بدون اى Girl Friend.. وده كان لازم علشان اتخرج بامتياز.. طبيعي جدا يوم الفالنتين أفضل قاعد فى البيت بدل ما اجيب الى فى بطني من المحن الى فى الشوارع.. لم أكن أتمنى أكثر من ان بوليس الآداب يلم العيال دى كلها فى البوكس.

حياتي العملية بدأت بدري اوى.. عجلة عمري دارت بأقصى.. طاقتها بداية من سن ال 22.. جدي الحبيب كان مقتنع ان فساد العالم سببه العزاب.. العازب فى نظره يبقى ابو نواس.. مقدرش يقتنع ان الشخص الى بيشغل فى اليوم 20 ساعة استحاله بيبقى عنده وقت يتجوز ولا هيبقى فى دماغ للنسوان وحواراتهم الخايفة.

جدي مقتنع تماما ان فى بنت صايعه من بنات البندر واكله عقلي.. فيلم شباب امرأة كان مأثر عليه اوى.. كل ما يشوف خلقتى يقولي اوعاك وشفاعات يا احمد.. الله يصلح حالك يارب.. راجل تزوج وهو عنده 16 سنة طبيعي جدا يشوف ان الى عنده 22 سنه ومن غير جواز يبقى صايع.

تقوله مثلا ابو تريكة جاب جون.. يقولك ما شاء الله.. بعد ما اتجوز الكورة فرجله بقت حلاوة.. ولد مستقيم صحيح وربنا يباركه.. تحكيه ان فى حرب حصلت ومذبحة وما الى ذلك.. اول سؤال يسأله..

- هو الجنرال ده متجوز؟

- ايه العلاقة يا جدى بين الجواز وبين المذبحة؟؟

يقولك ما هو لو كان اتجوز كان بقى طبيعي.. الجواز تهذيب للنفس ومسئوليه يتحملها الاقوياء من الرجال.. لما الراجل يتجوز ويعف نفسه عن الحرام وينشغل فى تلبية طلبات بيته واولاده.. مش هيبقى فاضى للهلس وقلة الادب والمذابح والكلام ده.. هيشغل وينتج للمجتمع افراد جديده يكون فيهم الامل للأصلاح الشامل ويقابل ربنا وهو أدى رسالته كاملة.. ده سيدك النبى قال تناكحوا تناسلوا فأنى مباه بكم الأمم يوم القيامة.. وبعدها محاضرة طويلة وتفسير لولبي ديني لوجوب الجواز مدعم باحاديث معرفش بيحييها منين انما صحيحة.. اقوم من تحت ايده وانا مقتنع ان الخطوبة هى اول درجه من درجات سلم الوصول الى الجنة والشبكة ما هى الا قربان الى الله عزوجل ومصر هتتقدم اكيد لما انا اتجوز.

الحوار مع كبار السن ينتهى فى العاده بحاجه من اتنين.. يا اما احنا جيل بايظ يا اما ايامنا ما يعلم بيها الا ربنا.. طيب يا جدي الحبيب.. هات انت العروسة وانا تحت امرك.. انا نفسى—والله بس معنديش وقت.. طالما انت اتفقت مع بابا ان انتو الى هتدفعوا.. يبقى بيس يا مان.. انا تحت امركوا.

وجدى مكديش خبر.. فى خلال اسبوع لقيته بيكلمني وبيقولى على ناس افاضل من قريه مجاورة لبلدنا اسمها زناره.. اسم الشهرة بتاعها "كفر ايطاليا".. دى قرية صغيرة تتبع محافظة المنوفية.

كفر ايطاليا لمن لا يعرف هي قرية فقيرة زى كل قرى محافظة المنوفية.. اغلب شبابها سافروا على إيطاليا في هجرة غير شرعية.. ومن هنا كان اسمها.. الشباب دول اشتغلوا وقبضوا باليورو وكل واحد فيهم اشترى في بلده 3 او 4 قراريط بنى عليهم بيت ملك بالطوب الأحمر.. يعنى بقى اقطاعي..

معلومة كمان على الهامش.. تكاليف الزواج في المنطقة دى من مصر.. شديدة الرعب.. حاجه في مستوى العريس الابوهشيمة.. يعنى مثلا لو قلت لأهل العروسة انا هجيب 100 جرام ذهب.. ممكن ابوها يكب عليك مية المسح.. ولو قلت 200 جرام.. يبقى هيبصلك باحتقار ويكتفى بطردك من البيت.. انا بتكلم جد على فكره.. سلو البلاد دى كده.. علشان بس محدش يفتكر ان الموضوع أوفر.. الجواز عندهم تقريبا عبارة عن ذهب + قايمه + شوية حاجات فوق بعض.. لو فرضنا ان الجواز هتتكلف 100 الف جنيه.. يبقى ذهب ب 95 الف وعفش وشقة وفرح وكله كله ب 5 الاف.. ده غير القايمه الى بتتكتب بأرقام وهمية لأغراض المكايده بين الستات.. وعلشان تاخدوا المعلومة الكاملة.. الذهب بيبقى غالى صحيح.. بس جرى العرف في الأماكن دى ان العريس بياخده تانى بعد الجواز.. وده شيء عادى جدا عندهم.. انا اعتبر ان الراجل الى ياخذ ذهب مراته يبقى حرامي.. لكن ده عندهم عادى جدا.. كمان المفروشات بتاعتهم لما بتشوفها بنات المدن الكبرى بيهروها تريباه ويجيبوا الى في بطنهم من القرف.. لأن ذوقها فعلا سيء جدا وجودتها زى الزفت.. مش مهم في الجواز دى كلها الا الذهب والقايمه وتروح العروسة تقعد في بيت عيلة.. وتبدأ بعده مأساة جديدة من مآسي الحياة تنتهي بالمسكينة واكله بالجزمة فوق دماغ أهلها.. ولا مجال للشكوى.. هتخلع بعفشها ازاي من بيت عيلة.. تتطلق ازاي في بلد صغيرة تعتبر الطلاق عار يلزمه دفنها حية.. هتعيش ازاي وسط اخوات جوزها وامه.. شيء مقزز الله العالم.. ولكنه ما زال بيحصل لحد الثانية الى فاته.. يختلف طبعا الزواج واتفاقاته من مكان الى اخر.. انا بتكلم تحديدا عن المنطقة دى او ما شابها من قرى مصر.

جدى حكاية عن الأسرة دى واخلاقياتهم وادايه البنت جميله ومتعلمه.. حكاياته اسالت لعابي بشده.. فلاحين يعنى اهل اصول وكرم.. هاكل فطير ومش وعسل وطبيخ أصلي بالسمن البلدي.. كمان البت هتقولى يا سي احمد ومش هترفع عينها فيا ابد.. ارجع من بره الاقي طشت الميه والملح.. وازعق وانا داخل البيت وأقول احم احم.. انا جيت يا اهل البيت.. والكل يجرى ويتخبط في بعضه من الهيبة والاحترام والست بتقول سي احمد وصل يا ولاد.. ابوكوا جه يا ولاد وتمشى ورايا بالبخور وانا رايح الشغل.. في حفظ الله يا سي احمد.. تروح وتجيى بالسلامة يا سي احمد.

الله.. انا عاوز من ده يا حزميل.. قصدى يا جدي.. هو ده الكلام.

فرحت جدا وابلغت جدى بموافقتي.. حكيت لأبوي وأمي وأخوتي.. قعدنا اسبوع نحتفل ونسمع في رائعة محمد فوزى يا ولاد بلدنا يوم الخميس.. صوت فاطمة عيد المبهج رجع يملي بيتنا تانى بعد سنين من صوت صراخ امى وهى بتندب حظها الى وقعها في عيال خيبتهم موردتش على حد في وقت كانت خيبة الناس فيه السبت والأحد بس.

توقعت المقابل منهم.. مهندس شاب 22 سنة.. مقبول الشكل وقوى زى التور.. شغلانة لوز واسرة تشرف.. ايه المانع بقى؟؟

مش عارف..

اهل البنت - وتحديدا ابوها - كان لهم رد فعل غريب شوية.. ابو البنت بلغ جدى انهم مستعدين يستقبلوا زيارتنا.. ولكن بعد اجازة الصيف.. رد غريب لفت نظري.. اشمعنى اجازة الصيف؟ ممكن مثلا يقول الاسبوع ده مش مناسب.. او بعد امتحانات الترم لو كان وقت امتحانات.. او في اجازة الصيف نفسها.. انما بعد الاجازة!!

غريبة!!

الحكاية فيها إن.. العقلية المتسائلة هتوردنى مورد التهلكة اكيد.. عن طريق بعض الستات عباقرة التجسس والنميمة بالفطرة.. قدرت اعرف الراجل قال كده ليه.

اجازة الصيف عندهم هو موسم نزول الشباب العامل في إيطاليا لزيارة الأهل.. ابو البنت قال بالنص.. نستنى بس لما نشوف الوارد الطلياني اخباره.. جايز حاجه منهم تعلق.. ان مكانش.. يبقى نشوف البشمهندس وربنا يجيب الى فيه الخير.

من بعيد كده وللجاهلين يبدو ان ظروف العاملين في ايطاليا كانت افضل منى.. الحقيقة لأ خالص.. ازاي تقارن عامل في مطعم وللا مغسلة وللا سوبر ماركت في إيطاليا بمهندس كمبيوتر في مصر.. بس هما دماغهم كده.. الأولوية عندهم للخارج وانا كنت استبن.. لو مفيش حاجه علقت من شباب إيطاليا نبقي نبعث للخروف بتاع طنطا علشان ييجي يدفع و يمضى ويشيل ويمشى.

الرجل في كلامه قال ان البنت في بيت ابوها متصانة ومحطوطة على الرف زى الورد في قصرية الزرع.. لوده نزلها وشافها.. وده مسكها وعينها.. ييجي بعد كده واحد يقولك مش معنى ان البطيخة مقفولة.. ان محدش طبطب عليها.. انا كنت متقبل تفكير الرجل ومديله العذر على أساس انه من بيئة مختلفة.. لكن طريقة النظر دى للبنات خلتي احس بشعور قوى اني عايز اتف في وشه.

وقتها حسيت بالغيب والغضب.. انا معرفش البنت ولا ربطتني بيها اى علاقه من اى نوع.. لكن حسيت بالمهانة ليها.. حسيت انه بيهين اخواتي ضمنا لأن وقتها كان في خطاب بيجوا عندنا البيت زى اى بيت في الدنيا في بنات في سن بين 18 و21.

ابويا كان راجل عقلاني تعامل مع الموضوع بالحقائق المجردة.. قاللى ده رجل مادي لا يصلح للنسب.. انت تعامل مع الموضوع بهدوء.. البشر مختلفين ومش كل الناس زى بعض.. امى ست عصبية.. فضلنا انا وهى ليله كامله نخطط ازاي نرد الالم للناس دى.. انا كنت مفروس اوى الصراحة.. في الاخر.. اتفقنا ان ماما هتعملى صينية بسبوسة بالقشطة مع كوباية لبن كييره ولا ازعل نفسى.. وبكره هاخذ ست ستها المعصعبة ام عرقوب دى.

عدت الايام وجت اجازة الصيف.. الرجل احلامه رشقت في الحيط.. محدش من الشباب الطلياني عبره.. عرفت كده لما لقيته بيتصل بجدى ويبدعونا لزيارتهم.. جدى فرح بالدعوة.. هو معندوش هدف الا إتمام الزواج ووظ في اى شيء.. بلا كرامة بلا زفت.. ده انت هتاخذ بنتهم.

ايوه يعنى.. هاخذها اشحت بيها؟؟

هاخذها أأكلها وكل يومين احلبها واطلع منها لبن ابيعه؟؟

هتبصيل بيض دهب مثلا يخليني مليونير؟؟

مكنتش فاهم نظرية جدى في جزئية "هتاخذ بنتهم دى".. بس لما اتجوزت عرفت.. والنهارده بتوعد من دلوقتى اللي يفكر ياخذ بنتى.. وربنا لانفخه.. هو وامه.

اخذت رقم تليفون الرجل من جدى على اساس انى هكلمه واتفق معاها وكده.. وفعلالكمت الرجل..

- سلامو عليكو يا حاج.. ازى الصحة؟؟
- الحمد لله.. ايه يا عم احمد.. يعنى ان مكناش نسأل احنا.. يبقى لا سلام ولا كلام كده؟
- انا انتظرت حضرتك كتير اوى يا حاج.. لعل المانع خير.
- معلش بقى اصلنا كنا بنجدد البيت.. والصنایعية بهدلونا
- كان الله في العون.. عتبة سعيدة ان شاء الله
- انا كلمت جدك.. ان شاء الله تشرفونا على الغداء الخميس الجاي.
- اه ماهو قالى.. انا بس بعذر منك يا حاج.. عقبال ولادك امى لقتلى عروسه اجمل ونسب انضف
- نعم!!
- اه.. زى ما بقولك كده.. لازم تشرفني في الفرح طبعاً.. العروسة عقبال اولاك ابوها لواء في الجيش

تيت تيت تيت تيت تيت

أيه ده.. هو الرجل قفل السكة في وشى وللا ايه!! ايه قلة الذوق دى!!

حاولت الاق تفسير غير ان الرجل شايف بنته سلعة لمن يدفع اكر.. ملقيتش.

حاولت الاق تفسير غير ان الرجل بيتعامل معايا على انى خروف اجى انديح وامشى.. ملقيتش.

حاولت اقنع نفسى.. ان الرجل بيدور على مصلحة بنته.. طيب من امتى المصلحة كانت في الفلوس بس؟ ليه مسألش عليا وعلى اخلاقي وسمعتي واهلي زى ما المفروض يحصل؟؟ ليه الأولوية كانت لبتوع أوروبا؟ لو كان عنده اعتراض من اى نوع.. وده حقه طبعاً.. يبقى ليه كلمني تاني بعد اجازة الصيف ما خلصت والشباب الطلياني رجع على بره؟؟

لو عنده مواصفات معينة لعريس بنته لا تنطبق عليها.. وده برضه من حقه.. ليه مقفلش الباب من الأول؟
لو كان الراجل على اتفاق مسبق مع حد من الشباب المسافر وملتزم باتفاقه.. طبعا كنت هحترمه.. انما هو كان مستني اى حد..
عاوز يرمى الطعم واى سمكه تعلق مش مهم.. المهم تكون سمكه إيطالي.
الح جدى عليا انى اكلم الراجل واعتذر له.. لقيت نفسى- بكلمه تانى ويقول له لا مؤاخذه يا حاج.. اصل الفرحه بالعروسه نستنى
اقولك على مكان القاعة اللى هنعمل فيها الفرح.. دار القوات الجوية.. ماهو ابوها لواء في الجيش بقى مش عرة زيكوا.
قام الراجل شاتمى وقافل السكه في وشى تانى..
راجل قليل الادب صحيح..

دبوبة التخينة

جدي الحبيب من تاني..

الرجل الى عايش حياته يحارب العزوبة.. حاولت وحاولت اجيال من قبلي اننا نقنعه بأن الجواز هو نشاط بيقوم بيه الانسان من ضمن عدة أنشطة في حياته.. والنتيجة كانت الفشل الذريع.. ان تزوجت سقطت كل ذنوبك وأصبحت انسان كامل.. وان عشت عازب لحد ال 30.. فانت داخل جهنم لا محالة.. أوقات كتير كنت بتصور انه باصص للموضوع ده من جانب وطني لأنه كان دايمًا يسخر من الشباب الى مانع نفسه عن بنات بلده.. لم يكن هناك أكثر تنمرًا على الجواز والستات مني الا جدي.. ومع ذلك كانت العزوبة في نظرة جريمة لا تغتفر.

بعد النهاية المأساوية للمشوار بتاع كفر ايطاليا.. ابويا بستفني بكلمتين عن احترام الناس مع درس عن كيفية الرد المهذب وعدم الانزلاق الى الخطأ حتى لو أخطأ الآخر.. امي كافأتني بصينية بسبوسة من الحجم العائلي الكومبو.. وجدي خد الموقف تحدى شخصي.. وهتجوز يا لمبي.. وهنشوف انا وللا انت يا لمبي.

اذا كانت طنطا اوضه وصاله.. فجدي هو باني هذه الأوضة ومؤسس الصالة ومالك العمارة وبواب المنطقة وعمدة الناحية.. مفيش كائن عاش في البلد دي حاليًا او في الماضي السحيق او حتي هيتولد فيها فيوم من الايام وجدي ميعرفوش.. لا استبعد انه كان صديق شخصي.. للعارف بالله سيدي أحمد البدوي شخصيًا.. طول عمري استغرب جدا ازاي مع كل المعارف دي لم يقترب من المجلس الموقر أبدًا.

انسان عارف كل شيء عن كل الناس واصولهم وفصولهم وازواجهم وبناتهم واولادهم.. مين اتجوز مين ومين طلق مين امتي وعلشان ايه.. مين خلف ومين عنده حالة وفاة ومين عنده فرح ومين عنده سبوع ومين عنده ميتة.. يوميا كان بيجامل في فرح او واقف في عزاء او بيحل مشكلة في الشغل او الحياة لحد.. قاعدة بيانات متحركة عن طنطا وأهلها.. لم ييخل يوما عن تقديم أي مساعدة لأي حد محتاج.. علشان كده فكرة انه بيدور على عروسة لابن بنته دي كانت اشبه بطلب كوباية شاي من عفريت المصباح.. الف مين يتمنى يخدمه.. هو بس يفكر مش يؤمر.

حاجه من اتنين.. يا اما الراجل ده كان مخبر في يوم ما.. او انه كان امين سجل مدني طنطا.. مع شخصية زى دي كلمة عاوزين عروسه تعتبر هزار.. في التو واللحظة يترص قصاذك مش اقل من 10 اسماء لبنات جاهزين.. ده انت كمان لو طاوعته.. ممكن يرفع سماعة التليفون يكلم حد يقوله هنكتب كتاب بنتك على ابننا النهارده.. وانت ولا شفت ولا اتنيلت.. وفي ظرف سويحات قليلة تلاقى نفسك من الشهداء.. عمل كده بالفعل مع ابنه الأكبر لما لقاه فرحان بالبدلة الميري وماشي يشقظ في بنات الناس.. الجدة راح شغله الصبح.. رجع لبليل لقي نفسه مكتوب كتابة.. ولم يخلق بعد أي شخص يقدر يقول لجدي لأ.. مش خوف.. انما هيبة ومحبة.. حاجه كده زي جابر الشراوي بتاع فول الصين العظيم.

العروسة الجديدة بنت حسب.. اصل وفصل وجمال وتعليم.. ريفيين لكنهم عايشين في طنطا.. سن مناسب وامكانيات عقلية أهلتها انها تتخرج من كلية الحقوق بتقدير عالي.

يا مسهل الحال يا رب.

مكانش عندي غير شرطين في عروس المستقبل..

الاول.. القبول العام شكلا وموضوعا.. لا تكون جميلة اوى وتعبي وراها وتقرفني بجمالها ولا تكون وحشه اوى انفر منها.

الثاني.. مش عاوز مراق تشغل.. من غير تفاصيل وهري كتير.. انا رافض شغل الستات قلبا وقالبا.. تتعلم لحد الدكتوراه لو حبت.. بس في النهاية.. واحد هيشغل والثاني للبيت.. ونسيب البيولوجيا تقول كلمتها.

دى شروطي وهي غير قابله للتفاوض ولا التنازل تحت اى بند.. مفرضتش رأيي على حد ولا عمري طلبت من واحدة انها تقعد في البيت علشانى.. انا كنت بختار الى مش بيشتغلوا فعلا.. هاخدها من بيت ابوها ست بيت واسلمها لملك الموت – او تسلمني – وهي ست بيت.

- ها يا جدى.. الناس موافقين؟؟
- موافقين طبعاً.. أبوها قالي الجدع معاه حق.. الست ملهاش غير بيتها وجوزها.
- طب والبنت.. ظروفها ايه يا جدى؟
- ظروفها ايه يعنى ايه.. هتكون ب 3 رجل يعنى؟ ايه العوج ده.. اهي حرمه زى كل الحریم.. خالتك شافتها وبتقول عليها فلقة قمر.. حمار وحلاوة.
- ايوه كده.. اديني في البطيخ وانا احبك يا فنس..

نتوكل على الله بقى ونروح.

الى لابوار رأسا.. التورتاية المقدسة ام 300 جنية.. الموظفين في المحل ده يعرفوني كويس.. تقريبا كل اسبوع كنت باخد نفس التورتاية.. مره حببت اجيب حاجات مختلفة للبيت عندنا.. الشوا عليا وافتكروا ان العروسة المرة دى مش حلوة.. نص بنات طنطا شاليه على قلوبها مش اقل من 5 كيلو دهون بفلوسي من لابوار ده.. اعتقد ان لابوار بدأ يقتحم المحافظات ويفتح فروع جديدة اعتمادا على وجود زبائن زبي كده.. ارزاق.

بيت بسيط جميل هادي لا تشع فيه بالغبية ابداء.. عندنا في البيت لوحه زى دي.. فرش الانتريه بتاعنا شبه ده.. الجزم على باب الشقة.. اذن هو بيت الكلمة العليا فيه للأم.. موبيليا عتيقة خشب زان اصلي نظيفة جدا.. اذن هو بيت كلاسيكي سبعيناتي.. كل تفصيله في البيت بتقول ان الناس دى هتستقبل عريس.. ريحة النظافة.. الورد على السفرة وفي الصالون.. كل شيء لامع بشكل غير طبيعي.. في بيته مصر- الترابية مستحيل تحتفظ بالموبيليا كده الا لو بتنظف البيت كل 5 دقائق.. في ريحة محشى.. بنت حرام تقول انه حراق ومتخدم عليه كويس اوى.. البيت عموما في ريحة محببة.. ريحة امان واطمئنان.

اتبسطت جدا من الانطباع الاول.. ام العروسة تبدو من النوع الغير سهل.. نظرات قوية مركزة وكلامها يحمل الف معنى ومش واضحة.. اسئلته في العمق.. بس عموما مش أزمه.. اخرها شبكه ومهر وخلافه.. حقها طبعاً محدش ينكر.. لا تبدو انها من النوع المثير للمشاكل.. 6 فرد غوايش مجدوله "موديل قديم بشده" في ايديها يقولوا انها من النوع الكلاسيكي الى مؤمن ان الغويشتين دول هما الامان من غدر الزمان.. غالبا هيبقي اخرها حاجه تغيظ بيها جارتها او اختها.

ابوها مثال حي على الانسان المطحون.. وشه عبارة عن لوحه واضحة جدا لانتهاك الزمن للأنسان بقسوة.. كلامه عبارة عن "خير ان شاء الله" أو "ربنا يصلح الأحوال" أو "الى عاوزه ربنا هيكون".. راجل لا بيحل ولا يربط ولا غنى عنه ابداء في كل بيت.. اختصارا.. راجل طيب اوى.

اذن مفتاح الأسرة دى في منتهى السهولة.. شيء مطمئن.

بدأنا الكلام والحوارات المملة المتنوعة.. معاناه حقيقه علشان تلاقى موضوع يلفت انتباه اسره زي دى.. لو شتمت الحكومة يشتموا معاك.. لو مدحت الرئيس يمدحوا معاك.. لو حببت تصلى يفرشوك السجادة.. لو قلت نكتة بايخة يضحكوا معاك.. بين كل جملة والثانية.. عزومه بشيء ما.. والتبى لتاكل يا اخي.. بالله عليك تكمل جردل العصير.. جرب صينية الكنافة دى.. طب خد فردة الكوارع دى من ايدى.. وهكذا.. حسيت براحة نفسية.. اسره لا تتوقع منهم اى خطورة ولا اى اذى من اى نوع لحد ما جت اللحظة الحاسمة.. والعروسة "دخلوا" علينا

الكلمة بين القوسين مقصودة مش غلطة.. فعلا.. العروسة دخلوا فعلا علينا.. انا شفتها من هنا.. وانهار نص حلم جميل بنيتة في الساعة الى فاتت من هنا.

المفروض انها أقل من 25 سنة.. بس الجسم ده صعب اوى تركيبه مع السن ده.. ده جسم واحده خلفت على الاقل 900 عيل واجهضت في 900 زيههم.. وشها جميل فعلا.. لكنه جمال مدفون تحت اطنان من الدهون.. وزن البنت في اقل تقدير لا يقل عن 150 كيلو مع الرأفة بالإضافة الى انها طويله جدا.. تكاد تقاربني طولاً.. بالبلدي كده.. عملاقه.

طيب دى انا لو اتعصبت عليها فيوم.. ممكن تهيدنى علقه تكسر عظامي.. وساعتها هبقى اول راجل يأجر بلطجية لمراته.

في نظر البعض يعتبر الوزن سبب كافي جدا للرفض.. لو قلت لأمي انا موافق عليها.. امي هتتبرأ منى ليوم الدين خصوصاً انها من جيل ميرفت أمين الى بيربط رشاقة البنت بكل حاجه.. في نظر امي البنت التخينة تستاهل تترى في الفرن لحد ما دهونها تسيح وتبقى مانيكان.. ست شايفة ان اقصى وزن للبنت لا يصح انه يعدى 60 او 65 كيلو بعد الحمل والخلفه.. البنت لو وصلت 70 كيلو تبقى بقرة تستاهل الذبح.. اقنعها ازاي أنا بالمنظر ده؟؟

انا اتقفلت من البنت.. لكن مخدتش القرار.. لسه في فرصه ومجال.. حرام انى اقول طالما هي تخينه يبقى متنفعش.. متهيألى هكون سطحي اوى.. ده غير ان التخن نفسه لا أعتبره عائق قوى للدرجة.. ما زلت شايف ان هيا تم ملكة جمال الكون.. البنت المعصصة دى متدخلش مزاجي.. انا راجل قديم احب الملين.

قررت أتكلم مع البنت.. يمكن الاقى مميزات تانيه عندها تخلينى اجبرها على ريجيم قاسي او عملية تخلى جسمها ينفع لشقي الجواز..

وكانت الصدمة الثانية..

البنت بتشتغل.. ومش اى شغل.. دى محامية في الاحوال الشخصية..

العب يا سمك..

يعنى قايمة نايمة عايشة في قضايا الطلاق والنفقة والرؤية.. وجودها في مكان زى المحكمة بشكل يومي وتعاملها مع مشاكل الأحوال الشخصية شاحننا بطاقة سلبية تهد جبل المقطم.. الى زى دى مع اول مشكله هتحتاج تجرب خبرتها وكل الى اتعلمته مع الغير في العبد لله.. هتلاقى نفسيتها زى الجماعة بتوع حقوق المرأة.. برميل بارود متفجر جاهز للانفجار في اى حد بدون اى سبب واضح.. مع اقل كلمة هترصلك كلام بالهيل كله فارغ ولا يصمد امام اى منطق مستقيم او معوج.. لكنه كلام مهم لأنه بيعبر عن نفسية غاضبة من كل شيء.. لازم تنتبه للغضب ولا تلتفت لمحتوى الكلام الفارغ غالباً علشان تقدر تتعامل معاها.. بقول آخر.. مين يابا في دماغ للعالم دى؟؟

طيب دى هعمل معاها ايه؟؟

دى سهل جدا تخرجني من الدنيا ملط.. ومش بعيد تلبسني قضيه كمان.. هو المحاكم فيها هزار؟؟

مش كده وبس.. دى مصممه تكمل في شغلها وتحضر دراسات عليا وتفتح مكتب خاص بيها.. أحلام مشروعة طبعاً ومن حقها.. بس بعيد عني.

كده أصبح القرار سهل وبسيط.. استمر الكلام بفتور الى ان أهدتني الاقدار الهديه الثالثة..

البنت لا تدرك من حقائق الزواج الا الأكل.. الزوج في عرفهم هو ثور التخصيب الواجب تغذيته باستمرار من اجل هدف محدد.. خيرة في اصناف الاكل وطرق اعداده وتقديمه وتأثيره.. دكتوراه في لف المحشى.. ودق الكفتة وتسبيك البامية.. زمالة كلية ابله نظيره في حشو الصغير وتأوير الكبير وتتبيل ماهو قابل للتبيل.. فنانة في استخلاص اللحم من بين ثنايا العظام وموهوبة في اللت والعجن والخيز.

باختصار.. البنت مطبخ متنقل.. نظيره نيقولا في ثوبها الجديد.

انهار النص الثاني من الحلم الذى لم يكتمل.. تخيلت نفسى— انا الشاب العاشق للكتب.. متقعر المصطلحات.. صاحب المغامرات في صحارى مصر— وجبال افريقيا وشواطئ أوروبا واحراش آسيا قاعد جمبها في البيت اكلمها عن تروتسكي ووحشية ستالين والفرق بين الحكم الملكي الدستوري والحكم الجمهوري البرلماني وان كانت تعتقد فعلاً في الدولة الشيوعية او الحكم

الشمولي.. بينما هي بترد عليا بالفرق بين اللحمة الموزة واللحمة الى مش موزة في الطبخ.. تخيلت نفسي— بكلمها عن الممالك والمغول والفاطميين والاندلس.. وهي تقولي افضل حازه لعسل الكنافة هو الليمون علشان الشربات ميعقدش.

تخيلت نفسي— قاعد جملها على الكنية منتفخ الكرش شبه نعان بعد غداء تقيل وقصادي على الترايزه شاي وحلويات وانا بعاني علشان اوصل للشاي بينما عينا نصف مقفولة من كتر الأكل والكسل.

تخيلتني اتعصبت عليها وقتلتها ابوكي وأمك.. وعينها بتطق شرار وهي بترفعني في الهواء وتنزل بيا على الارض في سوبر سوفليكس من بتوع ال "Undertaker" وبعدهم تروح نازله عليا بضربة كوع خلفية قبل ما تدفني بالحياة.

تخيلتها حامل وانا بساعدها علشان تمشي.. بس مش قادر اسندها بسبب وزنها المبالغ فيه.. شفتني رجل مغلوب على امره زى ابوها كده.. بطع الحركة والفهم.. عندي 3 او 4 بغال صغيرين بياكلوا الاخضر واليابس.

يا لهوى.. لا والف لا..

فجأة لقيتني انتبهت وفقت من كوابيسي.. وبصرخ وبقول لا لا لا بطريقة احمد عبد العزيز في المال والبنون..

حسني الضو بيقول لأ..

حضارة ال 7000 سنه بيقولوا لأ..

غمزت لجدي بالإشارة المتفق عليها بما معناه ان الموضوع بلح.. جومي بينا نمشي.. جومي بينا نمشي.

خرجنا من البيت بأدب واحترام.. انا كنت مضايق جدا علشان البنت الصراحة.. شايفها ضحية..

ضحية الى كذبوا عليا وخبوا عني حالتها علشان يعرضوها للموقف الزفت ده.. ضحية العقلية الى حبستها في المسافة بين فرن البوتاجاز والثلاجة.. ضحية الى كانوا فرحانين زمان ان البت بتاكل يا ما شاء الله.. ضحية الى تهاونوا بشروطي الغير قابلة للتفاوض رغم اني قلت قبل ما اروح.. ضحية الناس الى دايمًا تقول هما بس يتقابلوا ويحصل القبول.. وربنا يسهل.

دخول البيوت مش بالساهل.. مسكينة فرحت مؤقتًا بعريس.. واكيد هتكتئب لما العريس يروح في داهية وميرجعش تاني.. واكيد طبعا هتكتئب اكتئاب من النوع الى بيتعالج بمحتويات الثلاجة.. يعني مزيد من الزفت فوق القطران.

مين المسئول عن اعصاب الام الى اتحطمت بالبطيء وهي بتعد الساعات في انتظار مكالمة مش هتحصل أبدا من عريس الغفلة تقولها انه وافق على بنتها؟

مين هيدفعلى ال 300 جنيه بتوع التورنابة.. كانوا ريع مرتبي وقتها على فكره.

بنت الباشا

اكثر من 15 سنة مروا على الحكاية دى.. ولا زالت بتحرق دى..

جدي برئ المرة دى.. هو بس سلط عليا واحد من جنرالاته في حربه ضد العزوبية.. خالتي الوسطي ربنا يديها الصحة.
خالتي الحبيبة دقيقة جدا في وصفها للأشياء.. عين نسر.. ملهاش مثيل.. حازه كده محصلتش في التاريخ ومعتقدش انها ممكن تتكرر تانى لانها طفرة من الطفرات بتاعة الاحافير..

لو قالتلى مثلا صاحبك محمود إبراهيم ببسلم عليك.. يبقى لازم اعرف انها قابلت صديقي مايكل ميشيل.. ولو قالتلى امك كانت عندي النهارده في المدرسة.. فده يعنى انها كلمت امي الصيف اللى فات لما كانت هي في مطروح وامي في مرسى علم.. انا طولي 180 سنتي وبلعب حوالين 100 او 110 كيلو وزن "وقتها".. شعري بنى وعينيا خضراء.. مش ابيض ومش اسمر.. خالتي مصره اني طويل زى النخلة شعري اشقر وعينيا في زرقة السماء وفيا شبه كبير من يوسف وهبي في فيلم شباب امراه.

فيلمها المفضل هو رد قلبي بتاع عبد الحليم حافظ ومنى زكى.. مطربها المفضل محمد عبد المطلب واغنيته المشهورة عرباوي..
تعشق أغنية عمرو دياب "غلطة ندمان عليها" علشان كلها ضحك وفيها بهجه.. فرحت اوى ورقعت زغاريد لما ربنا كرمي وخذت "اليسانس" الهندسة.. هكذا قالت لما سألوها بتزغرتي ليه يوم تخرجي.

في دائرة كهربائية في الدماغ مسئولة عن ربط العصب البصري بمخازن المعلومات في مخ الانسان.. الدائرة دى عندها محروقة تماما ومعها شوية خلايا من بتوع تمييز الألوان والروائح.. المسكينة لا تتميز الاشكال ولا الأسماء ولا الألوان ولا التواريخ.. كل حاسة من الحواس الخمسة عندها شغالة.. بس لوحدها.

تخيل انت بقي ان الشخصية دى.. جايبالى عروسة.

بتكليف من جدي تطوعت خالتي للمهمة دى.. كلمتني في يوم وقالتلي خدتلك معاد من ناس انما ايه.. كُتِل.. البنت مليانه حبه ومملكه كده.. قمحية وعينها عسلي.. طالبة في كلية التربية الموسيقية وأهلها ناس على اد أيدينا كده.

من وصف خالتي اقدر اتوقع ان البنت رفيعة زى الخشب.. مش مقبولة الشكل على الاطلاق.. حاصلة على الماجستير في المحاسبة وبيضاء زى شق اللفت وعيونها سوداء كالليل البهيم.. وأهلها.....

وللا بلاش.. خلينا نشوف احسن..

طقوس الزيارة المعتادة.. ما تيسر.. من عطور ابويا الفاخرة لأن ميزانيتي لا تتحمل لابوار وازاة ريحة مع بعض.. العروسة كانت من بركة السبع "منوفية".. ابويا قرر يسلفني عربيته البيجو ال 504.. وده حدث لو تعلمون اشد وطأة على ابويا من سقوط روما..
توجهنا لبنت العروسة وانا سعيد سعادة غير عادية.. تفتكروا ليه؟

لأني سايق عربية بابا طبعا..

مجرد ما وصلنا البيت.. انا تنحت..

الله يكسفك يا خالتي.. هما دول اللى على اد أيدينا؟

سراي كبير اوى من بتوع الزمن الجميل.. قصر— بمعنى كلمة قصر—.. جنينه هائلة المساحة.. تماثيل تحفة في كل مكان.. ممر في وسط الجنينة لحد مدخل البيت.. بواب وجنايني شكلهم انضف مني.. زخارف ونقوش هائلة في كل مكان على جدران البيت من بره.. نافورة مرمر في وسط الجنينة شغاله والمية فيها انضف من مية شقتي.. زريبة مواشى وبرج حمام وعشش طيور باينين من بعيد.. كده عنب اوى.. مش ناقص غير اسطبل خيل ويبقى انا كده في رد قلبي حرفيا.

امي ابتهجت ومنعتها بالعافية من زغرودة مرعبه.. بابا كالعادة جامد الملامح.. خالي منفوخه ولا الديوك الرومي.. ماهو ده نقاوتها طبعاً.. وانا عاوز اعيط.. مجاش في بالي ساعتها الا مشهد نجيب الريحاني والباشا سليمان نجيب في فيلم غزل البنات.

استقبال يليق بأولاد الذوات.. البيت من جوا أثري فعلاً.. صور كبيره بالزيت لناس قديمة فحت لابسين الزي العسكري المميز لجيش عراقي.. بناطيل واسعه وصديري احمر عليه نياشين وزراير ذهبي لامعه وطرايش حمراء وماسكين سيوف وبنادق كوميدية الشكل.. صور ناس تانيه لابسه طرايش منفوخة ونظارات بعدسه واحده نازل منها سلسله.. صور ناس ثالثه شنباتها يقف عليها الصقر.. ستات لابسين الحجاب التركي القديم واليشمك.. كلام تحت كل صورة.. فلان بيه.. فلانة هانم وحاجات كده.. تليفون اثرى اسود قديم من أبو منافله في الجنب.. موبيليا فرنساوي "روكوكو" موديل 1920 فيها نقوش غائرة وبارزة كتير.. فازات سيفر ضخمة جدا من الى نابليون كان بيمضي.. عليها.. تاهت عينيها بين الصور على الحيطان لحد ما لقيت صورة واحد اعرفه كويس..

- بابا ... ده عبد العزيز باشا فهمي..
- ايوه هو.. ها ها ها "ضحكه رسمية اوى من بتوع يوسف بيه"

التفت بسرعه لمصدر الصوت.. ووقع نظري على راجل كباره اوى.. الصورة المثالية للباشا بتاع السينما.. حاجه كده خلصت من 900 سنة مثلاً.. ده بيقى أبو العروسة..

- اهلا يا.. أحمد.. صح؟
- ايوه حضرتك.. انا احمد.. "قدمته للعائلة" بابا.. ماما.. طنط
- اهلا وسهلاً.. شرفتونا.. انت تعرف عبد العزيز باشا يا أحمد؟
- ومين معرفوش حضرتك.. قاضى وسياسي فاضل.. من اقرب مساعدين سعد باشا.. الترام الارضي بتاع مدينة نصر.. متسمى على اسمه.
- ما شاء الله.. ولد مثقف.

توقعت ان الراجل هيضحك ويقول عفاريم.. حظرتنا مبسوط.. جوق جوزال.. بس محصلش طبعاً.. التصور ده جالي من قصر.. ضولمه بخشا الى انا واقف فيه ده.. اصلهم واضح انه تركي.. اهي دى مثلاً لما اتخانق معاها ممكن ابقى اقولها زى حافظ رضوان بتاع الشهد والدموع.. "بقولك ايه يا بنت التراكو.. مش انا الى يتقالي خد كيس الزبالة وانت نازل".. شوية ودخلت شغاله جايبه شاي وحركات.. عفوا.. دى مش شغالة.. دى اسمها كماريرا.. لو دى شغاله.. امال الولية ام السيد الى بتيجي لأبي البيت دى تبقى ايه؟

فاكرين فيلم قمر 14 بتاع كاميليا وحسن فايق؟

نفس المنظر بالظبط.. لو هي دى العروسة يبقى كده قشطة اوى.. كانت لابسه يوني فورم وعلى راسها حاجه كده بيضا عامله زى تاج العروسة وعلى وسطها زى مريلة مطبخ بيضاء برضه.. قدمت الشاي لأبي الأول وهي بتسألها كام قطعة سكر يا هانم.. ابي سمعت هانم من هنا وقلبت شيوه كار اوغلو لاطوغلو من هنا.. خالي قامت قالتلها عنك انتي يختي.. وانا وابويا متنحنين قصاص المزة.. انا كنت هقوم ابوس ايديها وهي بتصبلي الشاي في الفنجان.

للأمانة.. الراجل كان ودود ولطيف جداً.. أم العروسة كانت علوية جميل اوى في نفسها.. ست أرشانة بقوه.. لبسهم بسيط خالص بس الشياكة بتنط منه.. امها مش لابسه الا خاتم واحد.. بس تحفه وذوقه عالي اوى.

قضينا عندهم ساعه بالظبط.. حوار ملزق النشا بتنط منه.. انا طبعاً ساكت تماماً لأنني لو اتكلمت هتفضح فضيحة التنين.. انا بالنسبة للناس دى عريجي.. اللمي بيتكلم مع مريم فخر الدين مثلاً.

جدها المباشر لأبوها كان وزير الصحة وجدها المباشر لأمها كان وزير القوى العاملة.. ولا يهمني.. انا مش هفأ.. انا عندي واحد جاري امين شرطه اد الدنيا بيعرف يجيب الرخص المسحوبة من بق العو.

كمية لغات عماله تتحرك في القعدة بين ابويا وأمي والباشا ابو العروسة وامها.. انجليزي وفرنساوي وألماني.. اسامي مطربين ولا عمري سمعت عنهم.. انا خايف اقولهم اني بحب عبده الإسكندراني والتونسي الغمراوي احسن يقيموا عليا الحد.

انا كنت في وادي تاني خالص..

وهنا طلعت امي زى الصاروخ..

- ابوه يبني والله ما عملي فرح رغم انى كنت اجمل بنت في الحثة.. ضحك عليا وقالى بعد اسبوع ان عنده شغل في السد العالي وكل عليا فسحة شهر العسل.

واشتبكوا الاتنين في خناقة.. ابويا مصر.. انه فسحها في بلطيم.. وهى مصر.. انه وعدھا برأس البروان عربية الزفة كانت متأجرة والسواق كان محشش وهو يحلف انه ميعرفوش.

كده كويس جدا.. خلصت موقتا من الاتنين علشان عاوز افكر بجدا.

بعد يومين اتصلت بأبوها..

- سلام عليكم يا انكل.. انا احمد حسنى..
- اهلا احمد.. ازيك وازى بابا..
- الحمد لله.. ببسلم على حضرتك كتير.. يا تري في فرصه نتشرف ب حضرتك تاني؟
- قولى يا أحمد.. انتو من عائلة مين.. عصبك يعنى.. جدك.. اصلكوا.. فاهمنى طبعاً..
- مش عارف حضرتك.. هو انا اسمع ان جدي السابع كان من امراء المماليك.. وكان عنده ارض كبيره ومواشي وبيارات مية في شربين.. بابا معاه وسام السد العالي من عبد الناصر ونوط الشجاعة من الطبقة الثانية من السادات ومعاه كمان ميدالية حرب أكتوبر.. في عمى كمان الله يرحمه كان رائد طيار في اكتوبر 73 ومعاه نوط الشجاعة من الطبقة الأولى من السادات برضه.. بابا حاليا نائب وزير الكهرباء وانا زى ما حضرتك عارف.. اتخرجت بامتياز وبشتغل ف.....
- ممممم.. طيب انا هبقى اكلم والدك ان شاء الله.. خد بالك من نفسك.. مع السلامة

وقفل الخط..

طبعاً النتيجة مش محتاجه اى تعليق..

مش متفاجئ بس زعلان.. دماء الغضب فارت في دماغي بقوه.. اتصلت بخالتي افراغ فيها شحنة الغضب.. فوجئت انها بتقسم بالله العظيم انها قالتلهم كل ظروف بالتفصيل الممل وهما رحبوا وابوها قال بالنص كلکم لآدم وآدم من تراب.

- امال ايه بقى؟؟ التراب بتاعى معجبوش!!

- اديني يومين وانا هجيلك الخبر اليقين

يومين كاملين وانا بغلي.. ابويا حاسس بيا.. حب يهديني ويأخذ بخاطري..

- ليس المرء من قال هذا ابى.. انما المرء من قال ها انا ذا
- بس يا حاج الله يكرم اصلك.. بلا انا ذا بلا انا هذه
- يا ابني عادى جدا.. ياما هتقابل.. من اول الم كده هتعمل فيها جعلوني مجرماً!!
- انا مش زعلان انه رفضني.. انا مضايق من الاسلوب وطريقة التفكير.. المستوى الاجتماعي بييجى من التعليم.. انا مؤهل عالي وابويا وأمي وأخواتي مؤهلات عليا.. طيب ايه بقى.. ازاي يحاسبني على حاجه بره ايدى.. ذنبي ايه ان ابوك مكانش باشا؟ ايه الغلط الى انا عملته؟
- وخلقنا بعضكم فوق بعض درجات يا احمد.. الحياه ليست عادلة

انا عارف الكلام ده طبعاً.. بس مقدرتش اسيطر على إحساس الغيظ جوايا.

خالتي جابتلى المفيد.. البنت سلبية الحسب والنسب كانت حاطه عينها على واحد معين عندهم في البلد من نفس طبقته.. حبت تغلفله شويه فكانت زياتي ليههم علشان هو يشوف ان العرسان بدأن تيجي وتروح عليهم فيتحرك ويروح يطلبها.. في المدن الصغيرة دى.. الاخبار دى بتتحرك اسرع من الصاروخ.

بدون الدخول في تفاصيل كثير بعد أسبوع واحد من زيارتي كانت مخطوبة لصاحبنا إياه.. يعنى انا كنت مجرد كوبري مش أكثر.. اسفخص على دى اخلاق.

مقدرتش امسك نفسي من الغيظ.. كلمت الرجل المفروض علشان اباركه..

- سلام عليكم يا انكل.. الف مبروك.. أتمناها حياه سعيدة
- عقبالك يا احمد.. معلش الجواز قسمه ونصيب.
- صحيح.. قسمه ونصيب.. قد اكون مش سليل عائلات عريقة زيكم ولا امتلك من المال الى يغريك انك تناسيني.. لكى امتلك من قوة النفس ما يجعلني متأكد ان فيوم من الايام هكون اسعد منكوا وامتلك من الشجاعة ما يجعلني اقولك انك راجل واطي.. ابن باشوات اه.. بس واطي.. نفسك وضيعه علشان قبلت تستخدم انسان برئ طلب نسيك كطعم تجيب بيه عرس علشان بتتك البايه..

طراااااااااخ

ورجت هابد السماعه..

مشهد سينمائي تماماً.. الجلالة اخدتني اوى.. كنت شبه حسين صديقي وانا بقول الجملة كلها فى نفس واحد بغضب مهذب ولغة شبه فصيحى..

دلوقتي بضحك من قلبي على منظري وقتها.. وبضحك كمان لأن ربنا كان شايللي الأفضل في كل شيء..

بضحك لأن اللى خدها عمره ما هيكون سعيد زى ابدأ دلوقتى..

عرفت منین؟

هو اصلا في ست في الكون زي ام حمزه!!!

الفلاحة

قريت مره نكتة عن طالب مش شايف من الحياة الا حيوان الجمل.. كل ما يتسأل سؤال.. لازم الإجابة تكون عن الجمل.. يسألوه مثلاً مين هو ملك الغابة.. فيقول الأسد.. والأسد يختلف عن الجمل.. والجمل حيوان صحراوي له القدرة على تحمل العطش.. ما هي الصحراء؟ الصحراء كذا وكذا.. وفيها الجمل سفينة الصحراء.. والجمل حيوان صحراوي له القدرة على تحمل العطش.. ما هو الحاسب الآلي؟ هو اله لها القدرة على كذا وكذا يلعبونها بسفينة المعرفة.. لكن سفينة الصحراء هو الجمل.. والجمل حيوان صحراوي له القدرة على تحمل العطش.. وهكذا الى مالا نهاية.. لازم كل جملة يقولها الواد تنتهي بالجمل..

نكتة سخيفة.. مش كده؟

ابدا.. دى مش نكتة خالص.

أمي كانت إمراة عاملة في التربية والتعليم.. لما شفت امي وزمايلها في الشغل اخدت قرار حاسم الصارم بأنه لا لعمل للمرأة ابدا ولو كان فيه انقاذ للكوكب من فناء محقق.. قعدة الفطار ولمة المكتبة وحكاوي ابله فلانة ومدام علانه كفيلة انها تنزل بالدول من قمة سلم التطور الى حضبيض المعاناة.. ستات مفيش وراهم الا اللت والعجن في منظومة شديدة التهالك.. فكرك يعني ممكن يقعدوا يتكلموا في المدرسة في ايه غير عن عروسة لابن ابله فلانه وجوازة بنت ابله ترتانه وابلة بتتجانن نفسها الى اتطلقت ومش عارفه تاخذ القايمة؟

في احد ايام الصيف البشعة جالي تليفون من أمي:

- اسكت يا واد يا أحمد.. اخيرا لقيت طلبك
- خير يا مه.. طالما قلتي يا أحمد يبقى اكيد في مصيبة.. في العاده بتقولي يا مخفى.
- لا لا.. متقولش بقي.. عروسة نقاوة.. طول بعرض بحلاوة.. لا وايه.. ساكنين جمينا علطول.. يعنى بلاها شحططة كل مره دى.
- يا مسهل التساهيل.. خلاص.. نروح الخميس ان شاء الله

بالإضافة الى تورزاية لابوار الرخمة.. المره دى كمان جبت ورد بناء على نصيحة اختي.. يصح برضه نميزهم شويه لأنهم جيران.. أمي قالت لو العروسة دى فاتتني.. يبقى انا الخسران.. أمي ست صعبه جدا.. علشان تقول على بنت انها حلوه.. يبقى لازم تكون البنت دى على مستوى هند رستم او مارلين مونرو او هياتم.. بس من امتي الجواز بالحالة؟

ليسانس آداب.. بتشتغل بس عاوزة في البيت.. سن مناسب.. ابوها من العائدين حديثاً الى مصر بعد 20 سنة في الخارج.. وحيدة على 3 شباب.. هي من طبقة تشبهي.. كويس.. هنعرف نتكلم معاهم وهكسب 3 اخوات جداد.

جميل.

شكلي شديد البلاهة بالورد الى انا شايله ده.. انا احب الورد جدا بس وهو في مكانه.. مش مقتنع ان محن البنات سبب كافي علشان يحرمنا من النباتات الرائعة دى.. بأمارة ايه انا اقطف وردة مزهره جميلة عطرة الرائحة بتدى بهجة في اى مكان تكون فيه علشان واحدة تتبسط كام ثانية؟

ابو البنت يبدو رجل طيب رغم صغر سنه.. امها من النوع الى شايف في حلة المحشئ شفاء من كل داء.. النوع فارغ الرأس تماما من أى شيء.. اخوات العروسة عيال حلوة كده وشعبيين.. من النوع الى يبقي صاحبك بعد اول سلام.. حسيت انى على راحتي في بيتهم.. انطباع أولى كويس ومريح.

العروسة نفسها حلوه وفرفوشه.. تضحك كالضبايع بلا انقطاع بدون سخافة ولا نظرف.. كويس.. تضحك احسن ما تعيط.

بعد ساعه من الدردشة في شعور عام بالقبول بين الطرفين.

ايه ده.. معقول.. هتظبط اخيراً من غير خوازيق؟

طبيعي بعد اول زياره يحصل مكالمات بين الأمهات لجس النبض وتبادل بعض المعلومات عن الطرفين مع تحفظ كل طرف فيهم على اظهار نفسه في المظهر المثالي ذو الاخلاق عديم الفلوس.. احنا ثروتنا في الدنيا أدبنا والكلام ده.

زياره كمان في صحبة السيد الوالد علشان الرجالة تقعد مع بعض والستات تقعد مع بعض وانا والعروسة في البلكونة.. حاجه كده زى فؤاد المهندس في عائلة زيزي.. الجو هنا حر اوى يا جماعة.. طيب اتفضل في البلكونة.. الحقيقة انى كنت عاوز ادخن.. مقدرش ادخن قصاص ابويا طبعا.. محاولات متفرقه منى لفرض السيطرة في البلكونة من بدري.. البنت مش محتاجه.. عندها هدف محدداه من بدري.. البنت دى عايزه بيت وأسرة.. اغلب ردودها مريحة جدا.. كلمة حاضر حلوة اوى.. وبتريح.

يحضرلك الخير يا عسل.. الى اوله اتفاق.. اخره فل ان شاء الله.

انتهت الزيارة بدون أى مشاكل غير استعراض امي كل شويه ان العروسة دى نقاوتها.. بمعدل كل كلمتين تفكرني انها اختارتلى العروسة دى لحد ما كنت هرمى على البنت يمين الطلاق علشان اخلص من الذل الازلي ده.

ثم كانت الزيارة الثالثة.. او كما قال كارل ماركس..

أوعى الفحت.

المفروض انى رايح مع اهلي علشان نطلب البنت.. كل حاجه ماشية زى ما الكتاب بيقول اهو.. المفروض نروح نتفق على التفاصيل علشان القبول يتحول الى مشروع زواج.. بعض الناس يفضل الخطوبة الطويلة.. بعضهم يرفض الخطوبة ويكتب الكتاب علطول.. وبعضهم زى حالتي كده يفضل اخف انواع الارتباط لحد ما يتأكد كل طرف هو عايز ايه وبعدها كل حاجه تخلص في اسبوع.

سألت ابو العروسة..

- تفضل ايه حضرتك؟
- احنا بنشترى راجل لبنتنا يا ابني.. كل التفاصيل دى مش مهمه.
- (محدثا نفسي) بنشترى راجل.. اهلاً.. عارف انا الفيلم ده..
- شوف يا ابني.. انت قولى تقدر تعمل ايه وان شاء الله مفيش اى مشاكل..
- طيب يا عى.. ان شاء الله نقرأ الفاتحة وبعد 6 شهور تكون الشقة جهزت.. ننزل نجيب الشبكة ونكتب ونقيم الافراح والليالي الملاح وكل ده.
- طيب مش لما نتفق يبني؟
- تحت امرك يا حاج.. أوامرني
- الأمر لله.. نعرف بس الاول هتجيب الثلاثه بكام والبوتاجاز بكام والنجفة بكام.
- دى مرحله لاحقه يا حاج.. الاول نشوف الاطار العريض للموضوع لأن الكلام ده مش هيخلص في قعده وانا داخل خارج عليكوا.. لازم يبقى في شكل رسمي لدخولي وخروجي.. حضرتك موافقنى على الفاتحة الاول وللا؟
- اوافق ازاي من غير ما اعرف العفش بكام والقايمة بكام؟
- اه.. انت كده مش فاهمنى

كررت الحوار تانى للرجل بأكثر من طريقة.. حددت خطوات الزواج كله كالآتي:

الفاتحة- توضيب الشقة - الشبكة - الفرش - كتب الكتاب - الفرح

6 مواضيع ينبغي الاتفاق عليها تفاصيلها.. حاولت اخدهم مع الراجل من الأول للآخر.. وكان رده كالتالى:

- انت مستعجل ليه على الفاتحة.. مش لما نشوف الأجهزة هتجيبها ازاي ومنين.. ينفع مثلا تجيبلى ثلاجة باب واحد وتقولي نكتب الكتاب؟؟
- يا حاج.. الثلاجة دورها في الخطوة رقم 4.. انا بكلمك في الخطوة رقم 1 لسه
- وهو بيبي ينفع نروح 4 من غير ما نعدى على 1؟؟
- لا طبعاً.. علشان كده بقولك نتفق على اول خطوه وبعد كده الثانية ثم الثالثة ثم الثلاجة وهلم جراً
- طيب.. قولي الأول.. انت قدرتك في الأجهزة اديه؟؟ يعني تقدر تجيب ثلاجه 16 قدم مثلاً؟؟
- نهار اسود عليا وعلى اللى جابوني.. يا حاج الثلاجة عندي فعلاً بكونتها.. أمريكاني وفيها "ICE MAKER" كمان.. انسى الثلاجة شويه ابوس ايدك.
- ايه ... يعني مش هختار ثلاجة بنتي؟؟
- لا يا حاج.. انا اخترتها فعلاً.. دى اغلى حاجه في السوق والله.. قولي بقى.. تحب نجيب ايه علشان قراءة الفاتحة؟؟

الرجل مش بيرد..

اكلمه.. اشاورله.. اصرخ حتى في وشه..

وده جثة صامته.. جسد مستكين زى التماثيل.. لا حراك ولا نفس..

- يا حاج.. انت سامعني؟

وهنا رفع الرجل وشه تجاهي ببطء.. علشان اتصدم صدمة جبارة..

يا دبن النبي.. ايه اللى انا شايفه ده!!

ايه كم الحزن والبؤس والكآبة دى كلها!!

الراجل مش حزين.. الراجل عبارة عن لوحة للحزن نفسه.. المادة الخام للحزن.. الحزن النقي الخالص..

اتهزيت لثواني.. هو انا عكيت وللا ايه!!

بكلمات تقطر الم ومرارة وحزن.. رد عليا..

- عايز ايه منى يا ابني؟؟

- عاوز اعرف موقفك.. هنقرأ الفاتحة وللا هنعمل ايه؟

- انت لخبطني يا ابني.. انا طول عمري بحلم انزل اشترى حاجة بنتي.. جهازها.. فستانها.. ثلاجتها.. زى اى اب في الدنيا.. بحلم اخد بنتى من ايديها و الف معاها في الاسواق.. تختار وتتفرج.. تفرح بنفسها وافرح بيها.. دى بنتى الوحيدة.. تقوم انت تيجي بكل بساطه عاوز تحرميني من فرحتي؟؟ طب انا اقولك ايه؟؟

أحرمك!!

هو في ايه؟؟

الراجل ده لا يمكن يكون بيتكلم جد؟؟ الى بيقوله ده ملوش معنى الا انا غلطت مع بنته وجاى اصلح غلطتي..

لك ان تتخيل طريقته وهو بيتكلم.. صوت متهدج ومشاعر صادقه بشده.. الراجل شديد الجدية.. مشهد ميقدرش عليه حسين رياض في عز مجده.. عبد الوارث عسر بكل كآبته وانكساره هيقف منبهر قصاص المشهد ده.. زكي رستم لو شاف الراجل ده ممكن يقعد على جمب ويعيط من كثر الحسد.. انا لساني معقود تماما عن الرد.. مش لاقى حاجه اقولها لأني مش متصور انه فعلاً جاد.

على طريقة خدمة العملاء.. قررت اعمل "Restart" للكلام.. جازي انا كنت متسرع شوية.. او جازي الثلاجة بتاعتى مش عاجباه.

- ما عاش ولا كان اللى يزعلك يا عمي.. انسى الثلاجة.. هديها لأمي.. اعتبر كلاي كأنه لم يكن.. انت أوامرنى.. تحب نمشي موضوع الجواز ازاي؟

- زى كل الناس يا ابني.. قولي امكانياتك وانا اشوف اقدر اساعدك ازاي وربنا يسهل.. الفلوس اخر حاجه نفكر فيها.

- طيب يا حاج.. انا هجيب هديه لقراءة الفاتحة.. 6 شهور اخلص فيهم الشقة بعدها نشترى الشبكة.. وفي الفرش انا مستعد افرش كل حاجه.. خلى التقييل عليا والخفيف عليك لو حبيت.. او متساهمش معايا من اصله.. مفيش مشكلة.. انا كده كده مش بكتب قائمة والكلام الفارغ ده.. المؤخر هيبقي احسن من كل بنات عائلتها والفرح هديه من ابويا.. ها.. كلامك ايه؟؟
- يعنى ايه الفرش التقييل عليك.. مش تقولي تفاصيل.. يعنى هتروح تجيبلى ثلاجه ايدىال باب واحد وتقولي هي دي وخلاص؟؟
- الثلاجة.. تاني!!!
- ايوه امال ايه.. الثلاجة روح البيت.
- طيب يا حاج.. انا عندي طيارة بكره بدرى.. هضطر استأذن.. انا تحت أمرك في أى وقت.. وموافق على طلبات حضرتك.. شوف عاوز تجيب الثلاجة منين وتحت امرك.. سلام عليكم.

خرجت من عند الراجل ومفيش في دماغي الا الجمل حيوان صحراوي له القدرة على تحمل العطش.

نهاية الحكاية لحد هنا قد تبدو منطقيه في نظر البعض.. اختلاف تفكير واضح بيني وبين رب الاسرة.. مش لازم كل مره الامور تنتهى باهانة وأزمه.. مش كده..

الحقيقة لأ.

انا كملت مع الناس دي اكر من 6 شهور كمان.. مقدرش اخاطر بسمعتي في بلدنا.. الثلاجة سبب غير كافي ابداء لإنهاء مشروع زواج.. مش هلاق حد يفهم ان ده اختلاف في طرق التفكير.. الناس مسطحه وبتردد وخلاص.. هتلاقى الي يقولك معلىش.. اصبر وطول بالك وهو نفسه مش طويل البال.. وهتلاقى الي تقول العريس شكله بخيل وعاوز بنت الناس بلوشي.. اى كلام خايب.. والناس دايمًا بتحب الهري والشائعات.

الصبر يلزم.. علشان سمعتي اولاً..

في زيارات لاحقة حاولت كثير افتح مع الرجل حوارات مختلفة لزوم التودد وذوبان الثلج وكده.. حاولت اتكلم معاه عن نظرتي للزواج.. الرباط المقدس.. مستقبلي مع بنت الحلال.. الماجستير الى هالكنى.. تطلعاني للهجرة.. أحلامي بالنسبة للأطفال.. مغامراتي وشقاوتي.

وبمعجزه الهية.. دائما تنتهى كل فقره في الحوار بالعودة الى نقطة الصفر..

الثلاجة..

ازاى.. معرفش..

احكيه عن عيشة العزوبية.. الاقي الحوار انتهى بالحديث عن ثلاجة شقتي في القاهرة وازاى انا قادر أعيش بثلاجة صغيرة زى دي.

- سافرت أوروبا يا حاج؟؟

- اه.. سافرت مرتين في الشتاء.. الجو هناك برد اوى مش محتاج اى ثلاجات الصراحة رغم ان عندهم أنواع كثير اوى.

بلاش أوروبا.. امشى يا أوروبا.. نتكلم عن الصيف وحرارته المرعبة وتغير الطقس بسبب المصانع وقطع الأشجار وسوء سلوكيات الناس..

- الصيف في مصر رهيب والرطوبة مرعبة حاجه صعبه يا حاج والله.. ربنا يخفف عننا..

- اى والله يا ابني.. المفروض الحكومة تحط ثلاجات ميه في الشوارع.. انت تعرف في كام نوع ثلاجات في العالم؟؟

ثلاجات.. تاني!!!

بس ماشى.. انا معاك للآخر يا عم الحاج..

- تعرف فلان يا حاج؟؟ الله يرحمه.. مات اول امبارح
- لا اله الا الله.. ده كان صديقي من زمان.. لازم نروح نعزي ونعمله حاجه لله.. نخط ثلاثه مية صدقة على روحه.. انا اعرف معرض كويس اوى ممكن يعملنا خصم كويس.. انا لسه مركب ثلاثه زى دى تحت البيت هنا.. تعرف جبتها بكام؟؟

وهكذا.. مفيش موضوع في الدنيا.. الا ويقلب معاه عن الثلاثات.

لما لقيت مدخله هو الثلاثه اقنعتته اننا ننزل نتفرج عليها هي اول حاجه قبل اى اتفاق.. قبل الشبكة حتى.. انا حاسس ان قلبي هيقف من الراجل ده.. لكنى صبور صبر الجمل.

وعلى فكره.. الجمل حيوان صحراوي له القدرة على تحمل العطش.

في اليوم المقرر.. الراجل ومراته وبنته واخواتها منتظرينى انا وابويا وامي علشان ننزل كلنا مع بعض ونروح "نتفرج" على موديلات الثلاثات في السوق.

بس نتفرج!!

طبعاً لم اجرؤ انى اقول لأبويا الكلام ده.. فنزلت مع الرجل واسرته لوحدي.. وكانت المفاجأة..

الراجل فعلاً خير في الثلاثات وما شابهها.. بيفقد وعيه في قسم الثلاثات في اى معرض.. بشر الدنيا كلها على وشه بمجرد دخول معرض الاجهزة الكهربائية عموماً وقسم الثلاثات خصوصاً.. وانا بتفرج ومش مصدق نفسى..

الرجل مفتون بما يرى.. استله شديدة العمق عن كل تفاصيل الثلاثات..

حاولت اتعامل مع الواقع واخلي الزيارة ذات قيمة.. ناخذ فكره عن كل الأجهزة والمفروشات بالمرة..

وكانت الصدمة الأكثر قوة..

الراجل رد عليا بنبره بطيئة وكأنه استيفان روسى في دور اليهودي الناصح..

- لا يا ابو حميد.. الزيارة دى للثلاثة.. انا احب ان كل حاجه تاخذ حقها.. بكره ننزل نشوف التلفزيونات ومرة تانيه للأنتريه وهكذا

يا نهالار..

4 ساعات بنلف علشان الثلاثه بس.. مجرد جمع معلومات.. امال البوتاجاز هياخد وقت اد ايه.. اوضة النوم.. المطبخ؟؟

3 اسابيع علشان الراجل يقرر هنبدأ ازاى.. هو بالفعل موافق على شخصي لبنته.. لكن عاوز كل حاجه تاخذ حقها..

- معنى كده ان فرش الشقة ممكن ياخذ من سنتين الى ثلاثة.. مش كده يا عمي؟

- وماله يا ابني.. هو احنا ورانا حاجه.. ده جواز مش لعبه.

ركزت في ملامح وشه.. بحاول اخدع نفسى والاقى اى تفصيله تقول ان الرجل بيهزر او بيختبر صبري مثلاً.. بس للأسف لا..

الرجل بيتكلم جد اوى..

هذا رجل يعانى من التردد.. بينما انا راجل "Hyper Active".. معنى كده ان الحياه بيني وبينه هتبقى جحيم..

لا يا حاج.. انا راجل ضغطى بيعلى..

وكان القرار الحاسم.

- فاكّر البنت بتاعة الثلاثة؟؟
- اه.. ياااااااااااااااا... ههههههههههههه.. هما لسه عايشين؟
- اتخطبت امبارح

شريعة أوى أوى

عندي حكيتين.. حكاية فرعية وحكاية أساسية..

(بداية الحكاية الفرعية)

عندي صديق مفترى جدا في موضوع الحريم ده.. مفلحش في اى حاجه في حياته الا النسوان وما يخصهم.. لا عرف ينجح بتقدير ولا عرف يشتغل شغل كويس.. لا عرف يبني علاقة جيدة مع ربنا ولا عرف يكف اذاه عن الخلق.. كل موضوع يدخله لازم يخرج منه بمصيبة.. تقعد معاه تنسى الوقت من حكاويه وكم المغامرات اللي عاشها.. مفيش اى حاجه حقق فيها نجاح الا شقط النسوان.. حتى لما قرر يشتغل.. فتح محل اكسسوارات وأي كلام حريمي كان الشقط فيه للركب.. طواير النسوان "لحد النهارده" قصاده بالمثلثات.. رغم انهن عارفين انه ميملاش عينه غير التراب ورغم ان قصص ضحاياه معروفة للكوكب كله ورغم ان كله واحده منهم بتبدأ معاه وهى عارفه ان اخرها شهر او اثنين بالكثير اوى.. ومع ذلك الداخل عنده اكر من الخارج بكثير اوى.. اخر ما ابوه غلب منه - وكان رجل امام مسجد - طرده من البيت.. اى واحده تعدى من شارعهم بس.. يبقى بتغامر بسمعتها للأبد.

ورغم كده البنات دايمًا بتجرى وراه.. سمعته أذفت من الزفت ولا يعرف من الدنيا الا السيكو سيكو.. جميلات البلد فشلوا في تحريك اى مشاعر رومانسية في قلبه الميت.. اقوى مشاهد الرومانسية في العالم لا يحرك فيه الا الغريزة الحيوانية.. الست في نظره خلقت لشيء واحد بس.

- طيب ما تتجوز يا بنى؟؟
- اتجوز مين وللا مين يا جدع.. اتجوز الطويلة؟؟ طيب القصيرة المدملكة دى اسيبها لمين؟؟ اخد البيضاء؟؟ طيب الشوكولاتة مين ياكلها غيرى.. اخد الرفيعة؟؟ طيب وكاملة الدسم دى.. بدمتك مش حرام اسيبها؟؟ دى المية متفوتش على عطشان يا جدع.
- هو انت يعنى لازم تعدى على نسوان الارض كلهم؟؟
- هو مش ربنا خلق الجمال علشان نتمتع بيه.. ادبي بكافح اهو.

و تنتهى حواراتنا دايمًا بتريدى مثل امي كانت دايمًا تقولهلولى وانا مسافر علشان تحذرنى من بنات البندر.. الحجر الداير لابد عن لظه "بتشديد الطاء".. والى يعمل البنات تجارته يا خسارته يا احمد.. وكالعاده صديقي يسخر منى ومن محاولتي الالتزام.. هو شايفنى قفل وانا شايقه فلاقي.. جمعت بينا جيرة المنطقة وزمالة الثانوية الحربية ولم تفرقنا خصاله السيئه فيما يتعلق بالمرأة.

ايام المدرسة.. كنا نقضى الاسبوع كله تدريبات وجرى ونط واختراق ضاحية وبلاوى زرقاء وهو دايمًا مزوغ.. معاه صور او افلام او ما شابه.. انا كنت بستغرب جدا.. كل ده وهما أساسا فى المدرسة كانوا بيحطولنا على الفول فى الفطار زيت سم هاري ملعون بيقيضى على اى عاطفه فى قلب اتخن رجل.. زيت يحولك من ثور احمر ناري الى ورقة خس.

امال من غير الزيت ده كان بقى الموقف ايه؟؟

فى احد الأيام كنت سهران عنده فى البيت وعرفت انه على معاد مع صديقه محترمه وشريفة.. خدت بعضي.. ونزلت من البيت تفاديا لأى باب يدخل منه الحرام لأنى كنت ماسك نفسى.. بالعافية.. قابلتها على سلم بيتهم.. يا بنت الايه.. صاروخ.. طيب مش خساره كده؟؟

سبحان الله.. أعطاها الله جمالا تتمنى اخريات اقل من ربعه.. وهى اهانتته بالعط.. له فى خلقه شئون.

نزلت من عنده وانا وداني حمراء زى الجمر.. مفيش حل للحالة دى من الحراك الثوري فى داخلي الا كيلو كبدة ومخ من عند الشرقاوي.. انا بعدهم زى القتل.

(نهاية الحكاية الفرعية)

(بداية الحكاية الأساسية)

جدى عرف ان امي بترتب علشان عيد ميلادي ال 28.. افكرني فجأة.. هو كان انشغل عنى كام سنة كده جوز فيهم ولاد خالتي الأربعة.. كان فاكرني خلفت.. اتصدم صدمة عمره وهو بيعرف ان الاحتفال ده علشان عيد ميلاد انا مش عيد ميلادي ابني مثلا.

- 28 سنه ولسه صايح؟ ايه قلة الادب دى.. انت يا واد انت محدش عارف يلمك؟
- وانا مالي يا معلم جدى.. ماهو انتو الى مش عارفين تجوزوني.. انا مش فاضي للعك بتاع الحريم ده.. بقى بدمتك اسيب الماجستير واقعد أتكلم في النيش والملايات والكوبايات.. يا راجل بلا لعب عيال.
- هتتجوز ورجلك فوق رقبته.. من يومك وانت طالع لخالك عيل بايظ.. اسفخص عليك وعليه "خالي وقتها كان لواء بوليس".. زى ما جوزته ولميته من حياة المسخرة الى كان فيها.. هلمك انت كمان علشان تبقى بنى ادم.. الأول كنت بتتججج بالكلية ومعرفش ايه امتحانات وكلام فاضي.. حجتك ايه دلوقتي غير ان الحرام عجبك؟
- حرام ايه يا جدى!! هو انا بحضر ماجستير في طريقة صنع البيرة!!!
- شوف.. انا مش عايز كتر كلام الا وديني انت عارف.. هي كلمة واحدة.. هتتجوز الشهر ده يعنى هتتجوز الشهر ده.
- ماشى يا حاج.. انا رهن اشارتك اهو زى خروف الضحية.. شاور انت بس.

الكلام ده معناه ان جدى مدكن حاجه.. جدى نشن.. جدى قرر.. ربنا يستر.. ربنا يعوض في ال 300 جنيه بتوع لابوار.

من كتر الى شفته مبيقتش اهتم بالمقدمات من نوعية اهلها ناس طيبين والبنات فلقة قمر وعروسة ب 3 عيون والكلام ده.. اكتشفت بالتجربة ان كل الناس في - الموضوع ده - كذايين.. الناس بترشح دايمًا الأكبر سنًا باعتبار انها قربت تخرج من السبق خلاص.. الناس بتتعامل مع الجواز للبنات انه احسان او مكافأة.. انت كراجل بره حساباتهم خالص.. طلباتك ومواصفاتك مش مهم.. الجواز في مصر- معمول علشان الستات أولا وأخيرًا.. هما شايفينك خروف عنده زريبة ومعاه حزميتين برسيم.. يلزما نشوفله نعجة تاكل منه حزمة ونص.. انا اسف لقسوة التشبيه.. بس لو عندك تشبيه تانى يوصف الواقع مش المفروض.. شاركني بيه.

اذن هي انثى في سن التخصيب.. بنت اصل وحسب ونسب وفلقة قمر ومتعلمه واى هري.. كل ده مش عاوز اعرفه.. انا عاوز اعرف المستخبي.. الخوازيق.. مش عاوز حد يقولي مواصفات الزوجة المثالية نقلا عن ابن خلدون ولا ابن كثير.. انا عايز حد يقولي الحقيقة زى ما هي.

واسطة الخير "كما تدعى" او رسول ابليس "كما اسميها" استفاضت في وصف اخلاقيات العروسة وأهلها.. البنات زى السيف.. محببة وبتمشي.. زى الألف.. زهرة بنات المنطقة.. الأدب كله والاحترام كله.. طالعة لأمها الى كانت عسكري الكلية زمان وزمايلها كانوا مسميها الشاويش وفاء.

عينيا بتلف في ارجاء البيت.. حاسس انه مصطنع بشده.. كل حاجه تبدو باهتمام اكثر مما تتحمله الأمور.. مش طبيعي ابدأ ان كل مسطح في البيت عليه فازه فيها ورد جديد.. مش طبيعي صوت الموسيقى الهادي ده.. في واجهة البيت في لوحه تحفه من لوحات مونييه.. تقليد طبعًا.. لكن مين في طنطا يعرف مونييه ولا مؤاخذه؟؟

ابوها رجل مثير للاهتمام.. متحجر العقل بصوره تفوق كل خيال.. صلب وعنيد جدا.. قبضة حديد مرعبة على البيت كله.. 3 بنات وامهم نظراتهم فيها من الرهبة اكثر ما فيها من المحبة والاحترام.. معجبينش الحقيقة.. الراجل الى يخوف اهل بيته.. يبقى بلطجي مش راجل.. يبدو انه يشغل منصب حساس في شركة ما او في الحكومة.. لهجته الآمرة بتقول انه اتعود على القاء الأوامر دون معارضة.. هذا الرجل ولا شك.. ظابط جيش ذو رتبة كبيره.. وصدق حدسي.. لواء جيش متقاعد.. سبب مبدئي كويس للرفض.

كون الرجل من متحجري الرؤوس لا يعنى ابدأ انه منعدم الذوق او جلياط.. الاستقبال كان فوق الممتاز.. ترحاب غير عادى وكرم ضيافة فوق الوصف.. لو ربطت الكلام ده بتلميحات الام شديدة المرح وخفة الدم اقدر أقول ان تحت تراب الرعب الظاهر على الوجوه ده في دلح وهيء وهيء يستعد للانطلاق..

هنشوف.

دخلت علينا العروسة.. دائما وايدا اذا كنت في زياره لببت غريب.. او بيت انا مش من محارمه.. اقعد وظهري الى باب الأوضة او في عكس زاوية رؤية ماهو خارج المكان المقرر الجلوس فيه.. ميصحش ابدأ الضيف يجرح أسرار البيوت.. حتى لو لم ينتبه أصحاب البيت.. يصح ان انت تاخذ بالك والا شبشب امي هيطرقع على قفاك زى ما حصل معايا قبل كده.

العروسة بتسلم على الناس.. وانا اتسلى بالنظر الى رباط جزمي لزوم الحياء وكده.. سمعت صوت امي يستحسن جمال العروسة.. عادى يعنى.. ماهو مش معقول تقولها ايه الوحاشة دى زى ما بيعملوا بسخافة مع حديثي الولادة.. نظراتي متسلله من تحت لتحت.. شايف جسم متناسق.. قشطة.. الشغل هيحلو.

ملل الدنيا وانا قاعد اسمع قرع النسوان على بعض.. يا اااااى.. يا اختى ما شاء الله.. ايه الحلاوة دى.. والله فكرتيني بشبابي.. ما شاء الله مكياجك خفيف خالص.. والنبي ما انتي محتاجاه.. ده انتي قمر وكمان ذوقك حلو لأن لون الطرحة ماشى مع خلفية الويندوز.. انتي دخلتي قلبي ... امممممووووا.

البنت مدياني ضهرها.. لو بصيت هبقى أبيح.. طب اعمل ايه والفضول مفرتكني.. قررت قتل الوقت بالصراع مع كوباية الشاي وطبق الكحك الى قصادي.. على ما يخلصوا السلامة الاونطا دى.. اكون ضربت كام كحكاية.. بفلوسي.. مانا دافع بقى.. امال التورتاية ام 300 جنيه دى تبقى ايه.

السلامات خلصت ونص الكحكاية في زورى.. التفتت البنت تسلم عليا.. رفعت نظري ابص في وش البنت وكح كح كح كح...
آآآتشوووووووووووووووو... كح كح كح كح

- لا اله الا الله.. اهدى يا احمد.. خد نفس عميق.. كوباية ميه يا جماعة
- انا - كح كح - كويس.. كح كح.. متقلقوش كح كح كح خالص.. يظهر حد بيحب كح كح في سيرتي.. كح كح كح كح كح كح كح كح
- اه.. معلىش يا ابني.. محدش بيسيب حد فحاله

متخيلين الى حصل؟؟

تمام زى ما وصل للبعض.. نفس البنت الى شفتها طالعها عن صاحبي الفلاقي بيته.. هي نفس البنت الى واقفه قصادي دلوقتي.. ربة الصون والعفاف بنت الراجل الغضنفر ابو شنب يقف عليه الصقر.. الرجل الى فاكر انه ماسك البيت بقبضه حديد.

يا خبر مش فايت!!!

اخر حاجه ممكن اتصورها ان البنت دى تطلع بنت الراجل ده.. يخرب عقلك راجل.. ده انت كان ناقص شويه وتقولي انهم مش بيتنفسوا الا بأوامرك.

البنت عرفتي طبعاً.. ده لسه الموضوع كان امبارح.. لونها اتغير لمدى لا تزيد عن زيكو ثانية بعدها وشها اتفرد عادى جدا.. سلمت وقعت جمب امها في مواجهتي علطول ولا كان في اى شيء.

يخرب بيت قوة الاعصاب.. ده انتي محترفه بقى؟؟

الله اعلم.. بس الستات عموما اعصابهن اقوى.. ايه اخري يعني.. هقول لأبوها؟؟ هتنكر ببساطة جدا واطلع انا الى وحش في الآخر.

نزل عليا سهم الله.. سكوت تاااام مع نظرات غاضبة من الى جاني هنا.. مجرد وجودي في البيت ده اهانه ليا ولسمعتي.. لا اسمح ابدأ ان اسمي يقترن باسم البنت دى ولو على سبيل الترشيح.

هخرج ازاى من الأزمة دى.. البنت اكيد مش هتسكت.. هيتعرف اني زرتهم في البيت ومش بعيد تقول انها هي اللي رفضتني.. كده هي ممكن تتخلص من تاريخها الأسود كله وتمسحه فيا.. فورة الشباب لازم تيجي على جمب ويحل محلها حكمة الشيوخ.

- الدنيا حر اوى يا جماعة.. هو اغسطس ده ملوش اهل يسأله عليه؟

- هي هي هي.. متقلقش يا عريس.. البلكونة جاهزة.. هي هي هي

- شوفي الواد.. ال حر ال.. عيال عايزه تهيص هي هي هي

نظرات رافضه من ابوها.. راجل ميعجبوش المسخرة دى طبعاً.. ازاي انفرد بالبنت في البلكونة في وجود اهلها.. وانا بيني وبين نفسي بقوله يا عم اتنيل بقي وخليك ساكت.

خرجنا فعلاً للبلكونة.. البنت صامتة صمت القبور.. انا مش عارف اقولها ايه ولا ادخلها من اى مدخل.. معتقدش ان الارهاب هياثر فيها والا كان ابوها فلح.. قررت ابقي مباشر اكتر من اللازم.

- بصي- يا بنت الناس.. انا لا شفتك ولا انتى شفيتنى.. هخرج من هنا ولا كانى جيت.. هيسألوني هقول مفيش نصيب.. هيسألوكى هتقولي نفس الكلام.. اسمى مش هيتردد في بيتكوا ولا بينك وبين صاحباتك ولا حتى في حلم من احلامك.
- لا من فضلك.. متفهمش غلط.. انا كنت طالعه عند واحده صاحبتى.
- من غير كذب.. البيت ده بيت عائلة واحدة.. وصاحبي ملوش اخوات بنات.. وخدى عندك كمان.. صورك موجوده في البيت عنده هناك.. صور ايه.. لووووووز.
- والله ابداء.. اكيد في تشابه.. اكيد انت غلطان.. انت فاكرني ايه؟
- انا لا فاكر ولا عايز افتكرك.. دي حياتك وانتي حره.. يهمني بس تعرفي ان البيت الى انتى دخلتيه ده دخلته قبلك عوشروميت مليار واحدة.. كلهم كانوا بيقلولوا زيك كده.. بيجبى وهيتجوزنى.. وبعضهن خرجت غير ما دخلت.. وبعضهن احترفت المهنة بعد كده.. عقلك في راسك بقي.. يهمني كمان ان اسمى ميجيش في اى حوار يخصك.. وانا من ناحيتي مش هفضح سترك أبدا في مقابل شرط واحد بس.
- ااااا.. شرط.. شرط ايه بقى ان شاء الله؟؟ (بلهجه ساخرة ذات مغزى)
- حاولى تبطلي.. مش هعمل فيها واعظ لأنى مش اهل للكلام ده.. بالعكس.. كتافي شايله بلاوى.. بس على الاقل هقولك اعتبرى الموقف ده علامة.. رسالة ربانية.. انتى عرضتي نفسك للأكل ببلاش.. بينما تمنك كان هيبقى غالى اوى لو التزمتي بالطريق السليم.. الى عاوزك هيجيلك لحد باب بيتك.. لو مشتاقه لوجود راجل في حياتك و ده من حقه.. يبقى لازم تعرفي ان الى بتعمله ده كآن واحد الصيام ارقه فقرر يبلع مية وهو بيتوضأ.. لا صح صيامه ولا المية شبعته.. ومنابوش من الليلة دى كلها الا الجوع والعطش.

انهيت الكلام والزيارة بسرعة على وعد كاذب بتكرارها.. وفضلت مشكلتي مع أهلي.

لازم سبب قوى اخلع بيه.. مش هفضح البنت بعد ما وعدتها بالستر.. ربنا حلها من عنده بسفريه شغل طويلة خارج مصر.. خلصت الحكاية لحد كده.. لكن فضل في ذهني مجموعة اسئلة بلا إجابات..

- ايه الموقف لو لم تكن الصدفة قادتني انى اشوف البنت في بيت صاحبي؟

كان زمني خروف فعلاً.. كنت اكلت بواقي صيد غيرى.. ما أقساه من موقف على رجل حر.. البنات هتضايق من التعبير اكيد.. بس الرجالة هتفههم كويس اوى معنى الارتباط بواحد لها ماضي.

- هل واسطة "الخير" كانت تعرف سلوك البنت المشين ده؟؟

مش قادر اصدق الصراحة ان البنت يكون لها باع في الشقاوة كده ومحدش يعرف عنها حاجه.. دى الواحده بتبقى ماشيه جمب الحيط وببطلع عليها كلام زفت.. مفيش حد بيقدر يخدع كل الناس كل الوقت زى ما علمنا دكتور نبيل فاروق.. البنات كالعادة هتهاجم المنطق وتقول ده مجتمع مريض يغفر للرجل زلاته ويطالب بإعدام المرأة على الخطيئة المشتركة..

والرد بسيط جدا على كل الهري ده..

لما يجيلك عريس فلا تي.. حقه تماماً انك تقولي لا.. خليه يدفع تمن العك عن طريق الارتباط بالعكاكه الى زيه.. مفيش اى مبرر يخلى حد ياكل في طبق لغوص فيه غيره.. متتنازليش عن طلبك وترجى تلومي المجتمع.. بس الحقيقة المرة ان النوعية دى بالذات من الرجالة هي الى بتعجب البنات.. الشاب المستقيم الأول على الدفعة عديم الخبرة بيبقى ترياه ومسخرة في مقابل العيل المسبب الكيوت الكوول.. وتلبسوا في الحيط وبعدين ترجعوا تعيطوا.. اصبحنا على يقين تام من سوء سمعة الراجل فينا اذا شكرت فيه النساء.

كلامي قاسى على البنات؟؟

فعلا.. بس حبيت يشوفوا النظرة الثانية.. الشوفينية مشكلة كبيرة عن الستات.. طالما هي شايقة كده يبقى الكوكب كله لازم يشوف كده.. معذره.. احب اقولك لا.. صراخك العالي ان الخطيئة مشتركة وان العقاب الإلهي للزاني والزانية واحد وان ده مجتمع يضطهد المرأة وكل البلح ده ملوش اى قيمة.. هو ده المجتمع وهى دى نظرتة لى تفرط فى نفسها.. انتى نفسك محدش هيقدر يجوزك بالغضب.. فكرك ان الراجل ممكن حد يفرض عليه واحدة بالعافية علشان حضرتك شايقة ان ده الصح؟

معذرة.. طظ فى وجهة نظر حضرتك..

درس كمان مهم جدا اخدته من الحكاية دى.. القهر والإرهاب والخوف عمرهم ابدأ ما يطلعوا ابن او بنت سوى مستقيم السلوك.. الى بيخاف تضربه النهارده بكرة يكبر وجسمه يقوى ومش بعيد هو الى يضربك.. واللى بتقهرها النهارده وتمنع عنها المصروف بكرة تكبر وميقاش لك عليها حكم.

ساعتها ابقى دور على ميتك تسخن..

رنت فى دماغى جملة قالها فؤاد المهندس فى اخر مشهد فى مسرحية سك على بناتك.. "انا رأيى نسك على بناتنا.. بس نديهم المفتاح".

ايوه.. هقفل على بنتى الف باب.. بس هديها الميدالية كلها.. هكون لها كل شىء قبل ما أكون اب.. هعلمها انها مش مفروض تغلط علشان ربها أولا وعلشان هي اكبر من الغلط نفسه.. هربيها على احترام نفسها أولا قبل احترام ابوها وامها والمجتمع.

طب لو كبرت وجالى حد فيوم يطلب ايديها؟؟

ليلة امه سوده.. ودينى لانفخه هو وأمه.. مش بعيد كمان اخد امه رهن.

فقت من تأملاتي على صوت امى فى العربية و احنا راجعين..

- البيت ممتاز والبنت مؤدبة ومحترمة اوى
- اه.. شريفه اوى اوى (بصوت مني زكى)

أمضى يا أشول

جدى بيتنطط تانى..

الراجل واحد موضوع جوازي ثار شخصي.. بيكلمني على أساس ان الناس اكلت وشه واني جيتله العار.. محسسى انى رجعتله ملفوف في ملاية مثلا.. كل كلامي معاه عن ضيق الوقت وزحمة الشغل غير مجدى.. المرة دى مليش حجة.. فلقة قمر اهى.. صاروخ نووي فقد التوجيه فضرب يمين وشمال وفرتك قلوب شباب البلد ووقفهم قصاد بيتها طواير..

- للدرجة دى يا جدى؟؟
- مش كده وبس يا صايح.. دول.. أسرة قوية وواصلين.. مش عارف هيوافقوا على واحد زيك ازاي.
- يا حبيبي يا جدى يا رافع معنوياتي.. بينا على هناك الخميس الجاي.

قبل يوم الخميس عدت على جدى في بيته.. ظاهريا عاوز اشكره.. بس في الحقيقة انا متلهف بشده علشان اشوف صورة الصاروخ الى بيحكوا عنه ده..

خلينا نتفق ان الناس بتبالغ..

وخلينا نتفق ان في حد مقبول من المبالغة..

وخلينا نتفق ان كبار السن بحكم السن فقدوا التمييز الدقيق للأمور فظهرت عندهم صيغ المبالغة بوضوح..

بس الى حصللى ده اسمه "تعريض" مش مبالغة..

اذا كانت الصورة دى يتقال عليها فلقة قمر والوصف الى سيب ركبي ده.. يبقى انا بكره هروح اغير المهنة في البطاقة واخلوها "سفاح بورسعيد" على اقل تقدير..

بكثير من المجاملة أقول انها عادية جدا.. الى خوفي انه لما الصورة كده.. وكلنا عارفين بيحصل ايه في صور البنات.. امال الحقيقة ايه؟

الحمد لله انى مؤمن ان الجواز مش بالجمال بس.. والجمال نفسه نسبي.. والا كنت عشت اعزب لحد يوم الناس هذا.

البنت فعلا سليمة اسرة قوية.. قوية مش عريقة.. بمعنى انهم مش أحفاد فلان باشا او إعلان بك.. لكن كلهم من ذوى المناصب المرموقة.. رئيس محكمة.. لواء شرطة.. عميد كلية.. وكلاء نيابة.. اسرة عمرها جيلين.. حاجه كده تخليك تتخيل ان الجيل الأول عندهم في حد منه أخذ فرصة وقدر يفلت من الطبقة الوسطى الى الطبقة الآمنة في مصر.. وهو ده الى جر الباقي وراه.. وبما انهم من المتوفية.. يبقى اقدر أتوقع ان الكلام ده حصل أيام السادات لما كان كل متطلبات دخول كلية الشرطة والانضمام لسلك القضاء ان مفتاح تليفون بيتك يبقى 048.

وفعلا.. الى حسبته لقيته.. مقالوش كده صراحة.. بس دفاعهم المستميت عن السادات وكون كبير عيلتهم لوحده هو الى مستشار وبعده انفتحت ماسورة الظباط وكلاء النيابة في الجيل الى بعده يجاوب على كل شيء.. للأمانة ملمحتش عندهم اى مظهر من مظاهر الفساد.. العيال دخلوا النيابة صحيح.. بس متخرجين بتقديرات تستحق.. الظباط شكلهم فعلا ظباط.. بقول آخر هما اسرة عصبانية استغلت نفوذ كبيرهم علشان تاخذ من الدنيا ما تستحقه.

جدى في ايدى اليمين وعلبة لابوار الخضراء في ايدى الشمال.. ثم الطريق الى عتليت.. او ما يساويها من مدن مصر.. الباجور.

بيت جميل واسع وانيق في غير اسراف.. بيت يصرح عن مكنون ساكنه.. ده راجل بيعرف يصرف ازاي.. قطع الموبيليا قليلة.. لكنها تحف.. الوان المنزل كثير.. لكنها متناسقة.. ده مش ذوق فلاحين ابداء.. واضح كمان ان الاسرة دى لم تكتفي بالمناصب القوية.. لا.. دول على قدر من الاطلاع والثقافة.. واكدي وجهة نظري مكتبة عملاقة تحتل اجمل واهم مكان في الصالة.. انا شفت المكتبة من هنا.. ووافقت على الجوازة من هنا.. انا لو طلعت من الجوازة دى بالمكتبة دى بس.. انا كده قشطة جدا.

ابوها نفس الصورة الى كنت راسمها بالظبط.. نظرات اسد منوفى عجوز.. عيون تليق برجل حفر الصخر علشان يوصل.. بعد 10 ثواني من كلامي معاه حسيت انه لو مقاش حمايا.. انا ممكن انتحر.

الطلة الاولى لام العروسة تقول انها حرياء لعينة.. كل اثر جميل سابه الراجل في نفسى- مسحته الولية دى باستيكة.. مثال حي للاستفزاز وقلة الذوق وانعدام اللياقة.. غباء وتسطيع ميطلعوش حتى من واحدة جاهلة.. به**يمة بترفص يمين وشمال بدون حسيب ولا رقيب.. سبحانك يا رب.. ازاي يجتمع ده مع دى في بيت واحد فوق الثلاثين سنة!!!

تكونش دى الخدمة مثلا؟

ما علينا..

عضلات رجليا ومفصل ركبتي صرخوا من الألم بعد الزيارة دى من كتر ما قمت وقعدت علشان اسلم على اللى داخل واللى خارج.. ايه كل الناس دى.. دول زى ما يكونوا قفلوا خلفهم على الصبيان بس.. وكل عيل فيهم خرج لقي منصبة مستنيه.. اسرة زى دى تخوف.. النهارده هما معايا وفرحانين بيا.. بكره لو حصل خلاف اقل حاجه هتلاقيني لابس قضية تجسس مثلا.

امتد الحوار بيني وبينهم ساعات.. هم اذكيا فعلا.. تعرضت لاختبارات قوية بدون اى سؤال مباشر.. وكلاء نيابة بحق وحقيق.. الدروشة الطنطاوية في مقابل الدهاء المنوفي.. طبيعي اني اخر قصادهم بكل شيء واجيب أخرى تماما.. مش غلط ومش وحش.. نقدر نعتبرها شفافية محبوبة.

معنديش ملاحظات على البنت نفسها الا انها رقيقة اوى بزيادة.. مقبولة الشكل نوعا.. وزنها في اقل احواله يا دوب 40 او 45 كيلو بالكثير.. وقتها انا كنت في حدود ال 135 كيلوجرام.. يعني صباح الفل.. ممكن افطر بيها وانا مش واخد بالي.

مع الزيارة الثانية تأكدت وجهة نظري عن الاسرة دي.

الاب هو مركز العقل والحكمة.. كلمات قليلة متنقيه.. رفض التعجيل بأى نوع من انواع الارتباط مع السماح بالتواصل بيني وبين البنت.. راجل ذكي وواقعي تماما.. عجبني اننا فهمنا بعض.. التواصل بينا كان سهل الحقيقة وانا حابب فعلا اكمل مع الراجل ده.. اكيد هتعلم منه كثير.. زيارات متبادلة ومشاكل وخلافات بدون اى ارتباط رسمي.. انا عارف كويس اني تحت الميكروسكوب.. علشان كده كنت بتصرف بطبيعتي تماما.

بعد 5 شهور بالطبط قرر رب الاسرة انه يعدى للمستوي الثاني.

مستوى الوحش.

كلمي ودعاني لزيارتهم.. كنت بحترمه قبل الزيارة دى وبعدها بقيت بحترمه اكثر لشدة صراحته ودخوله في الموضوع بدون لت ولا عجن.

- بص يا أبو حميد.. انا قلبي ارتاحلك وحييتك.. ولادي كمان حبوك.. لو معندكش مانع تناسبنا.. يبقى ده شيء يشرفنا.
- يا خبر يا عمي.. ده الشرف ليا.. ده انت لو كنت قتلتي معنديش بنات للجواز كنت خطفتها واتجوزتها من وراكوا وبعدين اجيلكوا شاييل كفي.
- يا ولد يا بكاش.. شاور اهلك وشوف عاوز تعمل ايه وقولي..
- انا اللى تحت امر حضرتك.. أوامر وانا موافق على كل شيء قبل ما اسمعه.. مهما كان انا الكسبان اكيد.
- معنديش طلبات يا ابني.. خد البنت وانزلوا اشتروا الشبكة اللى تعجبكوا.. وخد بالك علشان هي مبتعرفش تشتري ذهب.. خليك انت واعى.. جيت خاتم.. جيت كردان.. اهي البنت والشبكة هيبقوا عندك في البيت.. بعدها ابقوا شوفوا العفش اللى يعجبكم وهاتوه.. محدش هينزل معاكو ولا حد هيفرض عليكوا اى حاجه.. جبتوا اوضه.. جبتوا عشرة.. مليش فيه.. انت ولد كويس وانا مأمئلك.. اهتم بس بالكنية علشان هتنام عليها كثير.. انت وهي اتفقوا مع بعض.. ولو الفلوس قصرت معاك متقلقش خالص.. من غير ما تقولي حتى.. اعتبر اللى هتختاروه في بيتكوا فعلا.. اكتب اى مؤخر يعجبك.. والفرج هيبقى عندنا هنا في البيت وسط أهلنا.. اللى هنصرفه في قاعة ملهاش لزمة.. نعمل بيه وليمة كبيرة للناس ياكلوا ويدعولنا.. مليش غير طلب واحد بس لو وافقتني عليه يبقى من ذوقك واخلاقك.

الراجل اكثر جديه من عمر سليمان في حديثه عن التنجى.. انا كل ده مش مصدق.. عملت ايه انا علشان اكسب ثقته للدرجة دى؟؟

- لو حضرتك بتتكلم جد فى الى فات.. ابقى عبيط لو رفضتلك اى امر.
- مش امر يا ابنى.. انا بكرر.. هو طلب ورجاء.. البنات عندنا للبيت.. تخرج مره واحده بس من عصمة ابوها لعصمة جوزها.. مترجعش بيت ابوها الا بأذن جوزها وموافقته.. هى متصانة عندي زى ما نت شايف.. عاوز كلمة شرف منك انها تفضل متصانة.. مش هقولك اوعى تزعلها وكلام النسوان الخايب ده.. ازعلوا واتخانقوا وقطعوا بعض.. بس من غير اهانة.. ان حبيت عشرتها يبقي هاتولنا 5 او 6 وكلاء نيابة صغيرين.. وان كرهتها فأنا واثق ان اخلاقك هتمنعك انك تبهدلها.. ابقى رجعهالى يا ابنى وكتر الف خيرك وملناش عندك اى شيء.

انا متنج.. هو الراجل ده بيقول ايه!!

انا أساسا لو حاولت اقل عقلي معاها.. اصغر واحد في عيلتهم كفيل انه يرميني في المعتقل لحد يوم الدين.. الكلام ده مقصود مش هبدي.. هو بيقولي انا قدمت السبت وانا قادر اهو.. ومنتظر منك باقى أيام الأسبوع.. كلامه مش سهل اطلاقا.. الراجل ده بيدبجلي القطة من أولها.. وفعلا نجح.. مفيش اى رد لكلامه ده الا الخضوع التام لكل طلباته.

الصراحة حبيت أسلوبه.. مقدرتش أوصل معاها لعقاد نافع بخصوص التكاليف المادية.. موقفه خلاي متحمس جدا.. كنا ننزل نشوف الذهب وهى تختار.. وانا اتعمد اختار الأغلى بالضعف مثلا.. انا محدش يعلي عليا ابدا.

شفت الراجل خلاي اعمل ايه بمزاجي؟

اصرت امها على الألباظ وانا نجت في اقناع البنت ان الذهب ابقى وأقيم.. سهل تبدله وتزود فيه بفلوس قليلة.. امان من الدنيا لو قلبت.. أفيد بكتير من شوية احجار براقه ملهاش قيمة حقيقية.. انا معرفش الا الذهب.. هو ده القيمة الحقيقية.

امها بقت عامله زى نمر جريح.. عماله تلف وتدور وتزأر كنمرة مسروق منها اولادها.. تبكى وتنوح بمرارة على فرصة عمرها المفقودة في اقتناء الألباظ.. على عكس الاب تماما.. الأم كانت مصره على اختلاق مشكله في كل خطوة.. مش عارف ليه الحقيقة.

اخترنا ذهب معين للشبكة.. أمها بعد ما عرفت سعره بربع ثمانية راحت قلبه وشها وقايله "ميجيبوش حاجه".. رد جاهز يقول انه هيتقال مهما كان الرقم الى اتعرض.. رد سخيف منها بلعته احتراما لجوزها.. لكنى في الاخر عملت الى انا عاوزة برضه.. ومش بس كده.. انا اصريت ان الذهب كله مش هيبجي من المنوفية أصلا.. مش بس المحل الى هي بتتعامل معاها.. مش شايف منطق انها تصر على الماظ سعره نص سعر الميزانية الى كنت عاملها للذهب أصلا.. غباء مستحكم.

دى بداية الاعلان عن رجل جديد مستقل الرأي والفكر تماما.. بداية الصدام مع ست قفشنا انا وهى من بعض من اول يوم.

كسبت كل جولات الخلاف قصاها.. مش علشان انا واد محصلتش.. اطلاقا.. ابوها كان دايم في صفى لأني بتكلم بمنطق مستقيم.. خضوع الأم لرغبتي كان ثمنه غالى اوى مخدش بالي منه الا بعدين.. تعكر الجو بيني وبينها للابد.. انا خسرتها وهى خسرتني.. طبعا ده غلط مني.. في الأول والأخر هي أمها.. بشكل او بآخر كان يلزم احتوائها.. وفي بعض الهزائم القريبة.. انتصار بعيد أهم.

بعد حركة الذهب جالي تليفون من أمها.. اعتقد انه كان فخ مقصود وانا وقعت فيه زى الرطل..

- ازيك يا احمد.. عامل ايه.
- اهلا يا طنط..
- انا عاوزة اكلمك في موضوع كده
- خير يارب
- طبعا انت عارف بعد الجواز الست بتبقى الطرف الضعيف.. اعمل انا ايه لو زعلت البنت وللا ضربتها وللا حصل بينكوا اى حاجه لا قدر الله؟؟
- مش فاهم
- شوف يا سيدى.. انا عاوزاك تكتبلي 3 شيكات.. شيكات باسمي انا بعيد عن المؤخر.

- شيكات باسمك؟؟ غريبه.. اول مره اسمع عن حاجه كده.. ليه طيب؟
- اهو مجرد ورق.. حاجه عبيطة ملهاش قيمة علشان قلبى يبقى مطمئن.. انا هعملك ايه بالورق يعنى اذا كانت البنت نفسها فى بيتك.
- ولما هي حاجه عبيطة.. لزومها ايه؟
- اهو.. علشان قلبى يطمئن بس.
- ولما قلبك ما زال فى شك من ناحيتي.. هنكمل الموضوع ازاي؟؟
- معرفش بقي.. اهو تعويض للبنت و خلاص
- البنت مطلبتش اى تعويضات.. ولو هو كده فعلا.. كان الأولى تطلي الشيكات باسم البنت.. انما هنا انتى حاطه نفسك خصم ليا.. انا مالي ومالك؟ المفروض ان مفيش اى ماليات خالص بيني وبين حضرتك.. اكتبلك شيكات انتى ليه واعوضها عن ايه أساسا وانا لسه مخطيتهاش.. هو ليه حضرتك مقدره البلاء قبل وقوعه؟؟
- حد عارف.. الزمن غدار.
- طيب انا احمد مش الزمن.. واحده واحده معايا كده.. انا العريس.. هشتري حاجات للعروسة.. هجيب شبكه للعروسة.. هدفع مؤخر للعروسة.. هدلع العروسة وهتجوز العروسة وهتخاق مع العروسة.. علاقه ثنائيه بين العريس وهو انا والعروسة وهى بنت حضرتك.. دخلك انتى ايه فى الموضوع؟؟ مش لاقى سبب انى اكتبلك اى شيء من اى نوع.. حضرتك ام العروسة.. يعنى اتجوزتي فعلا قبل كده.. خلي جوزك يكتبلك.. اكتبلك انا ليه!!!
- معلش بقي.. علشان قلبى يطمئن خصوصا ان مفيش قايمه
- باباها يعرف الكلام ده؟؟
- ملكش دعوه بأبوها.. انا امها وانا صاحبة الكلمة الأخيرة.
- اذن حضرتك بتكلميني من وراه.. ممممم.. طيب.. ولا كأتى سمعت حاجه.. سلام عليكم.

جرس الشك رن فى عقلي بشده من الطلب ده.. اهلى لا يصلحوا للاستشارة هنا لانهم أطيب من اللازم.. الأمر ده يلزمه محامي.. مش حابب أقول المحامي قالى ايه لأنه هيشحن ناس كتير ضد الستات عموما.. وده مش هدفي.

اه يا وليه يا بنت ال...

ازاي مخك يوصلك للفكر المسموم ده؟؟

بقى عايزه تمسكي ضدي سلاح تحبسيني بيه فى اى وقت؟؟

بقى انا أدخل بيتكوا طالب التسب.. وانتي تفكري ازاي تحبسيني وتضيعي مستقبلي؟

بقى رئيس محكمة.. بيا من نفسه ضد صعلوك!!!

اعصار ناري من الغضب جوايا بصراحه.. الولية مصممه تكسريني بأى شكل.. جالها لوثة جنون انه اصبح لها ند.. المسكينه اخدت الموضوع حرب وثأر شخصي حتى لو باظت الجوازة.

طبعاً القرار كان سهل جدا وواضح وفي منتهى القوه.. رفضت رفض حاسم والست حلفت ان الجوازة مش هتتم الا بالشيكات.. وانا عليت عليها وقتلتها لا بشيكات ولا من غير شيكات.. ومن غير سلامو عليكمو.. انا محدش يحلف عليا ابدًا.

وباظت الجوازة..

رغم حزني الشديد على ابوها.. ورغم ان الراحل اعتذر عن تصرف زوجته الأحمق.. الا اني اصريت على الرفض.

مكانش ده هيبقي اخر الخوازيق.. صعب جدا تدخل بيت تاخذ منه بنت وشعور أمها ناحيتك كده.. المحصلة النهائية كانت خسارة للطرفين بسبب غياب الأم وسوء تقديرها للموقف.

هل كنت متسرع وعنيف؟

هل كان ابوها هو المحرك من خلف الستار للكلام ده؟؟

هل الدنيا - على رأى جدى - مش بتمشي بالطريقة دى؟؟

خليني اقولك خبرتي بعد 10 سنين زواج سعيد جدا والحمد لله.. والكلام ده للطرفين.. شباب وبنات.

الأم "عموما" لازم تبقى زى امك بالطبط.. بصولها كويس وتعاملوا معاها في كل شيء.. لو قدرتوا تبوسوا ايديها زى ما بتبوسوا ايدين امهاتكم.. لو قدرتوا تحبوها زى ما بتحبوا امهاتكم.. لو قدرتوا تحترموها زى ما بتحترموا امهاتكم.. يبقى من غير تفكير.. اتجوزوا.. الى حماته تحبه بيبقى اسعد من جوز الاثنين.. ويا ويل الى حماتها تقرش ملحتها.. هتشوف جهنم في الدنيا قبل الآخرة.. اوعوا لأى سبب من الأسباب تحطوا نفسكو خصم للحماة والحماء.. مهما كنتوا بتحبوا بعض.. هتطلقوا.. الحماة هي انثى قادرة في ظرف ساعة او ساعتين انها تهد البيت كله على نافوخكوا.. ولو حد فيكو انصف الطرف الثاني على حساب امه هو.. يبقى عيل عاق لا يؤتمن جانبه.

عروسة للبيع

فاكرين الاعلان بتاع الراجل مش بس بكلمته.. الراجل برعايته لبيته وأسرته.

احب اقولكوا ان ده كلام هري.. الراجل بيتربط من لسانه.

الشغل والحلم بمستقبل أفضل في بلد مفيهاش مكان للمجتهدين خلى سنين العمر زى شمعة ولعت من الطرفين.. وصلت الثلاثين بسرعة وانا لسه بطولي.. اخدت الماجستير وسافرت ولقيت كتير اوى.. اكتسبت خبرات مريعة داخل مصر.. وخارجها.. واخر الليل اخد المخدة في حضني أحكيها على اللى بيحصل في دولة مبارك.. وانام وانا بتفرج على نفس الفيلم بتاع كل يوم.

ظروفي زى ما هي.. متغيرش بس الا ان وزني زاد بصورة مرعبة.. قريت من ال 140 كيلوجرام.. مع الطول وعرض الاكتاف اصبح شكلي عملاق.. كده يلزم معلومة جديدة نبليها لأى مرشحة جديدة.. في بنات كتير مش بتحب الراجل التخين رغم انه دايم حنين ودمه خفيف وشبه رشدي اباطة واكيد هيجبر خاطرها في الاكل.

المرة دى كان الترشيح من اختي.. جدى زعلان منى وبدأ يشكك في قدراتي ال "....." والا ليه متجوزتش لحد دلوقتي الا لو كنت معيوب او عايز اصبع؟

لكماته كانت سهام رشقت في قلبي وكسرتني زيادة فوق الكسرة اللى كنت فيها بسبب فشل مشروع العمر بتاع انفراد.. وفي الكلام ده رسالة الى الأهالي.. خدوا بالكوا كويس اوى انتو بتقولوا ايه لعبالكوا.. خصوصاً الأمهات.. كلمة يا فاشل منك كفيلة انها تدمر نفسيته تماما حتى لو اجمع الكوكب كله انه انجح انسان في الدنيا.. محدش يقول اهالينا ياما قالوا واديننا اهو فلحننا.. اهالينا غلطوا وعكوا كتير اوى في التربية وانتجوا أجيال مليانه بلاوى عرفناها لما قرينا وشفنا.. وواضح اثرها من اعداد البيوت اللى اتخربت.

كان كلامي مع اختي عن العروسة مباشر وبلا حماس.. تقريبا فقدت الشغف في الجواز زى ما كنت فاقد اى شغف في اى شيء في الوقت ده..

- هي موافقة تقعد في القاهرة وللا عايزه شقة جنب أمها هي كمان؟
- اطمن.. هي عارفه الظروف ومعندهاش مانع تعيش في أي مكان.
- قاتلها على كل حاجه؟؟ انها مش هتشتغل.. ووزني الزيادة؟
- ايوه.. وشافتك كمان.. وقالت كلام كويس
- طيب.. توكلنا على الله.

في يوم الزيارة كان معايا أمي واختي.. ابويا بدأ مراحل مرضة الأخير ومبقاش حمل المشاوير دى.. ربا يرحمه ويرحم كل اللى ماتوا.

رب الأسرة في اواسط الاربعينات.. يبدو من النوع الغير مثير للمشاكل.. الأم مغرورة الى حد ما.. عندها بنتين حلوين فعلا.. الكبرى مطلقة بمأساة وعاملة زى النمر الشرس.. كلمتين منها ورميتها من دماغي خالص افضل ما أقوم ارميها من الشباك.. الصغيرة هي اللى عليها العين.. كويس.. نلحقها قبل ما اختها تسمم دماغها بالكلام اللى انتو عارفينه.. بيت صغير هادى ومرتب في بساطة.. مستوى مادي متوسط.. مفيش اى مقارنة خالص مع المستويات اللى شفتها قبل كده.. كويس.. علشان مبحبش حد يتمنظر عليا وانا مش ناقص.

في قبول مبدئي.. مع تكرار الزيارات كررت شروطتي بمنتهى الوضوح لأنني عرفت ان أمها موظفة ومش موافقة على قعاد بنتها في البيت.. تعمدت اكثر من مرة ان البنت تقول بنفسها ان دى رغبتها مش طلبي.. وتعمدت اكثر من مرة اني اكد على ان حياتي وشقة الزوجية في القاهرة.. هننزل طنطا في الاجازات بس.. انا عايش ومقيم ومستقبلي كله في العاصمة بعيد خالص عن طنطا.. ومفيش اى خطة في غضون ال 50 سنة الجايين اني ارجع طنطا لأى سبب غير الاجازة.

- تمام كده؟

- تمام يا ابني.. الست مكانها جمب جوزها منين ما يروح.

بخلاف شوية حركات قارعة من الام.. اقدر أقول ان محصلش حاجه ذات قيمة وقت الاتفاق.. اتفقنا على كل شيء.. انا متمسك بالشرع الحنيف ووظ في كل عادات المصريين.. واللى عايز يعاركني يعاركني.

خلاص اتفقنا على كل شيء.. مش فاضل بس غير التنفيذ.. يوم للشبكة واسبوع للعفش والفرش.. يعنى بالكثير شهر ويتم المراد بأمر رب العباد.

في احد المواسم امي وجهتلهم الدعوة لزيارتنا.. كنا في حكم المخطوبين ولا غضاضة ابدا من تبادل الزيارات.. حتى يردولى تمن التورتات اللى كت بشيلها على قلبى من لابوار في كل زيارة ليهم.. تمت الزيارة في جو جميل ودود وسط مباركات الأهل وخصوصا جدى اللى كان بيتعامل في اليوم ده كأنه يوم فرحي بالفعل.

طيب.. نقفل الاتفاقات بقى ونحدد المواعيد؟

ميصحش طبعا اروح لوحدي.. خدت امي وتحامل ابويا على نفسه وجه معانا ورحنا عندهم البيت.. وبدأت الزبالة..

- تمام كده يا جماعة؟ توكلنا على الله؟

- ونعم بالله.. ان شاء الله خير.. مش فاضل الا حاجة بسيطة اوى ان شاء الله متكونش عقبة.

- خير يا فندم؟

جرس الانذار ضرب في عقلي الدخلة النواعم دى اكيد وراها حاجه..

- خير يا عمى؟؟

- البنت يا سيدى.. بتدلع.. ههههههه

- وماله.. تدلع براحتها.. بين ابوها وعريسها.. امال يعنى هتدلع على مين يعنى

- هى موافقه على كل حاجه زى ما اتفقنا.. بس موضوع الشقة ده في شوية قلق كده.

- قلق ازاي؟

- شوف يا سيدى.. الشقة حلوه وكل حاجه ربنا يباركك فيها وتملاها عيال.. هى بس البنت مش عايزه تبعد عن امها.

- نعم.. مش عايزه تتجوز يعنى وللا ايه؟؟

- لا لا لا.. مش كده خالص.. بس هى مش عايزه تسبب طنطا.. عايزه تبقى قريه من امها.. الأمر ميسلمش.. احتاجت

حاجه كده وللا كده.. حد يجيبلكوا طلباتكوا.. ذكر بط.. جوزين فراخ.. انت عارف بقى البنات في الأول بتبقى على

ادها.. ههههههه

- ده كلام جديد اول مره اسمعه.. بس ما علينا.. حضرتك تقصد انها عايزه شقه في طنطا هنا.. طيب عندك فكره عن

اسعار الشقق في طنطا؟

- اه والله.. الدنيا بقت غاليه موت.

- طيب انا بشتغل ومقيم في القاهرة زى ما قتللكوا من الأول.. ازاي اقيم في القاهرة واتجوز في طنطا؟؟

- دى مش مشكلة.. ممكن تروح وتيجي كل اسبوع.. تنزل الخميس ليل وتسافر الاحد الصبح.. ناس كتير اوى عامله كده.

- اه.. ولما اجي الخميس ابقى اخذ في ايدي كيسين فاكهه وشوية لحمه.. زياره يعنى.. وممكن ابقى اسبيلها 200 او 300

جنيه تمشي.. نفسها بيهم.. ماهو انا مقدرش اسبيلها مصروف للبيت.. مصروف ليه بقى وانا مسافر.. يومين كل أسبوع

وقت لطيف برضه.. اهو حتى نوحش بعض.

- ممكن برضه.

الرجل مفهمش كلامي.. انا لو حد قالي كده كنت فتحت في رأسه شباك 10 غرز.. دى بنتى مش واحدة شمال ترميلها فلوس وتمشي.

- طيب افرض حضرتك في وسط الأسبوع.. اسمحلي يعنى ولا مؤاخذه.. هرموناتى عليت.. اعمل ايه؟

- ممكن تبقى هي تجيلك مفيش مشكلة.. ما هو انت بقى توجب شقتك براحتك.. الله يكون في عونك والله.
- يعنى هفرش شقتين... طيب.. البواب عندي في القاهرة معيرفهاش.. ودى عمارة عائلات.. افرض صرخ وفضحني..
- اعمل ايه وقتها؟
- اه.. تصدق ههههههه
- كمان لو حملت مش هقدر اتابعها ولا أقوم بدوري الطبيعى كأي واحد مراته حامل.. مش كده؟
- لا ما هي أمها موجوده اهي متقلقش خالص.
- قصدك اني انفخها بالحمل وارميها لامها يعني.
- ايه يا ابني ده.. اختار الفاظك.
- معلش.. حقك عليا.. في حاجه كمان.. احنا اتفقنا ان مفيش شغل.. طيب هي هتقعد في البيت تعمل ايه وانا مسافر؟
- ما هي ممكن تبقى تنزل الشغل.. تتسلى يعني وانت مش موجود؟
- جميل.. مشكلة أخيرة بقي.. الجواز اساسه السكن.. المفروض اني اخرج اتبهدل طول اليوم وارجع اسكن في حضن
- مراتي.. اسكن بخناقة.. اسكن بشيك شاك شوك.. المهم اني ارجع من حياة الصخب بره البيت الى السكون مع
- زوجتي.. في حالتنا دى.. انا هسكن يومين في الاسبوع.. 5 ايام كبده وسجق ويومين أكل نظيف.. كده يبقى ضربنا
- الهدف من الجواز في مقتل.. مش شايف كده حضرتك؟
- ظروف الحياه يا ابني ساعات بتفرض على الإنسان ما يكره
- طيب.. نجيب من الاخر.. في قصائدك حد تاني ظروفه افضل؟؟ بالله العظيم انا لا هزعل ولا هتضايق.. انا عارف ان
- وزنى صعب ومش هكون فتى الاحلام لواحد في جمال بنت حضرتك.. نكون صرحاء افضل.. مهما كذبنا لازم
- هيتعرف السبب في الاخر وهيبقي شكلنا مش لطيف.
- لا يا ابني والله.. وهذا يمين احاسب عليه يوم القيامة.. انت ابننا وشارينك
- (ساخرأ) واضح طبعاً.. الكلام كده مش تمام.. ممكن تاخذ شوية وقت تتشاوروا وتفكروا تاني قبل ما اخذ الكلام ده
- على محمل الجد؟
- هو الهزار في الحاجات دى؟ والله يبني البنت مصممه.. بنات الايام دى بقي.. هههههههههههه
- طيب انا مش معايا اشترى شقة تانية في طنطا.. ايه الموقف؟
- احلها لك يا سيدى.. بابا ربنا يديله الصحة ممكن يساعذك.. او تبني شقه فوق بيتكم.. البيت كبير ما شاء الله وانت
- ابنه الوحيد.. هي هتبقى وسط أهلها برضه.
- بيت ابويا؟؟ اه.. قلتلى بقي.
- بيت ابوك هو بيتك يا ابني..
- انا كده فهمت.. عموما بيت ابويا مش بيتي.. انا كنت ضيف فيه لحد ما خلصت وبعدها استقلت بحياتي.. بعد عمر
- طويل هيبقي بيتي انا واخواني.. حقارة مني طبعاً أقول الكلام ده في حضور ابويا ربنا يطول عمره.. بس حتى ده لو
- حصل.. مش هبقي صاحب القرار.. والبنات اكيد أولى بالبيت مني.. معتقدش هيوافقوا ان واحدة غريبة تعيش معاهم
- فيه.
- وهي مراتك تبقى غريبة.. دى هتبقى اختهم.. وبعدين بكره البنات تتجوز والبيت يفضى— على والدك ووالدتك.. اهو
- تبقى مراتك تاخذ بحسهم وبعد عمر طويل.. البيت لكم؟
- الله.. ده حضرتك كمان خططت واستقرت على ان البنات لما هتتجوز هيبقي البيت لبنتك تبرطع فيه.. ما هي مرات
- الواد الكبير بقي.
- لا والله مش كده.. انا قصدى ان مراتك تقوم بأهلك
- تخدمهم يعني؟ هو حد قال لحضرتك اننا ناوين نرمي ابونا وامنا في الشارع؟ وافرض هما مرتاحوش معاها.. هيبقي ايه
- الموقف؟
- بص يا ابني.. انا نقلتلك طلب البنت.. البنت مش عاوزة تفارق امها.
- طيب يا فندم.. كده وضحت الرؤيا.. الكلام المفيد بقى علشان نلحق نروح.. وانا داخل البيت عندك النهارده.. كان في
- ايدى عليه خضراء مقلمه أبيض وعليها فيونكه من الجنب.. فاكرها؟
- نعم؟؟
- اللعبة الخضراء اللي مكتوب عليها لابوار دى.. حضرتك حطيتها على الترايزه والمدام دفنتها في المطبخ.. مش معقول
- لحقت تخلص.

ابويا صوته على وهو بيقولي "أحماااااد".. انا استأذنته وكملت كلام مع أبو العروسة.

- انا مش فاهم يا ابني.. هو في ايه؟؟
- هاتلى بس اللعبة بعد اذنك.. عليتي وعاوزها.
- حاضر

الرجل فعلا قام جاب العلبة من المطبخ.. انا بصيت فيها بسرعة وكملت كلام معاها

- ناقصه حتہ ونص.. ماشی.. صحتین وهنا.. اهو تمن الشاي الى شربناه.. ياللا بينا يا بابا.

الرجل وشه احمر زى الجمر.. شيطان مرید فی أعماقي لم یکتف بأحراج الرجل.. صممت على حرق دمه تاني.. التفت ناحيته وانا واقف على الباب ولبستني روح يوسف بيه وانا بتکلم بلهجة بطيئة قوية..

شفت حضرتك منظرې وحش ازای.. اكيد بتقول عليا دلوقتي اني زياله ورمه.. وزمان المدام والبنّت جوا بيقولوا كويس اننا كشفناه على حقيقته البخيل المعفن.. شكلي وحش انا عارف.. ومع ذلك مصمم اني اخذ العلية.. انا مش محتاجها.. بس هاخذها.. هاخذها علشان تشوفني وحش وسيء وقليل الذوق.. هاخذها علشان لما امشي—تقول اسفخص عليه عيل قليل الادب بيغير كلامه.. سلامو عليكو.

وسبت العلبة زى ما هي على التراييزة وفتحت الباب علشان امشي.. تحول وش الرجل من اللون الأحمر الى الأبيض وهو بيقول..

- استنی یا ابنی.. خد علبتک معا
- بالهنا والشفایا حاج.. انا میغیرش کلامی ابداء.. سلامو علیکو تانی.

خرجنا من بيت الناس وانا غضبان بشده.. ابويا طبعوا زعل منى لأنى اخرجته قصاص الناس.. امى اصرت اننا لازم نتعامل معاهم بنفس منطقهم.. نكلمهم ونوعدهم ونغير كلامنا.. نوافق على طلبهم بس من غير شبكة ولا مهر ولا فرح ولا اى التزام مادى.. مجرد رد انتقامى ليس الا.. طبعوا انا رفضت الكلام ده.

بعد 3 اسابيع.. جالي تليفون من واحده من اقارب العروسة بتحاول تقنعني انى الكم ابوها تانى ونحاول نرجع الميه الى مجاريها..
هى قالت ان الرجل مستعد يسامحنى وان شاء الله نوصل الى حل وسط.

مشكلة كبيرة عند ناس كثير في مصر. ان كبرياء الرجل لا تمثل بالنسبالهم اى شيء.. الكلمة دى حلال للبنات بس.. انما الرجالة لا.. يتمسح بيها الأرض عادى.. امال راجل ازاي.. عك وتخريف ومنطق مغلوط آخر من ضمن اكوام الزبالة الى بتسرح في عقول الناس لما بيحاولوا يجبروك على تحمل اى إهانة لمجرد انك اتولدت بجينات XY.

رفضت كل محاولات التوسط.. سقف طلباتهم فضل ينزل لحد ما رجع لاتفاقنا الاولى.. فضلت ماسك على الرفض برضه.. اتقفلت منهم قفلة بلا رجعة.. انا قدمت ايدى بالخير وانت تعاملت معايا بحقارة.. مهما كان رد فعلي.. هيفضل رد فعل يمتنع لو امتنع فعلك انت السيء من الأساس.

- هل طمعوا في بيت ابويا لما شافوه؟
- هل كانوا مخططين لكده من الأول؟
- هل تعاملوا بنظام نشوف الأول ويحصل قبول وبعدين نتشـرط ونعلـى في الطلبات علشان الاهيل الى هيريل لما يشوف حلاوة البنت؟
- هل ظهر قصادهم اختيار تانى افضل؟
- هل كانت عندهم تجربة سيئة مع البنت الكبيرة.. فبيعوضوا فيها؟

معرفش.. کلهأ أسئلة تحتمل كل شىء..

بعد سنتين من الموقف ده كنت في نادى طنطا مع اخواتي وامي.. كنا بنشوف عروسة تانية.. وأختي شاورتلي من بعيد على واحدة شايله طفل..

- تعرف مين دى؟
- مش متأكد.. بس حاسس انى شفتها قبل كده
- دى البنت اللى انت طلبت منهم التورتاية.. دايله في المحاكم علشان تتطلق اهي.. بيقولوا شافت من جوزها كتير اوى
- ياللا في داهية.. تلاقية هو اللى شاف منهم.. دى عالم رمم.
- يا سيدى.. اللهم لا شماتة.. ملناش دعوة
- ولما ملناش دعوة.. بتقوليلي من الأول ليه.. ما تخلينا في اللى احنا فيه

مكنتش عارف ان العروسة اللى قاعده قصادي وقتها هتبقى على ذمتي بعد اليوم ده ب 6 شهور.. ومكنتش اعرف كمان انى هطلقها بعد 3 أسابيع جواز بالظبط.

صحيح.. اللهم لا شماتة.

مفرش السرير

أيها الناس.. ترفقوا بأنفسكم.. انكم لن تخرقوا الأرض ولن تبلغوا الجبال طولاً.. ولن تفتحوا النيش

من حلويات سن الثلاثين انه الوسط في كل شيء.. الصحة عال العال مع استقرار محبب في الشغل.. خلاص مبيقيتش عيل صغير الناس تتهمه بقلة الخبرة.. ولسه عجوز يتقالك يا عم الحاج.. قصادك حاجات كثير تتعلمها في الدنيا.. ولسه الناس مستعده تسامحك على الخطأ.. البنات بتقع في طريقك وهما لسه في سن الطلب.. او على رأى جدى الحبيب التفاح طاب على الشجر وطلب الاكالة.

طيب يا جدى.. ناكل وماله.. ناولي مشويات اطعمنا الله واياك من مشويات الجنة..

- شوف يا سيدى.. صاروخ ارض سقف جه مع ابوه لحد عندي النهارده في الشغل.. بت زى كباب الحلة.. ليسانس آداب وبتسلي وقتها في حضانة أطفال لحد ما ييجي الى يجيب منها اطفال.. اهلها ناس طيبين وسمعتهم زى الجنيه الذهب.
- استر يارب.. كل مرة تستفيض في الوصف البس انا تورثاية بالشيء الفلاني.. المرة دى يا حلو هدفعلك تمن التورثاية بعد كتب الكتاب.. اتفقنا؟
- اه يا صايح.. خليك اتعوج لحد ما تعنس.. انا اتجوزت ستك الله يرحمها من غير ما اشوفها.. وعشت معاها 60 سنه لحد ما راحت لى خلقها.. لا عمرى اشتكيت ولا عمرى فكرت في كل الصراصير الى فداغك دى.

جدى من تانى.. ربنا يستر

جدى حالة خاصة في وصف الستات واحترامهم.. معذور المسكين.. عاش مع أمه 8 سنين ومع مراته 60 سنة.. ده غير ان حبه للأدب والشعر خلى كلامه كله محسنات بديعية واستعارات مكنية والحاجات الى كانت بتسقطنا دى.. لما كان يوصفلي بنت مثلاً كان يقول "ذات جمال كأن البدر طلّتها" او "رشيقة مصقول عوارضها".. هو مش بيأفور ولا حاجه.. هو لغته العادية كده من كثر تأثره بالشعراء من أمثال الذباني والأعشى وعنترة والعيال دى.

بس المرة دى بالذات.. جدى وصف الموقف بأقل من الحقيقة بكتير اوى..

ايه الصاروخ ده!!!

البت زى المانجاية.. جميلة بكل مقاييس الجمال في كل مكان.. تحسها من ساعة ما اتولدت لم تتعرض لأى عامل من عوامل التعرية الجيولوجية.. بشرة رايقة وصوت زى أجراس الموسيقى.. حاجه كده بتقفيل المصنع.. خراط البنات خرطها خرطة معلمين.. الى زى دى متعرفش تمشى—مترين من غير ما تتعرض لكل أنواع التحرش.. اى راجل تعدى من جمبه واحدة زى دى من غير ما يحك فيها يبقى بيغامر بسمعته علطول.

ايه البت دى.. دى لازم تتجوز بروس لي علشان يقدر يحميها.

كنت قاعد في بيتهم عامل زى اسد حبيس.. عاوز اقفش اى حاجه للبنات او أهلها علشان اقلل فيها تأثير الجمال المرعب ده.. كونها جاهلة او مسطحة التفكير ده مش شيء ينفع أدى ملاحظات عليه والا الناس تاكل وشى.. صمت أمها المرعب برضه مينفعش.. الستات في المواقف دى يلزمهم صواريخ سكود او ساجر تتحط في بقهم علشان يسكتوا ويدي فرصة للناس تتكلم.. الا دى يا خويا.. صمت القبور.

في شيء مش طبيعي في البت وامها.. يا اما هما شخصيات سهلة الانقياد جدا.. يا اما بيوفروا مجهودهم للمهم.. باءت كل محاولاتي لاستفزاز أمها علشان تتكلم بالفشل.. اى حاجه اقولها ملهاش عند أمها الا رد واحد.. ان شاء الله والى الف مبروك.

عرضت الإمكانيات.. وافقوا

عرضت الشروط.. وافقوا

كل حاجة عرضتها وافقوا عليها.. في وجود ناس زى ابويا وجدى لا تعتبر اى ماديات خلاف اطلاقا.. الاتنين وانا قبلهم مؤمنين تمام الايمان ان كل ما هو مادي مسئولية كاملة على الرجل زى ما الشرع بيقول.. انا لا اجيد التورية ولا التعريض بالكلام.. لما أقول يعمل كذا.. يبقى انا فعلا يعمل كذا.. لما أقول مفيش قايمة وانا شايل الليلة كلها.. يبقى فعلا هشايل الليلة كلها.

غلطي الكبيرة في الموضوع ده اني افترضت ان السكوت علامة الرضا.. ده مش صحيح.. السكوت في الشغل مثلا دليل على ان اللى قصداك ببشتمك في سره.. مراتك لما تسكت فده دليل انها بتخطط لقتلك.. صاحبك لما يسكت فده معناه انك بتهدد.. الطابط لو سكت فده معناه انك رايح المعتقل.. السكوت ده العن حاجة في الكون.. لم يكذب سقراط ابدا لما قال "تكلم حتى اراك".

قرينا الفاتحة مع هدية ذهبية محترمة تعلن للناس ان المزة دى خلاص في طريقها للهلاك.. في عقرب بيستعد علشان يغرس فيها ديله بسم الحمل والانجاب والمواعين.. سنتين بالظبط وهتتفرجوا على افروديت دى وهى بتتحول الى ام نور الى بتقل الكفتة في اوضة النوم.

الزواج هو العقاب الإلهي العادل للنساء..

تحول كلام جدى عنى من الصايح الفلاقي الى البشمةهندس ابن بنتي.. بقى يقتبس من كلاي ويقول لا.. البشمةهندس ابن بنتى قال كلام غير كده والبشمةهندس ابن بنتى عمل كذا او سوا كذا.. سبحان الله.. تحولت من أبو نواس الى ابن خلدون بين ليلة وضحاها.. والفرق كان دبة فضية في بنصر ايدى اليمين.

طيب.. نبدأ نفرش الشقة بقى وللا هنقضها غرامات وتورتات من لابوار؟؟

خليني في الأول اقولك الرسالة المهمة جدا والدرس الى اتعلمته من الحكاية دى قبل ما ندخل في التفاصيل.. جابز ملكش خلق على القراءة.

سواء كنت هتشيل كل حاجة لوحداك او هتشاركوا او هي هتفرش لوحدها.. أيا كان نوع الاتفاق بينكوا على طريقة فرش البيت.. اوعى الف الف مرة انك تشترك معاها في الجنون ده.. ولا حتى ابداء رأي او اختيار او اى شيء من هذا القبيل.. اهرب يا سيمبا.. اهرب بعيد واوعى ترجع الا والشقة مفروشة بالكامل.. بعد الخطوبة ابعدها تماما واقطع كل علاقة بيها.. لما تبتعلك مع امك تقولك تعالى يالالا الفرح النهارده. ابقى روح بس لابس وجاهز قبل الفرح بنص ساعة كده وللا حاجة.. وخليك صبور في النص ساعة دى.

شفت انت أمها الى كانت ساكتة دى؟؟ بعيد عنك.. اول ما بدأنا التجهيز انفتحت في الكلام ولا كأنها عبد الله فرغلي "الأستاذ ملواني" في مدرسة المشاغبين..

يهدك ولية.. ايه كمية التفاصيل دى!!

مصيبة لتكونوا بتتكلموا جد. معقول كل ده هيبقي في شقتي؟؟

ليه.. هو احنا بنخطط لغزو اوروبا!!

معقول 4 أسابيع بتتكلم عن النجف؟؟ ليه كده.. ما كريستال عصفور اهو زى الفل.. ده بيصدر نجف وكريستال لأكثر من 120 دولة حوالين العالم.. درب برابرة ايه الى هروحه ده كمان!!

معقول انزل اشترى قماش الستائر من مكان وخشب الستائر من مكان تاني واحبال الستائر من مكان ثالث وبعد كده اروح مكان رابع علشان صنايعي يقفل كل ده في صورة ستارة تتحط على الشباك!!

اروح دمايط انا ليه علشان العفش.. هو القاهرة مفبهاش معارض!!

وبعد ما قعدنا 4 أسابيع في مباحثات النجف.. بنتكلم ليه دلوقتي عن نوع تاني من الإضاءة بيتعلق على الحيطان.. مش النجفة موجودة؟

وايه مشكلة السجاد كمان.. ايه علاقته بالسئائر والنجف والانتريه.. ما هو كله حلوا هو.. النساجون الشرقيون بتصدر كل سنة ب 400 مليون دولار.. معقول وسط كل ده مش لاقين سجادة نفرشها على الأرض!!!

انا حاسس اني زى اهل الكهف.. زى ما أكون صحيت فجأة في عالم مش بتاعى ولا يخصني.. انا ايه الى جابني هنا!!
انا راجل بحسب وقتي بالساعة.. أقوم الاقي نفسى- رازع مشاوير لحد دمياط والعاشر من رمضان ووكالة البلح علشان شوية كلام فارغ!!

ليه.. هو انا لاقى وقتي!!

الى كان يستفزني دايمًا هو الرد شديد الغباء بتاع "كل الناس بتعمل كده".. نفس منطق هكذا وجدنا آباءنا يفعلون..

طيب افترض ان اباؤكم غلطوا.. ايه الداعي اني اكرر الغلط؟؟

حسيت ببداية اعراض الضغط والسكر لما بدأوا يتكلموا عن المطبخ..

كوبايات للمية وكوبايات تانية للشاي وكوبايات ثالثة للعصير وكوبايات رابعة للضيوف.. اطباق للأكل واطباق للتقديم واطباق للغرف.. حلل للمكرونه وحلل للخضار وحلل للرز وحلل امان ضد غدر الزمان.. كاسات للجيلي وكاسات للكريم كراميل وكاسات تانية عاملة زى كاسات الخمرة.. اعوذ بالله.. ليه كده.. احنا هنكفر وللا ايه!!

وكاسات للجيلي ليه.. ده حلواني العبد بجلالة قدرة بيقدمها للناس في علب بلاستيك.

وبعدين مين أصلا قال اني بحب الجيلي!!!

- ده طقم الصيني لوحده 450 قطعه يا ابني
- 450 قطعه؟؟ ليه.. ده احنا نفرين.. معنى كده ان ليا فيهم 225 قطعة.. يا سنه جاز.. انا عايش لوحدي من 8 سنين..
- عندي معلقه وكوباية وطبق وحله وخنجر من بتوع الجيش بعمل بيهم وفيهم البدع.. طب وربنا الاسبوع الى فات عملت مكرونة بالبشاميل.. تجنن.
- معلش يا ابني.. كل الناس كده.

كل الناس كده.. تاني!!!

ولو قاومت الرد الغبي.. يجيلي بعده الرد الأكثر غباوة "متقلقش.. الحاجات دى على العروسة".

ومين قال اني بتكلم عن الفلوس.. انا بتكلم عن المنطق..

مين قال اني همى اني اغرم العروسة وابوها واهلك فلوسهم في اى كلام فارغ من الى بتحكوا فيه ده؟

ليه.. هي فلوسهم حرام؟

يا اخي ان كانت فلوسك كتير وحابب تدلع بنتك.. ماشى.. خد منى المهر وحط عليه الى يعجبك واعملها وديعة في البنك باسمها.. جايز تترمل قبل الأوان..

محدث قالك ان الذهب امان للمستات؟

هل من المنطقي اننا نجهز اوضة للأطفال.. قبل أصلا ما يبقى في أطفال؟؟

مين قالك اننا هنخلف أصلا.. مش جايز ربنا يحرمننا من الانجاب.. ساعتها ابقى انا حطيت قصادي خابور غم اشوفه كل يوم وافتكر العيال الى اتحرمت منهم واقعد اعيط..

في حد يشتري النكد بفلوسه؟؟

وبعدين العيال علشان تنام لوحدها قصاها مش اقل من 5 سنين.. تكون موديلات الهبل الى انت اشتريته ده راحت في داهية.. ساعتها طبعاً هنعير.. يبقى كلفنا نفسنا ورمينا الفلوس في الأرض بدون اى داعى..

وبعدين نيش ايه وكلام فارغ ايه.. امى فضلت قافلة البتاع ده من مبدأ اننا هنطلع الاطباق الإيطالي دى علشان عريس اختك.. واخواتي اتجوزوا وخلفوا والنيش زى ما هو.. بقفلته.

انا مش بخيل ومش بغير في كلامي شيء.. انا بس بقولك بدل ما ترعى شقايا في اى كلام خايب.. استخدمه بطريقة أكثر ذكاء علشان تأمن البنت وحياتها بجد.. اقله ابقى نفعها حي وميت.

ابوها مقتنع تماماً بكلامي.. الى تعب في مجايب الفلوس نظرتة غير الى بيصرف على الجاهز.. الراجل شافني بحبوح في موضوع الذهب وكمان مش طالب منهم اى مساعدات.. فادرك انى حقاني مش رمة.. كمان عدم وجود قائمة معناه ان كل ده هبل في الجبل.. ملهاش عندي لو الأمور خلصت الا مؤخرها ونفقتها بما يرضى الله عزوجل.

ازاى بقى تقنع أمها بالكلام ده؟

ده ولا هنري كيسنجر نفسه يقدر.. الست مبرمجة تماماً على شيء واحد بس..

ازاى نقدم للضيوف العصير في كوبايات مش كاسات.

قبلت الوضع المزري ده مجبر.. خلاص بقى زهقت وعازي اتجوز.. كمان مش معقول جدى بعد ما بقى يقول عليا البشمهندس احمد ابن بنتى اخليه يرجع تانى يقول الفلاقي الصايح.

دخلت في دوامة لا تنتهى من الشراء والاستبدال والترجيع.. اكتشفت ان الدنيا فيها الوان غير الأربعة الى انا بشوفهم.. بعد 30 سنة في الدنيا عرفت ان في حاجه اسمها "صواني التقديم"..

سبحان الله.. وفوق كل ذي علم عليم.

كل ما كنت ازهق أو اشتكي كنت الاق اغبي ردود الكون "كل الناس كده يا ابني".. فبطلت شكوي خالص حفاظاً على مرارتي.. لحد ما مرارتي نفسها انفجرت في يوم.. وفجرت الموضوع كله.

او كما قال نبرون بعد حرق روما "لقد كانت القشة التي كسرت ظهر العريس"

- بقولك ايه يا أحمد.. بكرة ان شاء الله هنزل علشان نختار مفرش السرير
- هو مش حضرتك قلتي ان الفرش والملايات موجوده فعلاً.. مش عارف مين جابهملها هديه من بلاد تركب الافيال باين؟
- لا يا ابني.. مفرش السرير ده حاجه ثانية
- حاجه ثانية ازاى.. مهم في الجواز يعني؟
- اه طبعاً.. هو ينفع حد يتجوز من غير مفرش سرير
- ايوه يعني.. بيعمل ايه؟ معلش اصل انا اول مره اتجوز..
- ده يا سيدى بيتفرش على السرير
- وكتاب الله!!
- انا بتكلم جد.. ده بيتفرش على السرير يوم الصباحية
- واشمعنى يوم الصباحية!! ما احنا هنعير الملاية اكيد.. نفرش مفرش ليه.. ايه العفانة دى.. ده غير انى بطلت اعملها على نفسى من 28 سنة تقريباً
- يا ابني افهم.. ده بيتفرش فوق السرير علشان لما الضيوف يشوفوا الأوضة.. ميصحش يعنى يشوفوا السرير علطول كده
- ضيوف مين؟ وأوضة ايه الى هيشوفوها؟
- الناس يا ابني الى هيتيجى تباركلك يوم الصباحية.. مش هيتفرجوا على الشقة؟

- يتفرجوا على الشقة ليه.. هو انا عارضها للبيع!!! وييجوا يوم الصباحية ليه؟ ايه الغتاته دى.. هوانا هبقى فاضيلهم!!
علشان يباركولك يا عريس..
يباركولى في البيت!! امال انا عامل فرح ليه!!!
وعلشان يضربوا نار كمان.. هي هي هي هي هي
طب انا هسافر تانى يوم الفرح علطول علشان شهر العسل.. هيجولى فين بقي؟؟
يجولك لما ترجع.. اى وقت مش مشكلة
دول مصممين بقى.. ايه الرخامة دى.. وبعدين حتى لو جم.. يدخلوا اوضة نومى ليه.. مش كده عيب؟؟
ما هو علشان العيب مبيقاش عيب.. بنحط المفرش ده على السرير
مش فاهم برضه.. هيشوفوا ايه فى اوضة نوم المفروض ان كلها خصوصية.. ويتفرجوا ليه ويتخلوا.. طب مانا ممكن
اصورلهم الليلة كلها فيديو واوزع عليهم سيديئات.. اهو على الاقل لو عجبتهم منظر معين يبقوا يعيدوه براحتهم.. هو
حضرتك بتتكلمي جد وللا انا الى مش فاهم وللا ايه؟؟
كل الناس كده يا ابني
كل الناس مين.. انا مش فاهم البتاع ده لزومه ايه.. هو بكام اصلاً؟
يعنى.. قول 2000 جنيه مثلاً
ناااااااااااااا... 2000 عفريت ينظطونى لو وافقت على الهبل ده.. ده بتمن التلفزيون.. والله ما يحصل ابدأ.. ده
سفـه ربنا هيحاسبنا عليه.. اتهبـلت انا علشان ارعى 2000 جنيه فى ملايه.
مش ملايه.. ده مفـرش.. كمان انت مش تهجبـيه.. المفـرش على العروسة
لا عروسة ولا منحوسة.. حرام عليكم اقسم بالله.. بال 2000 جنيه دول اذبحوا خروفين وزعوهم على الغلابة.. اكيد
هينبونا من طيب دعائهم شيء ينفعنا او يمنع عنا بلاوى الدنيا.
يا ابني ما هو كل الناس كده
الله يحرق كل الناس الى قارفى فى عيشتي دول.. هي كلمة واحدة.. مفيش مفـرش.. كفايه اوى كمية الكوبايات الى
مش عارف هنلحق نكرسرها قبل ما نموت وللا لأ
ماشى.. خلييني اتكلم مع مامتك
والنتى حتى لو كلمتى مع الأم تربزا نفسها... انسئ.

نزلت من البيت وانا راسي فيها الف ببياده ميري.. زهق وقرف الشهور الى فاتوا كلهم طلع في اليوم ده.. مش هجييه اقسام بالله..
وحتى تحترق النجوم وتفنى العوالم وتتصادم الكواكب
.....

انتهى الموضوع وفشلت الجائزة بعد ما كنت قاب قوسين او ادني.. كل الناس غلطوني.. وانا دلوقتي بعد 15 سنة من الموقف ده بغلط نفسي.. تماما.. منطقي سليم لا غبار عليه.. انا اتجوزت فعلا بالطريقة الى حلمت بيها.. وهعمل كده مع بنتي وابني وبنصح كل الناس بكده.. غلطت وقتها اني وافقت في الأول.. كان مفروض من البداية لأ.. يعني لأ.

بعت اغلب الحاجات الى اشتريتها بنص تمنها رغم انها كانت جديدة بأكياسها وعليها.. ضاع من عمري وعمرها شهور واحسب علينا ارتباطا.. خسرت فلوسى واعصابى وأصبحت اكثر عدوانية ناحية الستات.. والسبب.. كل الناس الى يتعمل كده دى.

رسالتی هنا مش جدیدہ.. کل الناس ہتقولی اہ معاک حق.. وبعد ما یقفلوا التلیفونات ہینزلوا علشان ینقوا طقم کاسات التیرامیسون.

الأمهات الى مكركبه بيوتها بجهاز البنات الى مدفون تحت السراير وفوق الدواليب ويببدأوا في تحضيره من اول ما البنت تطلع البامبرز.. بطلوا حماقة وغباء.. كل ده هبل.. الموديلات بتتغير وكل شيء له عمر افتراضي.. ليه تفرضي ذوقك الوحش على بنتك.. ليه تشيلي بنتك زبالة ورثتها من اللي ورثوها قبلك؟

عمرک سمعتی عن نیش اتفتح الا بالخطأ؟

بذمتك ودينك.. اخر مرة عملتي جيلي في كسات لجوزك امتي يا ام العيال؟

خليكو واقعيين.. امنوا البنات بالذهب او بالمدخرات.. سيبكوا من الهالهيل والكراكيب الفارغة.. خليكو عاقلين.. الصين بقالها سنين بتاكل من هبلكم بقلادة.. واخرة المئمة رزعونا فيرس جابنا الأرض.. ولا راعوا اخوة ولا عشرة.

كل حاه للعيسان سعرها مضروب في 3 وجودتها زى الزفت.. طول عمرى كنت بحلق شعري ب 5 جنيه.. ويوم ما أقول انا عملت البدع.. بدى للحلاق 10 جنيه احلق بيهم 4 مرات مجانا بعد كده.. ليه يوم فرحي احلق شعري ب 150 جنيه!!

السخافات الاجتماعية زى زيارات الصباحية والفرجة على الشقق.. امى بقى هتنضفوا من الكلام ده؟

انهى اهم.. نظرة اعجاب وحسد في عيون الأقارب والجيران وللا دعوة من فقير محتاج؟؟

بفتكر كل الكلام ده كل ما ابص في وش حماتي الجميل.. الله يجزيها عنى وعن بنتها كل خير.. مقاتلش غير بيتكوا يا ابني وانتو احرار.. مراتك معاك ومش عايزه منكو غير كبشة عيال.. الله يديها الصحة ويطول عمرها يارب.

انا صح..

ما زال في الدنيا عقلاء.

عروسة للبيع

من الحكاوي الى عشتها هتلاق موقف او اتنين عدوا عليك او على حد من معارفك.. ممكن امك نفسها تكون عملت حاجة منهم مع عروستك/عريسك.. ممكن جدا تصرف من تصرفاتي تكون انت عملت زيه او اعلى او اقل منه في حياتك.. انا مش جاي من الفضاء بقصص محصلتش.. انا جاي من قلب الواقع.

انما انك تقابل ناس زى دى.. اسمحلي معلش.. مستحيل

31 سنة ولسه وحداني.. سافرت بره مصر- هريان من فساد دولة مبارك الى افشلت مشروع عمري.. الحياة في غربة الخليج كئيبة.. وبعد الثلاثين كئيبة اكثر.. الأيام بتجري زى ما يكون عقرب الساعة اتجنن.. مفيش حاجة تقدر تعملها في البلد الى انا فيها "وقتها" الا اكل الفراخ.. وتحويش الفلوس.. من زهقي من الحياة والى فيها عملت خطوتين شغلوا حياتي تماما..

بعد ما وزني وصل 180 كيلوجرام.. عملت عملية في معدتي للتخسيس.. كانت جديدة وقتها.. فقدت بسببها 114 كيلوجرام.. بقيت 76 كيلو.. شكلي اتغير خالص ورجعت من ثاني عصفور في منتهى الرشاقة.. في الوقت الى الناس بدأت تأتخ فيه وتعيش حياة الكهول بعد ما اتجوزت وعدت الثلاثين.. كنت انا برجع تاني لأيام الشقاوة ولعب الكورة والتنطيط والسفر.. مفيش حاجة في الدنيا اجمل من الاكل الا فقد الوزن على فكره.

وبما اني أصبحت غصن بان من ثاني.. فالجواز اصبح سهل جدا.. اتجوزت جوازة سريعة انتهت بأسرع طلاق ممكن تسمع عنه في حياتك.. انا غلطان قلبا وقالبا.. الزهق والإحباط لا يعنى ابدأ انك تقبل اى حاجة.. مفيش فرص كثير في الغربة للأسف.. الناس في مصر- بتكذب جدا وهما بيعرضوا عليك صور البنات.. فلوس كثير متوفرة تسيل لعاب اى حد.. خلاص انا هاخد دى.. كتب كتاب وفرح تكتشف بعدهم ان الوحدة فعلا اجمل مليار مرة من جليس السوء.. 4 سنين في المحاكم علشان اتخلص من آثار 3 أسابيع جواز.. دفعت المؤخر مرتين والنفقة مرتين ودخلت أقدر مكان ممكن تدخله في حياتك "المحاكم" واتعاملت مع أسوأ منظومة في مصر- "منظومة القانون وافراده".. مكنتش عارف اعمل ايه تاني اكثر من يمين وقسيمة طلاق في السفارة بره وعند المأذون في مصر.

المهم اني رجعت تاني لعيشة العزوبة في الخليج.. المشكلة وقتها مكنتش عندي اد ما هي عند زوجات اصحابي.. تخيل انت شقة فاضية مجهزة بكل وسائل الرفاهية والتسلية ومرحبة بأى واحد متخاف مع مراته او حبيب يقضى- سهرة الخميس حتى مطلع الفجر.. مجرد وجودي كده بدون اى التزامات مادية كان شيء مستفز جدا للناس.. دخل كبير جدا بصرفه كله على السفر والسياحة والتنطيط.. كنت صديق السوء الى كل الزوجات عايزه تبعده عن حياة اجوازها رغم اني انا الى كنت دايميا بصلح منهم لما يولعوا في بعض.. مكنتش موقفهم ده كراهية في شخصي- اد ما هو اعتراض على ظروف الخطيرة جدا في وجهة نظرهم.. وعندهم حق الصراحة.

اتحد نسوان اصحابي ضدي وقرروا انهم يجوزوني بأى شكل.. حتى لو هيخدروني ويكتبوا كتابي على اى حاجة بتتحرك.. المهم اني مفضلش كده وخلاص.. الله يمسيك بالخير يا جدى.. انت فكرة والفكرة لا تموت.. عملوا اجتماع قمة مخصوص ورشحوا منهم واحدة تبقى هي راس الحربة في الهجوم ده.

زوجة صديقي الى تصدرت للمهمة دى زنقتني عندهم في يوم.. انشكيت في لساني مره وقتلتها اني بحب التشيز كيك الى هي بتعملها فأصبحت الهابة دى مقرر اسبوعي علما.. اكل منها قطعتين غصب عن بوزي وانا عندهم واخذ منها صينية وانا مروح.. مش عارف الست هتعمل ايه لما تعرف اني كنت برعي الصينية زى ما هي في الزبالة.. انا أصلا مليش في التشيز كيك عموما.. وهي كمان كانت بتعملها وحش اوى.. الكذب ده أسوأ حاجة في الدنيا اقسام بالله.. حبيت اجود.. التجويد فرقع في وشي.

- بص يا عم احمد.. عندي لك حاجة شايلهاا للحبايب.. انت عارف معندناش اعز منك والله..
- مش عارف ليه اتعودت لما حد يبدأ كلامه ويقول يا سيدى الفاضل.. يبقى الى بعدها شتيمة عطلول.. استر يارب
- لا لا.. عيب عليك.. انت اخويا الكبير.. خد حطة التشيز كيك دى.. دى بالتوت والكيوي
- يعجعع.. لا مؤاخذه.. قصدى شكرا.. طالما قلتي اخويا الكبير.. يبقى لازم اسمع.. قول يا حواش.
- هما قاهرين.. اختها الكبيرة صاحبي الانتيم.. ناس طبيين اوى وعلى حطة ايدك.. تحطها تحط تطبها تطب.

- بط ؟؟ طيب البطة دى ظروفها ايه؟؟
- سنّها مناسب ليك وجمالها هادى كده.. محترمه جدا.. لا ليها فى اليمين ولا الشمال.. انا اديتها فكره عنك وعن ظروفك.. والناس مرحبة وقالوا اهلا وسهلا.
- طالما قالوا اهلا وسهلا يبقى مبدعهاش بقي.. اديني حنة تشيز كيك من اللى عليها سجق دى

لما سافرت للخارج اصابني مرض نفسي.. مشهور اسمه الحنين الى الوطن.. نوبات قيء وصداع وارتفاع في درجات الحرارة بدون سبب مع اضطراب في النوم وعصبية مفرطة.. كل الاعراض دى كانت بتختفي وانا خارج من مطار القاهرة.. نصحني طبيب نفسي اني انزل مصر.. مرة كل 3 شهور علشان اشوف الواقع المصري الذي لم يعد كما كان.. أقوم اخذ الصدمة واحمد ربنا وارجع على الخليج جري.. انا مسمعتش كلامه وكنت بنزل مرة كل أسبوعين.. مفيش فايده.. مصر.. سممت جسمي تماما بحب مش قادر اتخلص منه لحد النهارده.

علشان كده لما قالولي في عروسة.. انا طرت من الفرحة.. مش بالعروسة نفسها.. لا.. علشان هنزل مصر.

نعدى تفاصيل بداية الزيارة.. كبرنا بقي على الكلام ده.. وانا داخل محل حلويات مشهور قصاد بيتهم لقيت شاب من سني شايل 4 علب كبيرة باين من التغليف انها هدايا.. معروفوش.. ومع ذلك لقيته بصلي كده وقال:

- ملعون أبو ام الجواز على العرايس على النسوان على اللى اتجوز على اللى عايز يتجوز
- صلى على النبي فقلبك يا عم الحاج.. مالك بس؟
- تالت زياره في ديك ام ده اسبوع مش عايز يخلص.. ما اللى يتجوز يتجوز واللى يطلق يطلق.. مال ديك امي انا بعيلتهم..
- نيله عليهم وعلى عيلتهم وعليها في يوم واحد
- (ضاحكا) معلش.. كلنا لها
- ياللا يا عم.. خش اندبح.. كويس ان الواحد ميقاش اخر حمير الدنيا.. خش يا حمار.

جميل.. بداية مشرقة بالتفاؤل.

ساكنين في الدور السابع ومفيش اسانسير.. حظهم حلو.. لو كان الكلام ده قبل العملية كنت رفضت من قبل ما اروح.. انما دلوقتي الموضوع ده بقي اسهل من السهولة.

بيت بسيط اهلك قطع ائاثه الايام.. الاب ستيني بسيط الملامح.. قابلني بجلاية بيضاء بدون اى تكلف ولا تصنع.. حبيت جلابيته وتلقائيه.. مراته هي الصورة السينمائية المثالية للأُم.. فردوس محمد او كريمة مختار.. صواب تخينه مليانه حنان تحس انك عاوز تبوسها.. لما تبص لأيديها مش هتشوف الا محشى.. وكفتة وطشة ملوخية تصحى الميت.. دى ست افنت عمرها في تربية البنات وخدمة الزوج.. غالبا مش هتلاقى عندها اى حلم الا زيارة بيت الله الحرام.

بسيطة.. عمره وحج كمان يا ستي.. بس يحصل المراد.

شهادة حق.. الرجل احسن تربية بناته.. ده غير اني لمحت ورا ضهره مكتبة عملاقة خلّتي قاعد مش على بعضي.. بقيت شبه فؤاد المهندس في عائلة زيزي.. كان طبعي جدا ان انا وهو نفض لكل حوارات الجواز ونقضى – القعدة كلها” 6 ساعات” عن الكتب والكتاب والتاريخ.. لدرجة ان البت زهقت وسابتنا وقامت بعد 3 ساعات فشلت فيهم انها تلفت نظري.. وامها دخلت تنام بعدها بساعتين بعد ما جابت عشاء وسحور وحلو وحادق وساقع وسخن ولب وسوداني وكاجو.. وكل ده وانا ولا في بالي.. انا وابوها انتبهنا بس على صوت اذان الفجر.. فنزلنا صلينا وفطرنا سوا على عربية فول.. وبعدها رحت لحال سبيلي وهو طلع يستلقي وعده من مراته.

ظروفي المادية في مصر.. كانت كويسة.. وأصبحت افضل 100 مره لما سافرت.. اقله مفيش فرش ولا تجهيز والهري ده.. فرش اتخنها فيلا في الخليج مش بياخد اكر من 3 ساعات.. الكلام عن التفاصيل مخدش منّا اكر من وقت كوباية شاي.. بعدها رجعنا نرغي تاني في الكتب وعبد الناصر واياه.

طب ايه بقي.. الدنيا خربت ليه؟

بالرغم من كل السهولة والقبول ده.. الا ان الموضوع ده بالذات واحد من اشد القصص تأثيرا على نفسي.. بسبب الناس دى انا اذيت بنات كثير اوى بعدها.. ربنا يصلح حالهم ويسامحني.

- ها يا عمى.. نقول مبروك؟
- طبعا يا احمد.. انا كسبت النهارده ابن والله.. ربنا يسعدكوا يارب
- طيب ان شاء الله.. كتب الكتاب يوم كذا.. الفرح يوم كذا.. تمام كده؟
- قبل كتب الكتاب عندي طلب صغير لو سمحت
- حضرتك تؤمر.. اتفضل
- شوف يا سيدى.. هديلك عنوان دكتور.. عاوزك تعمل كشف سريع كده عنده
- كشف طبى يعنى؟؟ اطمئن يا عمى.. الحمد لله عملت كل ده بعد عملية معدتي.. انا فاهم طبعا ان النوع ده من العمليات جديد والناس بتقلق منه.. بس الحمد لله صحتي بعد العملية زى الحصان.. انا نفسى.. حاسس بنشاط غير عادى مع الوزن الجديد وزى ما يكون الفولت بتاعى على.. كأني حاطط صوابي في الفيشة.. (وضحكت ضحكة بريئة جدا.. ضحكة واحد اهل)
- لا مش قصدى كده.. انا عاوزك تطمئن على نفسك وانا كمان اطمئن على بنتي
- تطمئن ازاي مش فاهم؟؟
- انت عارف طبعا ان الجواز اساسه العلاقة الشرعية.. اوضة النوم يعنى.. عاوز اطمئن على مستقبل بنتي في الجزئية دى..

وشى بقي زى حبة الطماطم وانا بقوله..

- انا مجربتش والله يا عمى الحكاية دى قبل كده.. انا مطلق صحيح بس ملحقتش الحاجات دى.. آخر معلوماتي هو الكلام بتاع هبة قطب
- طبعا يا ابني طبعا.. انا فاهم.. بس انا عاوز اطمئن
- ايوه يعنى تطمئن ازاي برضه!!
- افرض يا ابني طلعت مش كويس.. افرض مبتخلفش.. يبقى ذنب بنتي ايه انها تقضى حياتها مع واحد كده؟؟
- ايه!!!!!!
- اعذرني يا ابني.. انا مطلعتش من ديني الا بالبنات دى.. عاوز اطمئن عليهم في كل حاجه قبل ما اموت
- طيب.. حضرتك افرض ان هي الى طلعت مش بتخلف.. او طلعت مضروبة.. اعمل انا ايه؟
- لا يا ابني.. انا بنتي زى الفل.. اشرف من الشرف
- وانت عرفت منين؟؟ انت عاوز تعرف قدرتي كام حصان ومفترض ان بنتك زى الفل.. رغم انه لا انا ولا هي سبقلنا حاجه زى كده.. ورغم كده حضرتك افترضت انها A1.. طبعا.. ما هي بنتك.. انما انا ابن الخدمة
- لا يا ابني.. مقصدهش والله
- وللا تقصده.. انت عاوز تتأكد من اني اقدر اقوم بواجبات الزوج.. طيب.. ايه علاقة الموضوع ده بالخلف؟؟ افرض طلعت سليم بس مش بخلف؟ هيكون موقفك ايه؟؟ هتطلبها الطلاق؟
- والله يا ابني يبقى القرار هنا للبنات.. بس عن نفسي.. هقول لأ
- حضرتك بتكلم جد؟؟
- هو الكلام الجد لازم يبقى فلوس؟؟ الفلوس بالنسبالي متسواش.. انا يهمني اطمئن على بناتي.
- طيب ان طلعت سليم دلوقتي.. وصابي اي حاجه بعد الجواز.. حادثة مثلا.. هتخلي بنتك تطلب الطلاق؟؟ وان كنت انا سليم وبنتك طلعت فستك بعد الجواز او باظت بعد كده.. هتقول ايه؟ وان طلعت هي مش بتخلف.. هتعرضني عن الفلوس الى دفععتها وعن لقب مطلق الى همشي بيه زى عار على كتافي..
- الراجل ميعيبوش حاجه يا ابني
- ازاي بقي.. مطلق مرتين.. ومرة منهم بنذالة علشان هبقى طلقت مراتي لأنها مش بتخلف.. مين يرضى ياخذ واحد كده
- الا ناس زبالة؟
- المستقبل بأيدي ربنا يا ابني

- ولما هو بأيد ربنا حضرتك بتقاطع ليه؟؟ انت عاوز زوج لبنتك وللا ثور تخصيب!!
- انا مش بقاطع.. انا بقولك الى يطمن قلبي.
- ربنا يطمن قلبك دايم يا عم الحاج.. بص انا مليش في الكشوفات دى.. انا راجل احب العملي.. قوم نادى البنت وانا اوريك فيلم سيدة الأقمار السوداء دلوقتى.. لعلك تتعلم حاجه جديدة.
- ايه الى بتقوله ده يا ولد انت.. انت واعى لكلامك؟؟

وهنا.. انفجرت زى القنبلة..

- انا الى واعى!! انت غالبا يا محشش.. يا لسه مصطبحتش.. انا سايبك من الصبح عمالك تعك وترمي زباله عليا وانا ساكت.. أقول هياخد باله ويتعدل.. وانت ولا هنا.. سابق في الهبل وعمال تدوس على كرامتى ولا كأنك اشتريتني وفي الآخر تقولي ربنا.. هو ربنا قالك تحرج الناس بطلب زى ده؟ ده ايه المخ ده؟؟ انت انسان مريض ولا شك.. دى حاجه معملهاش أبو جهل نفسه في عز ايام جهله.. لا ولما اقولك اكشف انا كمان على بنتك.. تقولي انها اشرف من الشرف.. وهوانا يا خويا اعرف منين ان كانت شريفة وللا مقرطساكوا.. اهو البطيخ المقفول شبع تخبيط.. عليا النعمة الشرف اشتكى منك ومن بلاويكوا..
- احترم نفسك.. متنساش انك في بيتي..
- بيت الغيرة وقلة القيمة.. ده انا كنت هلبس في الحيط لو دخلت البيت ده.. الحمد لله فلوسي حلال.. ومكتبة وعاملي فيها مثقف ومطلع وانت اجهل من الدواب.. آمن بالله.. انا هطلع على انيس منصور دلوقتى.. ا قوله الحق.. في راجل كذا كذا كذا بيقرأ كتبك.. وهو هينتر من الاحباط او يطلع بيان في الجرايد يتبرأ منك ومن افكارك.. يا راجل يا مهزأ يا عديم المنطق.. اوعى من وشى بدل ما اشوطك ارميك من الشباك.. انا غلطان انى قللت من نفسى.. وقعدت اسمع كلامك الفارغ ده.. بلا قرف.. اتقو.

وخرجت من البيت ودخان الغضب طالع من ودانى زى قطر السكة الحديد.. غضب خلاني حرقت علبه سجائر كاملة في اقل من ساعتين.. خطبت واحد بالعربية وكنت انا الغلطان ومع ذلك نزلت شتمته ومسحت بكرامة اهله الارض.. كلمت صاحبي وشتمته هو ومراته بأهاليهم رغم انهم مكانوش على علم بكل التفاصيل دي.. غضبت غضب خلاني كتلة زباله عمالة تشتم في كل شيء واى شيء بسبب وبدون سبب.

ام العروسة استنكرت تصرفي في العلن وكانت مؤيده لجوزها تماما في طلبه الغريب.. بينما قبل ما اسافر اتصلت بيا علشان تعتذر وتتأسف على موقف جوزها المخزي.. مش كده وبس.. لا.. دى كانت عاوزانى ازورهم تانى واعتذر لأبوها وهو اكيد هيسامحنى على عصبيتي.. مصارين البطن بتتخانق برضه.

- ماشى يا طنط.. موافق على الزيارة بس شرط
- ايه يا ابني.. اتفضل
- مفيش جواز الا لما اتأكد منها الأول.. لازم اجربها وتطلع بتخلف.. مش هعقد الدنيا وأقول تخلف ولد.. دى هسيبها لربنا
- ميصحش يا ابني الكلام ده.. عيب كده
- عيب.. وهو انتو تعرفوا العيب يا عالم يا *****

وقفلت الخط.

خلصت الحكاية لحد كده.. حتى يومنا هذا.. مش لاقى اى مبرر للتصرف ده.. خصوصا انى عرفت ان الراجل عمل كده مع كل عرسان بناته.. حتى يومنا هذا مش قادر انسى الاهانة دى.. حتى يومنا هذا بتعصب كل ما تيجي سيرته.

لما حكيت الموضوع ده لام حمزه كانت حامل.. لقيتها اخدت الموضوع جد اوى واصرت انى اكشف على نفسى.. قالتلى ارجوك يا احمد ارحمنى من الشك.. عاوزه اطمئن.. عاوزه اعرف الولد الى في بطني ده.. مين امه.

تيس مستعار

عارف لما المجتمع كله يبقى خصمك؟؟ وقتها بس هتفهم وتحس بالحكاية دى.

حكينا قبل كده عن حياة الغربية وكآبتها خصوصا بعد الثلاثين فلا داعي لتكرار الكلام.. يكفيني اقولك انك بترعى عمرك كله في مقابل شوية فلوس.. لا هتقدر تقف جنب ابوك في مرضه ولا جنب اختك وهى بتتجوز.. لا هتبوس ايد امك كل يوم ولا هتقدر تنسى هموم الكون على القهوة وسط صحابك.. اخرك في اى موقف او اى حاجة في الدنيا قرشين ترميهم من بعيد.. وشكرا.

انت مش وحش.. بس انت بعيد.

علشان كده لما امي قالتلى عندي عروسة.. مسمعتش باقى الفشر الى هتفشره عليا كالمعتاد.. خلاص انا نازل يوم الخميس.. مش مهم اى تفاصيل.. المهم انى نازل مصر.. علشان اشوف ابويا الى كانت صحته بتتدهور بسرعة.. بسابق الزمن علشان اتجوز وافرحه بأحفاده.. أخواتي جابوله صبيان وبنات صحيح.. بس هو كان مستي حمزه.. وصاني أقوله ان جدك كان بيحبك اوى وكان نفسه يشوفك.. بس امر الله كان أسرع.

العروسة من نفس بلدنا.. المرة دى مفيش حد غلطان.. الغلط هنا هو ميراث القرف الى بتدفع تمنه أجيال لم تشارك في صنعه.. الغلطة هنا يتحملها المجتمع الى قطع ظهور الشباب وحطم أحلام البنات وحرقت قلوب الأمهات وكسر نفوس الإباء.

المعلومات المتوفرة مكرره.. بنت من ذوى المؤهلات العليا.. مقدرتش تشتغل فقررت ان بيت جوزها أولى بيها.. واديها اهو قاعدة في انتظار العدل.

بيت مصري تقليدي جدا.. النظافة المبالغ فيها علشان العريس.. عباية أمها المطرزة.. همسات وضحكات اخواتها واصله لوداني في صالون البيت.. فكروني بيا انا واخواتي زمان لما كان يجيلنا ضيف ونقف نتفرج عليه من ورا الستائر رغم نظرات امي المتوعدة بعلاقة محترمة لما الضيف يمضى.. عملت نفسى.. مش واخد بالى من أصواتهم علشان محرجهمش.. كمان كنت مبسوط اوى ببراءتهم.

الاب موظف حكومي عادي جدا مفيهوش اى شيء يحكي.. افدر أتوقع هيقول ايه كمان شوية.. افدر اخمن هو بيشتكي صحيا من ايه.. بوضوح جدا افدر اعرف طبخوا ايه النهارده وهيتغدوا ايه بكره.. شايف أمها بربطة الرأس الملعونة وهى بتتنفض المراتب في البلكونة.. ناس طبيين جدا عاشوا علشان عيالهم.. معندهمش في الدنيا اى أحلام الا جواز البنات.. ناس بسطاء ماديا وعقليا وثقافيا.. بالنسبالهم واحد في ظروفى يعتبر حادث لا يتكرر الا مرة واحدة في العمر.. اللهم لا غرور.. اسألك رفعة الحال وتواضع النفس.. احببني واقبضى مع المساكين يا رب.. بس هي دى الحقيقة المجردة.

الى شد انتباهي في البيت ده هو العروسة نفسها.. البنت مكسورة بشكل مبالغ فيه.. عينها مش بتتحرك ولا نطقت بربع كلمة.. صوابها مبطلتش حركة فيما ينم عن توتر شديد.. جميلة بدون اى ماكياج.. شيء غريب فعلا.. من امتى البنات في المواقف دى مش بتحط كل الوان الدنيا!!! دى البنات بيبي وشها شبه البلياتشو من كتر الالوان.. البنت شكلها حزين.. ليه.. مش عارف.

حوار قمة في الملل.. الناس دى مش هاممها الا "ذكر" يشيل ويمشى.. تكررت الزيارات بينا وبينهم وموقف البنت والاهل زى ما هو.. الناس مش طمعانين في اى شيء اطلاقا.. صدمت من رد ابوها بانه مكتفي ان البنت هتعيش في السعودية.. قالها بأسلوب حالم خلاني رجعت بالكروسي شوية لورا لأحسن الراجل من شدة الوله يقوم عليا يحضنى ويوسني بالغلط.. الراجل بيتكلم عن السعودية زى ما انا كنت بتكلم عن هياتم كده.. حب وعشق وهيام وغرام..

- يا بشمهندس ده كفايه انك تقدر تعمل عمره في اى وقت
- وهو الحرم بيقفل.. انا ممكن اشتغل في دولة تانيه واروح ازور الحرم عادى على فكره..
- ايوه.. بس انت دلوقتى اسهل.. ممكن كده كل شهرين ثلاثة تشد الرجال وتزور البيت.. ياااااااااا.. اللهم صلى عليك يا نبي

شهرين ثلاثة مين!! انا ممكن ابقى قاعد زهقان في وسط الأسبوع اروح قايم رايح المطار.. 3 ساعات ابقى في مكة.. ساعتين عمره
وزيارة و3 ساعات كمان أكون في بيتنا.. حسيت انى لو قلت للراجل كده ممكن يغمى عليه.. حبيت انكشه شوية فكملت كلام..

- على فكره يا عمى.. الاحساس الجميل ده بيكون في المدينة.. مكه مدينة كثيبة جدا والمسجد الحرام نفسه هندسيا
اقل جمالا من مسجد سيدنا النبي.. المسجد الحرام له هيبة وجلال.. المسجد النبوي له الحب كله وفيه الراحة
النفسية كلها.. ده المكان اللى فعلا تروحه وتخرج منه بضرب الجزم.

الراجل سمع الكلمتين دول راحت دموعه نازله وهو بيصلى على سيدنا رسول الله.. انسان طيب جدا ونقى القلب الى اقصى-
درجة.. لا اعتقد انه متفقه في الدين.. ايمان فطرى أساسه محبة الرسول واهل بيته.. يمكن لو سألته مين هما ال البيت معرفش
يجاوب.. بس تلقائيا كده هيقلوك رضى الله عنهم.

البنت حزينة جدا..

أمها بتحاول تفتح مواضيع وتألش وتلطف الجو.. ضحكت من براءتها وسطحياتها مش من الألش بتاعها.. ألشه كمان وكنت
هفقد قدرتي الإنجابية للابد.. رميتها موضوع العفش علشان تتلهى فيه وتنسى.. الألش.. الست مكنتش مصدقة انى متكفل
بالفرش كله.. من فرحتها اتلخبطت في الكلام وانا بقولها مفيش قابمة.. راحت قايللا ايه طبعا امال ايه.. القايمة دى ربا.

ولسه برضه البنت حزينة..

نتلكم عن فساد الحكومة.. مغامراني في السفر.. الحياة في الخليج.. السينما.. الكتب والتاريخ.. الاكل والطبيخ.. اى حاجه وكل
حاجه.. والبنت زى ما هي.. حزينة وغير مهتمة..

مقدرش انكر انى اتضايقت وكرامتي نقحت عليا.. العرق المملوكي طلع في نافوخي بشدة.. قلت في الأول يمكن بتعزز نفسها.. بس
حتى لو كده كان هيبقى لها اخر.. الزيادة اوى دى وراها قصة.

كان ممكن انهي الموضوع بكلمتين.. بس الفضول كان هيقولنى علشان اعرف هي قافشه كده ليه.. في الوقت ده تحديد كان
بيتعرض عليا كل يوم مش اقل من 5 عرايس وانا بتدلج.. التجاهل دى استفزني بشدة فطلبت الانفراد بالبنت.. في بيتهم طبعا
على مرأى ومسمع من الكل.. بعض الخصوصية يلزم علشان نكشف اغوار الحزينة دى.

أمها لقطت طرف الكلام منى وقعدت تقول أشعار في بلكونتهم وهواها البحري.. مش عارف جالها منين القدرة دى على وصف
بلكونة لو تقلت شوية في الغداء ممكن كرشى يطلع بره السور بتاعها.. رباطات البصل والثوم المتعلقة في البلكونة تتناقض بشدة
مع اقفاص العصافير.. مش عارف هما بيربوهوم وللا بيعذبوهوم بريحة الثوم ده كله.. محدش بيربي كل كمية الثوم دى الا لو كان
خايف يطلع له دراكولا في يوم من الأيام.

نظرات عميقة للبنت مع شوية سكون علشان تتوتر فمتعرفش تكذب.. بعدهم كلام هجوي مباشر يقتل اى قدرة على الاختلاق
والتبرير.. مش عاوز الا الصراحة..

- انا عارف انك مش موافقه.. واضح جدا ان الموضوع مش على هواي.. يهمني اعرف السبب علشان اشوف هنقول
للناس ايه.

- انا.. لا ابدا مش كده.. عادى يعنى.. ليه بتقول كده؟؟

لا اكره في حياتي اكر من "عادى يعنى" دى.. مليش خلق خالص على دلح النسوان ده.. الى تعبانة تقول تعبانة من كذا وكذا..
الى جعانة تقول عايزه اكل.. الى عاوزه تتطلق تقول طلقني.. انما شغل الاهتمام مبيطلبش ولو مهتم كنت عرفت لوحدك
واعمل الى انت عايزه ده ملوش عندي الا مزيد من التجاهل والعنف.

- على فكره... لازم ببقى في سبب نقوله للناس.. علشان سمعتك وسمعتي.. ويفضل ميكونش سبب مادي.. اطميني انا
مش من هواة اللت والعجن.. الى هنتفق عليه هيفضل سر.. ومش هكرر كلامي تانى..

البنت توترت شوية بس الحيلة افلحت.. بالتفكير المنطقي.. لازم فعلا سبب نقوله للناس علشانها هي أولا مش علشاني.. لمست
فيا ضيق الخلق فقررت تفضفض..

- هوانا ممكن اثق فيك كأخ؟
- طبعا
- طيب.. بص.. انا هقولك.. بس تحلف بالله ان الموضوع ده هيفضل سر..
- من غير حلفان.. انا كلمتي واحدة..
- رغم اني معرفكش.. انما حاسه انك راجل جدع.. شوف يا سيدى.. انا مرتبطة بعهد مع انسان تانى من ايام الكلية.. هو ظروفه صعبه شويه.. اتقدملى مره ورفضوه علشان لسه مش جاهز وكده.. هو كويس والله ويحاول يبقى احسن.. بس اديك شايف ظروف البلد.. انا مش هقدر ارتبط بحد غيره.. بقالنا 6 سنين مع بعض.. ومستعده انتظره كمان 6 سنين.. بس هما هنا مش سايبينى فى حالى.. كل شويه عريس.. فمفيش قصادي غير كده.. فهمت؟
- اه.. يعنى انتى بتفطشى العرسان لحد ما هو يجهز.. طيب ما انتى قلتي ان اهلك رافضينه علشان انتوا تعرفوا بعض.. يعنى مش مشكلة الشقة والامكانيات بس.. دى مسألة مبدأ عند اهلك.. اعتقد ان حتى لو ظروفه اتحسنت.. هيرفضوه برضه.
- موضوع الشقة ده حجه منهم.. هما بيحاولوا يعقدوا الموضوع بأى طريقة.. ومفيش اسهل من كتر الطلبات.
- طيب انتى مالىه ايدك منه.. مقصدهش حاجه معينه.. انا لا اعرفك ولا اعرفه.. انما انا بتكلم فى العموم.. اغلب القصص دى بتنتهى النهاية المعتادة.. هيركنك شويه وبعدين يقولك انا اسف.. ظروفى مش بتتحسن ومش عاوز اضيع وقتك اكر من كده.. بعد ما يكون فعلا اكل من عمرك كام سنه.. ده لو هو محترم.. او ممكن يلاقي واحده انسب منك لظروفه فيقولك يا ريت نبقي اخوات احسن.
- لا والله.. هو انسان كويس جدا.. بيشغل شغلتي دلوقتي.. كمان هو مؤدب وعلاقتنا فى منتهى الاحترام.. انا بقول لو صبرت شويه.. ممكن يقولوا خلاص ويزهقوا ويوافقوا عليه.
- امتد الكلام بينى وبين البنت.. فهمت موقفها واحترمتها جدا.. انا بس بزود معاها فى الكلام علشان يمكن الاق حاجه اقولها لأهلي عن سبب الرفض من غير ما ياكلوا دماغي.
- كل ما البنت تتكلم احترامي لها يزيد.. مسكينة فعلا.. واحده غيرها كانت ممكن تتجوزه من ورا أهلها زى ما بنشوف فى قصص السينما الرخيصة اللى بتعجب البنات واللى عظمت من قيمة الرومانسية على حساب قيم الاسرة والاحترام والتربية.. واحدة تانية اكثر سفالة كانت اتجوزت واحد يصرف وكملت مع الحب القديم.. الدنيا مليانه بلاوي والواحد ياما سمع وشاف.
- مسكين الواد يا عيني.. زمانه قاعد بيفرك دلوقتي وهو متخيل ان البنت بتاعته فى واحد تانى بيعاينها.. مسكين وهو بيقارن حالة بحال اللى جاى من بره.. اتخيل مشكلة وهو بيفرغ غضبه فى البت بعد كده.. ماهو مفيش فى ايده حد يستقوى عليه الا هي.. وهي يا عيني فاهمه وساكته.. قهر من البيت وقهر من اللى عادت البيت علشانها.. زى ما هو مقهور فى الشارع والشغل والبيت وكل مكان.
- تخيلت انها كان ممكن توافق تتجوزني وهي بتحب واحد تانى.. الفكرة لوحدها خلت دماغي تغلي.. هعمل ايه لو كنت اكتشفت كده بعد الجواز؟؟
- ده انا كنت دفنتها بالحياة وسلمت نفسى لحبل المشنقة طائعا مختارا..
- مكنتش غضبان خالص من البنت.. انما هي الأفكار السوداء دى هي اللى غيرت مزاجي.. البنت وصاحبها صعبانين عليا..
- طيب.. اتمنالكو التوفيق طبعا.. والله لو قدرت اساعدكوا.. مش هتأخر
- تقدر طبعا
- ازاي؟
- يعنى.. هو طلب صعب شويه.. بس انت شكلك راجل جدع وهتقدر.
- خير يارب.. عاوزانى اكلم اهلك علشانه مثلا؟ وللا هتتجوزيه من وراهم وعاوزانى اشهد
- لا طبعا مش كده.. لو حضرتك يعنى توافق اننا نتخطب كده وكده.. مؤقتا لحد ما هو يجهز.. وبعدها نفرکش.. يبقى كتر الف خيرك.. والله مش هنسالك الجميل ده ابدًا.
- ثانيتين ثلاثة كده فكرت فيهم انى ارميها من البلكونة.. علشان لو مماتتش من الارتفاع تموت من الرعب.. بس فى الثانية الرابعة جالي خاطر خلاني احترم البنت زيادة..

البت يا عيني بتفكر تعمل اى حاجه وكل حاجه علشان خاطر ترتبط بالإنسان الى هي عاوزه.. انا شايف ان ده من حقها..
أخطأت في الطلب صحيح.. بس هي عاجزه عن اى تصرف.. قلة حيلة غير طبيعية تصعب عليك غصب عنك..
اتبسطت من كلامها رغم انه عك في عك.. قررت الاعيها شوية.. انا فهمت المشكلة وهقدر اساعدهم.. بس لا ضرر من شوية
رخامة..

- اخطبك علشان احجزك ليه؟؟ محلل يعنى.. تيس مستعار.. عظيم جدا..
- لا والله مش قص.....
- ولو عملنا الحل القدر ده.. نأجل الجواز اذ ايه لحد ما قيس بتاعك يجهز؟؟ البعيدة هابله؟؟ مش واخده بالك ان
اقصى مده ممكن ننتظرها هي 3 شهور مثلا..
- انا اسفه والله.. مش قصدى ازعل حضرتك.. انا قلت يعنى.. يمكن.. انا مش عارفه
- طيب ماشى.. سيبيني اتصرف وهحاول اساعدك.. من غير ما ابقى بقرنين.
- مش قصدى والله.. انا اسفه جدا
- هقولك نصيحة اخ اكبر.. نصيحة هتنفعك وتنفع كل الستات.. ارجوكي بلاش تفكري ابدأ بعد كده.. سيبيه هو يفكر
وانتي نفذي من سكات.. نص مشاكل الكوكب هتتحل لو الستات بطلت تفكر.. اعملى لنفسك وليه وللبيشية خدمة
جلية وبطلتي تشغلي مخك خالص.. ال اخطبني كده وكده ال.. اوعى يا شيخة من وشى.. بلا لعب عيال.
كده انا فهمت المشكلة وعرفت الحل.. شغلانة بره مصر.. هتنقذهم من كل ده.. وعدت البنت انى هحاول اساعدهم بدون اى
التزام فعلى بأى شيء.. ابتهج وش البنت اول ما قتلها كده..

- متنسيت تكشري تانى واحنا داخلين..
- ليه.. ده انا مبسوطه اوى
- وهقوليلهم ايه عن سبب السعادة دى يا ماري كوري طنطا؟ هو انا مش من شوية قايلك متفكرش خالص.. نفذي
من سكات الله لا يسيئك
- ايوه ايوه.. عند حق.. خلاص هكشر

انتهت الزيارة مع كلام لا يحمل اى وعود ولا اى التزام.. اهلى خلاص عرفوا انى طالما متكلمتش ببقى الموضوع مش على هوايا..
عندي اكثر من سبب ظاهر يكفي للرفض.. بس السبب الحقيقي محدش عرفه ابدأ.. حتى هذه اللحظة.

رجعت الرياض لا الوى على اى شيء.. في قعدة دردشة على القهوة مع صحابي عرفت ان في شركة هنا بتدور على شاب زى
الجدع إياه صاحبها.. كلمتها وطلبت منها تبعتل ورقه.. حطينا سيناريو محترم علشان نبرر تواصلنا معاها.. الولد بعثلي الورق
بتاعه وانا وصلته للناس زى ما هو ونسيت الموضوع كله.. انا مش فاضي للمجنن ده.. انا فيا الى مكفينى.

بعد 3 شهور جتلي رسالة على الواتس اب من رقم معروفش.. فتحت الرسالة لقيت صور خطوبة.. فريت في الصور بملل.. ايه
الجديد يعنى في اتنين بيتجوزوا.. تبعتوا صوركو كده للناس الى متعرفوهاش ليه.. ايه الهبل ده؟؟

وبعدين مالها البت عاملة زى المهايل كده ليه.. ايه كم الفرحة دى كلها.. هي كانت بايره وللا ايه!!!

والواد ماله كده مش على بعضه.. بقى ده عريس بالذمة!! فين الهيبة والوقار.. عيب كده.. ده انت هتبقى رب اسرة.. ايه المنظر
ده!!

ثانية كده..

دى البت إياها..

سبحان الله..

فهمت الموضوع من غير شرح.. الواد سافر وظروفه اتغيرت.. اكيد أهلها وافقوا عليه.. واديهم اتخطبوا اهو.. لسه هتصل بالرقم
علشان ابارك لها لقيتها بتكلمي وتبعيط من الفرحة.. انا اول واحد بعثله صور خطوبتها.. انا اول واحد بعد ربنا حبت تشكره..
انا الوحيد الى عرف سرها وحافظ عليه طول السنين دى.. مبقيتش عارف اقولها ايه من كتر كلمات الشكر الى بسمعها بصعوبة

من وسط صوت البنت المخنوق بدموع الفرح.. اتمنيتها التوفيق وفكرتها تاني بنصيحتي ليها بعدم التفكير.. ضحكت من قلب قلبها المرة دى وهى بتقولى محدش له كلمه عليا بعد جوزي الا حضرتك.. انا لو ليا اخ من دمي مكانش هيعمل معايا كده..

انهيت المكالمه ورجعت اتفرج على الصور تاني.. بس المرة دى بعين مختلفة..

مال قارون كله ميقدريش ابدأ يشتري السعادة الى على وش العيال دى.. لقيت نفسى- تلقائيا بقول على أمها يخيبك ولية.. بقى كنتي عاوزة تدفي بنتك معايا وتحرميها من اليوم ده.. ايه المخ ده؟

اهو ربنا جمعها بالإنسان الى هي عايزاه غصب عن بوذ ابوكوا.. وكمان هيعملكو فيزا علشان تطلعوا تعملوا عمره وحج كمان.. كان لزومه ايه بقى من الأول الغباء وقهر البنات؟

13 سنة عدوا على الموضوع ده وعمرى ما نسيتته..

13 سنة الواد كل سنة بيدعى عليا فيهم دعوة شكل.. لوربع الدعوات دى اتقبل.. يبقى انا لابس في جهنم وش.

ليه؟

اصلها خلفتله 5 عيال مطلعين عين الى جابوه.

بفلوسي يا كلاب

الى اى مدى ممكن ان يبلغ حرص الأهل على مستقبل البنات؟

سنة 2004 كانت من اجمل السنين في عمري كله صحيا ومهنياً واجتماعيا.. 27 سنه.. قوى زى الثور.. شغلانة شربات.. ابويا في قمة هرم حياته الوظيفي.. مفيش في الدنيا حاجه احلى من الفلوس الا السلطة.. ابويا اخيرا اقتنع انى لازم يبقي عندي عربية خاصة.. فكثر خيره سابلي عربيته البيجو 504.. ركبت فيها كاسيت وجنوط نيكل ولمبات زينون ومشيت ادوس بيها على الخلق من كتر الفشخرة.

الحياه كانت جميله لا يعكر صفوها اى شيء.. مفيش في حياتي الا الشغل والأكل.. فلوسي كلها رايحه على المطاعم.. امسياتي كلها تنتهى بسهرة صباحي على انغام العود عند زيزو النتن او بابا عبده في احضان اثار القاهرة الفاطمية.

الحال ده مش لادد على جدي.. قايم نايم معندوش سيرة غير الواد الى داير يتصرمح مع بنات مصر.. تحلفله على المية تجمد ان الحياه شغل وأكل بس.. وهو ولا هو هنا.

طب عليا مرة في شقتي في القاهرة علشان يقفشني متلبس بسهرة حمراء.. خاب امله لما لقاني بصلى العشاء انا و2 صحابي.. استني لما خلصنا صلاة وبعدين دخل في الجد علطول بنظرات شك انى كنت بعمل حاجه غلط بداريها بموضوع الصلاة ده..

- شوف يا سيدى.. تاجر خشب كبير من طنطا.. متعلم وعنده 6 بنات
- يا قوة الله.. 6 بنات.. ما شاء الله.
- اه.. مليونير محترم جدا وسمعته زى الجنيه الذهب..
- تاجر ومليونير ومحترم.. في مصر؟ ايه الهبد ده!!
- زى ما بقولك كده.. ومعرفة خالك الكبير كمان.
- كمان معرفة خالي.. يبقى ضلالي مفبهاش كلام دى.
- لا خالص.. ده راجل كويس.. الى عليها العين تبقى بنته الكبيرة.. خالتك شافتها وقالت انها حلوة ومحجبة.. ابوهم قافل عليهم طول عمرهم.
- طيب حيث ان الراجل عنده 6 بنات.. ما اخد اتنين.. يمكن الراجل يعمللى ديسكاونت.
- يا واد اعقل بقى.. الى ادك عيالهم في المدارس.. انا خدتلك معاد معاهم الخميس الجاى واتفقت مع ابوك.. زمان الموكوسة امك اشترت هديه العروسة خلاص.
- طيب.. عاوزيني معاكوا ليه بقى.. مانتوا مظبطين كل حاجه اهو.. بقولك ايه يا حاج.. روح انت اكتب بدالي.. بس متنساش تنادييني يوم الدخلة علشان لازم أكون موجود بنفسي.. وربنا الى هيدخل مكاني هزعل منه اوى.
- لو لسانك ده يتقص منه 3 متر بس.. ده احنا هنجوزك.. هو احنا هنرميك في النار.

جدي كان صديقي بشده انا بالذات دونا عن احفاده الاربعين.. يمكن علشان كنت اول احفاده الذكور.. لما كنت اعترض على سرقته ليا في الطاولة كان يقولي اذا كان امك ثم امك ثم امك.. ما بالك بأبو امك؟؟

الاستعدادات والتليفونات في بيتنا ماشيه على قدم وساق من قبل الزيارة بأسبوع.. امي مهتمة اوى المرة دى.. مفيش خناقة كل مرة انى أهبل واشترت تورتاية غاليه خساره في الى هيطفحوها.. المرة دى هي الى اشترت التورتاية ونصبت عليا في تمنها مرتين.

وصلنا عند بيت النسب السعيد.. وقفت بره البيت ثواني اراقب احلامي وهي بتنهار زى بيت زجاجي صابته طوبه من عيل من بتوع العشوائيات.. قبل ما تقول انى متسرع.. خد معايا اللقطة دى..

عماره كبيره بأبواب حديدية فخمة وضخمة زى أبواب قلاع العصور الوسطي.. اخر دورين عباره عن فيلا شكلها باين من تحت انها فوق مستوى الثراء الفاحش.. مساحة البيت مش اقل من 1000 متر.. الرخام في كل مكان.. الدور سفلى معمول جراج راكن فيه 4 عربيات احداهن مرسيدس موديل سنة 3000.. جمبها عربيات بيئه من فصيلة الداى والانس والكلاب الزبالة ده.. بالمناسبة.. بعد 8 سنين شغل وسفر وفحت وردم اشترت عربية لانسر موديل 99 سالف نص تمنها من ابويا.

نظرة ذات مغزي لأمي.. هاجت عليا ذكرى بنت الباشا المنوفي الى كان عاوزني كوبري.. ابويا كالعادة.. وشه زى الحجر متقدرش تعرف أبدا هو بيفكر في ايه.. بينما جدى على الطرف الاخر ابتهج وكان ناقص يفرق شربات وهو فرحان ان في مكان يركن فيه عربيته هنا وهو جاى يباركلي في الصباحية.

ده بره البيت.. اسرح بقى بخيالك علشان تتخيل ما هو داخل البيت.. الراجل ده عانى من حرمان بشع في طفولته.. تكلفة الصالة لوحدها مش اقل من 2 او 3 مليون جنيه.. تحف ومفروشات خيالية.. بيانو ابانوس وعاج اصلى في الزاوية.. رخام راجستان الهندي الفاخر في الارضيات المتغطية بالسجاد الايراني الفاخر جدا.. تكلفة الصالة لوحدها لو انا مش غلطان ممكن تتعمل 5 او 6 شقق يعيش فيها امثالي من الشحاتين في نعيم.

الراجل ده مش حارم اولاده من حاجه اطلاقاً.. ذوق حريمي فاسد واضح اوى في البيت.. البيت متكلف بس مفيهوش فن.. مش هستغرب لو لقيت الراجل ده لابس ساعة كاسيو من بتوع العتبه او بيخرج لابس اى كلام.. مش هتتعجب لو كان بيتعامل مع عم سعيد الحلاق أبو بيضة ورغيف.. مش هندهش ابدا لو لقيته قاعد يتغدى طعمية وبتنجان مقلي بينما بناته بياكلوا لحم نعام.. ده راجل طلع من تحت الأرض وعمل ملايين.. شقى وتعب وسف تراب التراب علشان يلاقي لنفسه مكان زى ده في الدنيا.. شاف من الدنيا الى محدش شافه وتبهل واتمرمط فوق مستوي الخيال.. علشان كده قافل على بناته تماما ومحول بيته الى جنة متكاملة فيها كل شيء بالنسبة للبنات علشان مفيش واحد فيهم تبص بره لأى سبب.. عنده الف حق.. انا لو مكانه هعمل كده.. ومش هنسى افصل فيشة الراوتر بتاع النت قبل ما انزل.

- اهلا وسهلا.. شرفتونا والله.. ده احنا زارنا النبي
- اهلا بحضرتك يا حاج.. الشرف لينا طبعاً
- انت بقى احمد الى خالك مصدعني بسيرتك.. ايه يا خويا.. محدش خد بكالوريوس هندسة غيرك وللا ايه!!
- ده من اصلك يا حاج عبد الغفور.. لا مؤاخذه.. اصل حضرتك بالدخلة والبالطو دول فكرتي بعبد الغفور البرعي بالظبط.
- ههههههه.. اه.. ماهو كان زميل برضه

الألشه دى منى كانت طُعم علشان اسمع منه قصة كفاحه.. حبيت ادخله من مدخل الشغل والكفاح علشان يحس ان ده محط اهتمامي.. اكيد مراته أرشانة وهتفقع مرارة الى جابوني لما هتتمنظر على امي بالذهب وامي ترميلها كلام بالفرنساوي علشان تحسسها انها جاهلة.. انا معادش فيا حيل لحركات النسوان دى.

الراجل مش سهل ابدا.. خد منى كام كلمة كده في الأول وبعدين قلب على قصة كفاحه هو.. جاب اخري في كلمتين وبعدين قلب الموضوع.. حسيت بشوية إهانة.. بس قصاد راجل زى ده مش هيظهر على وشك الا الاحترام الشديد اوى.. حتى لو شتمك بأهلك.

فجأة كده ومره واحده.. دخل علينا ال 6 بنات كلهم مع بعض.. جايين ورا بعض في صف واحد.. كلهم شبه بعض.. وتقريبا لابسين زى بعض.. شكلهم فكري بنات أمين الهندي في مسرحية لوكاندة الفردوس.. بنات مؤدبات ومحترمات كما يبدو.. هاديين خالص.. قعدوا كلهم جمب بعض زى ما نكون في الفصل.. مفيش ولا واحده اتكلمت لحد ما القعدة خلصت.

طب انا اعمل ايه.. مين فيهم العروسة؟ الفرق في السن مش كبير وفيهم اتنين توأم.. 4 منهم على الأقل ينفعوا عرايس ليا.. ايه الاحراج ده!!

مش لازم نعرف كل حاجه في اول زياره.. اكيد في زيارات تانية.. المهم ان القبول المبدئي حصل.

ما بين زياره عندهم وزياره عندنا.. راحت تحويشة عمري في جاتوهات وورد وديوك رومي وخرقان.. مش مشكله طالما الموضوع ماشى ربنا بيرزق.. لفت نظري ان الراجل كان بيسيب كل أصناف الاكل الفاخرة.. وياكل ارخص وابسط حاجه.. صدق حدسي ناحية الراجل ده.. شكلي هتعب معاه اوى.

المشكلة الثانية انهم كانوا ييزورونا ومعاهم قطر البنات كله.. لحد ثالث أو رابع زيارة مقدرتش اعرف بالظبط مين العروسة.. اخواتي البنات بقى ربنا يبارك فيهم هما الى حلولي الإشكالية دى.

لحد ما وصلنا للجد.

زياره منفردہ للراجل في بيته.. الراجل فاصل تماما البيت عن الشغل.. قاعد قصادي بجلاية البيت صحيح.. لكنه اكثر ثقة في نفسه من ملكة إنجلترا نفسها.

- طيب يا حاج.. انا طالب الشرف بالنسب.. لو عندك استعداد تبقى ابو أحمد.. انا في خدمتك.
- ربنا يديم المعروف يا ابني.. انت دخلت بيتي وعرفتني.. واكيد عرفت اني لا هجامل ولا هظلم.. انا حبيبتك صحيح.. وعلشان كده عارف انك هتفهمني.
- ربنا يديلك الصحة وطول العمر.. سمعة حضرتك العطرة تحميهم لحد يوم الدين.. كلهم في رقبي لو أمرت.
- وانا متأكد انك هتبقى اخوهم الكبير.. شقة البنت جاهزة في الدور الاول.. مش ناقصها اي فتفتوته.. هتعيشوا فيها سوا.. هتسيب شغلك وهتيجي تشتغل عندي في المغلق.. بعد ما اروح انا هتبقى انت المسئول عن كل حاجه.. طبعا كل حاجه باسم البنات.. ده حقهم وانت سيد العارفين.
- بس يا حاج مين قالك اني عاوز اسيب شغلي؟ ومين قالك اني بفهم في الخشب وللا في التجارة من اساسه.. الى انت عملته في 50 سنة شقي انا ممكن اضيعهولك في ست شهور.
- انا هعلمك كل حاجه وهتبقى تحت عيني لحد ما تشفى.. غير كده بقي.. شبكه وفرح والكلام الخايب ده.. ارميه من دماغك.. والى خلق الخلق هعملكوا فرح تحكي وتتحاكي عنه البلد كلها سنين قدام.

كمان!!

ليه كده يا حاج.. ما كنا ماشيين كويسين.. لزومه ايه التقطيم ده..

اتضايقت من كلامه وبان على وشي.. هو خد باله طبعا.. بس تجاهل كل ده وكمل كلامه عادي جدا..

- شوف يا أحمد.. بناتي هما كل دنيتي.. تربيتهم زي ما شفت كده.. بسكوت الهواء الطائر يجرحه.. لو سبتهم 100 سنة هترجع تلاقىهم زي ما هما.. يرضيك اسيبهم للدنيا تلطش فيهم؟
- مقلناش حاجه يا حاج.. بس انت كده مش عاوز زوج لبنتك.. انت بتشتري ذكر بالمعنى الحر في للجملة.. انت عاوز واحد تفصيل يقولها صباح الخير بالطريقة الى تعجبك ويخلف منها وقت ما انت تؤمر.. عاوز واحد تحت ايدك يوم ما يزعلها ترميه في الشارع.. انت عاوز واحد ياكل من طبقك ويسبح بحمدك.. يعيش تحت رجلك علشان تراقب كل تصرفاته.. هياكل احلى اكل ويركب عربية اخر موديل باسم بنتك.. مش هيبقي في البيت صوت الا صوتك.. ولا هتسمحله يعمل تجارة خاصة بيه.. انت عاوز زوج للبنت مجرد منظر بلا أى قوامة حقيقية.. انت عاوز موصلاقي للفلوس منك ليها بدل ما كانت بتاخذ منك علطول.. ومش بعيد اول ابن يتسمى على اسمك كمان.. صح يا حاج؟
- رغم انك مزودها شويه بس معلش.. بناتي وخايف عليهم.. وبعدين انت زعلان ليه.. هتعيش ملك مريح دماغك.. بيتك مفتوح وشغلك ماشي ومراتك في ايدك.
- طيب يا حاج.. انت قلت الى عندك.. تسمحلي اقول الى عندي.. وللا الكلام خلص لحد كده؟
- لا طبعا.. انا عاوز اسمعك اوى.
- صلى على سيدنا النبي.. مش هقولك اني زعلت من كلامك الى هزأني بالأدب او افترض فيا ما ليس فيا.. مش هقولك اني مش هرد على الكلام ده بسبب السن.. لا خالص.. انا مش هرد لأني احترمت حضرتك بجد وهيفضل احترام ليك لحد ما اموت سواء بقيت حمايا او لأ.. الاحترام ده يخليني مهتم اوى أوضح لحضرتك صورة اعتقد انها ممكن تهكم.. الى صنع شخصيتك هو سنين الشقي.. الى عمل منك الراجل الى احنا شايفينه ده هو اليتم وسوق الجمعة والبهدة وليالي الجوع.. الى خلاك النهارده في الوضع ده الثمن الى انت دفعته في شبابك.. حضرتك لما توفر لي كل الجو الى انت بتقول عليه ده.. بدمتك ودينك انت مقتنع اني ممكن ابقى بنى ادم؟

انا ابقى مش طبيعي لو مصرفتش فلوسي على المخدرات والنسوان وطفحتها الممار اشكال والوان.. انت كده بتفسدني يا حاج مش بتريحني.

ده أولا..

ثانيا.. كلام الجواز بقي علشان ابقى وضحت كل حاجه..

أغلي شبكة واغلي مهر يقطم وسطي وفرح ملوش مثيل.. كل ده هيتعمل لبنتك على حسابي.. هتعيش معايا في شقتي الى هفرشها كلها على حسابي.. انا الى هصرف عليها.. حضرتك هتسلمهاالي يوم الفرح برضاك وموافقتك.. هتدخل بيتي مش هتخرج منه ابدا الا وانا على ظهري.. الكلام الى هقولها لها انا واثق انها هتسمعه وتنفعه لأنها متريية وبنت أصول.. هتنوروا بيتنا بالزيارة حضرتك والحاجة خفاف خفاف.. لا اقفاص فاكهة ولا ذكور بط ولا ازواج فراخ.. كل ده هيتريي وانتوا لسه على سلم العمارة.. كمان لما نيجي نزوركو هنيجي بقيمتنا ونمشي خفاف.. لا اطرف مقفولة ولا أكياس لحم.. عيدية العيد هتبقى جنيهات قليلة.. هشتريها عربية لو حسيت انها محتاجة عربية.. انا الى هشتريها مش انت.

فلوسك عليا حرام.. طول مانت عايش وحتى بعد عمر طويل.. هي تورث جنيه.. تورث ملايين.. مش عاوز اعرف اى حاجه عن الموضوع ده.. فلوسها وهي حرة.. وهفضل برضه اديها مصروف البيت حتى لو بقت صاحبة ملايين مش هيدخل بيتي منهم جنيه واحد.

كلامي لها مش هيعلو عليه اى كلام.. انا متأكد ان ده الى هيحصل.. الى زيك ميخرجش من بيته ابدا بنات تعصى اجوازها.. انا متأكد الف مليون في المية انك مش منتظر منى اى فلوس ولا حتى لو حصل انفصال ممكن تهددني بقايمة وللا مؤخر والكلام الفارغ ده.. علشان كده انا همضيلك على اى ورقة تعجبك حتى لو هتدخلني السجن.. انت تقدر تعمل فيا كل حاجه.. بس مش هتعمل كده لأنك مش راجل اهل ممكن يضحي بسمعته لما يستقوي على عيل من دور عياله.. ولا في حاجه في الدنيا ممكن تساوي شعرة من شعر بنتك لو حياتها خربت.

ده كلامي يا حاج.. اوزنه كويس وفكر براحتك.. انا عاوز ابوس ايدك زى ابويا محبة مش خوف.. عاوز نسبك مش طالب احسان.. طمعان في انوثة بنتك وحسن تربيتها مش طمعان في فلوسها.. عاوز بنتك تقعد وسط النسوان وتقول زمان ابويا كان بيعمل.. دلوقتي جوزي بيسوي.. عاوز أتكلم معاك وراسي فوق مش راسي في الأرض.. عاوز أكسر عيني قصادك من الاحترام مش علشان انت ولي نعمتي.. عاوز احافظ على بنتك ونسبك بحسن العشرة مش علشان بتأكلني.

رقمي معاك.. وانا تحت امرك.. سلام عليكم

رد فعل الراجل كان طبيعي جدا.. تاجر وفاكر ان كل حاجه في الدنيا لها سعر.. الدخول معاه في مفاوضات يبقى هبل وعته.. عمرك ابدا ما تعرف تغلب تاجر.. علشان كده مسكت في كلامي ورفضت تماما التنازل عن حرف واحد من شروطي.. هو عرض اكر من طريقة لإتمام الموضوع كلها بتدور حوالين انا هبقى خاتم في صباعه.. وانا عند كلمتي.. لا يعني لا.

ابويا وامي وجدي ايدوا موقفى بشده.. اصحابي افتكروني اهيل وبتبطر على النعمة.. عانيت كثير بسبب الرفض ده.. مين في طنطا يرفض نسب راجل زى ده البلد كلها تعرفه من كيبرها لصغيرها؟

انا متفهم موقفه تماما ومقدر خوفه.. هو فعلا صعبان عليا.. الى زى ده معذور في اى شيء يقوله من كتر الى شافه.. بس في رأيي ان هو رخص بنته فعلا بالعرض ده.. الى هو عمله ده يفسد اى انسان سوي مش يضمن حياة البنت.. ممكن اوى تقع في عيل ابن حرام يضحك عليها ويقلب منها الجمل بما حمل.. ساعتها هينفع في ايه الحرص؟

هل كنت غلط انى رفضت؟

لا اعتقد.. محسيتش بالندم بعدها.. نجح ابويا تماما انه يحصني ضد اغراء الفلوس بس فشل يحصني ضد اغراء الأكل.. علمني وانا صغير ان الى بييجي سهل بروج سهل.. علمني كمان ان الكرامة ملهاش ثمن ابدا.. وان القوامة أساسها الانفاق.. علشان كده لما حد حاول يسحب منى قوامي.. رفضت.

هيضحكوا عليك ويقولولك الحياة مشاركة والقفة ام ودين يشيلوها اتنين.. ده كلام صحيح تماما.. بس مش في الفلوس.. البيت الى تدخله فلوس غير فلوس رب البيت.. يبقى بيت الكلمة فيه مش لرب البيت.. في بيوت كثير ماشيه كده.. بس خد الصورة الكاملة وشوف البيوت دى وقت الخلاف علشان تعرف تقرر لنفسك صح وتقبل ان مراتك تحط فلوس في البيت وللا لأ.. مش عاوز افسر اكر علشان حزب النسويات ميصدعش دماغي بكلام كالعادة كله غلط.

بقيت مسخرة صحابي.. واحد منهم قاللى يا اخي هتعيش تاكل وتشرب وتخلف.. ضامن مستقبلك ومستقبل ولاد ولادك.. راجب عربيه اخر موديل ومتصيح.. عايز ايه تانى.. ايه البطر ده؟

- طيب ودوري في الجواز يبقى ايه؟؟
- دورك انك تبقى زى الفل.. تحافظ على صحتك وتروح الجيم كل يوم وترجع البيت تهيص.
- ذكر تخصيب يعني.. اه.. عندنا في الارض في ثور بيعمل نفس الحكاية دى.

بلاها نادية

بلاها نادية.. بلاها سوسو "دكتور سامح - سك على بناتك"

الاحداث دى كانت سنة 2009.. كنت خلاص سبت مصر للأبد واخترت أعيش في السعودية.. امي كلمتني علشان عروسة.. نزلت لقيتها بتحب واحد تانى.. خلاص.. الموضوع فكس والاجازة قربت تخلص.. بجهاز نفسي للعودة للسعودية تانى.. المندى وحشي اصله.

مع كتر التجارب تبدلت مشاعري.. بقيت اخذ الموضوع بضحك وألش على عكس امي تماما الى فشل كل قصة بيبقي بالنسبائها حدث محزن.. كنت عديت الثلاثين وبدأت ادرك روعة الحياة من غير ستات.. الفترة من 15 الى 30 سنة لو مفيش في حياتك ست بتبقي عامل زى المجنون.. بتعض في الحيط وبتتحرش بأى كائن بيتحرك اخره تاء مربوطة.. بعد الثلاثين الموضوع بيهدى شوية.. محتاج ست اه.. بس بمزاجي وبشروطي ولا ضير ابدا من استكمال الحياة منفردا من كتر السواد الى شايف صحابي المتجوزين عايشينه.

خلاص بقي.. فاضلي يومين واسافر.. شوية سلامات وزيارات ومطاعم مصرية من اللى يحلم بيها ليل ونهار في السعودية.. بس يبدو كده ان الاقدار كانت مخبيالي مغامرة تانية مع جدي الحبيب.

- هلا هلا هلا.. هلا بالطيب الغالي.. وغلا يا جدي.. شلونك يا ابوي.. شو علومك.. عساك طيب
- مالك يا ض.. ما تتعدل كده لاسفحك الم ارجعك بطن امك تاني
- حبيبي يا جدي.. بحب فيك اوى احترامك ليا واللله.. بس لو ابويا يتعلم منك.. ياللا.. الحمد لله.
- عدي عليا كمان ساعتين علشان هنروح اسكندرية سوا.
- الله الله الله.. مدينة الرب.. هننزل البحر وناكل سمك ونشقط مزز.. جايلك يا سيدى يا قوت جايلك
- مزز ايه يا صايع.. انت فاكر نفسك في السعودية.. احنا هنزور ناس افاضل.
- طيب وماله.. نشوف العروسة وبعدين ناكل سمك ونشقط المزز.. مش شايف اى تعارض يعني.
- هتركز معايا بقى وللا هتتعبنى زى كل مرة.. احلف بالله انى مش هتصدرلك فحاجه تانى
- خلاص خلاص.. هرکز بس ليا طلب..
- طلب ايه؟
- بعد ما اركز.. نبقى نروح ناكل سمك ونشقط مزز.

معرفش قفل السكة في وشي ليه.. كان عصبي اوى جدى.. يمكن علشان كان فاكر ان هو الى هيدفع تمن السمك؟؟

مشكلتي مع جدي ان الحريم كانت بتتحرش بيه بصورة محبطة جدا ليا.. 85 سنة بس جسمه مفرد وعينية زرقاء.. شعرة كثانة بيضاء بس موجود.. عكس شعري انا الى راح وانا لسه 30 سنة.. لما تشوفه تحسه بيه وابن ذوات.. ولما يتكلم تحس انه شيخ الازهر.. النسوان لما كانت بتعرف انه ارملة كانوا بيعملوا في نفسهم البدع علشان.. بقيت أقول يا ناس.. ده 85 سنة.. يعنى لو عرف يبوس بس ببقى معجزه.

بس اهو.. سبحان الله.

كلي ثقة ان ده مشوار فاشل.. عروسة ايه الى هشوفها واقدر اتجوزها في ساعتين زمن دى.. مقدرش طبعاً أقول لجدي لأ ولا اقدر ابدا ارفض ارواح اسكندرية في اى وقت.. كمان كنت محتاج مشوار زى ده اوى علشان الإحباط الى كنت فيه بعد مشوار اليوم السابق الفاشل ده.

العروسة طبيبه تحاليل.. سنها مناسب ومن بيت طيب حسب كلام جدي.. ابوها صديق قديم لجدي.. اخوها ظابط جيش وهي عموما جميلة الشكل معتدلة القوام.

- انعم و اكرم.. طيب المهم بقى.. فين الخوازيق؟
- لا مفيش المره دى.. كانت مخطوبة ومحصلش نصيب
- ده مش خازوق.. قولى على المستخى يا جدى الله يكرمك.
- لا مفيش.. الراجل انا اعرفه من 70 سنة.. خدمنا في الجهادية سوا وبعد كده فرقتنا الأيام.
- يعنى مقاتل قديم وابنه ظابط في الجيش.. سترك يا ستار من الم لبس الخيار.. المهم بقى
- ايه؟
- بعد ما نشوفهم محتاجك معايا في مشوار مهم اوى
- فين؟
- هنروح ناكل سمك ونشقط مزز

الحمد لله.. كنت بره العربية فمعرش يلطشني على وشي.

عارف انت إحساس السعادة الى بيجليك اول ما تشم ريحة اليود وانت رايح اسكندرية؟

البلد دى فيها سر غريب.. الواحد بيتبسط من اول ما يعرف انه هيروح.. الطريق في الذهاب طويل اوى معرشف ليه.. الأيام هناك بتعدي زى الصاروخ.. ورحلة الرجوع ببقى عامل زى محمود المليجي وهما بيسحلوه في فيلم الأرض كده.

قاعد في بيتهم مترقب.. عيون الصقر بتسجل وتراقب كل شيء.. بيت متوسط لا يبدو عليه الثراء ولا العوز.. موظف حكومي عاش شريف بسمعة طيبة.. امثاله عملوا ملايين من الدروس الخصوصية.. هذا رجل رضى من الحياة بما ظن انه قسمة ربنا.. ملامح طيبه فيها عنفوان شباب قديم.. وش ضاحك مستبشر.. النوع الى بيسموه ضارب الحياة صرمة.. لا يمكن ابدا تديله سنه.. اعتقد ان مصدر الحيوية والطيبة دى هو الرضا.

على النقيض منه تماما كانت مراته.. مش ممكن اصدق ابدا ان الكركوبة دى في الخمسينات.. تدبها اكبر من سنها ب 20 سنة على الأقل خصوصا مع كومة الامراض الى بتعاني منها.. دى معجزة والله ان جوزها معاها لحد اليوم ده.. ملاحظة أخرى تعني انى في بيت تحكمه الاخلاقيات والمروءة.. كمان لاحظت ان الست هي الكل في الكل عندهم.. اياها.. علشان كده بقي.. الراجل ده عاش حياته مكبر دماغه ورامي كل حاجه عل مراته زى جدى كده.. مش غريب ان الولية صحتها خلصت في البيت ومسئوليته.. حطيت الكلام ده في بالي علشان لما اتجوز "عموما" ابقى عارف انا رايح فين.. الى هيشيل المسؤولية.. هيعجز قبل الأوان.. وقررت انى لما اتجوز هبقي زى جدى كده.

في ست تانية في البيت عرفت انها خالة العروسة.. ست من النوع الى تحب انك ترميه من البلكونة اول ما يقولك صباح الخير.. تخينه اوى ورعاية اوى وفضولية اوى ودم الى جابوها يلطش أوى.. كان فاضل 3 ثواني مثلا واقوم اکتفها وانزل فيها ضرب.. لم يمنعني بس الا ان صحتها كانت حلوة اوى ولو قعدت عليا هتفطسني.

حوار معتاد ممل عن الغربة.. التعليم الحكومي.. جيشنا الهمام.. كلام متصل غير مهم نقتل بيه الوقت لحد ما تيجي العروسة.

بهدهوء تام دخلت البنت وقعدت معانا.. كانت شايه صينية كبيرة اوى عليها كل حاجه ممكن تتاكل.. يبدو كده ان الصينية كانت ثقيلة لأن البت وشها كان احمر بشدة.. مش عارف ليه جه في بالي منظر سماح أنور في فيلم ليلة غسل لما وقعت الحاجة على حماتها ميمي جمال.. شيطان يزن في دماغي انى أقوم انكرها بصباغي واقولها ررررررركب الهواء.. هنضحك كثير صحيح.. بس غالبا هينتهى اليوم بيا في مستشفى المجانين بطلب خاص من جدى.

استعنت على شيطان الهبل بالقرآن.. ربنا يستر من الفضائح.. قعدت البنت وبدأنا نتكلم.. بعد نص ساعة بالظبط عرفت ان الموضوع فاكس.. فكبرت دماغي.

البنت رافضة تماما انها تقعد في البيت - حقها ولا جدال - وانا رافض تماما انى مراقي تشتغل - حقي ولا جدال - مش غلطتها ومش غلطتي.. غلطة الى افتكروا انهم لما يقولوا ان البنت هتقعد.. يبقى هي هتقول امين وتقعد.. دى دكتورة مش عيلة صغيرة علشان تفرضوا عليها اى شيء.

كملنا كلام في مواضيع عامة.. يا فرج الله.. انا والبنت مش متفقين في اى شيء في الحياة.. ان كانت هي اقصى- اليمين فأنا اقصى- اليسار.. هي دولجية وانا ثورجي.. هي مبتحبش الاكل وانا في طفاسة أشعب.. هي بتحب السهر وانا بنام بدري.. والادهى بقى انها اهلاوية.. وانا ملحد كرويا ويكره الأهلبي.. بس.. كده البيت هيولع وش.

الاختلاف ده خلاني غير مهتم بكلام البنت.. خلاص.. بانث الفولة.. البنت خدت الموضوع على كرامتها وسابتننا وقامت.. حقها تماما.. انا لو بكلم حد وطنشنى.. هشتمه بأمة.. احترام المتحدث واجب حتى لو لم تتفق معاه فيما يقول.

نقرت بصوابي على كاس العصير حسب الإشارة المتفق عليها مع جدي علشان أقوله ان الموضوع فاكس.. حلاوة جدى انه مكانش بيضغط عليا.. هو يضغط انى لازم اتجوز وانا حر تماما اتجوز مين.. مكانش بيبدل اى مجهود علشان يسأل عن سبب الرفض.. هو مؤمن تماما ان القبول من الله.. محصلش.. يبقى نشوف غيرها.. على عكس امي الى كانت كل ما تشوف واحدة.. تقولي هي دى.

واحنا قايمين علشان نمشي.. لقينا العشاء اتحط على السفرة والناس تحلف 100 يمين علشان ناكل معاهم.. مقدرتش اقاوم كثير خصوصا انهم كانوا عاملين سمك.. وواضح من ريحة الاكل ورص السفرة انه معمول بفرن ومهارة عالية اوى.. جريت على السفرة وانا بقولهم لا يا جماعة ارجوكم.. انا لسه واكل قبل ما اجي.. نظرات جدي النارية تعني انى هتهزأ لما نزل.. أو كيه.. انا موافق.. هزأني كل يوم بس هاتلي سمك زى ده.. قبولي العشاء يعنى انى موافق على النسب ضمنيا.. وده مش صحيح.. طظ في كل شيء.. ناكل السمك الأول وبعدين نشوف مين عاوز ايه.

واحنا قاعدين بناكل دخلت علينا بنت تانية من سن مقارب لسن البنت الاولانية.. طلعت بنت خالة العروسة.. بنت الست الى نفسى ارميها من البلكونة من اول ما دخلت.. المفاجأة لجمتني.. احنا قاعدين بقالنا ساعة.. اشمعنى دلوقتي يعنى؟

بعد الاكل قعدنا تاني في الصالون.. وعملنا ريستارت للكلام..

- انت بقى يا سيدى احمد بتاع الرياض؟
- ايوه.. سمعتي عنى في الاخبار وللا ايه؟
- لا ابدأ.. بس جدك أتكلم كثير اوى عنك.. حسسنا ان انت أبو زيد الهلالي الحقيقة.
- تعرفي ان أبو زيد الهلالي كان شيعي؟
- يا راجل.. احمد عبد العزيز!! ازاي كده

امتد الكلام بيني وبينها.. سبحان الله على الفارق بينها وبين بنت خالتها.. بنت متكلمة منطلقة فرفوشه وضحوكه جدا.. بنت من النوع الى يدخل القلب بعد ما تشوفها ب 3 دقائق.. عكس أمها خالص.

وخذ عندك بقى.. البنت متفقة تماما معايا في كل كلمة قلتها.. وربنا كان ناقص تقولي الحسين ناداني ولبيت يا سي السيد.. مسكت نفسي.. من الضحك بالعافية وهي بتأكدي انها زملكاوية واكثر لعب بتحبه في الزمالك هو عماد متعب الى دايمًا بيحجب الدوري ده.

جدي شاف الموضوع ماشي فدخل في الخط علشان يجود.. حكا لهم عن تربيتنا واصل عيلتنا واد ايه هو فخور بأبن بنته الى عاش عمره كله للمذاكرة والشغل.. وانه من وسط احفاده كلهم لا يفخر الا بأحمد.. بقيت ابصله بنظرات محمد سعد في اللمي 8 جيجا وانا بقوله اجل يا سيدى.

حكي جدى اننا اسرة بتعامل الستات معاملة خاصة.. حتى هو لما مراته ماتت رفض يتجوز.. وانا بتابع الحوار لمحت تعبير كده على وش الولية الى انا مش طايقها.. مش فاهم ايه ده.. بس هو شيء غير مريح.. قامت الستات تعملنا شاي.. ودخلوا علينا بعد نص ساعة.. وشفت منظر الله الوكيل مش قادر انساه لحد النهارده.

الولية التخينة الى انا مش طايقها راجعة متذوقه وفارده شعرها ولا بسه عباية مطرزه مقاس 9 اكس لارج وعامله في نفسها البدع ولا كأنها بنت عشرين.. قلت في عقلي بالي احبه.. هو فيه ايه يا جدعان.. الولية اتتهلبت وللا ايه؟

الاب صامت في غير ضيق.. الولية مبطلتش رغي وهما فرحانين بالتجاوب بيني وبين بنت خالة العروسة الاصلية الى اخوها سابنا ومشي.. علشان مسافر على كتيبته.. العروسة الاصلية اختفت تماما من المشهد ومفضلش الا بنت خالتها وامها التخينة وانا وجدى.

حوارات ثانية خايبه من الولية التخينة.. كل شوية تقول انا كسريت عمرى على البنت.. انا بعد المرحوم رفضت كل العرسان.. انا مش عارف ايه سويت ايه.. انا ضيعت عمرى فداه وهعيش على ذكره.. ناخذ منها المايك علشان نتكلم مع بنتها.. دقيقتين وتنط في الحوار تانى وتحود على رحلة كفاحها في الحياة وصورها وهي صغيرة لما كانت صاروخ قبل الانبوبة ما تضرب.. وطبعا كل كلمتين بينهم هي هي هسيبيى على اى بتنجان جدي يقوله.. وكل شوية اتفضل يا حاج سعيد.. اشرب يا حاج سعيد.. منور يا حاج سعيد.. وحككتنا انها كانت على صيام في اليوم ده.. ال ايه.. بتعوض اللى فطرته في رمضان بسبب ال.....

اقسم بالله مش قادر.. شوية صحة يا رب ارميها من البلكونة بس.. يا دين النبى.. هو ايه اللى بيحصل!!!

قرب نص الليل قامت النسوان وسابوا الرجاله تلخص الكلام.. وكان ابوها اول من بدأ الكلام.

- بص يا احمد.. احب انك تعرف حاجه مهمة.. البنيتين دول بناتي.. انا ريبتهم مع بعض واللاتين ميفرقوش عن بعض اى حاجه..
- انعم و اكرم يا عمى.. ونعم التربية.
- الاتنين تحت امرك.. المواضيع دى نصيب وقبول في الاول والاخر.
- اه طبعا.. الارواح جنود مجنده.
- الله ينور عليك
- انا يشرفي طبعا يا عمى.. اشاور أهلي بس وان شاء الله نتصل بحضرتك نستأذنكوا في زياره تانيه وطبعا لازم تشرفونا في طنطا.. اهو تقروا الفاتحة للسيد البدوي
- نتشرف طبعا وهنا بيتك ومطرحك والحاج سعيد فيه الخير والبركة.
- الله يكرم اصلك.. سلام عليكم

أيه بقى اللى حصل؟

العروسة الأصلية كانت قاعدة معايا والثانية في المطبخ بتسمع.. فهمت دماغي ماشية ازاى وشخصيتي على ايه ولما الموضوع فكس من الاولانية هي خرجت تقولي كل اللى انا عاوز اسمعه.. بنسبة 100% لو كان حصل ارتباط بيني وبينها كنت هلاقي كلامها اللى قالته قصادي ده بلح.. وساعتها ادور على ميني تسخن لأننا في مجتمع يسمح للمرأة انها تغير كلامها وتصحى كل يوم برأى وتعمل ما بدالها في اى وقت تحت مبرر اسمه الهرمونات الانثوية وانت راجل ولازم تتحمل وكل الهبل ده.

مسكينة.. ظلموها لما فهمومها انها لازم تتجوز خلاص.. هي اكيد لا اعجبت بيا ولا حتى افكرتني بعد ما نزلت ب 5 دقائق.. هي مبرمجة على كلمتين تقولهم علشان تصطاد اى XY .. انا طبعا مقدرش أقول اى كلمة حتى لو عجبتني البنت الثانية.. بقى انا اروح اشوف واحدة.. أقوم اخطب بنت خالتي!!

ده بيقى انتهاك لأبسط مبادئ الإنسانية واعتراف صريح منى انى حمار بياكل وبس.

صعبوا عليا البنيتين جدا هما وكل اللى زيههم.. ادكده يا ناس عيالكووا رخاص في نظركوا!!!

لا حول ولا قوة الا بالله..

بقى هو كده.. بلاها نادية.. خد سوسو!!!

وبعدين ايه الولية أمها دى.. اول ما عرفت ان جدي ارملة قررت ترمي الهلب عليه بأسلوب متصايي جدا.. الحمد لله انى كنت معاه علشان اقدر احميه من كهن النسوان ده.. طول الطريق وانا سايق ماسك لساني عنه بالعافية.. هموت وانكشه في الكلام وخايف ليزعل منى.. كنت افكر بعض حركاتها القارعة واكتم الضحك في سري لحد ما عيني تدمع ومناخيري تسبب.. وهو ساكت خالص.

فجأة لقيته بيدندن مع نفسه وبيقول قبل ما تشوفك عينيا لأم كلثوم..

احيه.. هي بقت كده..

فضلت ماسك نفسي بالعافية برضه لحد ما هو بدأ الكلام..

- ها يا عم احمد.. ايه الكلام
- كلام ايه يا جدي.. يا بتاع النسوان انت
- انا بقول بلاها نادية.. وناخد سوسو

ولحد هنا مقدرتش امسك نفسي خالص.. انفجرت في الضحك انا وهو لدرجة ان العربية حذفت مني يمين وكنا هنلبس في عربية نقل.. فضلنا اضحك بعنف وقوة والكحة فتركت صدري وعينيا فاضت بالدموع ونص سوائيل جسمي نزل من بقي من كتر الضحك..

ساعتين ضحك متواصل طول الطريق لحد طنطا.. بهدلت جدي من كتر التريأة وهو فطس مني اكثر من مرة من كتر الضحك لدرجة اني خفت عليه فعلا لروحه تطلع..

- طب انت جاي تبصص يا عم الحاج.. الله يسهلك يا سيدي.. واخذني معاك ليه!! كوبري
- اختشي يا وله.. انا اول مره اشوف الحيزبونة دى
- والنبي ايه.. هي دى اول مرة.. انا خايف الاقي على موبايلك رسائل ابوحه بينك وبين الولية دى.. قول قول متكسفش..
- انا ابن بنتك وستر وغطا عليك.. تاخذ مفتاح شقتي علشان لو حبيت تعط وللا حاجه بدل ما تطلع الدائري وتبهدل؟
- اهو ده اللى انت فالج فيه.. طول اللسان والتريأة.. ما تورينا همته كده.. وانا اذك كان عندي 6 عيال.
- يا جامد انت يا سفاح بورسعيد.. بس الولية ايه.. عينها منك وش.. شفت لما قالتلك كنت صايمة دى.. انا مسكت نفسي بالعافية اقسم بالله..
- جتها نيله.. دى عامله زى البقرة.. هو انا بعد ستك الله يرحمها يملي عيني حد؟
- اديني في الإخلاص وانا احبك يا فننس.. بقولك ايه بقي.. ما تسبيك من الولية التخينة دى وناخذلك البت الدكتور..
- اهو انا وانت ندخل في يوم واحد يمكن يعملولنا ديسكاون.
- اه.. بلاها نادية وسوسو.. وناخذ فوزية

وانفجرنا في الضحك تاني..

شفتوا الناس بتبص للجواز ازاى؟

طظ في الشهادة والتعليم والاتفاق والحياة المشتركة والطباع والثقافة والمستوي الاجتماعي..

طظ فيك وفيكي طالما بتقدروا تخلفوا..

معاك فلوس.. بقيت عريس كويس..

حلوة وببضاء.. تبقى عروسة كويسة..

دى بتطبخ ودى بتطبخ.. ده بيخلف وده بيخلف.. ان معجبكش محشى—الكرنب سبيه وخذ محشى—ورق عنب.. واذا انطفأ النور.. كلهن سواء.. ولو مش عاوز محشى من الأساس يبقى ولا يهمك.. سيبك من المحشى.. وخذ سوسو.

فلافيلو

اى حاجة مش عاجباك من حقلك ترفضها.. انما ترفضها ازاي.. هو ده مربوط الفيل.

معدرة.. مربوط الفرس.

هجرتي للسعودية كانت سنة 2008 بعد فشل مشروع عمري في مصر.. هجرة كانت اشبه بالهروب.. او لو شئت الدقة.. الطرد.

مكانش عندي اى خطط في اى يوم من الأيام انى اسيب مصر.. اسيبها ليه وانا من دراويش القاهرة الى بيقتضوا الاجازات يلفوا في مساجدها وكنائسها ومقابرها الاثرية.. اسيبها ليه وانا كل شهر بسافر دولتين او ثلاثة تبع شغلي.. اسيبها ليه وانا بشتغل شغلانة يحسدني عليها القاصي والداني.. اسيبها ليه وانا ليا فيها النيل زى ما غنى حمزه نمره في عسل اسود؟

قبل ما تتربأ عليا وتقارن المقدمة بوضعي الحالي يهمني جدا تعرف انى كنت واحد من جيل المغفلين الى اتربوا تربية عسكرية عمادها تاريخ مصر. التليد وقوامها الانضباط في المدرسة الحربية وسقفها جيش مصر. الى فيه يد تبني ويد تحمل السلاح.. واحد من جيل كان شايف إبراهيم عيسى- مناضل ومصطفى بكري معارض وحسني مبارك كويس بس الى حواليه وحشين.. مكانش عندي اى شكوى من مصر- لأني عايش فيها باشا.. بالتالي مكانش في اى سبب للتفكير في اى خروج.. فكرت بس لما احتكيت بالواقع واتقرصت من وداني ولباليلي.. فكرت وقررت ونفذت لما نزلت من برجى العاجي وشففت الانسان العادي بيتعامل ازاي في مصر- وادركت انى مينفعش أكون مصري بس علشان اخد حقى فيها.. لازم أكون مصري ظابط.. مصري وكيل نيابة.. مصري مليونير.. او ما شابه من وسائل الحماية.. رحلتي علشان ابقى مليونير انتهت بقتناعي التامة انى مش هينفع ابدأ ادخل النادي ده لوحدي.. لازم حد من جوا يبعثلي دعوة او يبجي بنفسه ياخدني.. عرفت انى صغير فيها اوى مهما اوتيت من علم وخبرة.. عرفت انى مسواش فيها تمن طلبة رصاص.. قالولى كده والله اول ما دخلت الثانوية الحربية.. مش هنسى- كلام صول التدريب وهو بيؤمرنا نطلع كرامتنا على باب المدرسة مع اللبس الملكي علشان ثمن اعلی واحد فينا عند الجيش 21 طلقة ميري ينضربوا على قبره.. قالوها.. بس انا كنت فاكرهم ببالغوا.

المهم انى خرجت منها خالص..

في السعودية زاد وزنى ثلاثين كيلوجرام في اقل من 6 شهور.. ايامها البلد كانت مقفولة خالص ومفیش اى نشاط تعمله في حياتك الا الاكل والجيم.. اشرتكت في جيم دولي بالفعل ومرحتش ولا مرة.. كنت بجدد الاشتراك كل سنة وانا محافظ تماما على علاقتي بالمطاعم.. تحولت الى ما يشبه العمالة.. 180 سنتي طول و180 كيلو وزن.. كنت واخذ الحياة بسخرية اليأس من كل شيء.. ازاي معملش كده وكل حاجة في حياتي فشلت.. لا جواز نافع ولا مشروع اكتمل.. نظرة قاصرة جدا لما تعاميت عن كل نعم ربنا الى كنت فيها وركزت بس في الى مش عندي.. نكران رهيب دفعت تمنه غالى اوى بعدين.

ابويا كان سعيد انى سافرت.. فرصة كويسة ابعد عن جو الفشل في مصر وابدأ من جديد.. كلمني في يوم وكان كلامه قليل اوى..

- ازيك يا احمد.. عندك وقت؟
- واحشني جدا يا بابا.. لو لحضرتك يبقى اكيد دايم عندي وقت
- عمتك بتقول في عروسة كويسة.. تقدر تنزل الاسبوع ده؟
- انا اساسا هنزل علشان اشوفك.. موضوع العروسة ده يبجي بعدين.
- طيب منتظر.. مع السلامة

هو ده ابويا.. أطول مكاملة في حياته كانت 65 ثانية.. وهو ده حالي اول ما سافرت.. بنزل مصر.. مرتين كل شهر.. خرجت بره مصر.. صحيح.. بس مصر مخرجتش مني ابدأ..

على العشاء بدأ ابويا يقولي المعلومات المتوفرة..

- البنت جميلة.. بكالوريوس تجارة إنجليزي.. ابوها عضو في مجلس الشعب واخواتها واحد رئيس نيابة والثاني وكيل نيابة.. اصلهم من بلد ارياف جمب طنطا.. عندهم ارض كبيره وسراية من ايام العز القديم.. يقولوا ان جدها كان واحد من اللى عبد الناصر قلبهم.
- ولما عبد الناصر قلبهم.. امال الأرض الكبيرة والسراية جم منين؟ وبعدين عضو مجلس شعب يبقى فاسد بدون نقاش.. امال عياله دخلوا النيابة ازاى؟
- بلاش تسرع.. الرجل سمعته كويسه والناس بتحبه.. كل اللى عنده ده ميراث.
- طب ودول هياخدوني على ايه ولا مؤاخذه؟؟
- والله عمتك عرضت على امها والناس مرحبين.. مش هتخسر حاجه.
- ماشي.. اتوكلنا على اللى بياكلنا

كنت قررت انى مش هدخل بيوت تانى بعد اللى شفته.. المقابلة والاتفاق يبقوا بره البيت.. البيت ده ادخله وانا من اهله.. مش ناقصة احراج ولا مشاكل تانى.. حتى كمان اعتبرتها فرصة انهم يعرفوا انى مدخن.

نظرات البنت قوية جدا.. حقها طبعاً.. بنت عايشه لنفسها.. لا بتشتغل ولا عايزه.. كلامها كله عن السفر والرحلات.. طلباتها كلها مجابه من أهلها لانها الوحيدة.. مقدرش أقول انها جاهله او فرفوه.. لا خالص.. عندها فكرة كويسة عن تربية الأطفال ومتابع جيد للسياسة.. عندها كل شيء تتمناه اى بنت بس هي فضلت تكبر دماغها عن كل شيء وتستمع بحياتها.

كلام ممل عن انجازات ابوها في مجلس الشعب وحروبه الوهمية علشان الغلبة ضد كمال الشاذلي وازاى انه لولا هؤلاء النواب الشرفاء كانت البلد راحت ورا الشمس.. انا عمال أأمن على كلامهم من باب اذا خاطبهم الجاهلون قالوا سلاما.. يحيا رجال النيابة العظماء والمجد لنواب الشعب الافاضل ويسقط ولاد الكلب الشعب.. او على رأي عادل امام في الزعيم.. اللهم اخرب بيتنا احنا يا شيخ.

قبل ما القعدة تنفض كنت على يقين ان الموضوع مش مناسب.. عدم الحجاب يبدو سبب كافي في الظاهر.. بس في واقع الامر انى كنت شايفهم لصوص وحرامية يستاهلوا السجن مش النسب.. الناس دى والى زيهم كانوا السبب انى هربت من مصر.. بسبب الناس دى في ملايين تحت خط الفقر.

مكانش ينفع ابدأ اخبي على ابويا سبب رفضي.. محدش ضغط عليا للقبول الا عمتي.. هي احست بالمهانة باعتبارها واسطة الخير وصديقة أمها الانتيم.. دافعت عنهم ولا كأنها فريد الديب وهو بيدافع عن عزام عزام..

- يا اخى انت انسان غريب.. مالك انت ومال ابوها وللا اخوها.. المهم البنت
- بنت مين يا عمتي.. دى عالم عايشه في مية البطيخ.. بنت متريه بفلوس حرام.. عارفه يعنى ايه حرام؟ مخدتيش بالك انها كاشفه راسها؟
- يا سيدى ابقى حجبها انت
- وانا افرض عليها ليه.. ما يمكن هي مش عايزه.. انا هضحك على نفسي؟؟ من الاول انا طالب طلبات محدده.. لا سافره ولا متزمتة.. ست بيت متعلمة.. ايه المعجز في ده مش فاهم!!!
- انت بتتبطر والعمر بيجرى بك.. الى ادك معاهم عيال دلوقتى.. انت الى عجبك عيشة البهائم دى.
- ماشي.. تشكري يا ست الكل
- بص بقي.. هي كلمة.. امك هتكلم امها النهارده وتشوف رأيهم ايه.. وبعدين تقعد معاها تانى قبل ما تسافر.. مش هنعيش طول عمرنا نقلب في بنات الناس والا مش هتتشرك تانى في اى موضوع
- حاضر يا عمتي.. لله الامر

مأزق فعلي.. انا مش محتاج حد يساعدي في اى شيء.. لكن غضب عمتي بعد غضب جدي لن يعنى الا ان العيب عندي فعلاً.. هما بيختاروا اختيارات غريبة وانا مفيش قصادي حد مناسب.. بقيت أقول موافق علشان اهرب من تهمة الصياغة دى.. وسبحان الله المواضيع بتبوظ.. وكأن رينا مش رايدلي اظلم ولا اتظلم.

حسب الاتفاق لبست اى بدلة محسن ممتاز وبدأت تستطلع الاخبار.. بعد يومين من العس والنخورة.. عرفنا ان البنت رفضت.
يا فرج الله.. احمد يا رب.

رسالتها كانت كالآتي.. ايه "المفش" الى انتوا جايبينه ده.. ده شبه علاء ولى الدين.. بقى انا اصوم اصوم وافطر على فلافيلو.. ده مش بنى ادم.. ده كرش طلعله بنى ادم.. الى زى ده يلزمه طبخة وخدمة مش زوجة.. انا مقدرتش امسك نفسي.. من الضحك لما شفته.. قولوله يخلص من كرشه الأول قبل ما يرازي بنات الناس بالدهون دى كلها.
ده كان ملخص الرد.. مع اسقاط بعض التفاصيل الغير مهمة.

قاعد في بيتنا وشى احمر مزهر من الغضب.. عمري ما قبلت اى إهانة او تناول ولا اتسامح ابدأ فيهم مهما كان السبب.. من حق كل انسان انه يرفض اى شيء حتى الدين نفسه.. اكفر حتى لو حبيت.. لكن تحتفظ برفضك بينك وبين نفسك او تعلن عنه بتهذيب.. مش من حقه ابدأ لا تسخر من حد ولا تهين حد برفضك.. اذا قررت تكفر مش هيبقي حد في الدنيا من حقه يحاسبك.. لكن اذا سخرت من الدين الى خرجت منه.. يبقي قطع رقبك واجب.. من حقه تشوف البنت دى مش جميلة.. بس لو قتلها يا وحشة.. تبقى انسان قليل الادب ومحتاج تربى.. تقدرى تقولي مش عاوزة اتجوز واحد على اده.. بس لو عايرتية بفقره.. يبقي تستاهلي التف على وشك وتستاهلي ان الاغنى منك يبصلك بنظرة استحقار.

دى وجهة نظري.. وللأسف ملهاش سوق في مصر.. مصر.. بلد بيدى النساء لوحدهم حق إهانة الرجال بسبب او بدون سبب.. مجتمع يتعاطف تلقائيا مع الأنثى من منطلق انها الأضعف.. ولما تعرض التفاصيل ويتعرف انك مظلوم.. تلاقى نفس الناس تقولك ربنا هياخدلك حقه..

طيب ربنا الى هياخدلى حقي ده.. مش هو ربنا بتاعها برضه وكلامه لازم يمشى عليها وللا ربنا لا يذكر الا في حالة ظلم الرجالة؟

ايه العلاقة بين كوني راجل وبين وجوب تقبلي الإهانة بدون رد؟

هل في سبب طبي يربط بين جينات XY وانعدام مراكز الإحساس والكرامة؟

هل علشان تخين.. يبقي لازم اتقبل سخرية الناس بالضحك؟

وهو التخان مش بيتجوزوا ويعيشوا؟ ملهمش حقوق في البلد دى يعنى؟

بمنتهي الحياء شايف ان عندها حق في الرفض.. الانسان التخين عرضه لأمراض السكر والقلب والضغط وتصلب الشرايين.. وهى من حقها ترفض الارتباط براجل ممكن جدا يفطس منها بدرى بدرى خصوصا انه مدخن كمان.. وحتى لو مفيش سبب.. هي حرة تماما.. بس مش قادر الحقيقة الاقي لها عذر انها تقول السبب ده.. كان ممكن اقبله لو كان في صورة نصيحة.. كنت هشكرها كمان.. لكن الرفض بالسخرية ده اذاني بشده.

مفيش في ايدى حاجة اعملها.. رجعت السعودية بنفس كسيرة من سكات.. وكملت حياتي على امل انصالح الحال مستقبلا.

سنة 2009 خدت قرار مجنون بالخضوع لعملية جراحية لإسكات الديناصور المفترس الساكن في معدتي.. خلاص بقي.. زادت معاناتي من الوزن في النوم والحمام واللبس وقصر النفس وضغط الدم.. مش لازم اصبر يعني لحد قبل ما اموت ب 5 دقائق علشان انتبه.. عملت عملية خطيرة جدا قربت فيها من الموت حرفيا.. خرجت من المستشفى بعد شهر كامل في العناية المركزة وشهر اخر في الرعاية المعتادة.. دخلت المستشفى 180 كيلو.. خرجت منها بعد شهرين 150.

صلاة النبي.. ولسه..

الوزن بينزل بجنون.. ليسي.. كله مبقاش نافع.. كنت كل أسبوعين انزل اشتري قمصان مقاس اصغر.. بعد 6 شهور بقيت 120.. بعد 8 شهور بقيت 100.. كرشى بيروح منى يا ناس.. حد يلحقني.

بعد سنة بالظبط بقيت 80 كيلو جرام.. مانىكان.. بخلاف مؤشراي الحيوية الى رجعت كلها لمعدلاتها الطبيعية.. نفسيتي كمان اتحسننت اوى لما بقيت بشوف جزمي وانا واقف من غير مراية ولا حاجه.

وخذ عندك بقى.. العرايس نزلت ترف على دماغي زى المطر..

لما كنت انزل مصر.. كنت بشوف في اليوم الواحد 3 او 4 بنات.. وشفت مواقف رهيبه بسبب كده.. طب وربنا حصل مره في إجازة الجمعة والسبت انى شفت 9 بنات ورا بعض.. حاجه قمة الهبل يعنى.

ومع كل دول.. كنت الاغلب برفض وقليل اترفض.. بس المرات دى كان الدلع هو السبب في رفضي.. دى طويلة بزيادة.. دى قصيرة شوية.. دى معندهاش غير عينين اتنين بس.. دى كف ايديها مفهوش غير 5 صواب.. ازاي دى عايشه من غير ماجستير.. والى خدت الماجستير أقول لا.. حرام تدفن الماجستير في البيت.. دى تشتغل وتحضر دكتوراه.

بشكل عام.. مكانش في قبول.. بس بعد الأيام ما عدت.. اقدر أقول انى كنت منتظر ام حمزه.. هي الوحيدة الى لما شفتها من بعيد من اول مرة ومن غير كلام قلت انا هتجوز النخلة دى والا هولع في البلد.

القبول ده سر كبير لو ادركه الأهالي والبنات.. هيعرفوا ان مفيش اى داعي لأى استنصاح في صورة مصاريف او اى ورق خايب بيتلطموا بيه في المحاكم.. بعد ما شعري شاب قررت انى مش هدى بنتى الا لشخص عاوزها فعلا.. مش يستاهلها.. بنتى لا تقدر بئمن بالنسبالي.. وهي لسه معملتش حاجه ليه علشان تبقى بالنسبالي هو كده.. لازم قلبي يطمئن انه متقبلها وعاوزها.. وساعتها هديها له من غير اى شيء مع دعواتي لهم بالبركة.

صوت اختي في التليفون وانا في السعودية بسمعه أجراس موسيقية في وداني رغم انها متصورة انى علشان بعيد في السعودية يبقى لازم تزعق وهي بتكلمني علشان اسمع..

- ازيك يا احمد.. عامل ايه.. بتاكل كويس؟
- الحمد لله.. طمنوني على اخباركوا
- بص يا سيدى.. فاكرك (....) بنت عضو مجلس الشعب؟؟
- اه
- امها كانت في النادي الجمعة الى فاتت وشافتك معانا.. جم سلموا علينا بعد ما انت مشيت وقعدوا معانا.. وحصل شوية كلام كده بينها وبين ماما عرفنا منه ان البنت لسه متجوزتش وامها بترمى كعب كده عليك.
- يا سلام.. هما مش كانوا رفضوا؟
- اهو بقى.. الدنيا ملهاش امان يا ابني.. ظروفهم اتغيرت خالص.. ابوها تعيش انت واخوها استقال من النيابة علشان يدخل المجلس مكان ابوه.. بس يظهر كده ان الحزب الشه.. الأرض دى كلها طلع راكبها مستأجرين.. منظر على الفاضي يعنى..
- طيب.. خليفهم ييجوا يتغدوا معانا في النادي يوم الجمعة الجايه.

عمري ما نزلت مصر.. بعربي في السعودية ابدأ.. دايم اشوف الناس الى بتعمل كده انها نازله تتمعنظر.. العربيات في السعودية رخيصة جدا والبنزين كان ارخص من المياه حرقا "وقتها".. سهل اوى تعجبك عربية الصبح وبعد ساعتين تبقى ملكك.. كل الإجراءات سهلة وكل أنواع التقيسيط موجودة.. ماركة العربية في الخليج لا تنم ابدأ عن صاحبها.. انا مثلا اشتريت عربية هامر H3.. الى في مصر.. ممكن يشوفها اعلان عن فلوس بالهبل.. بس في واقع الامر انى كنت جايها بالتقيسيط المريح جدا ومن غير مقدم.. مكانتش عربية حلوة خالص.. انا بس جيتها علشان يبقى اسمى ركبت هامر.. فراغ بقى بعيد عنك.

طب انا نزلت بالعربية من السعودية لمصر ليه؟؟

ايوه.. بالظبط كده.. علشان اتمعنظر.. خصوصا انى اشتريت ميدالية ذهب للمفاتيح مخصوص..

اغلب الوقت كنت قاعد ساكت.. بسمع كلامهم بنص ابتسامه.. البنت اتحجبت.. أمها زى ما تكون كبرت 50 سنة.. مشفتش حد من اخواتها خالص.. يبدو ان الحال اتبدل فعلا.

خلصت القعدة بعد ساعتين تعمدت فيهم قلة الكلام وانا في العادة رغاى فحت.. أوقات بعرف أكون مغرور رغم انى شعبي جدا.. المرة دى تعمدت انى أكون طاووس مش بس مغرور.. مفيش حد عاقل ابدا يدى بقشيش 100 دولار للجارسون الا لو كان عبيط.. هما صحيح 100 دولار مضروبين وانا كنت متفق مع الجارسون على كده في مقابل انى هديله 100 جنيه بدالهم.. بس محدش عرف ابدا الحكاية دى قبل كده.

ليه بعمل كده؟؟

يوه.. مانا قلت من شوية.. بتمنظر.

المرة دى كان التليفون من عندهم.. صديقة مشتركة كلمتني ال بتسلم عليا وكده.. وطبيعي ان الموضوع حذف على المقابلة إياها..

- ازيك يا عريس
- اهلا وسهلا يا طنط.. ازى حضرتك
- انت فين يا عم.. رحت وقلت عدولي
- ابدا والله.. مشاغل.
- طيب عاوزين نشوفك بقى.. الجماعة بيشكروا في اخلاقك
- بيشكروا في أخلاقي!! ليه.. هي كانت مدفونة تحت كرشى وظهرت بالعملية وللا ايه؟
- هي هي هيببي.. طول عمرك عسل.. الحق بقى قبل العريس الثاني ما ياخدها منك.
- عريس تانى اه.. واضح طبعا ان امكانياته اقل منى.. والا كنت انا اخدت الشلوت المحترم.
- لا يا راجل عيب متقولش كده.. دول ناس افاضل
- افاضل طبعا.. طيب.. شوفي يا ست الكل.. هحملك امانة لازم توصليلها للأفاضل.. وان موصلتيلهاش.. هوصلها انا بطريقي.
- امانة ايه؟
- قوليلها فلافيلو مش موافق.. هو عايز حاجه في مستواه.. سلام

عارفين انا اتعلمت ايه من الموقف ده؟

اوعى ابدا تهين انسان ولا تتجبر عليه.. مش بس علشان الاخلاقيات.. انما علشان لحظة دفع الثمن بتيجي دايم في وقت انت مش مستعد ليه.

العتبة الخضراء

هو فيلم من اجمل أفلام إسماعيل يس.. بس انا شخصيا بكرهه.. اكمنه بييجي على الجرح

سنة 2004 مكانش عندي شيء اعمله في الحياة الا الشغل بجنون والمذاكرة بعنف والاكل بافتراء على رأي محمد صبحي.. اجمل ما في سن العشرينات ان جسمك معاك في اى حاجه.. لسه معرفتش الحموضة ولا الانتفاخ ولا الإرهاق ولا اى عرض من اعراض بدايات سن الكهولة.. ماكينة جديدة تماما ان لم تحسن استغلالها في الفايده.. يبقى هتعيط عليها بعدين لما تحتاج عمره.

الجواز وحواراته كانوا خارج دائرة اهتماماتي تماما.. مش بس الجواز.. الستات عموماً.. مكانش عندي لهم خلق ولا وقت.. اهلي كمان بخلاف جدي الحبيب مكاوش مشجعين موضوع الارتباط البصري ده.. الأول اقف على ارض صلبة.. بعد كده اشرط واتشرط براحتي.. بعدت عن صنف الحريم خالص وخذت الكتب رفيق واستعنت على مشوار العمر بالله عزوجل.

الكلام ده مش داخل ذمة جدي بشلن.. ايه فايده الشغل والعيشة ان لم تكن عايش لإسعاد آخرين.. مكانش مصدق ابدأ اني بعيد عن الستات.. كان مصمم اني داير على حل شعري ورا بنات مصر.. وبتحجج بالمذاكرة والماجستير والكلام الفاضي ده.. وكان كل شوية يعمل عليا كبسة في البيت او الشغل علشان يتأكد اني فعلا وحداني.. مش بعط.

واحدة من الزيارات كانت في الشغل.. كنت بشتغل في العاشر من رمضان وجدى عايش في طنطا.. لما الاقيه جايلي الشغل فأكيد في مصيبة حصلت.. حالة وفاة مثلاً.. بعد كام دقيقة اكتشف انها زيارة عادية تحمل في طياتها الخبر الأليم.. هناك عروسة..

- خير يا جدى.. اى رياح طيبة؟؟
- المرة دى إعصار مش رياح.. اعصار انما ايه.. ملين
- يا حفيظ.. قول الله يدريك الصحة.. انا اتوغوش
- انا مرضيتش اقولك في التليفون.. لحسن حد بسمعنا وللا حاجه وانا جايلك في امر عظيم.
- امر عظيم ومحدث بسمعنا!!! ايه.. هنشتغل مع الموس***اد

سرح جدى بنظره وهو يقول:

- فاتنة الاساطير الملونة وصاحبة بكالوريوس صيدلة.. ترأس ابوها شركة النسيج لأنه من الهندسة خريج.. امها من الفضليات ذات ادب واخلاق وعيش في سكات.. يشكر الناس خلقهم بالساعات ويتمنون لهم التبات والنبات.. وحيدة على ثلاث صبيان صغيرة السن بغير نقصان.. جميلة المحيا من غير حلفان يخطب ودها الأنس والجنان.. لم يقربها انسي.. ولم يلمسها جني.. في انتظار زيارة سعيدة شريطة ان لا تكون بعيدة من شاب قامته مديدة يضمن لها عيشة سعيدة.. فأجبتهم لكم أبني ابنتي انه من فلذة كبدي.. مدخل السرور على مهجتي وهو من سيحصد زرعتي.. فلهلم الى يوم عروبة.. تركب سيارتك الكركوبية.. وتأتيني يا ابن الأروبة.. في زيارة طنطا المحبوبة لننتهي من تلك السبوبة.. فما قولك يا ابن الاكرمين.. ولا تحسبته كمين.. وربى انها الجمال المبين والخبر اليقين.. هي لك هديه.. يا ابن ابنتي المفترية

- طيب.. ايه بقى الموضوع يا جدي؟
- موضوع ايه يا وله.. عروسة عمال اوصفلك فيها بقالي ساعة اهو
- وربنا؟؟ معلش.. انا افتكرتك بتسمعى فوايز شريهان.. وانك هتبقى الملك كهلان.. ملك ملوك الجان.. الى بيعلق النسوان.. من سالف العصر والأوان؟
- هزر بقى.. مناخدش منك غير التريأة والمسخرة.. اخلص.. هتيجي وللا لأ؟
- اجى فين وامتى وازاى.. انا مفهمتش اى حاجه من قصيدة اراك عصي الدمع الى انت قلتها دى.
- يوم عروبة.. يعنى يوم الجمعة يا استاذ.. اسفخص على الى نجحك في العربي.. عدى عليا بعد الصلاة ونتوكل على الله انا وانت وامك.
- طيب حاضر.. ما كنت تقول يوم الجمعة.. عروبة ايه وبتاع ايه.. لازم تعمل فيها المتنبى
- وما المتنبى منى ببعيد.. فقد كتبت فيه القول السديد.. فهو.....

- ياااااا.. بس الله لا يسيئك.. انا مش ناقص.. كفايه الخضة الى انا فيها بسبب يوم عروبة دى

فى اليوم الموعود كنت على سنجة عشره مع اتباع طقوس وآداب زيارة العروسة حسب تعليمات امى..

- نوم عميق علشان الوش يبقى منور والهالات السوداء تختفى
- زياره الى الحلاق بعدها دش محترم بالليفة الخشنة
- فرشاة الاسنان والمعجون مع العطر المميز "وان مان شو"
- التورتاية المقدسة.. وداعا أيها ال 300 جنية.. اراكم فى عالم افضل

وننطلق الى زيارة النسب المتوقع.

فى بيوت كده لما تدخلها من اول مره تحس انك مش هتخرج منها ابدًا.. كذلك فى ستات لما تبصلها بتحس بوقوع شيء فى نفسك بالكراهية او القبول.. امى كانت دايمًا تقول ان اعمال الانسان بتنتطبع على وشه.. فتلاقى الخمورجي مثلاً باين على وشه غضب ربنا بينما معمرى بيوت الله بالزيارة وشهم ببشع نور.. علم الفراسة ييجى عند الأمهات ويعمل كت كده.

بعد ما فتحولنا الباب ب 3 ثواني حسيت انى مش هخرج من البيت ده..

بيت جميل بشده..

مساحات واسعه وذوق عالي فى اختيار الالوان وتوزيع الإضاءة وقطع الاثاث.. كل حاجه فى مكانها الصحيح.. نظافة ورائحة بخور معطر فى البيت.. مكتبه عملاقه تبهر الأعمى تنصدر اكبر مكان فى الصالة.. لوحات مقلده بحرفيه لفنانين كبار.. استقبال ارستقراطي لا يخلو من حسن الضيافة والترحاب الريفى.. شيء جميل الحقيقة.

ابو العروسة يبدو رجل ارستقراطي جدا.. كأنه يوسف بيه فى غزل البنات بالظبط.. رجل مثقف وعلى اطلاع ودراية بالتاريخ والاحداث الجارية.. امها كانت الصورة المتكاملة للأرشانة المصرية المليونية.. كمية ذهب مرعبه فى صدرها وأذرعها وصوابيها.. حاجه كده تفك ازمة مصر 3مرتين على الأقل.

شيء ما عجبنى فى البيت ده.. مش الفخامة ولا الثراء الواضح بالتأكيد.. كان عندي اكثر من فرصة انى اخذ من هي اغني فعلاً.. انا لفت نظري الارستقراطية والاناقة فى كل شيء.. حتى طقم الشاي والمعالق.. من اكبر التفاصيل الى اصغرها فى البيت ده.. كل شيء ينطق بالفن والرقي.

البنت نفسها جميله فعلاً.. جدي مكانش بيهيد.. نظرات خجولة وشخصيه تبدو غير متعبه فى التعامل.. حصل قبول اكيد من غير ما نلجأ الى شغل المخابرات النسائية فى استطلاع ما يخفى بين سطور اللقاء.. الناس كانت مباشره وانا اكثر مباشرة منهم.. زياره ثانيه فى نفس الموعد من الأسبوع القادم فى بيتنا.. وزياره ثالثه عندهم فى البيت لحسم الأمور والاتفاق على كل التفاصيل.. بعدها زغرودة حلوة رنت فى بيتنا.

عرضت عليهم امكانياتي فى الشبكة وكالعادة أمها استقبلت الرقم بامتعاض مع كلام من نوعية ده مش قيمتك ولا قيمة البنت.. بنسبة 9 مليون فى المية اى ست هتقولها اى رقم فلوس هي هتقبضه لازم هتقولك قليل.. ولو بتبيعها حاجه لازم تفاصل معاك ان شالله فى خمسين قرش.. الرقم الى عرضته للشبكة وقتها كان يشتري فوق ال 200 جرام ذهب.. ولا اعتقد ان ده فى الوقت ده يعتبر قليل.. مكانش معايا من ثمن الشبكة غير 100 جنية.. بس حبيت ارسم نفسي يعنى وكده.. عبيط بقى.

بدون تفاصيل كثير اشترينا الشبكة فعلاً.. دخلت فى جمعية كبيره قطمت وسطى سنتين كاملتين.. اصريت على رفض اى مساعده من ابويا على أساس ان اول حاجه تتعمل فى الجواز لازم تكون بفلوسي.. عرق الكرامة نقح اوى ساعتها مش عارف ليه.. ماهو ابويا برضه وحسب ما قال الامام الببحجاني.. انت ومالك لأولادك.

خالي الحبيب شرحلي خطته المجريه لاسترداد الشبكة بعد الجواز.. اطمأن قلبي لما عرفت ان شقايا مش هيروح بعيد.. العائلات تبدو متفقه بدون منغصات والأمور ممتازة.. اتفقنا بالفعل على ميعاد الفرح وكتب الكتاب.. قررت انى هتنازل واقبل مساعدات

من ابويا علشان مكسريش خاطره.. وهقبل كمان مساعدات اخوالي من باب السعادة الجماعية ان اول احفاد العائلة الكريمة من الذكور هيتجوز.. الكل فرحان لأن الجيل الثالث في الاسرة الكبيرة هيبدا هو كمان يكون أسرة.

فاضل ايه بقى؟؟

ولا حاجه

قالك اهم حاجه في الخطوبة انك تكون رومانسيكي ملزق.. ورد ودباديب وكاظم الساهر ووائل كفوري وبلاوى زرقاء.. يوم الفالنتين حبيت اعملها مفاجأة.. اشتريت ورد ورحت خبطت على بيتهم مباشرة.. فتحلي راجل اول مرة اشوفه..

- سلام عليكم.. حضرتك مين؟؟
- انت الى مين.. انت الى بتخبط
- انا عاوز البشمهندس (....)
- ايوه.. انت مين؟؟
- انا خطيب بنته
- انا انا.. أحمد.. اهلا وسهلا.. اتفضل

طالما يعرفني يبقي اكيد قريتهم.. بعد نص ساعه وصل حمايا العزيز مع العروسة.. عرفوني على الشخص الى فتح الباب انه يبقي جوز خالة العروسة..

انعم و اكرم..

جوز خالتها وقاعد في البيت عندهم بالترنج؟؟

وفين ام العروسة وخالتها طيب؟؟

غريبة..

مركزتش كثير.. ممكن يكونوا متعودين يقضوا الاجازات عند بعضهم كآسره مترابطة بزياده او اى شيء من هذا القبيل.. مش لازم كل حاجه غريبة علينا نقابلها بنية سيئة يعنى.

مر اليوم بدون اى ملاحظات ثانية منى ولا منها بخلاف ان الورد عمل شغل عالي اوي.. انصح بيه اى شاب.. مفعول الورد على البنات "زمان" كان نفس مفعول الحاجة الصفراء بالظبط.. دلوقتي بقت ساندويتشات الشاورما احسن من الكل.

في يوم عمل عادى كنت عند واحد من العملاء بتوعنا.. دردشة سريعة وقت التدخين.. انت منين.. انا من طنطا.. وانا كمان.. منين من طنطا.. من الشارع الفلاني.. اه الشارع ده في بيت نسايي.. فين بالظبط.. العمارة كذا الدور السابع.

لقيت الراجل بيركز معايا اوى باهتمام.

مع التفاصيل عرفت ان عنوان نسايي هو نفس عنوان بيت الراجل الى انا واقف بتكلم معاه ده.. والدور السابع ده بالتحديد هو نفس الدور الى أهله عايشين فيه.

الله.. هكون خطبت اخته وانا وهو منعرفش؟؟

الراجل مصمم ان ده عنوانه.. وانا مش هتوه عن البيت طبعاً.. الأمور تطورت الى شبه مشادة.. لحد ما الراجل دعاني لزيارته اخر الأسبوع في البيت علشان يشوف اخته الى اتخطبت دى وهو ميعرفش.

في سرية تامة رحت عنده البيت.. هو نفس بيت خطيبتي.. نفس الراجل الى فتحلى المره الى فاتت وكان لابس ترنج هو نفس الراجل الى دخل سلم عليا دلوقتي.. بس المره دى وشه جايب الوان.

هو في ايه؟؟

هو انا اشتريت العتبة الخضراء وللا ايه؟؟

بعد تهديد غير مباشر بدأت اعرف الحقائق..

العروسة الجوهرة المكنونة تبقى قريبتهم من بعيد.. وعلشان مستواهم متواضع قرررو يستقبلوني في بيت قرايهم دول على انه بيتهم.. يعني.. حبوا يرحبوا بيا في مكان يليق على حد قول الراجل اللى واقف قصادي.. واكيد طبعا كانوا هيعرفوني ومستحيل يكذبوا عليا لانهم ناس افاضل فوق الشبهات.

- اه.. كانوا هيقولولي امتى.. بعد الجواز؟

- يا راجل متدققش في التوافه دى.. المهم انت والبنت ربنا يباركلكم حياتكم

- وهو ربنا بيبارك مواضيع قامت على الغش والخداع؟ معرفش المعلومة دى.. ربنا اللى اعرفه حقاني وطيب لا يقبل الا طيب.. عموما.. أشكرك

خدت منه تفاصيل العنوان الحقيقي بتاع نسايي وكلمت امي علشان تنزل فورا تروح هناك وانا هحصلها.. فضلت قاعد مع الراجل شوية علشان اضمن انه ميعملش اى تليفونات.. ولما نزلت من بيتهم قطعت كابل التليفون الرئيسي- بتاع الشارع كله.. وطلعت على العنوان اللى اخدته منه رأسا.

هل كان حي فقير وبيت متواضع وناس بتكمل عشاها نوم وكده؟

ابدا.. كان بيت عادى جدا شبه بيتنا.. بيت لا يملك أصحابه اى مبرر حقيقي للخديعة او الظهور بمظهر مخالف للحقيقة.. بيت لو كنت شففته من الأول مكنتش هقول لأ خالص.

خبطت وفتحولي الباب.. طبعا كانوا اخدوا الصدمة لما شافوا امي.. الكلام كان واضح وقليل جدا.. عاوز شبكتي من فضلكم.. يبقى انت كنت داخل على طمع ودلوقتي عاوز تفرکش.. عموما.. اللى سايب مش من حقه الشبكة.

محاولة الشرح ان الكذب كان السبب محاوله عبثية.. الناس مش مركزه الا ان الشبكة من حق العروسة طالما انا اللى سايب.. حاجة كده لا جت في شرع ولا يأيدها قانون ولا عمرنا سمعنا عنها الا في مصر.. ظهر وش تاني خالص غير الوش الارستقراطي اللى قابلته اول مره.. بس الحقيقة مكنتش متفاجئ.. الكذب هو اصل شرور الدنيا.. اذا كذب ابن آدم.. يبقى توقع منه اى شيء مهما كانت فظاعته.

انطردت من البيت شر طرده بعد معركة حامية بيني وبين ابوها واخوها كان نتيجتها كسر- في ذراع اخوها واكثر من 16 غرزه في بطن ابوها ورأسه و4 غرز في ظهري وتكسير كل ما هو قابل للكسر- في بيتهم.. بعد كده تدخل أكثر من طرف في الموضوع بالرأي الشرعي اللى بيقول ان طالما الجواز لم يتم يغض النظر عن السبب.. يبقى كل الهدايا من حق العريس طالما جت بنية إتمام الزواج.

ولا حياة لمن تنادى..

على رأى عادل امام في مسرحية الواد سيد الشغال.. فجأة يا خال النسر.. الى على أورته طار.. وقال بصوت جهورى.. انت ملكش فلوس عندي

وراحت عليا الشبكة اللى قعدت اسدد في تمنها 24 شهر بحالهم

لم اسامحهم ابدا.. عرفت بعد كده انها اتخطبت مرتين بعدي خرجت بيهم بالشبكة برضه.. هديت نفسي.. شوية لما عرفت انهم واخدينها تجارة واني مش الوحيد اللى اشترى العتبة بعد إسماعيل يس.. توجهت لربنا بدعاء المظلوم.. انا شفيت بالفلوس دى لا سرقته ولا ورثتها.. لما حجيت بيت ربنا اول مرة بعدها خصصت شوط كامل من أشواط الطواف للدعاء عليهم بكل شيء سيء في الدنيا والاخرة.

طيب.. هل كان في نتائج اسوأ للموضوع ده؟

طبعاً..

حكيت سيرتهم القذرة لكل بيت اعرفه في طنطا.. كثير اوى كنت بروح عند بيتهم ارمى عليهم ازايز مولوتوف واطلع اجري.. اكرر من مرة يستدعوا المطافئ بسيبي.. اكرر من مرة يحرروا محضر ضدي وافلت منه بمعجزة وبيعض النفوذ.

سنتين كاملين بعدها كنت شرس جدا فيهم في التعاملات المادية مع اى بيت دخلته.. لا انكر ابدا ان في ناس تأذت بسبب شراستي دى.. لكني فعلاً مكنتش قادر انسي انى اتنصب عليا..

بس برضه حقي مرجعش..

لا منى اخدت فلوسي.. ولا منى حافظت على صفحتي بيضاء من ايداء الغير.

كنت مظلوم تحول الى ظالم.. بالظبط زى عرفه مشاوير في الهلفوت..

الانتقام كان سلاح ذو حدين.. زى ما اصاب من سرقوني.. جرحني انا كمان.. ولم يحقق هدي او يشفي غليلي في الاخر..

مين السبب..

الكذب..

قاتله الله

الحب في زمن السيکشن

لو قلت عاوز اتجوز وحد قالك اتلھى على عينك وأكل نفسك الأول.. اوعى تزعل منه.. الراجل ده عاوز مصلحتك.

.....

في الكلية..

انا كنت واحد من قلائل جدا ملهمش اى مغامرات عاطفية ولا اى علاقة من اى نوع بقاء التأنيث بخلاف حب من طرف واحد للعزیزة هیاتم.

قضيت فترة مرافقة صعبة بين التربية العسكرية القاسية في الثانوية الحربية وبين تهديد اهلي ان الى هعمله في بنات الناس هيقعد لاخوات البنات.. كان دايمًا قصادي جملة كنت فاكرا مي هي الى اخترعتها في قصة السقا الى مسك ايد الزبونة بتاعته..

دقة بدقة.. ولوزدت لزاد السقا.

لو عايز تتخيل منظري في الكلية.. فهو بالظبط امام "شكري سرحان" في فيلم شباب امرأة.. الشاب الريفي الساذج الى جاى من الافايلم علشان اذاكر وانجح.. معنديش اى انطباعات عن القاهرة الا انها مدينة فيها البنات زى لهطة القشطة.. ويخرجوا لوحدهم ويرجعوا البيت بعد صلاة المغرب.

كنت بقعد في الصف الأول في المحاضرات وأحضر- السيكشن هو هو مرتين وثلاثة.. يعرفني كل الدكاترة والمعيدين ويتعاملوا معايا باعتباري زميل المستقبل.. ازاي لأ وانا الى كنت بشرح العملي "السكاشن" دايماً لزمائلي وانا الى بيتدرب في الصيف في شركات وانا الى بيعرف ينزل ويندوز وشبكات ويصلح الأجهزة لو خربت.. دخلت الكافتيريا بتاعة الكلية مرة او مرتين طول سنين الكلية.. اروح الكلية الصباح اول واحد بالقميص أبو زراير مقفولة لحد اخر زرار وامشى- على صلاة المغرب بعد ما الامن يخرجني بالقوة من المعمل.. حياتي في الكلية كانت بين قاعة المحاضرات والمعمل او قاعد بقرأ على جمب مع اتنين او ثلاثة شبيهي بالظبط.

في يوم واحدة من زميلاتي طلبت مني الديسكات الى كنت شايل عليها كل الشغل الى عملته على ال C++.. عملتلها نسخة ورحت الكلية تاني يوم وانا حاطط جيل وعامل شعري Spike.. قعدت بكل ثقة منتظر انها تيجي تقولي انها معجبة وكده.. اما يعني طلبت الديسكات ليه.. بعد كده شفتها قاعدة مع معيد بيشرحها قواعد بيانات.. اتصدمت وقررت اقفل بابي على قلبي المحطم وانسي مع المذاكرة قصة حب عمرها 18 ساعة لما تيقنت ان كهن مصطفى ام حجر.

ساعديني على العزلة كليتي وسمعتها التاريخية.. لك ان تتخيل ان في عز أيام السبعينات والميني جيب والحركات دى.. خرج من كليتنا اول نشاط دعوى لطلبة الاخوان المسلمين واختاه الحجاب قبل الحساب.. ابويا خريج نفس الكلية.. تقدر تقول ان الكلية دى بالذات هي اخر مكان ممكن تتوقع ان في بنات.. البنات عندنا كانوا يلبسوا شرايات كورة مش شرايات فيلية.

كنت بمشي- كل يوم من بيتي في حدائق القبة الى ميدان عبده باشا في العباسية.. كنت بعدي على مجمع قصر- الزعفران الى فيه كليات تجارة وآداب وحقوق.. ابص بحسرة على العيال الى قاعدين يفطروا مع بعض وسط الهيء والميء وصوت ضحكهم واصل للسماء وانا اعيط.. كلية الآداب دى عبارة عن مصنع تفرخ وانتاج مزز.. كنت اقارن بين حالهم وحالنا في عبده باشا وكان عطلول ييجي في بالي فيلم الكرنك.. تحديدا.. المشهد بتاع فاللارالاج.

نشاط اتحاد الطلبة والدراسة اكلوا كل وقتي لحد ما وصلت الى اخر سنة.. قصادي تحدي كبير اسمه مشروع التخرج.. هو ده المقياس الحقيقي ان كنت هنجح في السوق وللا لأ.. المشروع صعب ومحتاج شغل كثير لأنه مشروع مشترك مع بتوع ميكانيكا واتصالات.

قسمونا مجموعات.. مجموعتي كانت 5 افراد.. هي كانت واحدة منهم.

كانت متوسطة الجمال.. غير ملفته للنظر بأى شكل من الأشكال.. على وشها آثار لعنة الكلية.. اجدع كوافير كان يحتاج وقت طويل علشان يخرجها من مود كلية الهندسة ويرجعها الى طبيعتها الأنثوية تانى.

ميزتها الرئيسية كانت الأصل الطيب.. بنت ناس مألولة ولكنهم شحاتين زى حالتي.. مستوى اجتماعي راقى تقدر تلمسه في التعامل اليومي معاهم.. ابوها دكتور مهندس وامها مهندسة خريجين نفس الكلية الملعونة بتاعتنا.. اقل اخواتها بيحضر دراسات عليها.. اسرة ذات تاريخ عريق في القوات المسلحة.. لها عم شهيد في أكتوبر 73 كرمته الدولة بإطلاق اسمه على واحد من اجمل وارقي أحياء مدينة نصر.

باختصار.. كانت من النوع اللى يربي عيال بتستحمى ويقولوا "شكرا يا طنط" و "لو سمحت يا انكل" و "اى ام سورى".

التقارب حصل لوحده من غير ما اقولها انا معجب وهى تقولي اديني وقت افكر.. اسبوع ورا التاني من الشغل المشترك في مشروع التخرج خلانا قرييين من بعض.. نروح ونيجى سوا.. قاعدين في السيكشن طول النهار بنشتغل وبعدها المجموعة كلها تروح عندها البيت علشان نكمل شغل.. عندنا الف موضوع نتكلم فيه غير نفسى.. امسك ايدك وقلت الكلام ده لكاه واحدة قبلي.. العلاقة كانت محترمة جدا وفي النور قصاص الجميع.. عمري ما قتلها كلام ناعم ولا عمرها تعاملت معايا بنظام جايلي عريس يوم الخميس.

طب انا اعمل ايه بقى؟

قبل التخرج ب 3 شهور رحت حكيت لأبويا.. رد فعله كان غريب انه مطردينش من البيت ولا جاله ازمة قلبية.. تخيل انت عيل عنده 22 سنة فاضله على التخرج شهور وجاى يقولك آبا انا عايز اتجوز "بصوت محمد هندي".. لو كان رقعي علقه بالحزام كسر فيها عضمي كان هيبقي عنده الف حق.

بس ابويا معملش كده..

- بص يا احمد.. من حيث المبدأ معنديش مانع.. انا اعرف ابوها.. كان قبلي بدفعتين.. بس عندي شرط
- موافق من غير ما اعرفه
- لازم تنتظر سنة على الأقل لحد ما تقف على رجلك ونشوف مستقبلك رايح فين.. قبل كده هيبقي مستحيل.. انا هساعذك طبعاً.. بس لازم على الأقل دخل تقدر تصرف بيه عليها.. وللا تحب انا اصرف عليكوا انتو الاتنين؟
- عداك العيب يا حاج.. اطمئن.. هي مستعدة تنتظرني طول العمر.. وحتى تحترق النجوم وحتى.....
- اتفقنا.. ركز بقي في مشروع التخرج.. في انسانه منتظارك دلوقتى اهو..

منتهي الحكمة من ابويا.. لو كان رفض كنت هعند واكيد شغلي كان هيتأثر.. لكن موقفه ده حول فرحتي بالارتباط الى طاقة إيجابية وظفتها في المشروع علشان أوصل لهدفي بسرعة.. كده الأهالي عارفه والموضوع في النور اهو.. مش رسمي تماما صحيح.. لكن على الاقل لما بكلمها في البيت.. بيبقي بعلم أهلها وفي حضورهم وبمباركتهم كمان.

واتخرجت..

الحمد لله اشتغلت قبل حتي الشهادة ما تطلع.. مكانش عندي جيش فاندمنت بسرعه في سوق العمل وبلاويه.. حبيت الصنعة جدا.. كنت بتنشط كثير بين المحافظات علشان المشاريع اللى كنت شغال فيها.. كنت بصحي قبل الفجر وانا بعد نص الليل بشوية.. شغل وكورسات ومذاكرة وامتحانات.. سفر وعملاء واخطاء شاب لسه بيتعلم.. حياتي كانت زحمة اوى.. كان منظر معتاد في اخر عربية في مترو الانفاق انك تلاقي عيل قاعد على الأرض ماسك قلم وكتاب تخين بالإنجليزي وعمال يخطط وتفوته المحطة عادى وهو ولا حاسس.

طيب.. وبنت الحلال المنتظره دى؟

وقعت من دماغي تماماً..

مش علشان انا سافل ولا كنت بتسلي.. اطلاقاً.. نفسيا انا مكنتش جاهز للارتباط وتحمل مسئولية انثى اتولدت بربع ضارب في دماغها.. استغرقت في الشغل تماما ونفستلها.. مكانش عندي وقت لها فعلاً خصوصاً ان هي كمان اشتغلت.

هي زيه زي اى بنت.. في حياتها راجل عاوزه تتكلم معاها كل يوم.. من حقها نخرج سوا على الاقل مرة كل شهر.. لازم اعيرها ما هي بى ادمه برضه.. انا مش مركز معاها خالص.. كنت دايما بتخانق معاها واقلب الترابيزة على دماغها مع اتهام انها مش مقدرة انا بعمل ايه علشان المستقبل.. واروح قافل السماعه.. وهى كانت دايما تصالحي.. نظرتها ليا كقائد للمجموعة متغيرتش من أيام الكلية.

23 سنة عند البنات هوزهرة سن الارتباط.. اى واحده فى السن ده لو مش بتفكر فى الخطوبة والفيستان والنيش والعريسان تبقى انسانة مش طبيعية.

الستات في الوقت ده خارج حساباتي تماما..

قررنا اننا لازم نكون واضحين مع بعض.. الامور تطورت من شد في الكلام زي كل مره الى خناقه حقيقية كانت الأولى والأخيرة..

- باااااااااااااااااااا.. كفايه لحد كده.. احنا مش هينفع نكمل.. ربنا يوفقك مع حد تاني
- كنت عارفه انك هتقول كده.. كان مفروض اخد بالي من زمان.. بس انا الى حماره
- لا حماره ولا غيره.. ربنا يوفقك وخلص.. سلام بقي علشان عندى شغ.....

والمرة دي هي اللي قفلت السماعه.

وانا محاولتش اصالحها ابدًا..

أدركت ان في فرق بيولوجي نفسي- بين الرجل والست.. البنت في سن ال 20 جاهزة جسديا ونفسيا للزواج والانجاب وتكوين أسرة.. بينما الرجل مش جاهز الا جسديا.. لا امكانياته العقلية ولا المادية تسمح.. والمقارنة بينهم هنا قمة في الحقم والغباء.. اذا تساوى سن الرجل والمرأة تحسن المرأة اكبر.. ببساطه خالص البنات بتنضج الأول وبشيخ الأول برضه.. علشان كده لازم يبقى في فرق سن مناسب بين الرجل والست.. لما تكون هي 20 وانت 25 او 30 يبقى كده ممكن الأمور تظبط.. انتوا الاتنين بتفكروا في نفس الاتجاه.. معنى كده ان انت لو في الكلية دلوقتي يبقى عروستك لسه في الإعدادية او الثانوي بالكثير.. كده كويس مش وحش خالص.. خد وقتك وظبط مستقبلك لأن الجواز اقوى اساساته هو الأمان المادي.. محدش هيديلك بنته تجوعها علشان عينيك خضراء ومعندكش كرش.. مش عاوز اقولك ان صاحبتك في الكلية الى انت قضيت معاها احلى أيام وطنشت علشانها محاضرات وعديت من سنة ثالثة بمقبول بالعافية بسببها.. هي نفسها لما تتخرج "او قبل كده" هتسبيك بمنتهى البساطة مع اول واحد بكشر يدق الباب وعنده شقة ويقدر يصرف.

لما يشوف "العيال الحبيبة" زى ما كنا بنسميهم ايام الكلية.. يبقى عاوز اقول للبنات تحديدا.. سيبك منه.. ده مش هينفع رق ولا طار.. هو كويس والله وارجل خلق الله وحنين.. لكن ظروفه مش مناسبه لظروفك.. مفيش منطق انك تقضى اجمل سنين عمرك في انتظار ملوش اى لزمه.. سيبه يشوف مستقبله وانتي كمان شوفي حالك.

بطة مش ليك يا مرزوق..

كثير بنسمع قصص من نوعية وقفت جمبه واتحدت الكل علشان.. اهى.. اهى.. ساعدته كثير واتنازلت عن شبكتي علشان اقف جمبه.. استحملت معاه ايام الفقر والشقي.. كنت باكل 5 مرات بس في اليوم علشان اوفرله.. وفي الاخر راح اتجوز عليا عيله صغيرة.. كلهم مصطفى أبو حجر يا بابا ضياء.

طبيعي ان ده يحصل حضرتك.. ماهو شبابيه راح في مشوار الاستقرار.. بعد الاستقرار هحتاج حد يقوله يا محاميلو حسب تدرج هرم الاحتياجات الإنسانية الى عمله عالم النفس ابراهيم ماسلو.. لو سابك علشان واحده تانية فده سفاله مفيهاش جدال.. بس سفالة طبيعية هتحصل هتحصل.. عينات نادره اوى مش بيحصل فيها كده وتفضل القيمة الأساسية فيها للعشرة والوفاء.. بس يا ستي خلينا نفترض ان حالة واحدة من كل مليون هيجحصل فيها كده.. هل عندك اى ضمان انك مش هتكوني الحالة دي؟

طب لزومه ايه من الأول؟

الموضوع مش اتهام ولا صراع علشان لازم يكون في طرف غلطان.. الموضوع أبسط من كده بكثير.

كمان في حاجه مهمه جدا لازم يتعمل حسابها..

رد فعل الأهل..

فكري كده في سبب منطقي يخلي امك توافق على واحد من سنك كانت لسه امه امبارح بتعمله سندوتشات زى ما هي كانت بتعملك بالظبط.

انت كمان فكر في سبب منطقي يخلي ابوك يرعي شقي عمره في مشروع يبسط حضرتك وهو شايف انك لسه مش بتعرف تأكل نفسك.

اهلها هيوافقوا عليك لما يشوفوا قصادهم بنى ادم يقدر يحل محل ابوها ويقدر يبقي هو صاحب الامر والنهي.. اهلك هيوافقوا اذا كنت واقف على ارض صلبه تقدر تقول كلمة وتلتزم بيها.. موقفك هيبقي قوى لو مستقبلك واضح المعالم.. مش معنى كده انك تكون مليونير ولا بقيت المدير الاقليمي لشركة الفضاء الخارجي الدولية.. انما يبقى واضح انت ماشي في انهي اتجاه وبكره بتاعك شكله ايه وايه مدى تأثير صدمات الدنيا عليك اذا حصلت.. دي حاجه في علم الغيب صحيح.. بس ده الى بنسميه الخيرة والشعر الأبيض.. بمعنى آخر.. انا كأب اطمئن اني ادليك بنتي ومرتجعها ليش تاني.

لا انا ولا هي كنا وحشين.. احنا اتقابلنا في وقت مش مناسب لينا احنا الاتنين.. انا قصادي مشوار طويل علشان أقف على رجلي وأقول ها انا ذا.. تكون هي اتجوزت وجابت اورطة عيال تلحق تربيههم بصحتها قبل ما تشطب.. حب ايه وكلام فارغ ايه.. الامور دي لازم تتوزن بميزان العقل اولاً.. محدش بيموت من الحب خصوصاً ان العالم فيه شاورما وكبدة وبقلاوة تركي.. انما ممكن يموتوا بعض بسبب الخلافات بعد الجواز.. واحب اقولك كمان ان كل أنواع الحب بتخلص وتنتهي تماماً بعد 3 ساعات من الجواز.. وعلشان مبقاش ببالح.. ممكن تقول 6 ساعات.. يوم الصباحية هتقف في البلكونة في حدود الساعة 10 او 11 الصبح تبص عليها وهي نايمه في نص السرير وواخده الغطاء كله وتنفخ دخان سيجارتك لو بتدخن وتقول احيه.. ايه الى انا عملته في نفسي ده!!!

طيب.. هل في حالات ارتباط حصلت من الجامعة؟

في طبعا.. لكل قاعدة استثناء.. ده على أساس اننا نعتبر ان حالة واحدة من ضمن مليون حالة تبقي استثناء.

غراب البين

من جاور الحداد ينكوى بناره.. طيب أعمل ايه لو كان الحداد ده ابويا؟

الكلام ده كان سنة 2010.. كنت لسه خارج من تجربة الانفصال مكملتش شهرين.. زى ما اتجوزت بسرعة وكنت غلطان.. طلقت برضه بسرعة وكنت غلطان اكتر لما افكرت ان كل الناس فاهمة معنى تسريح بإحسان.. الإحسان ده كلفني كثير اوى ماديا ومعنويا.. كنت اقدر اعمل حاجات كثير جدا.. بس اخترت اكبر دماغى.. وده اللى دفعت تمنه غالى اوى من وقفي واعصابي وقبلهم فلوسي.

حياتي زى ما هي.. مفيش حاجه اتغيرت الا صحة ابويا المتدهورة ونظرة حزن في عيون أمي.. زيارات مكوكية الى مصر— مرتين شهريا.. اسهال العرايس لسه زى ما هو.. مش عاوز أقول انه زاد بسبب تحسن وضعي المادي جدا وتردى أوضاع مصر جدا جدا.. عرايس بالهبل صحيح.. بس زحمة على قلة فائدة.. على رأى دعبل الخزاعي لما قال:

ما أكثر الناس لا بل ما اقلهم ** الله يعلم اني لم اقل فندا

أنى لأفتح يعنى حين أفطحهما ** على كثير ولكن لا أرى أحدا

عقدة حياتي كانت ولا زالت الطنطانات.. كائنات في حجم البقر.. حشرية فضولية تعشق النميمة والقليل والقال.. عندهم شوفيانية غريبة وتصور مربع انهم عارفين كل شيء عن كل شيء وهما في الحقيقة اجهل من الدواب.. ضحكاتهم سمجة ودمهم ثقيل جدا.. شدييدات السخاء لو هي قبضوا.. شدييدات البخل لو هي دفعوا.. منطقهم خربان غير متزن ولا يخضع لعقل او منطق او شرع من اى نوع.. كل آرائهم غلط ومعندهم اى ميزة الا انهم بيطلبخوا كويس.

الطنطانات معندهم اى تصور عن الجواز الا انه في خروف عنده زريبة ومعاه حزميتين برسيم ولازم نشوفله نعه تاكل منه حزمة ونص.. واللى نشوفه هو الى صح.. طظ فيها هو وآراؤه وطموحاته ان كان له طموحات وشروطه ان كانت موجودة.. سمعت مرة واحدة منهم بتكلم امي مره وبتنصحتها انها لازم تجبرني على واحدة هي كانت رشحتها.. امي مش متصورة ان الى معملتنوش مع البنات هتعمله مع راجل عدى الثلاثين.. والطنط دى مصره اني لسه عيل مفهمش حاجه.. راودتني رغبة قوية اني اشتمها بأمرها.. بس احتراماً لأمي اكتفيت اني فصلت فيشة التليفون وهما بيتكلموا.

كانت الطنط من دول تبتسم في وشي بسماجة وهي بتقولي "عقبال ما نشرب شرباتك".. انا ببقى نفسي.. اقولها "عقبال ما نشرب قهوتك يا طنط".. بس يميني نظرات امي النارية.

في يوم كتيب قابلت واحدة منهم في بيتنا.. زميلة أمي في المدرسة.. اول ما شفت وشها كرهتها لله في الله.. بسملت وحوقلت واستعذت بالله من ابليس.. توجست خيفه من الولية وشكلها ونظراتها المتفحصة.. لما عرفت انها هتتغدى عندنا قررت اني هعمل دايت ومش هاكل رغم اني كنت خسيت جدا بفعل العملية.. توقعت هي جايه ليه.. أخواتي البنات اتجوزوا ومعادش فاضل غيري.. سترك يا ستار.

اكل ايه والنبي الى ممكن اكله والولية دى قاعدة في وشي.. ان مجاليش تلبك معوي من ثقل دمها يبقى اكيد هي جيلي تسمم من عينها او يجيلي الضغط من منطقها البايظ..

حطينا الأكل من هنا وانفتحت في وشي ماسورة صرف صحي من هنا..

- شوف يا بو حميد.. انت عارف ان معزتك عندي من معزة رشاد ابني بالظبط

الهي تتوكسى يا بعيد.. مسميه ابنك رشاد.. اهو ده سبب تستاهلي الحرق علشان..

- ايوه طبعاً يا طنط.. ربنا يبارك في رشاد ويرزقه بتهاني ان شاء الله.. او انتصار.. ماهو اكيد رشاد ده مش هيتجوز باكينام

يعني

- الاول نفرح بيك انت.. رشاد لسه صغير

- خير يارب (بيني وبين نفسي.. يارب الاكل يقف في زورك علشان متكلميش)
- بنت بقى انما ايه.. قالب زبده ماشى على الارض.. حته بقلاوه بالعسل.. طاجن كباب حله مستوى على نار هاديه.. مانجايه خرطها الخراط خرطه عجب.. شبه البت بتاعة اخاصمك اه كده.. ابوها متوفى.. معاها ليسانس حقوق.. وزى ما انت عاوز بالطبط.. لا بتشتغل ولا عايزه تشتغل.
- حضرتك تعرفيهم شخصياً؟
- اه.. من زمان.. امها صاحبي الروح بالروح
- طيب.. خير ان شاء الله.. نشوف الموضوع ده

بيني وبين نفسي لقيت سبب قوى جدا للرفض.. كفاية ان أمها تبقى صاحبة برمبل الزفت الى قاعد قصادي ده.

مش متحمس ومش فاتر.. نشوف ومش هنخسر حاجه.. ان كان على دسنة الجاتوه او التورتاية.. انا خلاص اتعلمت وبقيت اروح ازور الناس وقت الغداء علشان اخذ حقي اكل.. رأى المثل.. كل اكل البخيل واطفحه..

بيت متوسط الحال لا غنى ولا فقر.. منطقته متوسطة لا شعبيه ولا فخمة.. خير الأمور الوسط.. ربنا يجعلنا دايما من أهل الوسط في الدنيا.. وأهل اليمين في الآخرة.

ام العروسة ست عاديه خالص.. لو استثنيت فضولها الزائد.. يبقى اقدر اقول انها تمثل 90% من ستات مصر.

امتد الحوار الممل بلاى هدف حقيقي اللهم الا كسر الجليد والعيال تاخذ على بعض وكده.. فى الحقيقة هو بيبقى فرصه لدراسة القبول.. فى خلال القعدة دى مطلوب منك قرار مستقبلي حاسم.. اه او لأ.

بعد نص ساعة.. دخلت ست تانيه فيها شبه من ام العروسة.. عرفت انها خالتها وبعد شويه كمان دخلت ست ثالثه عرفت انها جارتهم.

معجبنيش الموقف ده.. دى بنت جايها عريس.. ودى أمها.. خالتها وجارتها جايين ليه؟؟

لقيت نفسي.. مضطر اعيد كل الكلام الى قلته من ساعة ما وصلت.. ما هي زبطة بقى.. يعنى امها تعرف وخالتها وجارتهم لأ.. ده كلام برضه؟؟

شوية ودخلت اختها الكبيرة.. عشرينية معاها طفل في عمر الزهور.. لفت نظري ان البيت مفهوش رجاله خالص.. ده شيء قلقتني.. مبحش اتكلم مع ستات الا في اضيق الحدود.. لا انا بفهمهم ولا هما يفهموني.. انا راجل اعرف من الألوان أربعة وان واحد + واحد يساوي 2.. مع الستات عرفت ان في 16 مليون لون وان 1+1 بشوية عياط ومحن ودبدبة في الارض ممكن يبقوا 3 او 5 عادي.

قالولى قبل الزيارة ان ابوها متوفى.. لكن خالتها وقعت بلسانها في وسط الكلام وقالت ان ابوها وامها مطلقين..

كده وقعنا في مطب.. انا عندي عقدة من الطلاق.. كمان محبيتش اسلوب عرض المعلومة بالتنقيط ده.. اكره جدا كذب الناس علشان خوفهم لو قالوا الحقيقة يحصل غير الى هما عايزينه.. ده غش وتدليس صريح.. بالنسبالي ده سبب كافي جدا علشان أقوم امشي.. بس قلت اقعد شوية اكيد هلاقي بلاوي تانية.. الى يكذب مره في شيء.. يكذب الف مرة في كل شيء.

رميت ملاحظتي في وسط الكلام بذكاء.. امها فهمت الرسالة وغيرت الموضوع بينما خالتها انطلقت في وشيء زى الصاروخ..

- وايه يعنى مطلقة.. مانا كمان مطلقة.. هو الطلاق حوروم؟؟
- لا طبعا محرمش ولا حاجه.. بس حضرتك مش قدوة.. ولا في اى شيء في الطلاق يدعو للفخر علشان نقول فلان كذا وعلايه كذا
- امال يعنى الواحده تعمل ايه لما تعيش مع راجل بخيل وعصبي ورمه ومهمل بيته ومش يبصرف على عياله

واتفتحت ماسورة الشكوى والكلام الى بنسمعه في اى طلاق.. واضح ان الجماعة دول بينقلوا الكلام من بعض زى ما هو.. الله اعلم بظروف كل واحدة.. فى ستات فعلا بتعانى.. ولكن من خبرتي الشخصية.. نسبه كبيره اوى بتفتري في مجتمع بقى فعلا ظالم

للرجالة.. انا نفسي.. كنت ضحية ظلم بين بسبب القوانين الوضعية.. عرفت كده لما القاضي قالى والله يا ابني مش عارف اقولك ايه والورق كله بيأيد كلامك.. بس اهو.. ما في اليد حيلة.. القانون كده.. قبل ما يدفعني المؤخر للمرة الثانية.

اتضايقت جدا من الست دى وكلامها.. لا المكان مناسب لكلام زى ده ولا التوقيت كمان.. بقى البنت جايها عريس.. تقوموا تقليبها قعدة حكاوي مطلقات؟ البعيدة هابله؟

ذنبا ايه المسكينة دى تتسمم دماغها بافكاركوا الهباب دى.. مش علشان حضرتك جوزك كان وحش "واشك في كده بشده" يبقى الرجالة كلها وحشه.. الله اعلم.. يمكن ربنا رحمه منك.. والجواب باين من عنوانه اهو..

لمعت في دماغي فكره.. الصراحة كنت متغاض اوى من الولية دى.. فحببت اخرسها خالص..

- حضرتك بتشتغلى؟

- لا..

- عندك أولاد؟

- اه.. محمود في اولي تجارة وسما في الليسانس السنة دى بنا يحرسهم.

- ربنا يبارك فيهم.. حضرتك قاعده في البيت بالعيال الى هو مش بيصرف عليهم.. غالبا العيال دى بتاكل هواء ومش

بيمرضوا ابدا وبيتعلموا مجاني وبيلبسوا من اهل الخير.. ماهو مبصرفش عليهم بقي

- وانا هكذب عليك ليه.. الرجالة كده عموما.. احسن ما فيهم كلب

- طيب يا ستي الله يكرم اصلك ويبدلك خير ان شاء الله

- لا والله صدقي.. عندك كمان الست الكمل دى (وشاورت على جارتهم) وقعت في واحد الله لا يريك.. 6 شهور وقالت

جاي

- 6 شهور!! الله اكبر.. معلىش.. هما الطيبين كده.. ملهمش حظ

- وهنروح بعيد ليه.. اختها اهي.. شافت الويل وسواد الليل قبل ما تخلع المفضوح الله يحرقه.

- الله.. برضه!!

- ههههههه.. مش بقولك كلاب

- ايوه فعلا.. انا اقتنعت

نظرة لوم وعتاب من البنت لخالتها وصلتلى انطباع من اتنين.. يا اما البنت مش متفقه معاها في الزبالة الى بترميها دى.. يا اما البنت معترضة على توقيت الكلام.. وفي الحاليتين معاها الف حق.. انا لو مكانها كنت قمت غرست سكينه في قلبها علشان اخذ ثواب.. البنت نفسها والحق يقال.. كانت عاجباني ظاهريا.. لسه متكلمناش علشان احكم على دماغها.. بس اتبسطن بها اوى لما عرفت انها بتقرأ ولها في الكتب.. اى نعم بتقرأ القرف الى بيكتبه احسان عبد القدوس.. بس اهو.. شوية شوية ممكن اعلمها تقرأ لمصطفى محمود وعبد الوهاب مطاوع ويوسف ادريس.. المهم ان البذرة موجوده.

مشينا من عند الناس وانا في قمة حيرتي.. ام البنت وكل خالاتها الأربعة – زى ما عرفت بعد كده – مطلقات.. جارة البنت واختها الكبيرة مطلقات.. 3 من بنات خالاتها مطلقات وباقي بنات عائلتها لسه متجوزوش.. لها اخت اصغر منها لسه مخطوبه.. وشكلهم كده بيتكلموا في اجراءات طلاقها.

المسكينة عايشه في وسط مسموم.. مفيش راجل حواليتها في دايره نص قطرها مليون كيلومتر.. بتصحى على حكايات المطلقات.. وتنام على قانون الاحوال الشخصية.. على الغذاء اخبار جلسة النفقة بتاعة اختها.. وعلى العشاء تليفون مع المحامي الى ماسك قضية الحضانه بتاعة بنت خالتها.. يوم الخميس بيحضروا قعدة طلاق صاحبتهم.. ويوم الجمعة بيرتبوا ازاى هياخدوا القايمه من طليق جارتهم علشان ضربها..

جو خائق مسموم البنت بريئة منه تماما..

البنت مثقفة وبتقرأ.. مش شرط ابدا تخضع لجهل امها وغباء جارتهم والسم الناقع الى بيتصب في ودانها من خالتها زعيمة مطلقات وجه بحرى.. جايز هي تكون حاجه مختلفة..

لو قدرت اقتنع بكده.. يبقى انا بضحك على نفسي..

ابويا أيد كلامي بشدة.. في كلمتين ساعدني كثير انى احسم القرار..

- الجواز يا ابني 90% منه ام الزوجة.. قبل ما تبص للبننت بص على أمها وشوف بتعامل ابوها وبتتصرف في البيت ازاى.. شوف سلوكها واخلاقها.. بنسبه كبيره هو ده الى هتشوفه في بيتك.. مفيش حد في العالم له القدرة على افساد حياه زوجيه مستقرة او اصلاح حياه زوجيه متوترة الا أم الزوجة.. ام الزوج تخرب بينما ام الزوجة تعمّر.. حماتك لو حبتك يبقى هتعيش شهريار.. انت أيه رأيك في امها.. مستعد تتقبلها زى امك؟
- الصراحة لا.. دى وليه رخمه اوى.
- خلاص خلصت.. ياللا علشان تلحق طيارتك.

سافرت وانا مقتنع برأي بابا جدا.. لا اخفى انى كنت حزين.. صعبت عليا البننت وفكرت جديا انى انتشلها من البكابورت الى هي عايشه فيه ده.. اكيد هتقدر الجميل وهتبقى نعم الزوجة.. هفسخها وادلعها وهتعيش معايا حياة هتشوف فيها عملي ان كل القاذورات الى كانت محيطة بيها دى تستاهل الحرق.. هعرفها بجد يعنى ايه يبقى في حياتها راجل تتسند عليه وتنام في منتهى الاطمئنان لان بس حسه في الدنيا.

طيب افرض تصوري طلع غلط وتأثير النسوان دى على البننت طلع اقوى منى؟ ساعتها هبقى مطلق للمرة الثانية.. ولا اعتقد انى مستعد للطلاق تانى.. الانسان بعد الطلاق بيبقى حذر جدا وعقلاني فوق التصور.. احنا عايشين في مجتمع بيجلد المطلق.. ما بالك بالمطلق مرتين؟

دعيتها من قلبي ان ربنا يقصف عمر امها وخالتها وجارتهم علشان هي تاخذ فرصتها في الدنيا وتعيش.. بس يبدو انى مكنتش متوضى لأن امها وخالتها لسه عايشين يطلقوا في الناس لحد النهارده.. غربان مجرد ما تحوم حوالين بيت.. يبقى الخبر الأسود آت لا ريب فيه.

بعد الحكاية دى ب 5 سنين كنت قابلت السعد كله في بيت ام حمزه.. حياتي اتغيرت وهجرتها الكآبة للابد.. البيت اتملي ورد وبخور ومزازيك وملوخية واهتمام مبيتطلبش واكياس زباله بشيلها على قلبي وانا نازل.. نص فلوسي رايح على البامبرز.. اللهم لك الحمد.. ضحكة حمزة بسبب طرقعة صوابه على وشي تساوي الكون وما فيه.. أصبحت في نظر جدي راجل كبير ومن حقي اقعد في جلسات فض المنازعات والكلام الكبير ده.. انا صحيح بعد الجواز رجعت اعيل من الأول.. بس ظاهريا كده ببقى سعيد لما باخد مراتي واروح بيت جدى واقعد مع الرجالة وهى تقعد مع الستات وكل مجموعة تقعد تقطع في فروة المجموعة الثانية لحد ما الاكل يتحط.. سنة الحياة مشيت عليا.

كلمني جدى في يوم بسبب تجربتي في مشاكل الطلاق وخبرتي في قانون الأحوال الشخصية.. في أزمه بين ابن خالتي ومراته والانتين واقفين على الطلاق.. الولد اتيتم بدري وملوش اخوات رجاله ومش عاوزينه بيان وحداني.. تعالى يا احمد احضر.. حاضر يا جدي..

حضرت الجلسة.. دخل ابن خالتي.. ودخلت حماته..

يا نهار اسسسسسوح..

دى الولية إياها..

خالة العروسة الى كانت صعبانه عليا..

غراب البين..

جاي في السريع

فاكرين الفيلم بتاع ماجد الكدواني؟؟ ده مش فيلم للأسف.. دى حقيقة مرعبة

لو انت عايش في مصر.. هيبقي سهل انك تقابل ناس وتتعرف على بشر- ممكن تلاقي فيهم من تصلح كشريك للحياة.. لكن لو قررت الهجرة زى حالاتي كده.. فالموضوع بيبقي صعب جدا.. السفر للخارج بيقضى- على المشاكل المادية ومشاكل الغباوة المتعلقة بفرش شقة مش هتسكن فيها صحيح.. لكن المعروض قليل جدا واقل منه الوقت المتاح للتعارف.

لما تقابل حد نازل أجازه.. طبيعي انك تلاقيه بيلف حوالين نفسه ومعدوش ثانية واحدة فاضية.. تحس انه عايز يعمل كل حاجه في مصر اتحرم منها في الغرب.. أيام الأجازه بتعدي هوا.. وطبعا مفيش اى حاجه بتحصل فيهم.

هتزل تلاقي والدتك مربوطه مع عروستين او اكثر.. هي وشطارتها بقى.. هترتب جدول مواعيد الزيارات علشان تلحق تشوف اكبر عدد ممكن تختار انسبهن كشريك للحياة.. هتلف وتدور وتقابل وتشوف وتقيم كل واحده بالميزان التجاري الصرف ومعايير المكسب والخسارة.. وسطاء الشر- (الطنططات) هيحاولوا بكل الطرق انهم يجملوا البضاعة في نظرك.. هيقولوك كل حاجه انت مش عاوز تعرفها ويخبوا عنك كل المهم.. انت في نظرهم مجرد زيون نازل يشتري.. مش مهم يشتري ايه.. المهم نعرف نبيعه.

احداث القصة دى كانت سنة 2010..

في واحدة من زياراتي المكوكية الى مصر.. لقيت امي محضره قائمة مرشحات عنب.. ما شاء الله.. الرزق المره دى عال.. يبدو كده ان موضوع العرايس ده مواسم.. كانت بتعدي عليا أيام جفاف مفهياش اى بتنجان.. واوقات تانيه الاق خير كثير ومش ملاحق.. الزيارة كلها يومين.. اول يوم هقضيه مع اهلي.. اليوم الثاني مطلوب مني فيه 4 زيارات..

4 زيارات في اليوم!!

ودى تتعمل ازاي يا جدعان؟؟

هل مثلا اقسم الوقت من بعد العصر الى العشاء.. اخرج من بيت دى ادخل بيت دى واجرى من بيت دى علشان الحق دى قبل ما تنام؟

هقعد مع الناس وانا ماسك تايمر وآجى في نص الكلام اقولهم سوري.. وقتكم خلص.. عندي معاد تاني؟

طيب افرض عجبتني واحدة في الأول.. هطنش الباقي؟ او لو عجبوني اتنين مثلا.. يا ترى الناس هتقبل التعدد وللا ايه؟

الفكرة نفسها قلبت معدتي.. فيها ظلم كبير ليا انا اولاً ولبنات الناس ثانياً.. كده معناها ان قصادي ساعه او ساعتين بالضبط علشان احكم على انسانه انها تناسبني او لا.. المسكينة قالولها في عريس.. بس مقالوش انه مستعجل.. بقالها كام يوم بتتضرر.. وتسمع في نصائح اى كلام من ناس كل همهم انها تبقى مدام فلان.. ناس طيبين قتلهم شبح العنوسة وبقت الحياه في نظرهم اى جوازه والسلام.

تفتق ذهن امي عن فكره جهنمية.. احنا نقابل الناس في مكان عام.. النادي مثلا.. نروح نقضى اليوم كله هناك وكل واحد تيجي في معادها.. تقضى الوقت المحدد في كشف الهيئة وبعدين تتوكل على الله علشان توسع الطريق لى عليها الدور في الكشف.

عجبتني الفكرة.. كده معناها اني مش هروح لابوار ولا محل الورد.. ويبقي ضريت 4 عصافير بحجر واحد.. اكيد هتضبط المره دى.. مش معقول بقى ابقى نحس للدرجة دى ويطلع اليوم كله بلح.

تمت الترتيبات من امي.. في اليوم المحدد رحنا النادي بعد صلاة الجمعة.. في انتظار ما ستلقينه علينا الاقدار من صيد حلال.

المفروض ان بين كل مقابله والثانية ساعه كامله.. اكدنا على الناس الالتزام بالمواعيد لان الوقت ضيق جدا وانا عندي طيارة.. لم نجرؤ على ذكر السبب الحقيقي طبعاً والا كانت هتبقى فضيحة.

اول معاد عدى على خير.. اهل البنت كانوا عمليين جداً.. البنت لازم تشتغل.. لازم تفرشلها شقه في مصر.. ولازم تنزل مصر.. كل 3 شهور.. استخدموا كلمة لازم اكثر من اللازم لحد ما حسيت اني لازم انهي الموقف ده.. بهدوء جدا وفي وسط الكلام وبدون اى مقدمات.. سامحوني يا جماعة الخير انا لازم امشى.. الوقت ازف وعندي طيارة لازم الحقها..

ها يا حاجة.. اللي بعده.

لسه فاضل وقت على الموعد الثاني قتلناه انا وامي بالفرجة على الناس.. أهي عمالة تتفرج على البنات وكل شويه تشاور على واحده وتقولي ايه رأيك في دى.. طيب دى.. شوف بقي الطويله دى.. مش عاجباك.. ولا يهملك.. لا بلاش القصيرة دى.. هيبقي شكلوكوا مضحك وانتو زى رقم 10.

الترايزه اللي قصادي دى فيها زميل من الباحثين عن الاستقرار زي.. شكلهم واضح اوي.. لبس الام.. الطنط الابليس اللي قاعده بين الواد والبنت ومبطلتش رغي وضحك.. شكل البنت المضحك بمكياجها الثقيل ولفة الطرحة الاسباني والبوت ابو كعب 7 سنتي.. عدة الشغل يعني.. حاجه مسخرة.. ماكياج على الصبح وبوت في عز الحر؟

خطر في بالي خاطر سريع..

يا ترى الناس بتتفرج عليا كده برضه؟

انا كمان شكلي باين عليه اني جاي اصطاد.. يا ترى بيقولوا عليا ايه؟

اتكسفت من نفسي.. فنزلت عيني في الأرض وبطلت سخافة.

انا راجل مواعيدي ميري.. لما اقولك نتقابل 6.. يبقى نتقابل 6.. مفيش اى سبب يمنعي من الالتزام بمواعيدي الا قيام القيامة.. ولو حصل ولقيت نفسي.. متأخر.. هكلمك قبلها بفترة كافية اعتذر واديلك مطلق الحرية انك تلغي المعاد او تنتظرنى من فضلك وذوقك.. بالتالي لما حد بيتأخر عليا ربع ساعة.. بيبقي سبب كافي جدا اني اخذ موقف.. لا اقبل اى عذر.. الزحمة عليا وعليك وانت مش اهم مني.. احترام المواعيد في نظري هو احترام لصاحب الموعد.. كمان في اليوم ده وقتي محسوب بالثانية.. يعني حضرتك لما تيجي متأخرة ساعة كاملة.. فده معناه اختصار ساعة كاملة من وقتك انتي.. لأن في واحدة ثانية بعدك.. طبعاً هي متعرفش كده وانا لو مكانها وعرفت.. لا هروح بدري ولا متأخر.. الالتزام بالمواعيد عموماً حلو محدش بيكرهه في الكوكب الا الستات.

وصلت المرشحة رقم 2 بعد معادها بساعة كاملة.. كان باين عليه اوى الضيق.. شوية ضحكات سمجة وشوية اعداز من نوعية معلش انت عارف البنات ودلعهم.. اصلها هي هي كانت هي هي بتلف الطرحة هي هي.

ايه يعني بتلف الطرحة؟ ايه المبرر برضه للتأخير.. ما تصحى بدري تلفها براحتها.. اهو بالمره تستحمي كمان.. مالي انا ومال لف الطرحة.. طظ فيكي انتي وطرحتك لما تلطعيني بالشكل ده..

طبعاً ده كلام واحد عازب.. لما اتجوزت عرفت الأهمية الاستراتيجية لأحداث لف الطرحة وموقعها المميز في حياة الستات.

الى حصل حصل واتقفلت من البنت خلاص.. رغم انها كان دمها خفيف جدا وحاولت انها تخرجني من مود النشاء الى كنت فيه.. هما فاكرينه تقل وكلام فاضي من ده.. انا فعلاً مقفول منها ومن أمها.. مقدرتش اتقبل فكرة انها تتأخر كده خصوصاً انها مش ساكنه بعيد.. ترجمت التأخير ده الى حاجه ثانية.. بس مع الوقت بدأت افك شويه وبدأت اخذ وادى مع الناس في الكلام.

الوقت بيمر بسرعة وانا قلقان علشان الموعد الثالث.. داهية لتطلع ملتزمة زى حالاتي.. الجماعة الموجودين حاليا قعدتهم لطيفه والحكاوي شغاله الله ينور.. امي ارتاحت للبننت وبدأت مرحلة فرض سلطتها على البننت كحماة مستقبليه.. انا بتفرج وعاوز اضحك.. قشطة.. امي بدأت الشغل.

الوقت خلص.. المعاد الثاني فاضله نص ساعة والجماعة لسه قاعدين.. احيه.. هقولهم ايه.. انا لسه مسحوب من لساني وقتلتهم ان الطيارة بليل.. ام البننت حسنت ان في قبول فقلعت برقع الحموات واتصاحبوا هي وامي لدرجة انهم طلبوا غداء..

يا لهوى.. انتو لسه هتاكلوا؟؟

لجل الحظ الرائع.. البننت الثالثة وصلت بدرى عن معادها.. الله اكبر.. شفتهم داخلين من باب النادي رحت غاطس في الكرسي كأني عامل عمله.. مشكلة كبيرة لو لمحويني.

ربنا ستر وقعدوا في مكان هما مش شايفيني منه.. استأذنت في الغياب دقائق بحجة اني رايح الحمام.. رحت استقبلتهم وسلمت عليهم.. الحمد لله مخدوش بالهم من امي الى قاعدة مع البننت الى قبلها.. اخترعت حجه كويسه علشان اروح اجيب امي وأرجع.. الحمد لله ان الستات بتتفهم معنى التأخير والكلام ده.

رجعت للبننت رقم 2 وانا عليا عفريت.. قاعد متوتر وقلقان ودول لسه بيحكوا ويرغوا.. ابص لأمي بنظرات ذات مغزى.. ادوس على رجلها من تحت الترابيزة.. اكلمها بالسيم.. بالفرنساوي..

ولا الهوا..

جالى الفرج في صورة تليفون من البيت.. اختي بتسأل على الاخبار.. استغلتي المكالمه علشان اوهم الناس ان في سبب قهري يضطروا الى الانصراف.. الحمد لله افلتنا.

ورحت انا وامي نقعد مع البننت رقم 3.

نفس الكلام والحوار المكرر.. البننت دى دمها واقف حبتين.. اكيد طبعا مش هنقول نكت من اول ساعة.. لكن اجمالا.. كانت شخصيتها اقل قبولاً من الى قبلها.

لحد كده والامور عال.. الجدول ماشى تمام.. ساعتين كمان والمعاد الرابع بييجى ويبقى انجزنا المراد.. ولما نروح بقى نبقي نشوف ايهم انسب.

واذ فجأة والقعدة هاديه ومملة.. تنشق الأرض عن البننت رقم 2 وامها.. كانوا مروحين وبالصدفة لمحونا في طريق خروجهم.. ومن محاسن الصدفة.. ان الامهات معرفة قديمة.. ده عيب كبير من عيوب المدن الصغيرة.. الموقف مش محتاج اى تفسير.. البوت الى لابساه البننت الى قاعده قصادي يجاوب على كل الأسئلة.. بالمناسبة.. هو كان أطول من البوت الى كانت لابساه البننت رقم 2.. يمكن علشان كده بصوا لبعض بنظرات نارية؟

ومن محاسن الصدفة برضه ان الست الى قاعده قصادي هي كمان شافت ام البننت رقم 2.. ومن روائع الصدفة ان الاثنين بدل ما يحطوا لسانهم في بقهم ويعملوا مش شايفين بعض زى أحوال الستات العادية مع بعض.. لا.. قاموا سلموا على بعض وهات يا بوس واحضان.. غالبا ام البننت رقم 3 كانت عايزه تغيظ ام البننت رقم 2 اكمن البوت بتاع بنتها براند واطول من البوت بتاع البننت رقم 2.. في ريحة نفاق واضحة جدا في السلام بالإضافة الى اظنان من نظرات الفضول القاتلة.. فضول يقول اني داخل على مصيبه.

ام البننت رقم 3: والله زعلانه منك اوى.. كل ده لا سؤال ولا تليفون حتي..

ام البننت رقم 2: معلش والله يا حبيبتي.. انتى عارفه الثانوية العامة.. الواد مطلع روجي.. نيله عليهم وعلى ايامهم..

ام البننت رقم 3: انتى هتقوليلي.. ده احنا شفنا الويل.. ها.. على فين كده؟؟

ام البننت رقم 2: ابدأ.. جينا نغير جو ومروحين اهو..

ام البننت رقم 3: كويس اني شفتك.. اقعدى نشرب حاجه مع بعض.. ده انتى وحاشاني موت

ام البننت رقم 2: معلش بقى وقت تانى..

ام البننت رقم 3: لا والله ابدأ.. اقعدى يا شيخه.. مفيش حد غريب.. ده البشمنهندس احمد.. عريس بنتى..

يا لهوااa

فجأة لقيت نفسى بقول بدون وعى..

- ايه ده.. هى مالها بردت كده ليه!!!

في العادة الناس بترفض عزومة المراكبية دى.. لكن كلمة "عريس بنتى" دى تخلى اى ست معدية ملهاش علاقة بالليلة دى تيجى تقعد.. ما بالك بقى ان ده عريس مشترك؟

طبعا الست قالت "عريس بنتى" لزوم الكيد لا اكثر.. اهو.. البوت بتاع بنتى أطول من البوت بتاع بنتك وعندنا عريس وانتو لا يا جرابيع يا شحاتين يا رمم.

يا ترى مرضعات قلاوون دول هيعملوا ايه لما دى تعرف انى عريس دى ودى تعرف انى عريس دى؟؟

دى هتبقى حرب طاحنة هخرج منها ب 3 اصابات وفضيحة بالميت كده..

سمعتي هتدمر ومش هلاقى حد يبص فوشى تانى..

طب اعمل ايه؟

اطلع اجرى واسيب امى؟

اكيد مش هيقولوا ادبهم عليها.. مهما كان دى ست كبيره ولها احترامها برضه.

وللا اصبر واسكت و اصدر الوش الخشب.. مفيش بينى وبين اى واحده فيهم اى التزام بأى شيء.. وكده كده الرابعة هتوصل كمان شويه.. يبقى يغوروا الاتنين.. لسه في اوبشن رابع.

يا لهواااa

ام البننت رقم 2 قعدت ومسكت دفعة الحوار.. الكلام بقى عن الشباب المستهتر اللى بيلعب ببنات الناس ويتسلى بيهم ويدخل البيوت ياكل ويشرب ويهرب بعد كده.. طبعا انا المقصود رغم انى لا دخلت بيتهم ولا شفتهم في حياتي اكثر من ساعة.. وطبعا ام البننت رقم 3 مش عارفه ان انا المقصود فزاطت مع صاحبها في شتمة شباب الجيل والرجالة بالمرة.. الستات على استعداد تام لإهانة الرجالة دائما.. حتى لو قاعدة بتكتب كتابها على فارس احلامها.. ممكن تلاقيها سابت دفتر المأذون ومسكت الموبايل شتمت في الرجالة دعما لواحدة متعرفهاش كتبت على صفحتها من 5 سنين كلهم مصطفى أبو حجر.. وبعدين رجعت تانى تمسك الدفتر علشان تمضى.

ساعه كامله وانا قاعد في الموقف ده.. متمالك اعصابي تماما.. هموت على سجائر انفخ مع دخانها كل التوتر.. لكن مش قادر ادخن قصاد امى.. نافوخي هيلوع.. كل ما الستات يفتحوا بقهم.. اقول استر يارب.. الفضيحة جايه اهى.

الوقت أزف واعلنت انى لازم امشى.. بأدب حييت الاتنين ومسكت ايد امى علشان نقوم.. اول ما وقفنا.. ام البننت رقم 2 رمت القنبلة..

- يا بشمنهندس.. متبقوش تتصلوا بينا بقى.. البننت مش موافقة.. ربنا يبارك لك في "... واشارت الى البننت رقم 3

مفيش اى كلام في الدنيا ممكن يوصف موقف زى ده.. لما تخيلت نفسي مكان الاتنين.. مسكت ايد امى وتقريبا طلعتنا نجرى.

المعاد الرابع كان عادى جدا.. مش فاكر اى شيء مهم يذكر عنه.. خلصنا المعاد وانطلقت على المطار..

خلاص.. اليوم خلص.

لازم اقر واعترف.. انا الغلطان رقم 1 و 2 و 3.. انا الى حظيت نفسي في الموقف المهيمن ده فكان طبيعي انى اتهان.. صحيح مفيش اى التزام بيبي وبين اى حد فيهم.. وصحيح جدا ممكن اشوف واحدة فيهم في البيت تبقى هي نفسها على موعد اخر مع واحد تانى في اليوم الى بعدى.. وحصل معايا قبل كده فعلا ان واحدة كانت لابسه في صوابعها دبلة عليها اسمى وشافوا عريس تانى وشبكتي عندهم في البيت.. ولكن انا مش هما.. سفالة الاخرين مش مبرر انك تبقى سافل.. بنات الناس مش بضاعة اقلب فيها علشان ادفع واشيل..

حاجه كمان مهمه جدا..

الاربع عرايس أفسدوا بعض عليا.. لو كنت شفت كل واحده فيهم على حده.. كان ممكن جدا اوافق عليها.. ثلاثة منهم كانوا ينفعوا.. وجودهم كلهم في نفس الوقت خلاني عامل زى طفل قصادة العاب غالية كان هيفرح اوى بكل لعبة لو جت لوحدها.. لكن كلهم مع بعض خلاه يرميهم كلهم.

اكثر حاجه وجعت قلبي في الموضوع ده تليفون جالي وانا في المطار.. كان من ام البنت رقم 3.. الست كلمتني زى امي من غير إهانة ولا تجريح.. لامتنى بأدب حزين انى عرضت بنتها لموقف زى ده.. هي افكرت انى بلعب ونصحتني لوجه الله انى اتق الله في بنات الناس.. مهما حاولت اشرحها ظروف الصعبة مش هتفهم.. هي مشافتش مني الا اذى بنتها.. والصراحة.. معاها حق.

مقدرش أكون حيوان واقولها ان الموضوع عرض وطلب وانتو كستات بتعملوا كده كل يوم.. انا مش ست.. ومقدرش استفيض في شرح موقفى لأن كل شيء خلص.. معتقدتش ابدأ ان حتى لو كانت البنت عجبتني كنت انا هعجبها.. الى وصلها ان في واحد شافك وعازي يتقدم.. راحت.. لقت واحد حاططها في ميزان مع اخريات.. الحقيقة موقف قاسي جدا لا ارضاه لاختواتي ولا لنفسى.

لقيت ان اسلم حل اعمله هو السكوت.. بصوت مكسور سمعتني الست كلام زى السم.. يا ريتها كانت شتمت وقلت ادبها على الأقل كان ببقى عندي فرصة اقفل الخط في وشها ووظ فيها.. لكنها أدبها واحترامها فرتكوا ضميري.. فضلت اسمعها من باب انى أستاهل.. وعلشان الست تفرغ فيا شحنة الإحباط الى حصلها بسببي.. ده اقل اعتذار اقدمه.

ركبت الطائرة بشعور مرعب بتأنيب الضمير.. نزلت فرحان قاصد اسعد انسانة لسه معرفهاش.. رجعت وانا كاسر فرحة اتنين بدون قصد ولا سوء نية.. حسن النية لا يبرر ابدأ سوء التصرف.. كلمت الست تانى لما وصلت الرياض.. اعتذرت كثير اوى وللأسف هي قبلت اعتذارى.. الست علمت عليا بالأدب.

ساحلية أوكراني

- واخبار السحالي هنا ايه يا عمده؟
- ده انت هتشوف دنيا صورات مش سحالي

"عماد بن تريز - الرهينة"

حد يعرف ايه هو تعريف الجمال؟

الجمال له أكثر من تعريف يتغير حسب تغير الشريحة العمرية للإنسان.. الجمال في سن المراهقة مثلاً هو المفاتن الجسدية.. بينما قدام في العمر شويه هنلاقي ان تعريف الجمال في عيون الغالبية هو الشعر الأشقر والعيون الملونة.. حبه كمان قدام لما تكون كبرت وعقلت هتقتنع بتعريف المنفلوطي ان الجمال هو التناسق بين أجزاء الهيئات المركبة.

يعني ايه؟؟

يعنى كل جسم او كيان ما بيتكون من اجزاء او أعضاء او مكونات.. علشان نقول انه -ككل- جميل.. يبقى الأعضاء دى لازم تكون متناسقة مع بعض في تناغم غير منفرد.. يعنى مش كل ملون او مستقيم او بارز بيقى جميل.. الجمال هو التناسق.. كل انسان عنده جمال بشكل ما مختلف عن الاخر.. كل انسان له بصره مميزه ليه هو.. عينها حلوه في وشها هي.. شعره حلو على راسه هو.. الجزء الجميل لا يصح جميل الا بوجوده مع التفاصيل المكمله ليه.

قلت كده لصديقي من أصدقائي في السعودية في معرض حديثنا عن الستات وقلة المعروض والعزوبية الى احنا عايشين فيها.. قصص الارتباط الفاشل في مصر.. هلكتي.. تجربة الزواج الفاشل اضافت الى احباطي إحباط وكراهية عميقة لكل ماهو مصري مؤث.. الفترة دى كنت متحفز جدا ضد الستات من كتر ما شفت منهن.. قررت انى مش هتجوز من مصر.. خليههم جمب اهلهم.. يا نحله لا تقربيني ولا عاوز منك عسل.

صديقي بصلي بصة تحمل كثير من ملامح عدم الفهم وهو يقول..

- ارعي يسطى الهري ده كله على جمب.. مفيش حاجه هتجيبك ورا الا الكتب الى انت شايها على قلبك دى..
- هات من ورا.. في ايه؟
- خدا يابا.. متع عينك وصلي على النبي.. الجمال اهو.. ااااااهووووو.
- ايه يسطى المزد دى كلها.. منين النسوان دى
- دول من الشيشان
- دول شيشان.. حرام عليك.. انا شيش واحد بس من دول ممكن ييهدلني
- ولسه لما تشوف أوكرانيا بقى.. نار يا حبيبي نار على رأى رؤوف خليف.

أوكرانيا!!!

رفیق السکن والعمل کان راجل مهووس بالجمال.. فی نظره الست الجمیلة تتأقل بالذهب.. کان دایما یحاول یقنعنی ان الست الجمیلة فی البیت فضل ونعمه.. تصحی الصبح کده تلاقی عیون زرقاء وشعر اصفر ینیقولک صباح الخیر.. ساعتها یس تتأكد انه فعلا صباح الخیر وتلاقی نفسک برتد بقلب جامد وحراره وعنف صباحک سکر یا حیاتی.. ساعتها مش هتکون بتکذب.. مع واحدة زی دی لازم ینیقی صباح سکر فعلا.. لو مقلتش الکلام الحلو ده للمهلپیة دی.. هتقولہ لمن؟؟

لم اكن من محبي الجمال الاوفر.. الستات الجميلة اوى دى متعبة.. الوسط حلو فى كل شىء..

- بس يا معلم الست الجميلة دى الناس هتبصلك فيها
- وماله.. اكل غسل انا والناس احسن ما اشرب زفت لوحدى

من المطار على الاوتيل رأسا.. نزلنا نستكشف البلد علشان الصبح عندنا موعد في المركز الاسلامي.

صدق الي قال يا جدعان.. الفلاحين لما تتمدن بتخربها..

مصليناش ولا فرض.. مكلناش.. مدخلناش الحمام.. معملناش اى حاجه في الدنيا الا الفرجة وبس..

بقينا ماشيين في الشوارع رؤوسنا كأنها راكبه على زمبلك عماله تلف يمين وشمال.. التحرش الزبالة والمعاكسات البيئة.. شكلنا كان زى الطين واحنا عاملين زى واحد عاش طول عمره جعان.. فجأة لقي نفسه في مطعم مشويات مقفول عليه الباب وهو لوحده.

والمقرر هناك تقوله تعالي يا مقرر.. ييجي علطول..

ماسورة بنات من كل الألوان والمقاسات انفجرت في البلد.. قنابل جمال نووية فرقعت في البلد وادت الى طفرات جينية خلت جلودهم في لون القشطة ولون الشعر يتراوح بين الأشقر السافل والاحمر الكلب والأسود المفتس.. العيون ازرق من الزراق المزرق.. القوام نحيف والاوزان عصافيري.. 70 كيلو تعتبر فيل ويلزمها برنامج مخصوص.. اهي دى مثلا مش هتاكل اكثر من صوباع كفتة كل 3 أيام.. يعنى اقتصادية كمان.

وقفنا نشترى ذرة مسلوقة وكستناء من عربية زى عربية الكبدة كده.. المفروض ان اللى بتبيع دى بنت فقيرة جدا.. نقول مثلا كأنها بياعة فل في إشارات المرور في مصر.. انا وصاحبي حينناها في نفس الوقت..

مش حرام يا ناس دى تبقى بياعه في الشارع!!!

امال مين اللى تتستت وتتبعدد وتدلع!!

ايه الكوكب الظالم ده..

احنا لازم نغزوا البلد دى وناخد نسوانهم سبايا حرب نحسن بيهم النسل.. اللى يتجوز واحده زى دى ويفكر في تنظيم الاسرة يبقى كافر.. خسارة دول يلبسوا ذهب.. الذهب هو اللى يلبسهم..

- شايف يا بو حسنى.. متع نظرك.. تسقط الرياض..

- بس يا عم مش طالبه مغص

- ده الواحد كان متجوز صندل في مصر.. يا قوة الله

- متبقاش خفيف كده.. انت ايه.. مراهق!! صندل ايه يا اخى.. ميصحش

- !!!!!

- انا كنت متجوز نعل صندل طالع من قلب بكابورت

روحنا الاوتيل قرب الفجر بنتطوح من السعادة.. سكرانين من غير اى كحول.. ملوش لزوم نحكى على الاحلام السعيدة في النوم.. خيلنا مؤدبين.. بس اجمالا انا تخيلت نفسى.. في البيت مع واحدة ملونة من دول وحواليا 4 عيال شبه امهم.. حرام والله يطلعوا شبيهي بعد كل المجهود ده.

المركز الاسلامي في كيف ماهو الا مسجد كبير ملحق بيه مدرسه للأطفال المسلمين ومركز تحفيظ قران وشوية انشطه اجتماعية زى ملابس المحجبات والأكل الحلال.. المسلمين هناك اقلية فبالتالي يعرفوا بعض.. صلينا الجمعة وبعدين رحنا نقابل المسؤولين عن الزواج والتفاصيل دى.. الراجل مدير المكتب شبه حسين فهمى.. هو نفسه عنده 3 بنات في سن الزواج.. قشطه جدا.. انا عاوز الحاج حسين فهمي ده يبقي حمايا.. حسب التواصل المسبق هو عنده كل بياناتنا ومعاه صورة من جوازات سفرنا.. سابلنا اليوم الصور المتاح عنده وقام يحضرلنا واجب الضيافة.. اول ما خرج من الأوضة قمنا انا وصاحبي نطينا على الالبوم نشده من بعض.

مفريناش في الالبوم كتير.. يمكن تانى او تالت صفحه "الالبوم كان 30 صفحه" قلت هي دى.. انا حبيتها اوي.. هي دى اللى هتجيبلى الذرية الصالحة.. انا لو اتجوزت واحدة زى دى اكيد هخسر صحابي كلهم.. وهخسر شغلى كمان.. دى محتاجه الشحات

مبروك علشان يقدر يحرسها.. واحده زى دى لو اتعرف انها ساكنه في الرياض.. هلاقى غزو من كل مدن المملكة على شارعنا..
هبقى زى عادل امام في التجربة الدنماركية كده.

المعلومات المتوفرة مش كثير.. 26 سنه.. مش بتشتغل.. معاها ما يوازي ثانويه عامه.. من اسره متوسطه هناك "بالميزان بتاعنا
فقيره جدا".. بتتكم انجليزي ضعيف جدا ومستعده تسافر.

مدير المركز رتبنا مقابله مع البنت وأهلها وهو مبتسم.. كان بيتكم عربي قدر بلهجه اوكرانية ثقيلة جدا..

- فاطمة بنت ممتاز.. ان شاء الله يكون دوبريه "كويس"
- سباسيبا "شكرا" يا رفيق.. ربنا يقدم اللى فيه الخير
- انت مش موافق.. غير فاطمه اليوم تاني..
- وايه اللى هيخلينى مش موافق بس.. ربنا يجيب القبول

الراجل بيكلمني على أساس ان البنت لو معجبتنيش في غيرها.. عندنا في مصر- الناس بتتصرف من منطلق ان العروسة هي محور
الكون والراجل بلا اى اهميه.. هنا الدنيا مختلفة شوية.. ثقافات شعوب بقي.

على ما خالصنا غدا في صبحى كابرکوف الأوكراني.. كانت الناس حضرت.. اسرتين جايين ساحبين في أيديهم بنات محجبات..
الفقر باين عليهم رغم خدودهم الموردة.. الصور اقل من الحقيقة.. البنات فعلا صواريخ..

كلمتين منى.. كلمتين منها.. التواصل صعب اوى بالإنجليزي الزبالة بتاعها ده.. مش مهم.. هعلمها عربي وانجليزي وهتعلم اوكراني
كمان.. ايووه يا جدعان.. اني علشان القمر ده نعملو البدع "بلهجة اسكندراي وحشتنى جدا".

خاطر جه في بالي عن ابويا وموقفه.. يا ترى هيوافق وللا لأ؟

مممكن يغضب منى شويه.. بس لما ادخل عليه شايل الفرعون الصغير الملون.. اكيد قلبه هيجن.

- انتى تعرفي عن الإسلام كويس؟
- شويه.. انا عاوزه اتعلم منك
- طيب ان شاء الله.. هنبقى نعمل عمره ونحج.. وان شاء الله احفظك قران
- ايوه.. انا معرفش قرآن
- بتصلي؟
- لا.. مش بعرف
- طيب مفيش مشاكل.. هعلمك برضه.. تعرفي حاجه عن المطبخ الشرقي عموما؟؟
- ايوه.. وكمان بعرف اعمل فودكا
- فودكا!!! خمره!!!
- ايوه.. بعملها حلو جدا
- اتعلمتي فين الكلام ده؟
- في شغلي القديم... كنت بعمل تركيبات كويسة
- انتى اشتغلتى قبل كده؟
- ايوه
- فين؟؟
- كنت بشتغل في فندق في كييف واشتغلت في البحرين
- اشتغلتى ايه في البحرين؟؟
- في فندق اسمه "....." في البار.. كنت بكسب فلوس كويسة.
- الله اكبر

في صحة المفاجآت..

يا لهوى.. هتجوز واحدة استغفر الله العظيم؟

- شغل مين اللى قانونى يا ابن الكلب.. انت هتهزرا!!

طیب انت شوف تانی

نفسی- اتسدت تماما من البلد والى فيها.. طبعاً مش کلهم کده.. بس تخيل ان ده اول بخي.. الجو العام في البلد دى کثافة لا یتماشى اطلاقاً مع طبعنا وعاداتنا.. هما مثلاً یشربوا الکحوليات بإفراط.. الجو البارد بتاعهم لا یصلح معاه الا الهوب هوب کصدر من مصادر الطاقة للجسم.. مش شایفین في الموضوع ده اى عیب ولا حرمانیه.. بینما الکلام ده عندنا مصبییه.. انا أساساً لو شفت ازاة البتاع ده من بعید بقی جدد علطول.. وبعدين ماله العدس؟؟ ما هو یعمل نفس المفعول وبتلاش تقریبا.

علاقتهم بالإسلام علاقة اسميه.. هما مسلمين اه.. انما قله قليله اوى بتصلى.. قله قليله جدا تعرف القرآن.. بالإضافة الى ان العلاقة الجسدية في اى وقت ومع اى حد.. لا تعتبر عار او عيب.. غلط اه.. بس غلط مقبول يعنى بيحصل كثير.. ده موروث من ثقافتهم السوفيتية.. وناخد بالناس.. السوفييت حاجه والروس حاجه ثانية وأوكرانيا حاجه ثالثة.. السنين الى قضتها البلد دى في أحضان الاتحاد السوفيتي الشيوعي والحاده مأثرة عليهم في حاجات كثير.. بالمناسبة.. هما مش بيحبوا السيرة دى خالص بيعتبروه احتلال.

الموضوع ده خلاني اعيد نظر يامعان في الجمال الاوكراني.. بس المره دي بتركيز.

الملاح بارده مفيهاش روح.. حلوين من بعيد اه.. انما متحسش ناحيتها بعاطفه.. القلب مش بيتحرك.. أيام الخطوبة لما كنت بكلم ام حمزه.. كانت تقولي الو من هنا.. وانا انزل بوس في المخده من هنا.. شيء ما اسمه الكيمياء.. او على رأى عبد الفتاح القصي.. الكهرباء عملت كونتاكت.

اختلاف التاريخ.. اختلاف العادات.. اختلاف العقيدة.. متفرحش اوى انها ممكن تقولك انا عاوزه اتعلم الإسلام.. من شب على شيء - في الغالب- شاب عليه.. هي مش هتقدر تعيش مع كم المحرمات الى عندنا مقارنة بالبليلة الى عندهم.. كمان الانتقال من أوروبا الى الرياض يشبه في تأثيره على البشر- خروج ادم من الجنة.. اعتقد ان دانتي كتب الجحيم بعد ما اشتغل في الرياض سنتين.

في الاوتيل قعدنا انا وصاحبي ميتين من الضحك.. كم غير عادي من الحظ الذكر.. فشلنا احنا الاثنين في جوازاتنا في مصر.. انا راحت فلوسى وهو خسر بنته.. رحنا بلاد الواق عشان نتجوز.. كنا هنطلع منها بقرون..

- تخيل يا ابو حسني.. انا كنت هبقي كايتن الجو كله

احيه يا جدع.. ده احنا هنعمل فلوس بالكوم

- ويمكن نبقي نعلق صور حمدي احمد في القاهرة 30 مثلا

- ههههههههههه... يا ولاد الكاااالب.. وربنا يا عم انا مش مصدق.

- ولا انا.. جومی بینا نمشی.. جومی بینا نمشی

ضربنا الأعراض وشدينا الرجال على الرياض بعد ما لغينا الفكرة من أساسها.. استمتعنا بالفسحة في البلد.. اعتبرنا الفكرة كلها بولك اند وخلص خلاص..

بعد 5 شهور كنت نقلت دبي مؤقتا.. قابلت صديقي الى كان اتجوز من روسيا.. مراته خدت العيال ورجعت على بلدهم.. الله اعلم باللي حصل بينهم.. الاختلاف وارد دايمنا وانا مش بحب اخوض في التفاصيل دى.. الشاهد هنا بس هو رد الفعل وقت الخلاف.. في مصر تتحبس بالقايمة.. ومع الأجانب تودع عيالك للأبد..

الكوكب ده بقى ظالم اوي للرجالة.. انا قررت اروح المريخ اتجوز من هناك.

أمينة

تربية الطفل تبدأ قبل ولادته بعشرين عاما.. بتربية أمه "سيمور سانت جون"

.....

بين العشرين والثلاثين نشاط الذكورة في جسمك ييزيد بطريقة جنونية.. تفكيرك بيلف ويدور حوالين فكره واحده بس.. الستات.. هو ده السن الى الستات بتضحك فيه علينا.. هو ده السن الى ممكن تمضى- فيه على اى ورقة او تعمل اى حاجة في سبيل التواصل الحلال.. هي دى الفترة الى هياتم بتحتل فيها احلامك بصورة يومية.. هي دى الفترة الى بتسأل فيها دايمًا هو الفيلم ده قصه وللا مناظر.. دى الفترة الى تأثير الستات عليك بيبقى رهيب ومضمون.. خلقه رينا.. لما تلاقى واحد يقولك لا انا مش كده.. انا عادي بشوف الستات ومش بتأثر.. ابقى خد خطوة شوية وارجع لورا.. صاحبنا ده حاجه من اتنين.. يا اما حاتم رشيد والعياذ بالله.. يا اما ورقة خس.. سكينه متقطعش بطيخة يا حلاوة على رأى محمود عبد العزيز.. اوعى تسلم عليه لاحسن يكون الى هو فيه ده معدى وتلبس اسود يوم جوازك.

ممكن حد يقولك جرى ايه يا عم.. ما تمسك نفسك شوية.. انت ايه.. عيل صغير؟

عيل صغير.. يا سلام يا ولاد.. ده اجمل شيء في الدنيا ودى اجمل كلمه ممكن تتقال.. الى يقولك انت عيل صغير لازم تشيله فوق راسك.. مراي لما بتحب تقلبني في فلوس زيادة بتعمل فيها غضبانة وغيرانة عليا وتتهمني انى طايش زى العيال الصغيرة.. انا اسمع عيل صغير دى.. اروح مطلع المحفظة علطول.. بنسي- تاما الشكل الكئيب لشعر دقنى الأبيض في المراية.. مش بفتكر بس الا جملة عيل صغير دى.. الله على حلاوتها اقسام بالله.

عيل صغير دى مش شتيمه ابدًا.. ده استحسان وحسد. عيل صغير معناها ان جسمك لسه جديد بسلوفانة المصنع.. خبرتك وتجاربك لسه مش اد كده صحيح.. بس متقلقش.. كام سنه وهتبقى صاحب خبره.. وكام سنه برضه والجسد يبلى وتتحول من "كابتن" الى "عمو" ثم "انكل" ثم "عم الحاج" وتعيش اللحظة المربعة.. أو كما قال أحمد خالد توفيق..

"اللحظة التي تتحول فيها من كابتن إلى أستاذ إلى عمو.. هذه لحظة قاسية ومربعة".

اللهم احببني كابتن وامتنى كابتن واحشرنى في زمرة الكباتن واكفينى شر عم الحاج دى قادر يا كريم.

في عامي الرابع والعشرين كنت كابتن بقوه.. كابتن خالص.. كابتن عامل في احلامي جرسونيرة بعزم فيها نص ستات الكوكب.. نانسي عجرم وهيفاء وهبي كانوا بيزوروني فيها كل يوم.. تحولت ساعات نومي القليلة جدا الى كوابيس مزعجه يعاقب عليها القانون.. وشى مزنهر باستمرار وحالي تصعب على الكافر.

لازم اتجوز.. مش هغلط ابدا مهما حصل.. مش هخضع لوساوس ابليس الى بيحاول يميل دماغي بخصوص فلانه او علانه.. ولأن الحلال اجمل مش هنتظر خالص.. انا عاوز اتجوز النهارده قبل بكرة.

ابويا كان شايف ان السن المناسب للزواج مش اقل من 30 سنة.. لجأت لجدى الحبيب صاحب التفكير المعاكس تاما.. الراجل الى شايف انى طالما قادر على انتاج المثل يبقى لازم اتجوز.. 20 سنه بالكثير أكون في بيتي.. 24 سنه ومش متجوز في عرف جدى معناها انى ماشي في طريق النجاسة أكيد.. لو ناقشته وحاولت تقنعه ان عندك شغل او دراسات عليا هيرد عليك باستحار ويقولك أنا كنت بشتغل وفاتح بيت وبصرف على ابويا وامى وجوزت 3 من بناتي وبقيت جد قبل ما أوصل 40 سنة.. انت الى فلاقي وعاوز تجرى ورا الغوازي.

غوازي يا جدتي!!!

- ايه يا جدتي الجو القديم ده.. محدش بقى بيستخدم الكلمة دى من بعد نعيمه عاكف.
- انا عارفلكوا بقى.. اهو شوية الصيع الى بيطلعوا بالمايوهات في التلفزيون دول.. اعوذ بالله.. النسوان العريانة دى مش بتتجوز وتسلم ليه.

- مستنين ابن الحرام.. المهم بقى.. انا عاوز اتجوز علشان ابطل جرى ورا الغوازى.. لاحسن اخر غازية عرفتها بيعتني فدائين الموالح وفي الآخر هربت مع واحد تانى رغم انها كانت دايمًا تقولي التمر احسن وللا الياسمين.. وانا اقولها التمر حنة.
- ماشى يا سيدى.. ربنا يهديك وينور طريقك.. عدى عليا بكرة بليل ونروح نخطبك.. عندي حاجة كويسة
- مين.. فين.. ازاي.. تفاصيل.. اى حاجه الله يكرمك
- ايه الأسئلة دى.. انت واحد رخامة امك كده ليه.. هو انت هتتجوزها وللا هتوظفها.. هنرجع للحركات القارعة تانى.
- لا لا خلاص.. انا معاك يا حاج.. هجيلك بكرة.

ومشيت من عند جدى وانا تقريبا حببت العروسة الى فداغاه.. معرفش عنها اى معلومة بخلاف انها أنثى.. وده كان كافي جدا في نظر جدى لإقامة حياة زوجية سعيدة.. ابويا وامى طبعًا معرفوش حاجه...

هل انا مستعد اتجوز من غير ما اقولهم؟

في الوقت ده انا كنت مستعد ان اذهب الى بيتهم الكنيسة ذاته ومناقشتهم في إجراءات الجواز.. المهم.. يتقفل عليا باب في الحلال مع اى كائن انثوي.. ان شالله كلبة.

بيت ريفي جميل ومستوى مادي ميسور جدا.. اب متفتح متعلم هو عمدة بلدهم.. دوار العمدة ده حاجه جميله اوى.. برج الحمام وزريبة البهائم والأرض.. اوضة السلاحليك والتليفون أبو منافله.. العمودية دى شيء حلو على فكره مش وحش.. فكرة ان حمايا يبقو جنب العمدة دى عجيتي اوى.. ممكن اورثها منه خصوصا انه مخلفش ذكور وابقى انا جنب العمدة.. طب وربنا البس عبايه وامسك عصاياه وابقى عمده بجد.. بلا هندسه بلا زفت.. قصادي صورة صلاح منصور في الزوجة الثانية.. شيء جميل ان يبقو جمبي أحمد موسى يقول للناس واطيعوا الله ورسوله واولى الامر منكم.

البنت لسه في الكلية.. جميلة ومهذبة.. رشيقة وذات خجل.. حلو.. انا بكرة البنات الايناس الدغيدي جدا.. الخجل في رأيي الشخصي.. هو 80% من جمال البنات.. اتكسفي كده وخلي وشك بحمر وقلبي يولع.. ابوه كده يا شيخة حسيني ان في فرق بيني وبينك.

توقعت ان الجوازة هتخلص في نفس القعدة.. هما الجماعة الفلاحين دول يههم ايه من الجواز غير القايمة والذهب؟؟

حاولت افتح حوارات مع البنت.. المفروض انها في السنة الأخيرة في كلية الزراعة.. يعنى شخصيتها تشككت.. المفروض الاقي فكر ما من اى نوع.. اسلامي.. شيوعي.. ليبرالي.. فيمينيست.. مطبخي.. انجاي.. اى حاجه.. اى شيء.. ابدأ..

البنت دماغها لا تحتوى على اى شيء.. اى شيء بمعنى اى شيء.. حتى مع كلمات الغزل العفيف او الصريح او السافل.. حتى مع الحديث عن أحلام المستقبل او التصور العام للحياة بعد كده..

ولا الهوا.. ويكأنى بحرت في البحر.

- طيب نفسك زوج المستقبل يكون ازاي؟
- يعنى.. يكون كويس
- كويس بمعنى ايه
- كويس.. كويس كده
- طيب نفسك في أطفال؟؟
- كل اللي يجيبه ربنا كويس
- كام طفل مثلاً؟
- كله خير.
- بتفكري تشتغلي؟؟
- مش عارفه..

- مستعده تسافري؟
- اه.. انا سافرت قبل كده مع بابا.. رحنا بلطيم
- لا انا اقصد خارج القطر.. بره مصر كلها.. الخليج او أوروبا مثلا
- كلها ارض ربنا
- حد قالك قبل كده ان عينيكي حلوه؟؟
- ربنا يخليك.. اتفضل العصير
- بتحبي القراءة؟؟
- على خفيف كده
- طيب بتحبي السينما
- ساعات وساعات
- نفسك تروحي فين؟
- اى مكان كويس
- بتحبي ايه في الاكل؟؟
- الحمد لله.. كلها نعمة ربنا
- انتي عارفه انه من كام شهر حصل تفجيرات في أمريكا.. البرجين الكبار دول وقعوا..
- يا سبحان الله.. وقعوا ازاي.. من نفسهم كده
- لا.. خبطتهم طيارات.. حادث مقصود
- يااه.. وهما ليه يعملوا كده..
- هما مين؟؟
- بتوع البرجين.. ليه يضربوهم بالطيارات؟؟
- لا.. في ناس قصدت تضرب الأبراج بالطيارات
- اه.. طيب ليه برضه؟
- هو انتي مش بتشوفي الاخبار؟؟
- ساعات.
- طيب تصورك ايه لحياتك بعد كده.. نفسك في ايه.. عاوزه ايه.. بتحلمي بأيه؟
- نفسى ابقى كويسه..
- طيب عندك هوايات معينه.. بتعملى ايه في وقت فراغك؟
- بصحي الصبح افطر.. بعددين اقعد شويه كده لحد الغداء.. وبعددين انام حبه.. وبعددين اصحى على المغرب.. نتعشى..
- عشاء خفيف كده وبنام بدرى.
- بروجرام هایل.. خير ان شاء الله.
- واستمرت الإجابات من النوع ده طول القعدة.. حتى لما حاولت احوّل دفة الحوار الى السفالة.. برضه.. إجابات من نفس النوع.. تخيل نفسك – مثلا- بتقول لواحدة اديني قطعة "بفتح الطاء".. وهى تقولك الف شكر.. حاجه شلل.. اللون الرمادي هو المسيطر على حياة البنت تماما.
- سكت.. وسكتت البنت.
- كان لازم اى حوار يسلى القعدة.. بتخفق من تكرار عبارات "اهلا وسهلا" و "ده احنا زارنا النبى" و "منورين" .. ببقى عامل زى حسن فايق في فيلم سكر هانم لما في الاخر اتعصب من كتر ترحيب ابنه وقال "خلاص.. عرفت انك مبسوط لما شفتني".
- انا كنت مركز على الناحية البيولوجية صحيح.. لكن تسطيح العقل الرهيب ده عملي نفور من البنت.. هي مش وحشه.. انما مخها فاضي بطريقه ترعب.. راسها لا يحتوى اى شيء عن اى شيء.. مفيش اى أفكار حوالين اى موضوع..
- فين حوارات البنات.. فين الطيخ.. فين الاحلام والمستقبل.. فين اى حاجه في ام اليوم الى مش باينله شمس ده؟؟
- مفيش..

مفیش خالص؟

ماااافیییش "بصوت ضیاء المیرغنی"

فراغ تام.. فیزیائی عرفنا ان مفیش حاجه اسمها فراغ.. الی انت شایفه فاضی ده المفروض ان فیه هواء.. والهواء عنصر- یتحتوی علی 2 کیلو هیدروجین مع کیلو اکسجین.. سقطت کل نظریات العلم والعلماء قصاصد مخ البنت دی.. الفراغ موجوده اهو یا عم راذفورد.. لو بعث فاینمان من مقبره.. اکید هیئتحر بسبب البنت دی.

مشینا من عندهم وانا مقرر ابقی العن منها.. مش هعمل ای حاجه.. وربنا لاشلها زی ما شلتنی.

حكيت لأبوي بعد ما تلقيت لعنات جدى واحنا مروحين.. ابتسامة سخرية من بابا تحمل شماعة لأني مش بسمع الكلام.. امى لم يشغلها فى الدنيا الا ازاى اروح لوحدى.. مخفتش بمضوك على قايمه يا اهيل خلق الله؟؟

البيت والاسرة والعمودية واوضة السلاحليک وشيخ الخفر کلها أحلام تبخرت من دماغي تماما.. لا یمكن ابدًا هقدر أعیش مع البنّت دى تحت سقف واحد.. انا صحیح وقتها کنت بدور على الزواج من اجل التکاثر لیس الا.. لكن بنت زى دى بالفراغ ده کفيلة انها تقضى— على اى رغبة جوا الانسان فى اى تکاثر.. انا بذاکر وبشغل وعندي طموحات کثیر اوى.. محتاج حد أتکلم وأعیش معاه مش مجرد وعاء انجابي.. محتاج ست تشترک معایا فى اى هواية من اى نوع.. ست یكون لها اى رد فعل بأى شکل.. کائن حی له شخصیه وأفکار وتصورات واحلام.. محتاج صوت معایا فى البيت مش مجرد صدى.. اقله خالص لو فرضت علیها ذکوريّ فى يوم من الأيام.. احس انى فعلا انتصرت وکلای مشى.. على رقبته بالعافیه.. فى حالة البنّت دى.. انا أساسا مش محتاج أقول حاجه لانها بلا اى رد فعل.. بلا اى منطق ولا کینونة.. هى والفراغ سواء.

الستات بيزيطوا في النقطة دى زى ما بيزيطوا دايمًا على اى شيء بلا منطق.. يقولوك تعارضه مش عاجب تسمع الكلام مش عاجب.. هو الرجل كده.. عاوز يقهر الست وخلص.

طبعاً ده من ضمن منظومة الأفورة العامة في مصر.. لازم التطرف في كل شي.. لازم تحلق دقنك والا تبقى إرهابي.. لازم تلبسي- نقاب والا تبقى رقاصه.. لازم تضربها والا هتبقى زوج خرع.. لازم النجاسة والا تبقى شاب خرونج.. لازم اقصى- اليمين علشان متبقاش اقصى الشمال.. لازم تبقى 100.. علشان متبقاش 0.

طيب الوسط يا جدعان.. بين ال 0 وال 100 في 98 درجة.. موقفكوا معاهم ايه؟

ماله الرقم 50 وللا 40 وللا 60؟

ففيها ايه لما أكون حليق اللحية بس ملتزم بالصلوات والسلوك القويم.. او مربى دقنى ولما أخطأ زى كل البشر؟

فيها ايه لما تكون ست لها شخصية مستقلة واحلام وطموحات وتعرف حقوق جوزها عليها واولها الطاعة وحسن التبعل؟

مفيهاش حاجة طبعاً.. انما هي منظومة الأفورة المصرية.

كرجل شرقي احب ان مراقي تكون مطيعة من غير ما تكون جارية.. احب احس انها خضعت لكلامي احترام مش ذل.. احب اكسب المناقشة بالمنطق مش بالتهديد بالطلاق.. احب أكون مهاب الجانب في البيت محبة مش خوف.. احب مراقي تكهرب الجو في البيت قبل وصولي بدقائق لمجرد كوني رب الأسرة الواجب احترامه مش علشان انا الى بصرف ولا علشان بعرف ازعق واضرب.. احب اسمع اراء مراقي واشوف تفكيرها.. افنتع او لا.. هذا أمر آخر يخص المنطق الى هتتكلم بيه والى ساعات كثير جدا ممكن يعجبني واخذ بيه.. انا كده كده هسيبلها العيال تربيهم.. احب لما ابني يسأل أمه عن حاجه.. تقوله وتعلمه.. مش تقوله روح لأبوك.

احبها تعلم ولادي أهمية العلم و قدسية المعرفة.. محبتهاش تقولهم انتو محسودين ولا فلانة راكبها جن.. احب لما تغيب احس انها غابت.. مش احس اني جعان.. المفروض ان الانسان يكون كيان و كينونة.. له وجود ويصنع فارق.. لو غياب الانسان ووجوده سواء.. يبقى الانسان ده صفر.. فراغ.

انشغل عقلي بالبنت دى فتره.. هي ليه سايه نفسها كده زى الميه.. لا لون لا طعم ولا ريحه..

لاحقا عرفت السبب..

البنت أمها ماتت وهي صغيرة.. ابوها رفض يجيب لأولاده مرات اب.. رباهم احسن تربيته "هكذا يظن" لحد ما البنات كبرت وبقت على وش جواز.. في حقيقة الامر هو مرباش حد.. هو احسن اطعامهم لحد ما اجسامهم كبرت.. ودلوقتي بيدور على حد تانى يدفع تمن العلف والعليقة مكانه لأنه ميت لا محاله يوما ما.

صعبت عليا البنت.. لكن مشاعر الشفقة لا تصلح لإقامة حياه زوجيه.. غياب الام من حياة البنت وانشغال الاب بتوفير النفقات ومسئوليات الحياة والعمودية انتج أبناء بلا اى شخصية.. كونه عمدة معناها انه رجل ذو مكانة وهيبه بيته مش مكشوف للأغراب.. بناته ميخرجوش من البيت.. مش مسموح لحد انه يقرب منهم.. البنات عاشت في برج عاجي بدون ام.. والنتيجة كانت زى ما شفت.

هل لسه في حد عاقل متصور ان وظيفة "أم" في الحياة مش كفاية والستات يلزمها الخروج للعمل علشان تثبت اى كلام أهبل؟

هل كل ام ماتت سابت وراها أبناء او بنات اصبحوا بالشكل ده؟

اكيد لا.. انما الشخصيات بتفرق.. في حد بيتعرض لليتم وهو صغير فينشأ كاره للمجتمع وينحرف.. وحد تانى يمر بنفس الظروف فيكبر وهو قادر يعتمد على نفسه.. اليتيم في حد ذاته من أهم أسباب ومقومات النجاح مع الفقر والحرمان.. ربنا سيحانه وتعالى لما حب يربى النبی عليه الصلاة والسلام تربية قوية حسنة.. حرمة من ابوه وامه.. فالنتيجة انه نشأ ناشف وصلب.. بس مش كل الناس زى بعض.. في بعض الناس بتنهار مع الصدمات.. زى البنت دى.. اعتقد ان وجود أمها كان هيفرق كتير في حياتها.

طيب والأب؟؟

الرجاله مش بتربي قولوا واحدا.. الام بتربي بسلطان الاب.. الام تمسك عصاية اسمها هقول لابوكوا.. الاب يوجه من بعيد ويعلم دروس الحياه ويحط استراتيجيات على المدى الطويل.. الاب ملوش خلق انه يقوم سلوك او يركز في حياة الأطفال اليومية.. الاب هو كائن بتخاف منه وانت صغير وتكرهه وانت مراهق وتتعايش معاه وانت شاب وتتعرف قيمته بس لما تقول الله يرحمه.. لكن الام شيء مختلف.. الام تحبها طفلا وتعشقها مراهقا وتحنو عليها شابا وتشيلها فوق راسك وانت راجل بشنبات وتطلق علشانها مراتك بعد كده.. الاب يرسم الحلم والام هي اللى بتخلي أحلام الاب حقيقة.. الاب شابف ولادة بعد 20 سنة هيبقوا فين.. الام هي سواق الميكروباص اللى بيوصل بالأسرة كلها للمكان اللى شافه الاب زمان وعنده خلق وصبر انه يقف كل شوية علشان ينزل حد ويلم الاجرة.. الاب يبني البيت ويحمى.. والام تملئ البيت كل حاجه.. بدون الاب مفيش امان وبدون الام مفيش اى حاجه.

علشان كده لازم تبقى حريص جدا في اختيار الست اللى هتربيلك ولادك.. لازم لما تروح ولادك يفتكروك بكل خير علشان اخترتلهم ام.. مش ماكينه تسمين.

ربنا يرحم الجميع ويبارك في عمر كل الآباء والأمهات.

هذا جناه على أخي

"قَالَ سَتَشُدُّ عَضُدَكَ بِأَخِيكَ وَنَجْعَلُ لَكُمَا سُلْطَانًا فَلَا يَصِلُونَ إِلَيْكُمَا بِآيَاتِنَا أَنْتُمْ وَمَنِ اتَّبَعُكُمَا الْغَالِبُونَ" ..

طبيب تخيل كده لو كان اخيك ده هو السرطان الى أصاب عضدك؟

بعد التخرج بسنتين بالطب كنت من الرعيل الأول لمهنة ال IT في مصر.. البشمنهندز الى بيعرف يصطب ويندوز ويعمل شبكات ويشغل أفلام على الكمبيوتر.. امي مكنتش مقتنعة بالشغلانة كلها.. ازاي ابقي مهندس ومش عارف اصلح صوت الغسالة المرعب ده؟

معالم المستقبل بانت بدري.. ابويا رافض فكرة ارتباطي بأى شيء غير الشغل.. جدي رافض فكرة ارتباطي بأى شيء غير الستات.. امي مش شايفه من الحياة الا اني خسارة في كل البنات من منطلق ان القرد في عين امه غزال.

بعدت عن الستات علشان أوفر وقتي للشغل وفلوسي لعربية ابويا البيجو الى قدرت اسلكها منه بمعجزه بعد ما فرض عليا شروط تعجيزية ولا شروط معاهدة لوزان بتاعة العثمانيين.. من ضمن الشروط دى واهمها.. اني لازم اروح عند جدى الورشة كل جمعة نعمل فحص كامل للعربية.. كهرباء وميكانيكا وعفشه وسمكرة ودوكو.. وكمان نكشف عليها لتكون حامل وللا حاجه.

ابوا.. زيارة لجدي يبقى اكيد هيسمم جتي بالكلام عن الجواز.. لازم هيحكيلي قصة كفاحه المبكر وأزاي مراته وبنته خلفوا في نفس السنة علشان يبقى ليا خاله أصغر مني في السن.. ده طبعاً غير مجموعة قصص تاريخيه تأكد على أهمية الجواز وقصة انهيار نابليون لما ساب مراته وأزاي عقبه بن نافع اكتسح شمال أفريقيا بعد ما اتجوز بأسبوع.. ده بالإضافة الى شرح كتاب "تكسير الأزاز في افضال الجواز" للعلامة الأمام ابن أبي العبيط.

- طبيب يا جدي.. ورحمة ستي ما عندي مانع.. شوف انت العروسة وانا تحت امرك
- وهو انا كنت هستناك.. انا كلمت ابوها فعلاً وزمانه في الطريق دلوقتي اهو.. مسافة ما نشرب الحلبة يكون جه
- طب قولي اى معلومات عنها طبيب.. اى حاجه.. أقول انا ايه للراجل!!
- معلومات ايه هو انت هتوظفها.. بنت زى كل البنات.. هتبقى ايه يعنى.. عفريت
- يا سيدنا افرض هي مرضيتش بيا وللا كانت حاطه عينها على حد.. أخرج نفسي ليه انا؟؟
- لا متقلقش.. دى لسه صغيرة.. وبعدين ابوها جه اهو.. ابقي انت اسأله.

وسابني وقام يسلم على رجل طويل رفيع بشكل ملفت.. المفروض انه في الخمسينات.. لكن شكله يدى مش اقل من 90 سنة مرتاح.

ما بين حكايات مختلفة عن العربيات ومشاكلها والأهلي والقرف الى بيعمله في الدوري.. قدرت أكون فكره سطحية عن الراجل ده.. مع تحفظي الكامل انه اهلاوي خاين زى جدي.. الا اني قررت اسكت خالص.. من يومين بس الزمالك شال نص دسطة اجوان وأصبحت انا والى زبي بنستخي في الشوارع.. كتمت زملكاويتي فقلبي.. اعتقد لو فتحت بقى بسيرة الأهلي.. جدى هيعمل عليا حفلة تحكى وتحاكى عليها طنطا 3 قرون قدام.

اتفقنا على زيارة عائلية.. حيث انهم من اهل طنطا.. يبقى خير البر عاجله..

- بكره ان شاء الله بعد صلاة العشاء تنورونا يا حاج سعيد.
- على خير ان شاء الله.. هو الواد ابن بنتى ده صايع وزملكاوي صحيح.. بس متري كويس واضمنه برقبتي.
- كفايه انه من طرفك يا حاج.. ده احنا يزيدنا شرف.
- على بركة الله

كل ده وانا قاعد اتفرج.. ال 6 اجوان بتوع بيبو وبشير كاسرين نفسى خالص وجايين كرامتي الأرض.

بيت عادي جدا مفهوش اى تفصيله مثيره للانتباه الا مسحه من الهم والحزن على وش الأب والأم.. الست زى القمر.. مقدرتش السنين تخفى ملامحها الجميلة.. استبشرت خير.. طالما الأم كده يبقى اكيد البنت حلوه.. وطالما الناس غلابه كده يبقى مش هقابل حاجه شاده عن المؤلف.. شكلها هتظبط المره دى وهلبس في جوازه.

زى ما توقعت.. البنت جميلة جدا وشديدة الهدوء.. من النوع الى لو أنكلم تحس ان في عصفورة بتزقق.. النوعية الى تخاف تقولها قومي اعمليلي شاي لاحسن نفسيتها تتدمر.. الشت عليا الشه سريعة وهي بتقدملي طبق الجاتوه الملبان على اخره.. دمها خفيف كمان.. كنت عاوز اترى عليها كعادتي زى ما بتراى على الستات عموما.. بس بصراحة ملقيتش منفذ.. الناس جادين وقت الجد ومنفتحين بلا انحلال وقت الضحك.. محتشمين زى ما هو واضح من لبسهم.. مستوى مادي متوسط زى ما هو واضح من فرش البيت.. لا أتوقع ان موظف حكومي يكون من ذوي الأملاك الا انه يكون حرامي او مرتشي.. بنتين وولد هما كل حصيلة الراجل من الدنيا.. راضي وقانع بهم.. شكله فعلا أحسن تربيتهم.. البنات عصافير حرفيا.

تعددت الزيارات بينا وبينهم.. اخرهم كانت زيارة طويلة جدا.. امي مبسوطة بالبنت الى أعلنت الخضوع لها تماما من قبل حتى ما تتكلم.. واضح ان البنت دى شافت كده في بيت أهلها فبتعامل ان حماها هتبقى زى أمها.. هي فعلا بدأت تقول لأمي يا ماما وبدأت تفتح معها مواضيع وحواديت وكلام يطول بينهم.. بنت ذكية.. لما شافت امي بتشتكي من رجلها.. قامت بنفسها جابت مخدة وحطت رجلين امي عليها.. حسيت بالأحراج وقمت انا اعمل كده.. ردت عليا بلباقة رد خلاها دخلت قلب أمي وقتي.. حركة زى دى تخليني اشيلها فوق دماغي وتضمن انها كسرت سم حماها للابد.. بس مين تفهم وتعلق.

خلاص.. مش فاضل حاجه.

الاتفاق كانت سهله جدا.. ابويا أنكلم كأنه أبو العروسة مش أبو العريس.. هو يعرض وجدي يعلي عليه وانا الطم.. هجيب كل ده منين يا عالم يا كفار.. انا معايا تمن الشبكة بالعافية.. أبو البنت مكانش له اى طلبات.. الراجل ده مكسور كسرة غير طبيعية.. لو طاواعت الشيطان الى في دماغي يبقى مفروض اشك في البنت.. اعوذ بالله من قذف المحصنات.. بس فعلا شكل الراجل ومراته زى ما يكون في مصيبة كاسرة نفسهم تماما.

اصريت اني اشتري الشبكة من فلوسي.. جمعت كل الفلوس الى كانت معايا على جمعيه قبضتها الأول ونزلنا اشترينا شبكة عظيمة لبستها البنت في حفل خطوبة هادي عملناه في بيتهم.. البنت كانت قنوعة جدا وامها كمان.. حاسس انهم خافين من شيء ما او زى ما يكونوا مهددين بحاجه.. بيتكلموا معايا زى ما أكون لواء في امن الدولة.. مستغربتش كثير.. جيل عبد الناصر ده كله كده.. الخوف اترع في النفوس وبقي جزء لا يتجزأ من حياة الناس اليومية..

بس بقي يا سيدي.. وبقيت عريس رسمي فهمي نظمي.

كنت بزورهم في البيت كل أسبوع حسب مواعيد شغلي.. لاحظت في مره ان في خاتم ناقص من شبكتها.. مسألتش كثير رغم اني اتضايقت.. هو ذهبها وهي حرة تعمل فيه ما بدالها.. انا بس كنت أتمنى تحتفظ بيه زى ما هو كذكرى.. مش علشان انا طمعان فيه.. لاحظت كمان اني لما سألتها على الخاتم المفقود جاوبت بسرعة وبغيرت الموضوع.. زى ما تكون بتهرب من حاجه.. ملاحظة ثانية أكثر اهمية خدت بالي منها.. انا لحد دلوقتي مشفتش اخوها.. قالولي انه بيشتغل في البحر الأحمر وبينزله مره كل 45 يوم.. طيب.. عدى أكثر من 45 يوم.. ولسه مشفتوش.. ايه بقي؟؟

لحد ما يوم كنت عندهم.. وشفته..

ويا ريتي ما شفته ولا عرفت انه موجود أساسا..

اعوذ بالله من غضب الله.. هو في كده!!!

لو حبيت ترسم لوحه من المدرسة الواقعية تعبر عن الخطايا وانغماس النفس في السوء.. مش هنلاقي أفضل من الوش ده.. لو حبيت اشرح واوصف معنى كلمة "عليه غضب ربنا" مش هنلاقي وش زى ده ابداء.. لو خدت من وشه كل تفصيله لوحدها.. هنلاقي انها تصلح بقوه للتعبير عن شيء سيء.. لو خدت الوش على بعضه هتشوف راسبوتين.. لو بصيت عليه من ظهره.. لازم هتقول ان الواد ده مش تمام.. يأكد انطباعي ده نظرة الكسرة والهم الى زادوا اوى على وش الاب اول ما شاف ابنه داخل.. اكاد اقسام ان أمها دلوقتي بتقول في سرها يا ارض انشقي والبلعيني او يا رب خده وريحني منه.

متكلمتش معاه اكثر من 3 كلمات ايقنت بعدهم انه بالقليل اوى مدمن.. بعد الزيارة دى اصريت اعرف كل حاجه عن الواد ده.. ثقتي فيهم اتهزت ومش هصدق اللى هيقولوه.. هما كذبوا عليا صحيح.. بس انا عاذرهم.. لما تبقى عندك مصيبة زى دى هتعيش عمرك على امل ان ربنا يفكها من عنده وياخده.. بدأت اعتمد على نفسي في تجميع المعلومات.. شهر كامل من شغل المخبرين.. بعده أفزعني بشده ما عرفت.

مفيش حاجه حرام في الدنيا الواد ده معملهاش.. مفيش حاجه غلط في اى تشريع او ديانة مغوطش فيها.. مفيش اتنين اختلفوا على سمعته السيئه.. مجرد ما تقول اسمه الناس تستعيز.. سمعة رائعة في سوق المخدرات.. مفيش ظابط مباحث في قسم بوليس ثاني طنطا ميعرفوش.. محدش يعرف فعلا هو عايش فين او مع مين او بيعمل ايه او بيصرف منين.. محدش عارف الولية اللى بيظهر عندها في البيت كل فترة دى تبقي مراته وللا عشيقته.. محدش عارف ان كان مستمر في تعايط الماكس وللا قرر يتجه للهروين.. محدش عارف ان كانت الفلوس اللى معاه دى سارقها وللا كسبها من بيع المخدرات وللا نصب على حد فيها وللا ذهب اجبر واحده من مقاطيعه انها تبيعه.. محدش في البيت عندهم مهتم بيه ولا بأخباره.. لما البوليس بيسأل عليه ابوها بيقولهم انه طرده من زمان.. معرفش ايه سبب وجوده في اليوم ده بالتحديد.. بس من ضمن الحكاوي عرفت انه لما بيفلس.. بيظهر لأبوه وأمه ويعمل مشاكل.

كده فهمت ذهب شبكة اخته راح فين..

غم الدنيا كلها ركبني لما عرفت.. وقعت في حيره فعلا.. اهلي كلهم اتفقوا ان الموضوع ده مينفعش.. البنت اه كويسة.. بس هل ينفع ان خال ولادي يبقي مجرم ومدمن؟؟

- يا جماعه حرام ناخذ البنت بذنب اخوها.. هي تتحاسب عن اللى هي عملته وبس
- مش مختلفين.. لكن البعد عنهم أفضل
- طيب وانا مالي ومال اخوها.. هو فحاله واحنا فحالنا.. مش هبقى هدخله بيتي
- ده مجرد كلام.. النسب مش اتنين وبس.. شوف انت علاقتك بأخوالك ايه وقيم الموقف
- بس ابوها راجل طيب.. سيدنا نوح ابنه كان عاصي وربنا مخدوش بذنب ابنه
- ولا أي اب يقدر يقطع علاقتة بأبنه حتى لو طرده.. انما لو بنته حبت تتجوز واحد صاحب ابنه.. اكيد كان هيرفض.
- بس البنت كويسه خسارة فعلا.. انا ممكن اتجنبه خالص..
- برضه مش هتسلم من اذاه.. ان مكانش بشكل مباشر.. يبقى على الأقل بالسمعة

ايه الحيرة دى!!

انا مستخسر البنت بس بابا عنده حق.. انا حكيت لأهلي ربع اللى عرفته بس وكان رد فعلهم كده.. ما بالناس لو عرفوا كل حاجه.. من جوايا حاسس ان الموضوع مش نافع.. بس مش كل يوم هقابل بنت زى دى.. مش محتاج اصلى استخارة.. عارف انى مش هخرج عن طوع اهلي ابدًا.. بس مش كل يوم هقابل بنت زى دى.

ربنا يحلها من عنده بقى..

مقدرتش انه الموضوع.. إنسانيا على الأقل.. فكرت انه يمكن وجودي يحجم الواد ده عنهم شوية وابقى كده عملت فيهم جميل.. كنت عندهم في البيت في يوم وجه اخوها يزورهم.. بعد دقائق سمعت صوت زعيق وخناق.. قمت امشى علشان الاحراج.. في طريق خروجي لقيت منظر مرعب الله لا يكتبه على اى حد ابدًا.

الأم متكومة على الكنبه والواد ماسك ابوه بيضريه.. واضح انها اخدت الطريجة التمام والأب دلوقتي بيدفع تمن دفاعه عنها ضد المجرم ده.

يا ستار يارب.. ده لو ابن حرام مش هيعمل كده.

مينفعش ابدًا اعمل نفسي مش شايف حتى لو تعاميت.. انا لو ماشى في الشارع وشفت المنظر ده لازم هتدخل.. صوت الم مهول نزل على وش الأب خلاني اتسرعت من الخضة.. انا غريب صحيح.. بس حرام يا ناس ده راجل كبير مهما كان.

بدون تكفير هجمت على الواد بمنتهى العنف.. كان قدي في الحجم تقريبا بس واضح تأثير المخدرات على صحته.. مخدش في ايدي اكثر من دقيقتين وكان مرعى تحت رجليا وانا عمال اشوط فيه بمنتهى القسوة.. دم كثير نرف من مناخيره ومن جرح راسه بعد ما ضربه بفازه لقيتها قصادي.. واضح كمان ان دراعه انكسر لأنه بيصرخ منه جامد وفي لون ازرق محمر منتشر عند قصبة ايده.. مش مهم.. ده عيل وسخ وفاجر.. محسيتش بنفسى الا وأمه بتحوشنى عنه وبتقول كفايه يا أبني كفايه.. سيبه منه لله.. الست خافت الواد يموت في ايدي واروح انا في داهيه.. عرضت عليهم نتصل بالبوليس بس هما رفضوا.. يبدو انهم كانوا متعوده منه على كده.. كالعادة جاي يطلب فلوس.. ولما رفضوا.. كان التمن المنظر الى شفته ده..

نزلت من عندهم وانا متمسك بالبنت زياده.. حسيت بتعاطف جامد معاهم.. اخدت الموضوع تحدي شخصي.. انا بقي الى هقف للصايح ده.. واضح جدا ان ضعف ابوه وأمه اغراه انه يتمادى زياده.. نشوف بقي هيعمل معايا ايه.

مجبتش سيره لأهلي خالص.. البنت كلمتني وطلبت انى اعيد تفكير وهي متقبله القرار أيا كان.. هي لازم تقول كده وانا لازم اقولها خليكى بره الحوار ده.. هشوف انا وللا هو.

بعد الموقف ده بفترة كنت عندهم في زيارة.. اخوها اختفى تماما ومعملش اى حاجه من ساعة ما رقعته العلقه المتينة.. قاعد منفوخ عندهم وركبتنى روح الرجل الذي يعرف كل شىء.. بحاول ارسم نفسى واترسم على حمايا.. اتفتحت في حنفية اقتراحات للرجل المسكين.. كل ما أقول حاجه الاقيه يحزن زياده.. الوقت اتأخر وميصحش اقعد عند الناس اكثر من كده.. استأذنت وقمت في هدوء.

على سلم البيت البنت اتصلت بيا كالعادة.. شوية كلام لزج من بتاع الخطوبة..

- خليني معاك على الخط لحد ما توصل.
- هيحصلى ايه يعنى.. حد هياكلنى.
- لا مش كده.. بس عاوزه أتكلم معاك.
- طيب.. اتكلمى يا ستي.. عاوزه تقو.....

وفجأة ظهر فلاش زى بتاع الكاميرا كده والدنيا ضلمت ثواني ونورت تانى مع الم رهيب في راسي.. صداع عنيف نشأ من الفراغ في اقل من ثانيه.. بعيون زائحه لمحت 4 افراد بيعملوا حركات بنشاط عالي.. بعد كل حركه منهم كان الألم ينتشر في جزء من جسمي.. عينيا مزغلله مش قادر احدد ان كان الى في أيديهم ده نيابيت وللا كرابيج وللا مطاوي.. وقعت متكوم على الأرض.. مقدرتش أوجه لأى حد فيهم اى ضربات من اى نوع.. مقدرتش اعمل اى حاجه الا انى احمي راسي بدراعي في انتظار انتهاء حفلة الضرب دى.

لحسن الحظ ان البنت كانت معايا على التليفون وسمعت اغلب الى حصل.. طلعت على السلم ورقعت بصوت عصافيري مضحك كان كافي ان الجيران تطلع تشوف في ايه.. العيال طبعوا ادوا مهمتهم كاملة واخدوا المحفظة والساعة والموبايل وسابوني مرعى على السلم بسف التراب.. روح بيتنا واضطريت طبعوا احكي لأهلي على كل حاجه.. بابا قام من سكات اتصل بأبو البنت.. بلغه ان الموضوع انتهى لحد كده وانا قاعد اسمع ومش قادر انطق.

الناس كانوا محترمين جدا.. بعنولى حاجتي كلها.. لقيت خاتم ناقص بس.. هو ده الى الصايح ده كان سرقه وباعه.. نزلت الصاغة اشتريت نفس الخاتم هو هو وحطيته في العلبة.. رحت للناس البيت واصريت ان بنتهم تاخذ الذهب.. هو دلوقتي مش شبكة صحيح.. بس اعتبروه ذكرى منى.. انا زى زيكم بالظبط.. مكره لا بطل.

انتهى الموضوع بيني وبين البنت على غير رغبة مننا احنا الاتنين.. بالعقل.. كلام بابا صح.. مش هخلص من مشاكل اخوها حتى لو بعدت عنه.. الموضوع ده ملوش غير حل واحد.. اخوها يموت.

صعب عليا البنت وأهلها.. لكن مكلمتهاش تانى.. كرامتي مجروحة بسبب العلقه الى اكلتها بالإضافة الى انى حاسس فقدت صورة الراجل الى يقدر يحميمهم.. كمان يمنعي تار بايت بيني وبين اخوها مش يحميه الا الموت.

عرفت اخد حقي منه بأكثر الطرق وحشية في العالم.. مفيش في الدنيا اسهل من قلة الادب.. الى عملته فيه كان السبب انه انقطع عن تهديد ابوه وامه فترة طويلة اوى.. سمعت كلام ابويا.. وقطعت زيارة طنطا فترة علشان الموضوع يتنسى.. ولأن طنطا بلد صغيره تتنقل فيها الأخبار بسرعة.. عرفت ان اخوها بعد كده خد 15 سنه سجن في قضية اتجار بالمخدرات.

يا الطاف الله.. ربنا كان رحيم بالناس دى.. خلصهم منه مده طويله مؤقتا.. هيرتاحوا من بلطجته عليهم اه لكن مين يجرؤ يقرب
من بنات اخوهم في السجن؟
لهم الله.

قل ما جمع

الطمع يجعل الأغنياء فقراء "بنجامين فرانكلين"

عارف ايه هو الطمع؟

التعريف الاكاديمي يقول انه الرغبة المحمومة في امتلاك الأشياء بما يتجاوز احتياجات الفرد للبقاء او الراحة او الرفاهية.. الراهب الإيطالي توماس أكويناس قال "الطمع خطيئة ضد الرب مثل كل الخطايا المميتة" والي قرأ الجحيم بتاع دانتي هيلاتي دانتي في الجزء الثاني "المطهر" انتقم من الشرهين بأنه صورهم مرميين على وشوشهم في الأرض.. كسقاط على تركيزهم على الاطماع الدنيوية.. وفي الأسلام الطمع فيما يملكه الغير أو السعي المحموم لامتلاك ما فاض عن حاجتك سلوك مذموم.. بيحولك الى عبد زى ما قال الأمام الشافعي:

العبد حر ان قنع ** والحر عبد ان طمع

فاقنع ولا تطمع فلا ** شئ يشين سوى الطمع

من المنطلق ده حرص ابويا رحمة الله عليه انه يقتل فينا اى بوادر للطمع.. مصروفي كان قليل بالمقارنة باللي في سنى.. فكرة المقارنة في حد ذاتها كانت مرفوضة تماما.. رده كان جاهز علطول.. في قلب منتصف الجبهة.

"اتعود تكفي نفسك باللي معاك.. الدنيا عمرها ابد ما هتديلك اللى يكفيك.. دايم هتلاقي نفسك محتاج وعاوز.. السنة اللى فاتت كان نفسك مصروفك يزيد.. اهو زاد بالفعل وانت لسه بتشتكى.. كده المشكلة عندك انت مش في المصروف.. وفق احتياجاتك طبقاً لما يحتويه جيبك"

وكبرت على كده..

اتعودت مطلبش أبدا.. انما اضبط حياتي على قدر اللى معايا.. في خلال رحلة عمل امتدت ل 25 سنه.. عمري ما طلبت زيادة من مكان اشتغلت فيه ابد.. عمري ما فاصلت في أي شيء.. عمري ما طلبت اى شيء من اى حد.. يمكن لما اتجوزت انتخت شويه وبيقيت اطلب من مراتي عملي شاي بالمره وهي في المطبخ.. لكن في العموم.. عندي إحساس انى اعلى من الطلب.. ينطلب منى اه.. لكن انا مطلبش.

السلوك ده مريح لأصحابي جدا.. انا في نظر مديري شخص مثالي في موضوع الفلوس.. كمان بالنسبة للبياعين انا راجل لقطه.

ايامها كنت بشتغل في قطر.. الكلام ده سنة 2011.. كنت بنزل مصر كثير اوى بسبب ظروف مرض ابويا وقضايا الانفصال.. كمان كان عندي في قطر جارة لبنانية طروب اوى.. كنت خايف منها جدا ومدرك تمام الادراك ان السقوط مسألة وقت مش اكر.. فكنت بهرب من البيت دايم يا اما بالشغل الكثير.. او انزل مصر في الويك اند.

ترشيح عن طريق زوجة صديق.. كوني السنجل الوحيد في أصحابي كان بيمثل هاجس رهيب عند نسوانهم.. كل السهرات عندي.. كل اللى يتخانق مع مراته ييجي عندي بينفخ نار ويرجع آخر الليل مزققط.. شقتي أصبحت تجمع لكل ما هو مسلي وجميل في بلاد الغربية.. أفلام.. بلاي ستيشن.. طاولة.. كوتشينة.. مونوبولي.. ريسك.. كل أنواع الألعاب متوفرة بكثرة علشان ليالي الغربية الطويلة.. سهرة الخميس كانت بتمتد الى الفجر.. وطبعاً ده شيء مستفز جداً للستات.. الواحدة منهم عايزه لما تتخانق مع جوزها تفضل متنكده وهو كمان يفضل متنكد.. بتاع ايه هو يخرج يروق مزاجه ويرجع البيت ينام.. ده كلام مش منطقي طبعا.. لازم نفضل نعيد ونزيد في موضوع الخناقة لحد ما يفقد اعصابه ويقولها روجي وانتي طالق.. بعدين نقعد نعيط ونندم ونستفتي اى بنى ادم علشان يقولنا هل هو كده كان مسئول عن كلامه ودى تحسب طلقه وللا الغضب افقده الوعى ويلزم كفاره؟

كنت في نظر زوجات أصحابي أبو نواس.. خط الدفاع الأخير الى مانعهم يحكموا قبضة النكد على بيوتهم.. مساكين والله.. لو بيميزوا صح كانوا عرفوا اني خط الدفاع الأخير الى محافظ على بيوتهم.. لولا وجود واحد زى حالتي كده كان زمان حالات الطلاق وصلت لمعدلات قياسية.

اتفقت الحريم كلها عليا.. الجدد ده لازم يتجوز بأى شكل وبأى طريقة.. وبدل ما كان جدي بيسعي انه يجوزني.. بقي جدي وأمي وزوجات اصحابي كمان.

بيت متوسط المستوي لكنه في منطقة فخمة في مصر الجديدة.. مش عارف ايهما أفضل.. الانسان يسكن في سكن متوسط في منطقته فخمة وللا سكن فخم في منطقة بيئة؟

البنيت بتشتغل لكن عندها رغبة شديده انها تقعد في البيت بعد ما جربت مرار الشغل.. الاب موظف كبير في أواخر سنين خدمته.. الام تبدو طيبة.. اخواتها اتجوزوا ومش فاضل غيرها.. اسرة كبيرة العدد حسب ما فهمت من سياق الكلام.

اول زياره عدت على خير.. الزيارة الثانية كان معايا أمي.. ابويا كان ملازم فراش المرض في أواخر أيامه.. في بيتنا الحريم زى الرجالة.. الكلمة الى تتقال ميثاق.. سواء قالتها امي او قالها ابويا.. تمت الزيارة الثانية على خير.. البنيت نجحت في كشف الهيئة بتاعى امي ونجحت كمان في اختبار السيطرة وأعلنت انها مستعدة تشيل أمي فوق راسها زى ما انا مستعد احط أمها في عيني..

طالاييب.. بشرة خير.

الزيارة الثالثة بقي.. زيارة حط النقط على الحروف قبل ما نطلع سوا على الروف علشان نعمل فرح نوزع فيه على الناس عليه ورق فيها حتتين جاتوه وسندوتش لانشون.

استر يا رب.. بطني دايم بتقلب من الزيارة دى.. امها حطت قصادي كوابية عصير ليمون اخضر كتيب علشان يخلى الاعصاب رايقه قبل الكلام.. انا شفت الكوابية من هنا.. وعيني الشمال رفت من هنا.. مخي بدأ يشوف إبراهيم نصر في شمس الزناتي وهو بيقول اوهروب يا ولد دول بيشرىوا لمون.. اوهروب يا ولد.

نتحلى بالصبر.. رجعت بس بالكروسي لورا شويه علشان ابعد عن السائل الفاتك بالأبراج ده.. لو فضل قصادي كده هتوتر ومش هعرف أتكلم.

- طلبات حضرتك؟؟
- طلبات ايه يا ابني.. انت دخلت قلبنا.. كلنا حاسين انك واحد مننا
- ربنا يديم المعروف.. الأرواح جنود مجنده
- ايوه فعلا.. هات ايدك نقرأ الفاتحة.
- طيب.. قبل الفاتحة.. هل اقدر اخذ فكره عن طلبات حضرتك؟
- مفيش طلبات يبنى خالص.. دى مش بيعه وشروه.. الى تتفقوا عليه اعملوه.. ولو الأمور قصرت معاكوا.. الكبار يساعدوا.. انتو ولادنا يا ابني مش بضاعة.. هتنتفعنى بإيه شوية كراكيب لو بنتي عاشت حزينة وللا مهمومة؟؟ انت نفسك هتكسب ايه لو خدت البنيت وهى مش مبسوطة وعاشتلك في البيت ببوز شبرين؟؟ انا ادك ابوك اسمع منى.. بوز النسوان ده اقسي عذاب في الدنيا.
- اه والله يا عمى.. كلامك درر.. كله الا البوز ده.. انا خلقي ضيق اوى في الموضوع ده.
- ربنا يرزقكوا يا ابني ويفتح عليكوا من واسع.. الى تقدر عليه اعمله وان شاء الله كل خير.
- طيب حضرتك.. انا مش هجهز شقه في مصر لأنى كده كده عايش بره.. مفيش منطلق انى اجمد فلوسي في شقه مش هنعيش فيها.. لما ننزل مصر اجازة.. يا هنبقى عندكوا يا هنبقى عند أبويا.. لا اعتقد اننا هنبقى واحشين بعض اوى لدرجة اننا ننزل نقعد في مصر سوا بعيد عن بيت أهلها او بيت اهلى.. مش كده؟

بدا صوت الراجل يهدى وكلامه بقى بالقطارة وعينيه ضاقت وهو بيقول:

- كلام منطقي يا ابني
- طيب الحمد لله.. دى اول عقبه راحت..

- ربنا ما يجيب اى عقبات ان شاء الله.. ايه كمان؟
- انا مش بكتب قوايم.. مهرها هتاخده في ايديها قبل الجواز.. بعد الجواز بأسبوع او اتنين هتاخذ مؤخر صداقها.. الكلام ده هنكتبه في عقد الجواز.. يوم ما نقرر نفرش شقه في مصر.. انا متكفل بيها كلها من الإبرة للصاروخ.. وكده يبقى حقها وصلها كاملا قبل الجواز وبعده زى الشرع ما بيقول.. يناسب حضرتك الكلام ده؟
- محدش بياخد مهر يا ابني الأيام دى.. بس أزاى مفيش قايمه؟
- ماهو حضرتك جرت العادة ان أبو العروسة بياخد المهر ويحط من معاه اده مرتين او ثلاثه ويتنفخ في شراء عفش وكراكيب واى كلام.. بعدين كل ده بيتكتب في قايمه باسم العروسة كحفظ للحقوق.. انا بقى ريحتك من كل ده.. بدل ما تاخذ ورقة ملهاش اى قيمة الا وقت الخلاف اللهم احفظنا.. انا هديك حقها كله في ايدك قبل اى حاجه.. الشقة انا وهى نفرشها بعدين لما ربنا يشاء.. اكيد يعنى مش هبقى متجوز وآجى اقولك افرش معايا بيتي.. واقله يبقى معاها فلوس بتاعتها.. للزمن على الأقل.
- اه.. فهمتك.. طيب عندك فكره المهر بيكون في حدود ايه؟
- شرعا.. بيبقى مهر المثل.. يعنى نشوف الى زيتها خدوا كام وبعدها نقرر.. بلغة حديثة.. خد عينه من 10 بنات حواليكوا في نفس المستوي.. اجمع المهور بتاعتهم واقسمه على 10.. الرقم الى هيطلعلك هيبقى اسمه المتوسط.. هديه من عندي ابقى اضرب المتوسط ده في اتنين ويبقى هو ده الرقم الى هدفه مهر لبنت حضرتك
- كريم واصيل يا ابني.. اهو كله لمراتك.
- الفرح بقى والحاجات دى تفاصيل مش هنختلف عليها.. حببت تساهم معايا فيه.. اهلا وسهلا.. محبيتش.. ولا يهكم.. انا متكفل بكل شيء
- طيب يا ابني.. سيبني كده اشاور البنت وامها وارد عليك.. تعالى الجمعة الجايه نتغدى سوا ونشوف هنعمل ايه.
- طيب جميل.. لو في اى حاجه غامضة او اى أسئلة تاني.. انا تحت امرك.. اقولك سلام عليكم.. يا دوب اطر على المطار علشان عندي شغل الصبح.

ومشيت وانا كلى تافؤل.. حاسس ان الكلام مريح.. انا حليت للراجل 500 مشكله وفتحت الطريق على البحري لجوازه سهلة وسريعة من غير قلق.. كمان كنت حاسس بتأنيب الضمير انى استسختف الراجل في الأول.. الراجل كويس اهو.. امال ايه بقى؟

عدى أسبوعين وتليفوني رن.. أبو العروسة يدعوني لزيارتهم.. يبدو انهم توصلوا لقرار أخيرا.. يا مسهل يارب.

نزلت مصر مبتهيج وسعيد حتى انى حجزت الطائرة فردة واحده بس.. فلوس الشبكة في جيبي وناوى ازودلها عن الى هي هتختاره حتى لو كان ايه.. اتعلمت كده في الاتفاقات دى.. اتفق على اقل من مقدرتي ووقت الشراء ازود من عندي شويه.. هبقى في نظر الناس كريم وفرحان بالنسب ومقدر البنت.. حركة نصب ليس الا اجرنا عليها تسطيح الاهالي وتركيزهم على كل ما هو مادي في الجواز مع اهمال الاساسي فعلا.

الحمد لله المره دى مجابوليش لمون.. حلال عليهم البسبوسة الى كنت داخل بيها..

- ها يا عمى.. نقول مبروك؟
- هنقول ان شاء الله.. في بس شوية رفايع كده متكلمناش فيها.. بس ان شاء الله مش مشكلة أومرني
- موضوع الشبكة ده.. البنت شايفه انه قليل شويه.. دى شبكة بنت عمها الكبير اد كده مره ونص
- اهلن.. طيب.. ايه تاني؟
- المؤخر كمان قليل اوى.. على الأقل خالص نساويها بأختها
- طبعي.. أيه كمان؟
- المهر بقى.. احنا عملنا حسبه سريعة كده.. الورقة دى فيها الخطوط العريضة لمحتويات الشقة.. حسبنا الرقم كله على أساسها.. شوف كده لو في اى مشكله وللا حاجه.

خدت الورقة من ايد الراجل اقرا الى فيها.. دقيقتين بالظبط وحسيت ان في حاجه غلط.

- معلش يا عمى اعذرني.. مش كتير شوية 60 الف علشان اوضة النوم؟

- والله يا ابني دى نفس اوضة النوم الى جابتها بنت خالها.. هي كانت بالظبط ب 64 الف.. احنا خدنا الرقم الصحيح.
- طيب والسفرة؟؟ 80 الف.. ليه.. هنعزم وزراء الخارجية العرب؟؟
- ماحنا جينا لأختها كده.. حتى المحل هو هو
- 60 و80.. 100 فل وأربعين.. لسه طبعنا الانتريه والمطبخ والستائر ومش عارف ايه الحاجات الغريبة بتاعة الستات دى.
- ماهو الجواز كده يا ابني.. امال انت فاكر ايه.. الفلوس بتروح وتيجي.. المهم الاختيار الصحيح.
- والله يا حاج الفلوس بتروح وتيجي والستات برضه بتروح وتيجي.. حضرتك مش شايف ان الأرقام دى مبالغ فيها شويه؟؟
- ماحنا عملنا زى ما انت قلت بالظبط.. شفنا الى حوالينا وعملنا زيه
- لا طبعاً.. حضرتك معملتش الى انا طلبته خالص.. حضرتك فليت الى حواليك وأخذت اعلی تفصيله من كل حاله وحطيتهم في ورقه.. خدت اعلی شبكة من هنا على اعلی اوضة نوم من هناك على اعلی اوضة سفرة من هنا تاني.. من كل فيلم خدت اعلی اغنيه عملت بيهم شريط زمان كنا بنسميه كوكيتل.. النتيجة هو الرقم المرعب الى انا شايفه ده.. واللى مستعد اراهن بعمري ان مفيش ولا بنت عندكم قايمتها تساوى حتى نص المبلغ ده.
- طيب انت عاوز تدفع كام يعنى؟
- اه.. كده بقى فصال.. طبيعي جدا ان اى رقم هقوله لحضرتك هتقولي ميجيبوش حاجه.. زى الشبكة كده مثلا الى انا عرضت فيها رقم بعد ما سألت كويس وعرفت ان اعلی شبكة عندكم كانت اقل منه بالربع تقريبا.. ومع ذلك حضرتك قتلتي ميجيبوش حاجه.. الكلام ده مش كلام الرجاله.. يبدو كده والله اعلم ان في نفس حريمي دخل في الليلة دى.
- مش انت قلت اسألوا الناس.. ادينا سألنا
- طيب.. نقول الكلام بطريقة ثانية لعلی اسأت التوضيح سابقا.. سيبك من موضوع المتوسط ده لان واضح انه مش ماشي معاك.. حضرتك خد حالة جواز واحده بس من المحيطين بيك.. حاله واحده نمشي وراها من أولها لآخرها وزى ما عملوا نعمل.. اختها مثلا.. بنت عمها.. اخوها.. اى حد.. مش هنجيب اوضة نوم زى فلانة وشبكة زى علانه وفرح زى ترتانه.. لا.. نعمل زى ما عملت الحالة دى من الأول للآخر.. يمشی معاك الكلام ده؟
- طيب يا ابني.. نشوف كده.. انت موجود في مصر اد ايه؟؟
- يعنى.. مش هطول
- طيب ماشي.. هرد عليك بكره ان شاء الله.
- جميل.. سلام عليكم

وسيت عندهم في البيت كل أحلام الشبكة اللطيفة والزواج المريح المرن.. واستعدت لجولة ثانية سناني فيها مسنونة كويس اوى لأني عرفت اني بتعامل مع انسان طماع.. هل لو كانت الجوازة دى لأبنه.. كان عمل الكوكيتل ده.. اكيد لا..

الاحداث بعد كده متوقعه.. الرقم الى ابوها طلبه اتزحج شويه.. كده بقي فصال بحق وحقيقي.. اصرارهم على المقارنات كان قافلني جدا.. كل خطوه الاقي اشمعنى فلانه.. ده غلط تماما.. من المبادئ الأساسية للإنسان لما ييجي يطلب.. لازم يتفادى المقارنات.. اوعى تقول لمديرك اشمعنى فلان بياخد كذا.. ده معناه انك انسان طماع بتبص حواليك مهما تاخذ هتفضل تطلب برضه.. انت اطلب الى انت شايفه مناسب ليك بناء على أسباب منطقية من غير مقارنات.. من غير ما تقول علشان ابقى احسن من فلان او اعلی من علان.. كده كده هتلاقى الأعلی منك دايماً..

ادركت ان الموضوع فاكس فأصبحت اتعامل معاهم بلا اهتمام.. كل شوية حوارات من ابوها او أمها يعرضوا شوية فصال زيادة.. مساكين.. مقدروش يفهموني.. انا رافض مبدأ المقارنة جملة وتفصيلاً لأني باصص لبعدين.. النهارده الكلام عن شبكة ومهر.. بكره الكلام عن اى تفصيله موجودة عند قريبه او جاره.. النوع ده من الستات مرهق جدا.. دايماً مشغول باللي في ايد غيره مهما كان اللي في ايده كثير.

كنت وصلت الى مرحلة من السلام النفسي خلتني دايماً بري كلام الناس في الزبالة.. اد ايه كنت محتاج تجربة الانفصال بكل قسوتها علشان اشوف حقيقة البيع الى بنسميه كلام الناس ده.. شفته من قريب اوى وأدركت انه هواء.. مجرد وهم انا الى كنت عامله لنفسى.. الناس فعلاً بتحترم الى يديها بالجزمة.. حقيقي الشروحة ست جيرانها.

سحبت نفس عميق من سيجارتي الاخيرة في غرفة التدخين وانا منتظر الطائرة.. صوت المعلن الداخلي عمال يجعرون.. طائرة الدوحة.. اخر نداء لطيارة الدوحة.. اذ فجأة یرن تليفوني بمكالمة أتوقع انها هتكون طويلة.. لا ده وقتها ولا ليا مزاج فيها خالص.. كان المتصل اختها.. بتكلمني من منطلق انها صاحبة تجربة وعماله تديني في نصايح متناسية فارق العمر والخبرة والشخصية الى بيني وبينها.. سمعت كلامها للاخر وبعدين قاطعتها لما بدأت تكرر الكلام..

- شوفي يا ست الستات علشان بس اخر نداء لطيارة الدوحة.. هو ده الى عندي.. زى ما بيقولوا الإنكليز.. Take it or leave it

حماتي ملاك

الحماة حُما وأُم الزوج عقربة سامة "مثل شعبي حقير"

كلمة ماما "بعد الجواز" .. حدودها ايه للطرفين؟

طول عمري متحفز بلا سبب واضح ضد الحموات.. شايلى على اكتافى ميراث سىء من تراث مقزز عن علاقة الام بزوجة ابنها او جوز بنتها بسبب القصص الى سمعتها وقصتين عشتهم.. الأم قد تكون بالفعل ملاك ينقذ بيت من الانهيار.. او تكون شيطان رجيم يتسبب في هدم بيت قائم بالفعل.. الأم تحديدا مش الأب.. الأم هي المتهم الأول المسئول عن وجود كم مهول من طاقة سلبية بتتزرع في نفس الزوج او الزوجة بسبب تصرفات هي شايفها صح..

فجأة البيت ولع من غير مقدمات.. قتلها حضري العشاء.. راحت قايلالي أمك واللى جابوها.. رحت مطلقها..

والله ما عملت حاجه يا ساعات البيه.. شتمني وضربني بوشه على ايدى من غير سبب يا ساعات البيه..

هي دى اول مره تقولها حضرينا العشاء؟ امال كرشك ده جه منين؟

انتى مقتنعة انه ضربك من غير سبب؟ اشمعنى اليوم ده بالذات مش كل يوم مثلا؟

في سبب جذري حقيقي للحرائق دى.. في بينكو خراج مستخبي تجت الجلد منتظر ينفجر بمجرد لمس واحد بسيطه علشان يفرغ ما في جوفه من صديد وقيح وبلأه ازرق.. للأسف في أحوال كتير اوى بيكون الخراج ده هو الأم.

الأم.. ست الحبايب يا حبيبة..

علمتني الحياة ان الام سلاح ذو حدين.. يا نستخدمه صح ونعيش عيشه فل.. يا اما نغز بيه بعض ونقضى على كل امل في حياة مستقرة.. نفس السلاح في ايد الظابط النظامي يحمى وفي ايد المجرم يهدد..

يعنى ايه؟

اختي الكبيرة اتجوزت.. بذلنا مجهود جبار مع أمي علشان نقنعها ان اختي بقي ليها بيت مستقل وراجل ممكن جدا ميقلبش منها اى نصيحة حتى لو كانت هي شايفها في الصالح.. مجهود يفوق ما بذله روميل علشان ينسحب بقواته سليمه من فخ العلمين.. يوميا لازم تسمم جتتنا واحنا بناكل..

- جراك ايه يا ولا انت وابوك.. دى بنتي!!
- يا ستنا عارفين.. ال DNA الى عملناه يوم ما خلفتيها اثبت ان انتى أمها.. بس خلاص.. هي بقت على ذمة راجل.
- راجل يعني ايه.. يعنى اشوفها بتضر نفسها واسكت؟؟
- وانتي مالك.. مش هما متفقين؟؟ مال ديك ابونا احنا؟؟ ما صدقنا اوضة فضيت في البيت
- دى بنتي يا ناس.. بنتي
- طالما مطلبتش الطلاق.. يبقى ملكيش الا تفتكرها بدعوه حلوة.. وتشوفيلنا حل في الملح الى دايميا يألش منك في الاكل ده.
- بكره تخلف وتعرف قلب الأم
- حاضر.. اوعدك اول ما أبقي ام هبقي اقدر موقفك علطول.

وبعدها اتهامات متنوعة اني بنس الأخ وعرة الرجالة مع التأكيد على ان كل الناس خيبتها السبب والأحد الا هي بس الى خيبتها مورديتش علي حد.. مش عارف ليه السبب والأحد مخصوص.. علشان إجازة في أوروبا مثلا؟؟

كنت بحط نفسي دايميا مكان الزوج.. هل اقبل ان حماتي تقول او تفرض وجهة نظرها عليا؟؟

اكيد لأ.. اقل ما فيها حقولها خديها في ايدك وانتي نازله.. طالما مش شايفاني أقدر أقول واقدر في بيتي.. يبقى بلاها.. خليها عندك ونشوف غيرها تكون مقتنعة بيا وبشخصيتي.. اقبل النصيحة او لأ.. هذا يخصني.. انما انك تقولي "لازم" في بيتي.. في الصالة كمان مش في اوضة المسافرين.. سورى يا طنط.. النظام ده بيهنج معايا.

المرة دى مكانش في ترشيح من اى حد.. كسرت الثلاثين وقصرت رقبة كل الناس الى اتوسطولي في المشوار ده.. اتجوزت وطلقت.. ادعي انى أصبحت على وعى كامل وخبره بدهاليز الجواز ومشاكله وبلاويه.. كنت حذر جدا.. كفايه لبسنا في الحيط مره.

وقتها كنت بشتغل في قطر.. عندي هناك شلة أصحاب لطيفة.. في خروجه من خروجات نهاية الأسبوع شفتها مع أهلها.. تشارك معايا في هواية شواء اللحوم والفراخ.. بتحب القراءة عموما بغض النظر انها بتقرأ القاذورات بتاعة دار الكتاب العربي.. جامعيه بتقدير قليل.. يبدو ان الشغل والكلام ده مش في دماغها.. التعارف كان سهل وبسيط.. الأهل شافوها فرصه للبنت الى عايشه معزولة في الخليج فكانوا بيباركوا محاولاتي لفتح مواضيع مع البنت.. واضح أساسا ان الخروجه دى كلها كانت مترتبة علشان الشاب العزبنجى يشوف البنت العزبنجية.. حبوا بعض يا ولاد الكلب وياللا اتجوزوا.. شهر كامل والبنت وأهلها عضو أساسي في فسحة الويك اند.. طالعين الصحراء.. رايحين مول.. مطعم.. اكوا بارك.. اى حاجه لازم الاقيهم في وشي.

طبيعي ان الأمور تتطور.. وطبيعي ان يحصل كلام بيني وبين البنت في التليفون.. شعور الإنسان المطلق تجاه تجربه جديده لا يختلف بين رجل وأمرأة.. "الإنسان" المطلق هو انسان عقلائي جدا في قراراته العاطفية ومعدوش أي استعداد انه يلبس في الحيط مره ثانية.. المجتمع بيعامل المنفصلين انهم ذوي عيوب او ذوى عاهات علشان ينكل بجراحهم زيادة ويحط فوقها مزيد من ملح الرغى والهري والكلام الفاضي.. وكأن الواحد خرج من تجربه سيئة وقفل صفحتها علشان كل واحد يقابله يفكره وهو ببسالة برخامة شديدة..

- الا انتو اطلقتوا ليه يا اخي؟
- وانت مال امك؟؟

ومع الرد العنيف ده.. برضه مكنتش بسلم من سخافات الناس.

في كلامي مع أهلها كنت واضح جدا وعنيف شوية صغيرين.. الى فات خلاص انتهى.. دفنته في قبر وردمت عليه طن اسمنت.. الماضي بتاعى يخصني انا لوحدي.. مش هجاوب على أي سؤال وهتعامل انى لسه "ولد ولود" لم يسبق له الزواج اطلاقا.. لو كلاي مش عاجب.. يبقى نوفر تمن صينية الكنافة النابلسية.. شيء رائع ان قطر مفياش لاربوار.

البنت تقبلت الموضوع.. الى يهمها هو الى هي شايفاه دلوقتي.. حبيت ارغي هتسمعي.. محبيتش يبقى نتكلم في النيش افيد.

عجيني موقفها.. البنت فهمتني وكان في اريحه في التعامل.. بعض الأوقات يكون ديكتاتور لا يقبل النقاش.. بعضها يكون حنفي.. بعض الأوقات ممكن أسأل صرفتي 10 ريال بحالهم في ايه يا اخت ابليس.. أوقات ثانية مش بركز مع رسالة الموبايل الى بتقول اتخصم من رصيد حسابكم 1000 ريال في محلات الطرحة الذهبية.. انسان طبيعي يتأثر بحالته المزاجية.. الى رفضته النهارده ممكن أوافق عليه بكرة والعكس.. ممكن ارفض حاجه بسيطة من حقك واوافق على حاجه كبيرة مش من حقك لا لشيء الا ان طريقة الطلب ممكن تكون مش مناسبة.. شوية ذكاء في التعامل ممكن يخلو كل ست في منتهى الراحة.. بس نقول ايه في الغباء.

طيب.. العقدة فين بقي؟

العقدة كانت في علاقتها بأمها..

اكيد انا مش بالغباء الى يخليني احط نفسي في مقارنة مع أمها ابداء.. انا عارف حدودي والتمتع والممكن ايه وبتصرف على هذا الأساس.

بس كنت حاسس اننا زحمه في الموضوع ده.. لما بتكلمي كنت بسمع صدى صوت حد تاني.. لما بكلمها في اى موضوع كلاي بيكون عند أمها بعد 3 فيمتو ثانية من نهاية المكالمه.. لو خرجنا بتبقى أمها عنصر أساسي في الخروج.. اى شيء بعمله لازم أمها تكون شريك فيه بشكل مزعج جدا.. وطبعاً من أمها الى نساء اخريات.

ابدیت ملاحظات في الأول وكان الرد الى مكنتش ابدًا عاوز اسمعه:

- دى ماما.. عارف يعنى ايه ماما؟
- ايوه عارف.. انا كمان عندي ماما على فكرة
- انا عمري ما خبيت عنها حاجه
- ده شيء صحي جدا لكل البنات.. وانا مطلبتش منك إنك تخبي.. بس الوضع دلوقتي هيتغير.. لو قدرتي ابقى احكى الى يخلصك انتي بس.. لأن في طرف تاني مش بيحب حد يعرف عنه حاجه
- ايوه بس دى ماما
- هي ماما انتي مش ماما انا.. ممكن نزعل مع بعض وانتي هتحكيها لانها ماما.. ماما هتزعل علشان خاطرك.. بعد كده هنتصالح انا وانتي وهي هتفضل زعلانه.. انا مش هصالحها ابدًا لأنني مغلطتش فيها ولا زعلتها.. يبقى كده العلاقة بيني وبينها باظت بدون سبب فعلي.. يبقى الأفضل من الأول كل واحد يحتفظ بخصوصيات حياته لنفسه.. زى ما انا معرفش حاجه عن علاقتها بجوزها.. هي كمان مش من حقها تعرف حاجه عن علاقتي بمراتي.. منطقي كده؟؟
- ايوه بس دى ماما.. عارف يعنى ايه ماما؟
- طيب.. اقولها لك بطريقه أسهل وأوضح.. كل كلمه بيني وبينك أمك متعرفش عنها اى شيء ولا اى تفاصيل من اى نوع.. اى اتفاقات للجواز انا أساسا مش هتكلم فيها معاكمي.. هتكلم مع الكبار مباشرة لأنني مش هاخذك من الشارع.. يبقى كده مفيش اى مرر ولا سبب ان الست والدتك تعرف عنى اى شيء.. واضح؟
- أوامر يعنى؟؟
- مش فكرة أوامر.. مامتك على عيني وراسي.. كل الاحترام لها ولشخصها.. لكن انا مش موافق على آرائها ولا اتفق مع وجهة نظرها في حاجات كتير.. هي حره تعمل ما بدالها في بيتها هي مش بيتي انا.. عندها جوز تجرب فيه براحتها.. ارائك انتي الشخصية على عيني وراسي.. اقبلها او ارفضها ده شيء يخضع للمنطق بيني وبينك بشرط انها تكون ارائك انتي مش آرائها هي.. من حكم في ماله ما ظلم.. صح وللا لا؟
- وهي ماما مضايقاك في ايه بس؟؟
- مش لازم تكون مضايقاني.. مش لازم علشان مختلف معاها انى أكون متضايق منها.. هضايق منها لو فرضت كلامها عليا.. طول ما هي فحالتها وانا فحالي.. هتبقى فوق راسي..
- انا مقدرش أعيش من غير ماما على فكره.
- كل واحد وواحد لازم يفارقوا أهلهم يوما ما.. امال هتعيشي ازاي مع راجل في بيت مستقل بعيد عن اهلك؟
- مش عارفه.. انا حاسه اني هجيبها تعيش معايا
- وإذا رفضت؟؟
- وترفض ليه.. دى ماما
- طيب انا كمان اجيب امي تعيش معنا؟
- مش عارفه.. ممكن يحصل بينا مشاكل
- بالظبط كده.. هو ده الى انا بقوله.. ليه قبلتبه لأمك ورفضتبه لأمي؟ أمك احسن من امي مثلا؟
- ايوه.. بس دى ماما
- طالما الكلام بيتكرر يبقى المنطق أفلس.. نقول الكلام بطريقه مباشرة أحسن.. الست والدتك مش هيبقى ليها اى علاقة بينا بعد اللحظة دى.. سواء دلوقتي او بعد الجواز.. واضح؟
- أوامر يعنى
- اه.. اوامر
- بس انا محدش يديني اوامر
- وانا مراتي متكسر ليش اوامر
- *****

نهاية سخيفة جدا للحوار بس للأسف مكانش في غيرها.. طبعًا حصل الى كنت متوقعه.. الى اتربت طول عمرها انها تتنفس بعلم أمها.. صعب اوى تبدأ تتعامل مع حد تاني بمعزل عن أمها.. حسيت اني هتجوز 2 مش واحده.. والنقطة دى بالذات اثارت عندي ذكريات حماتي السابقة الى كنت مستمتع جدا بطلاق بنتها علشان مش هشوف خلقتها تاني.

جريت معاها مره واتنين وعشرة.. كل مره يبدو ان الكلام أساسا مش واصل للبنت.. تسمع من هنا وتفوت من هنا.. أمها في نظرها هي جوزها مش انا.. ربنا يباركهم في بعض.. ولكن هذا النموذج لا يتفق معايا خالص.. خصوصا اني موجود بصورة مؤقتة في قطر ومحتمل جدا انزل مصر او ارجع السعودية تاني.. وقتها اعتقد انها هتطلب الطلاق لانها مش هتقدر تعيش بعيد عن أمها.. يبقى نوفر طلاق تاني ووجع قلب.

طيب الأب فين من كل ده؟؟

الاب متفق معايا تماما.. لكن صوته ضايع تماما في وسط العلاقة الغريبة دي.. كمان لما أمها عرفت موقفى.. تلقائيا اخدت مني جيب بدون ما أكون عملت حاجه فعليا.. كده قشقة جدا.. باظت علاقتي بست المفروض تكون حمايتي من قبل ما تبدأ أصلا.. حماقة كبيرة اني اكمل.

انهيت الموضوع بهدوء.. انا والبنت اتضايقنا بالفعل.. الظروف كانت مناسبة جدا لينا احنا الاتنين.. مش هنزل مصر وهنفرش البيت هناك في ساعتين زمن.. لا دمياط ولا سعد محمد سعد ولا درب البرابرة ولا وكالة البلح ولا اى كلام فارغ من ده.. تأشيرة زيارة لأسرتي ونعمل فرح عائلي هناك.. حتى كانت فرصة اننا نهرب من فضول الناس في مصر.. على فكره.. الناس الفضولية في مصر مش بتبقى كده في الخارج.. نفس الناس دي بره بتبقى فحالها.. يبدو ان مية النيل فيها طحلب بيزود فيرس "الحشرنه" في شئون الخلق عند الناس.

الأم طبعاً حسيت ببنتها.. هما روح واحده في جسدين.. كلمتني تاني وحاولت ترجع المياه لمجاريها مع تعهد تام انها هتعزل نفسها عننا خالص.. لو كنت أصغر شويه او مكنتش مريت بتجربة الطلاق.. كنت فرحت جدا وكملت الموضوع.. لكن خبره كئيبة اكتسبتها مع تقدم العمر علمتني ان محدش بيتغير ابدًا.. الى انت شايفه ده هو الى الوجه الحسن.. الأسوأ جاى بعدين.

هل شخصية الأم لها علاقة برفضى للموضوع؟

اه.. ولأ..

قد أكون رافض المبدأ نفسه حتى لو اتفقت مع شخصية الأم.. لكن بعد الجواز بيبقى في بعض التنازلات نظرا لظروف الحياة او تغير الموقف كله.. التنازل بيبكون مقبول لو مفيهوش مشاكل او ميكونش بيقلل من حد.. بعد الجواز كان ممكن اقبل تدخلها في حياتنا لو شخصياتنا متفقه.. لكن في الواقع احنا شخصيتين مختلفتين تمام الاختلاف.. مقدرتش اتقبل ابدًا شخص شايف صحابي الى ماتوا في الميدان صيع وقابضين فلوس.. حتى لو كان بيأكلني.

طيب التوقيت مهم؟؟

طبعاً والى الف طبعاً..

يؤكد وجهة نظري دي.. جده حمزه ابني.

انا الى بحكيلها على كل حاجه.. انا الى بكلمها يوم ويوم.. انا الى بشركها في حياتي لدرجة ان مراتي هتتجنن لأنها حاسة اني متجوز أمها مش متجوزها هي.. انا متعايش معاها لدرجة اني بتحايل عليها تبجي تعيش معانا وترحميني من المحشى المزيف بتاع بنتها.. لك انت تتخيل اني قبل ما افاتح مراتي في موضوع يكون كلمت أمها الأول.. ولك ان تتخيل ان مجرد رأى عابر لحمايتي قد لا يعنى لها اى شيء يمشى على الكل واولهم انا.. لك ان تتخيل اني كل ما اشوفها لازم ابوس ايديها.. ولا عمرى ابدًا اناديها الا باسم الدلع..

طيب اشمعنى بقي؟ ما هي دي ست والتانية ست؟

بحبها يا اخي..

شفت منها مواقف جدعنه.. اسرتني بالمعروف.. رفعت الشيشب على بنتها لما حسيت ان بنتها مزعلاني.. تعاملت معايا على اني ابنها فعلاً ودايماً تنتقد مراتي لو لقتها جايه حاجه جديدة ان شالله طرحة..

تعاملت معايا على اني ابنها الى مخلفتوش.. فاستحقت عندي مكانة امي التي لم تلدني.

بعد 10 سنين جواز اعلن دايمًا وفي كل مناسبة ان من اهم أسباب استمرارى في الجواز دى هو عدم تصويرى لاستمرار حياتى وحمايتى مش فيها.. أوقات كثير ببقى عايز امثل مع ام حمزه دور هانى سلامة في فيلم خيانة مشروعة لما كان بيسحب السكينة علشان يعمل الصح مع سمية الخشاب.. ولا يمنعني الا انى أتصور بس ان حمايتى ممكن تزعل مني.

بقول آخر..

لما تدخل بيت.. متركزش كثير على جمال العروسة.. بعد الجواز ب 3 ساعات هتتعود وهتشوف ملكة الجمال دى عاديه جدا.. ركز اكتر مع أمها.. بص في وشها كويس.. أتكلم معاها كثير.. افهمها واعرفها.. لو قدرت إنك تبوس ايديها زى ما بتبوس ايد أمك.. لو حسيت انك هتعاملها زى ما بتعامل أمك.. لو حسيت ان الست دى فيوم لو زعقتلك انت هتخط وشك في الأرض وتسكت زى ما بتعمل قصاد أمك بالظبط..

يبقى اتجوز بنتها دون تردد.. 99% من خوابير الغم مش هتظهر في بيتك..

حبيباتنا المعترضات على كل شيء..

عارفين والله ان امك ست طيبة زى البلسم.. مش معنى ان ابوكى بيقضى 22 ساعة بره البيت لحد ما شعره شاب انها قارفاه.. متأكدين والله ان مرات اخوكى هي الى وحشه وبصوم وعرقوب.. عارفين كمان ان القطيعة الى امك فيها مع الجيران دى سببها المية المسحورة الى الجيران كبوها قصاد باب شقتكم.. عارفين كمان ان اخواتها وحشين وكلوا ورثها في كشك السجاير بتاع جدك.. هي ست زى الملاك..

بس خدى بالك.. هي أمك مش امه هو.. خليه هو يحبها متفرضيهاش عليه.. الجواز اتنين بس.. اكتر من كده بيبقي زحمه.. والرجالة دايمًا بتهجر الزحمة وتروح عند مدام عيبر الى في الرابع.

بيت النتاش

النتاش في العامية المصرية هو الكذاب.. قديما قالوا اذا اردت ان تكون كذوبا.. فكن ذكورا

بشكل شخصي عندي مشكلة كبيرة مع الكذب والكذابين.. لا اتقبل الكذب تحت أى مسمى ولا في أى ظرف ولا في أى مكان ولا من أى شخص.. مهما كان في حد قريب منى اول كذبة هي اخر كذبة.. تنقطع العلاقات بيني وبين الكاذب بلا أى امل في العودة ولا الرجعة.. مجرد ما شخص ما كذب عليا "عامد" كذبة واحدة.. خلاص.. هي دى النهاية.

عندي سند شرعي وديني وأخلاقي.. اتربيت على كده.. وصية ابويا كانت اعمل أى مصيبة وتعالى قول انا عملت.. اعترافك لوحده يلغى نص العقوبة.. انما لو كذبت.. حتى لو كذبة صغيرة.. ده معناه ان العقوبة تتضاعف تلقائياً.. عقوبة للخطأ نفسه ودى في الغالب بتبقى سهلة وعقوبة أخرى كارثية للكذب.. في قصه قريتها من فتره – الله اعلم بمدى مصداقيتها – عن شخص أراد التوبة وكان بيعمل كل شيء غلط في الدنيا ومن ضمنه الكذب.. راح للرسول عليه الصلاة والسلام وسأل.. يبدأ التوبة بأية.. الرسول اوصاه بأن يذهب ويبدأ بالا يكذب.. يعنى البداية لم تكن بإقامة الصلاة ولا الصيام.. لا.. البداية إنك تطهر لسانك وحياتك وقلبك من قول الكذب.

مش محتاج اخوض في مساوئ الكذب.. كلنا عارفينها.. انا بس حبيت اعرض رد فعلى انا على الكذب عامل ازاى.

عينيا بتلف في كل اركان البيت- في حدود بصري- المنظر اللي انا شايفه دلوقتي لا يطابق المعلومات اللي اتحكتلى قبل الزيارة.. في العادة معنديش شروط تعجيزيه في شريكة المستقبل.. اللي بطلبه تقدر اى وحده تعمله.. لا طلبت تكون بنت وزير ولا بنت مليونير ولا ذات جمال فتاك.. في المواضيع دى هي زيتها زيي.. لبست ثوب العيش لم تستشر.. يبقى ليه أصنف الناس بناء على مالم يكن لهم يد فيه؟؟

طلباتي تتمحور حولين الانسان نفسه.. مستوى دراسي معين.. سلوك.. مظهر محتشم.. حاجات كلها تقيس مستوى تفكير وشخصية وتربية البنت نفسها.. كنت بحاول أحكم على العقل عن طريق الظاهر من التصرفات.. من المنطلق ده بنت الوزير بالنسبالي زي بنت البواب.. المهم جوا دماغها في ايه.. الجميلة بالنسبالي زى الغير جميلة.. لا دى اختارت عينها الملونة ولا دى اختارت شعرها الاكتر.. انما كنت اقدر الأولى على الدفعة مثلا.. اقدر البنت المحتشمة او القنوعة.. اقدر اوى الأسرة المتوسطة الى مورثوش حاجه وعاشوا مستورين.. اقدر اوى الأسرة الى بتقرأ.. مكانش كلام شعارات.. رفضت الارتباط قبل كده ببنت مليونير وخلعت من بيت رئيس محكمة.. رفضت نسب لواء جيش قوي جدا.. وكان رفضي ده هو كلمة النهاية لمشروع العمر.. لما كنت اترشح لحد واسمع ان رأى فلانة او ناس معينه فيا ان "شكله حلو" او "ابن ناس".. كنت أقول دول ناس نافهين ومكنتش بكمل.. هي المبادئ كده.. لازم تصرفاتك تؤيد ما تعلنه من قواعد والا تبقي منافق.

البيت الى انا شايفه يقول ان اهله ناس عاديين جدا.. ويمكن اقل من المستوى المتوسط كمان.. بيت لا يوحى بأى شيء مميز من اى نوع.. مفيش اى شيء يقرأ في البيت.. اذن هو بيت غير مثقف.. مفيش اى شيء غالى الثمن.. اذن هو مستوى مادي متوسط.. مفيش اى شيء جميل بزياده.. اذن مفيش حد في البيت ده له ميول فنيه.. مفيش حتى دوشه زياده.. اذن مفيش أطفال.. وهكذا.. كل شيء مفيش منه اى شيء مميز او غير عادى..

امال ايه بقى الكلام الى وصلني ده؟؟

كذب طبعاً كالعادة.. سبب كافي ابنى اقفش.. بس القرار لسه مش دلوقتي.

أم البنت كانت شخصيه كرتونية جبارة..

في شخصيات كاريكاتير الاخبار كان في شخصية اسمها الكُحيت "أحمد راتب".. شخص فقير جدا.. لدرجة ان صوابه طالعه من شرايه المخروم.. ومع ذلك كان مصاحب عزيز بك الاليت "حسن كامي".. الرجل الأرستقراطي فاحش الثراء.. كنت بفضس من

الضحك وانا بقرأ تعليقات الكحيت وهو بيعبر لعزيز بك عن قلقه على مستقبل امير موناكو "رينيه" بعد ما يطلق مراته.. وهو فأنلته كل خرم فيها اد كده.

أهو الست دى كانت كحيت بالظبط..

حنفية من الفشر والكذب انفتحت في وشى..

بين كل كلمة وكلمة.. كلمتين كذب.. بين كل كذبة وكذبة.. 3 كذبات.. تستريح شويه من سرد قصة اونطا علشان تفشر فشرتين سريعتين.. تبلع ريقها مع كذبة بيضاء قبل ما تشرب شويه شاي علشان مخها يألف كذبة رابعة.. تقدملي قطع الجاتوه "الى انا جايه وانا جاي" وهى بتقول ان التورتاية دى عمال بنتها.. انا طبعاً بأيدها في الكلام وانا باكل قطعة الشوكولاتة اللي عليها اسم "لابوار" وانا بقولها..

- اممم.. جميلة اوى.. يظهر انها فنانة في الحلويات
- حلويات بس!! دى ولا ابلة نظيرة في المطبخ
- الله.. يا سعدك يابو حسني.

كل موضوع يتفتح.. لازم الست دى تكون النجم بتاعه.. كل موقف يتحكي.. لازم تكون هي البطلة.. شوفينيه عجيبه مصحوبة بكم مرعب من الكذب.. لو كل كذبة الانسان بيكذبها بياخد عليها سيئة فعلاً.. يبقى الست دى بسبب القعدة دى بس مكانها محجوز في جهنم.. اول صف.

مع مرور الوقت.. حسيت ان الموضوع قلب كوميدى.. معقول اتقدم لهم كل هذا الكم من وكلاء النيابة والضباط والأطباء والمهندسين من طنطا واسكندرية والمنصورة والقاهرة؟

هل معقول ان الست الى انا شايفها دى.. رفضت رائد طيار في الجيش "كان دفعتي في الثانوية الحربية" وطنطا كلها بتحلف بأدبه واخلاقه ومستوى اسرته المرتفع جداً.. ال ايه علشان ربة الصون والعفاف قالت لا كده من غير سبب!!!

الست يا عيني مش عارفه بتقول ايه.. كل السلوك دخلت في بعض.. الأكاذيب مش متسقة مع بعضها خالص.. الشرق دخل في الغرب والجنوب بقى يمين.. غالباً كده مخ الولية دى هتج.

حكيتلى عن رحلتها للعمرة.. وازاي العبارة كانت هتغرق بيهم قبل ما ترسي في ميناء الدمام "غرب المملكة على الخليج العربي" وبعدها خدت طائرة على مكه.. العبارات الخارجة من مصر بترسي على ميناء ضبا على البحر الأحمر.. بين مكه والدمام 1200 كيلو تقريباً.. بقى معقول انك ركبتي العبارة.. الى هي ارحض واحط وأسوأ وسائل النقل بين مصر والسعودية.. وركبتي طائرة من الدمام الى مكه؟

ده غير ان أساساً مفيش عبارات من نوبيع للدمام.. ومفيش مطار أصلاً في مكه.. المطار في جده..

ايه الهيد ده!!!

حيث ان الموضوع بايظ بايظ.. بدأت انكش أمها على خفيف كده حفاظاً على ضغط دى..

- انا سافرت كتير صحيح.. بس اكرر مكان حبيته هو اسكندرية
- الله على جمال إسكندرية في الصيف يا بشمهندس.. الحاج ربنا يديله الصحة عمره ما حرمانا من حاجه.. في يوم كده ودانا نتعشى عند واحد اسمه محمد احمد.. مش قادره اوصفلك اد ايه كانت الكفتة جميلة واللحمة مستويه اوى..
- الراحل ده فعلاً لحمته بلدى.
- محمد احمد مين؟
- متعرفش محمد احمد؟ معقول؟ انت مش بتتشاقى بقى وللا ايه.. هي هي هي هي هي
- محمد احمد بتاع محطة الرمل؟
- ايووووه.. هو ده..
- كلتوا كباب وكفته.. عند محمد أحمد!!!!

- هـ.. هو غالى شويتين.. بس يستاهل الحقيقة.
- محمد أحمد بتاع محطة الرمل.. كبابجي.. وغالي!!!
- هـ.. لازم تودى ماما هناك.. هتدعيلي

أى طبعا لقطت الطعم وقررت تزيط في الزحمة..

- ولا عمره ودانى يا اختى في اى مكان.. نشيل على قلوبنا ونري.. وفي الاخر خيرهم لغيرنا.. على رأى المثل.. ربي يا خايبه للغايه
- يا ماما وحدى الله.. انا لسه موديكي اسكندرية من أسبوع.. انتى نسيى فطيرة السجق الى جبتالك من عزه بتاع بحري!!!
- عزه ايه ونيله ايه.. ياما قتللك نفسي اكل كباب عند محمد احمد وانت بتطنش.. أقول ايه بس غير حسبي الله فيك.. خيبة الناس يا ربي السبت والأحد وانا خيبتي في ابني ما وردت على حد.

وتزيط اختى الصغيرة في الزحمة هي كمان معلنه تمسكها بعزومة كباب عند محمد احمد لانها ملحقش فطير عزه الى بالسجق.

يستمر الحوار علشان الام تصر ان البنت خريجة كلية الهندسة من جامعة طنطا دفعة 2007.. نفس دفعة اختى الصغيرة الى قاعده جمبي ماسكه طبق الجاتوه وهات يا حشر من باب خسارة في ديك ابوهم الفشارين دول.. الست مصره ان البنت كانت الأولى على الدفعة بس علشان دى بلد كوسه.. متعينتش معيده.. هي تحلف وتصر.. واخى تضرب كف على كف.. من زميلة دفعتها الى هي متعرفهاش دى.

وهكذا.. من كذبة الى أخرى.. ومن فشرة الى الثانية.. انا بسمع واتعجب من قدرة الله في خلقه.. الست دى مريضه نفسياً لا محاله.. ربنا يشفيها ويزيح عنها.

كنت فاكرا ان البنت بتأمن على كلام أمها من باب بر الوالدين.. لكن مع الحوار اكتشفت ان البنت فاقت أمها بمراحل.. كذب أمها على سخافته وسطحيته مسلي ومش مؤذي.. انما البنت دى بتقول كوارث.

- حضرتك ارتبطتي قبل كده.. خطوبه او ما شابه؟؟
- كان اتقدملى كذا حد.. بس انا مكنتش بوافق
- انتى عندك شروط معينه؟؟
- الشروط العادية يعنى.. بس هنعمل ايه بقى.. ده انا اتقدملى عاهات.. الرجاله ماتت في الثورة باين.
- يا ستار يارب.. ليه كده بس؟؟
- اخر واحد اتقدملى لما سألنا عليه اكتشفنا ان راي مراته وعياله وجاى يتجوز.. والله انا يستغرب جدا من الناس دى.. مفيش ربنا خالص عندهم.. اعوذ بالله.
- لا مش فاهم.. يعنى ايه راي مراته وعياله.. جاى يتجوزك عليها مثلا وللا ايه؟؟
- هـ.. تخيل
- اعوذ بالله.. ربنا يرحمنا

المفروض انى بكبر دماغى دايم من فشر الستات.. لو سألت اى بنت عن الجواز هتقولك نفس الأسطوانة الحمضانة بتاعة طواير العرسان.. الجماعة دول عندهم عشرات المليارات من الأسباب تغطي كل شيء واى شيء.. كل شيء الا انه مفيش نصيب او أهلها طلباتهم كثير او العريس رفض.. وكأن مش من حق العريس ابدأ انه يقول لا.. معرفش ليه يومها بالذات حبيت اعرف معلومات زياده عن الى سايب مراته وعياله ده.. ساعات ببقى سخيف مع الستات واسأل كام سؤال كده يعرفوا منه انى قافش كذبهم فيتلموا..

- مين الشخصية الزبالة دى!!!
- بيشتغل مهندس بره مصر.. قالولى ابن ناس ومعرفش ايه.. كان فاكرا انه هيزغلل عينيا بقى بالسفر وكده.. بس على مين.
- محدش يعرف الظروف.. الله اعلم بشأن كل واحد.. هو نفسه لما جالك.. كان في قبول بينك وبينه وللا لأ؟؟

- في الأول اه.. كلامه مريح.. بس بابا حذرني ان الناس الى زى كده بيبقى سلاحهم كله هو الكلام.. علشان كده سألنا عليه واكتشفنا الحقيقة بقي
- طيب ما جاي ز كلامه صحيح او الى وصله عنكم مش حقيقي
- انا اعرف مراته.. كانت معايا في الكلية.. لسه مقابلاها من كام يوم في النادي مع شلة ثانية.

وقالت اسم صاحبته في وسط الكلام.

وشعر راسي وقف..

- صاحبتك دى من طنطا؟؟
- اه.. ساكنه في شارع "..." البيت ".....".
- الدور الأول.. تالت شقة على يمين السلم.. صح؟
- ايه ده. هو حضرتك تعرفها؟
- سيبك مئى.. جوزها أتقدم لحضرتك علشان يتجوزك عليها بعد ما رماها هي وعياله.. صح كده؟؟
- اشكال زباله ربنا يعافينا.
- اشكال زباله فعلا..

في وسط الكلام وعلى فجأة.. قمت وفتت.. المفروض ان في إشارات بيني وبين امى علشان ابليها بانطباعي الأول.. المرة دى لا.. وفتت فجأة علشان امشئ.

موقفي المفاجئ كان صادم للبنت واهلها.. خصوصا انى عمال اضحك.. أمى متوقعه رد فعل قوي مئى لمعرفتها بكرهيتي للكذب.. بس متوقعتش ابدا انى اقف ازعق في بيت الناس.

أبو البنت سألني..

- خير يبنى ايه الى حصل؟؟
- حضرتك بتسألني أنا ايه الى حصل؟ حصل وطحينة يا عم أبو لمعة.. المفروض تكون اخدت بالك.. يا راجل احنا من ساعة ما قعدنا مقلتوش كلمة صدق واحدة توحد ربنا.. انا مكبر دماغي وبضحك طالما الأمور في حدود فشر النسوان المعتاد.. ست وبتحاول تعمل لبنتها سعر.. شيء مقرف اه بس بيحصل.. شفت من ده كتير.. بس زى حالكوا دى.. الحقيقة مشفتش.
- حاسب يا ابني على كلامك.. عيب انت في بيتنا.
- غلطان والله انى جيت بيتكوا.. هو ده بيت.. ده كذبه اتبنى حواليتها بيت.. بنت حضرتك قالت ان "فلانه" صاحبته.. فلانه الى ساكنه في الشارع الفلاني في البيت العلاني في الدور الترتاني تبقى صاحبته.. وان جوزها.. جوز صاحبته يعنى.. راميه هي وعيالها وجالكوا علشان يخطبها.. سمعتها حضرتك وللا كنت نايم؟؟
- حصل فعلا.. انا كنت قاعد معاهم وواجهناه بالكلام ده قبل ما نطرده من البيت.. رغم انه انسان مش محترم.. الا انه معملش زيك كده.
- آمنت بالله العظيم.. الى بنتك بتحكى عنها دى تبقى طليقتى انا.. مفيش في العنوان الى هي قالته بنات ثانية غيرها.. طلقته بعد 3 أسابيع جواز.. معرفش ازاي خلفت منها بعد 3 أسابيع جواز.. بس هي عموما شهادة في حقي اشكرك عليها.. طول عمري حاسس انى عنتيل.. 3 أسابيع يا كفار!!! طب كنتوا خلوهم 3 سنين كان بيبقى ممكن.. 3 أسابيع اتجوز واخلف وارمى العيال وامهم واروح ادور على عروسه ثانية.. يا دين امى.. ده انا لو بفطر واتغدى واتعشى فياجرا مكنتش هقدر اعمل كده..

..... (صمت تام من الاب)

- انا مستحمل الفشر بتاعكوا من الصبح وساكت.. يقول مساكين بيرسموا نفسهم لإحساس ما بالدونية.. الخواجة نايف عماد الى انت بتدي انك من نسله ده.. مكانش عنده عيال ولا كان مصري اساسا.. ده كان أرمي مسيحي.. انقطع نسله من الدنيا بوفاته سنة 65 والحكومة قلبت فلوسه وعملت شركة الصابون الى حضرتك بتشتغل فيها..

..... (صمت تام من الاب)

- وبعدين هي مش بنتك خريجة هندسة دفعة 2007؟ طب ازاي بقى بتقول على طليقتي دفتعها والتانية دى أساسا خريجة آداب دفعة 2004؟

- (صمت تام من الاب)

- قوم انا بقى جيت اخطبت بنتكوا بعد ما رميت مراتي وعيالي الى خلفتهم بعد 3 أسابيع جواز في الشارع وانتو فقستوني وطردتوني.. يا اخي "ايه سفن ايه".. الله اعلم طبعا انتوا قلتوا لمين الزبالة دى في رحلتكم الطويلة مع الفشر.. يعني الواحد يبقى عايش في حاله وماشي جمب الحيط وسمعته تتلوث بسبب شوية كلاب معندهم ذمه ولا دين.. ابقى مرعي بره البلد علشان ابعد عن المشاكل.. وامثالك بيحبوا سيرتي بالباطل علشان حاقدين عليا اكمني خلفت في 3 أسابيع.. يا خي نيله عليك وعليهم وعلى ال 3 أسابيع في يوم واحد.

وبصوت قوى.. زعقت في امي وأختي.. سيبوا الزفت الى بتاكلوه ده.. ياللا نمشي قبل ما الاقي نفسي اترفضت علشان طلعت بتاجر في المخدرات.. ياللا.

اختي قامت وهي ماسكة قطعة الجاتوه الرابعة وبتقولي يا ابني استنى.. انا الى اخترت حته الجاتوه دى واحنا جايين وعيني كانت فيها أساسا.

مسكت ايد امي علشان نمشي.. صوت أمها وصل ودانى وهي بتبرطم بكلام مش مفهوم فيه لفظ الجلالة.. حسيت بالاستفزاز.. اسم ربنا ميصحش ييجي على لسان الولية دى ابدأ..

- على فكره يا مدام لمعه.. محمد أحمد بتاع اسكندرية.. الموجود في محطة الرمل.. يبقي بتاع فول وطعميه.. محمد أحمد يبقي اشهر واحد في المجرة بيعمل فول وطعميه.. كل مشاهير مصر اكلوا عنده فول وطعميه.. عنده ترايزة موقعه عليها فؤاد المهندس مكتوب عليها "كلمتين وبس.. الفول يجنن".. يا عيله نفرين وطفاية يا بتوع الزرايب.. انا راجل وسخ اني جيت هنا أساسا.. يا ترى لابوار هيرضي يرجع الجاتوه بقى وللا ايه.

ياللا يا ماما.. انا عازمكوا على فشة وممبار عند كنتاكي انما ايه.. أורجانيك.. انا هاخذ وجبة كوارع كومبو من غير كومبو علشان مش بحب الطحينة.

هاتولي راجل

قريت قصة قديمة عن غراب تنكر لنوعه وحب يبقى طاووس.. دهن نفسه الوان وبقي يقلد مشية الطاووس.. بعد فترة بهتت الألوان وفشل الغراب انه يمشی— زى الطاووس.. ده غير ان مجتمع الطواويس رفضه لإنه مش طاووس.. الغراب حب يرجع لأصيلة بس للأسف معرفش لإنه كان نسي- مشيته.. ومن يومها مشية الغراب عبارة عن قفزات.. لا هو بقى طاووس.. ولا فضل غراب زى ما ربنا خلقه.

فلاش باك لسنة 2010.. 32 سنه بقرف في الناس والناس بتقرف فيا.. يحاول أتأقلم مع حياتي بعد الانفصال.. دور "خالو" الطيب الفرفوش بتاع الألعاب والهدايا والحلويات لايق عليا اوى.. أولاد اخواني اصبحوا اولادي الى مخلفتهمش.. خصوصاً ابن اختي الكبيرة المنحدر من اصول مملوكية.. طبيعي يقعد جمبي يسمع حكاوي جدوده والى عملوه في بعض علشان الحكم.. وطبيعي ينسى- كل الهري ده لما بفتح الشنط ويشوف جبته العاب ايه.. على الجانب الاخر حنفية عرايس أمي وجدي مش عايزه تخلص..

يا دين النبي.. ايه كل البنات دى!!!

أسباب رفضي كانت مستفز للناس.. يعنى ايه أقول ان دى طويلة او دى مش مثقفة او دى عندها عينين اثنتين بس في وشها؟

الحقيقة ان أسبابي -على تفاهتها- كانت من أساليب مقاومةي للأحباط ومحاولات الناس المستميتة لكسر- نفسي- لا شيء الا ان عندي "مواصفات".. ده شيء بيستفز البنات جدا مش عارف ليه.. لما بيسمعوا ان فلان له طلبات في عروسته بيبقي كأنه اجرم او اتى باثم ميين.. تلاقهم بيسفوا ويتريأوا بكم مهول من ثقل الظل والسخافة لمجرد ان له طلب معين.. وكأنه مثلاً مش من حقه.. في نفس الوقت الى هما بيحطوا شروط ومتطلبات وهمية ميقدرش عليها غير عفريت المصباح.. حاجه كده تخليك تسأل.. هي الى بتتريأ دى بصت في المراية الأول وللا بتتكلم كده وخلاص؟ ده طبعا بالمقاييس الحريمي بتاعتهم.

كنت بسمع بوداني السخرية من نوعية "امال لو كان فالح" او "تقوليش رشدي أباطه يا اختي".. مش عارف ايه معيارهم للفلاحان بالظبط اذا كنت وقتها حاصل على ماجستير بعد بكالوريوس الهندسة ولولا فساد النظام كنت كسبت عشرات الملايين من التكنولوجيا.. او ايه الجميل بالظبط في رشدي أباطه علشان نقيس الناس على مستواه وهو كان خمورجي حشاش متعدد العلاقات النسائية.. ارثه في الدنيا مجموعة أفلام قدمت أفكار دمرت أجيال نفس الستات دى بتشتكى منها دلوقتي في محاكم الاسرة.

في الأول كنت برد بمنتهى القوة بنفس الطريقة.. ولا اسهل من قصف الجبهات بطريقة شديدة العنف تخرس المتكلمات تماما طالما الكلام عن الشكل مش المضمون.. بعد كده اكتشفت اني لم اخلق للتفاهة.. وان افضل رد على العيانات دى هو التجاهل التام والاستمرار في الرفض.. اه ليا طلبات رغم اني مطلق.. واه لسه برفض وهفضل ارفض.. هو انا برفض علشاني؟؟ ده علشان مصر.

المرة دى ترشيح عن طريق الرهيبه خالتي.. ست مش ممكن تقابل زيتها في حياتك الا مره واحده بس.. ايه من آيات الله في الأرض.. عبقريه وذكاء غير عادى في الوصف ونقل المعلومات.. كل ما اشوف الست دى اسجد في الأرض زى بتوع المنتخب.. ست عندها الحواس الخمسة كلها شغالة.. بس كل حاسه لوحدها.. مفيش بينهم اى رابط منطقي او عضلي او عصبي.. الطب هيقف كتير قصاص حاله ست مصممة ان فيلم رد قلبي بطولة عبد الحليم حافظ ومني زكي وان افضل اغاني الأفلام هي الاغنية المبهجة "غلطة ندمان عليها" للمطرب عمرو دياب أبو شعر ابيض ده.

في يوم غلطت وعديت عليها في شغلها.. وبعيد عنك خالتي بدأت تشتغل..

- تعالي يا أحمد سلم على طنط "تريز"
- كل سنه وحضرتك طيبه يا طنط..
- اهلا يا احمد.. عقبال ما نشرب شرباتك يا حبيبي..
- عقبال ما نشرب قهوتك يا طنط..

وتقوم العبقريّة خالتي تتدخل في الحوار وتغمزلي بطريقه انتهت من أيام كافور الإخشيدي..

- تعالى يا أحمد سلم على ماريان بنت طنطك تزين.. قمرابه ما شاء الله.

ايوه قمرابه.. ماريان حلوة صحيح.. بس حلاوتها لا تعنى بالنسبالي اى شيء.. خالتي حسنت انى غبي ومفهمتش الرسالة.. فراحت قلبه الحوار عن النصيب وطيبة ابي وعمق علاقتها بطنط تزين وذكريات زمان أيام ما كانت المقدسة ام طنط تزين وجدتي بيتنافسوا على لقب صاحبة اجمل طبق عاشوراء في المنطقة.

ايوه.. اعمل ايه انا طيب خصوصاً ان النهارده مش عاشوراء؟؟

وهكذا مآثر الفاضلة خالتي لا تنتهي.. اتقرصت منها 10 مليون مرة.. فقررت ان اى حاجه هتقولها.. هأخذ عكسها علطول.. المرة دى بتقول ان العروسة دكتوراة وسمراء شوية ومدملكه.. يبقى اكيد العروسة ليسانس حقوق وطويلة زى النخلة ورفيعة زى الخشب.

في يوم الزيارة عدت على لابوار.. كنت لسه مخدوع فيه ومعرفش انه نحس.. التورتاية المقدسة الى وصى عليها سعد زغلول قبل ما يموت.. واخذت ابي وخالتي في ايدي.. والى بيت العروسة رأساً.

بيت لطيف مفهوش حاجه تثير الشك او الريبة.. 3 بنات وولد.. كبراهم هي بيت القصيد.. الأب موظف كبير في الحكومة.. لا يبدو من اهل الثراء.. يعنى مش هيقعد يتمنظر عليا ويقول جدي الباشا وعمي وكيل الوزارة.. ام موظفه عادية.. يعنى الصورة شبه المثالية في خيالي للأسرة المصرية لولا عمل الام.

حضرت العروسة.. وحضر الاخوة والعائلة كلها.. حوارات عادية مع محاولات من الأم لجس النبض.. اسئلة حريمي مفقوسه جدا علشان تعرف منها مستواي وإمكاناتي ايه وبالتالي تحدد طلباتها ايه.. طول عمري أكره طريقة الطلب بناء على الموجود مش بناء على الرغبة.. نفس الأسرة ممكن تطلب شبكة من شخص بألف ومن شخص تاني لنفس البنت ب 10 الاف.. ليه يا جدعان.. أصل ده معاه بينما التاني مش معاه.

الانطباع الأول انهم مش بيقيموا الشخص اد ما بيقيموا الإمكانيات.

واحد في الصندوق..

مع تعدد الزيارات.. لفت نظري شيء مهم جداً..

الأم هي كل شيء في الأسرة دى..

كل شيء بمعنى كل شيء..

الأم هي صاحبة الأمر والنهي والقرار.. صاحبة الرؤية المستقبلية والتخطيط.. مسئولة الميزانية والموارد المالية.. هي التي بتذاكر الأولاد.. هي التي بتتابع احوالهم في المدرسة.. هي التي بتقرر للأولاد.. هي تقول مين يعمل ايه امتي وازاي.. الأم تقول نكتة.. يبقى الكل يضحك.. الأم عاوزة تاكل يبقى الكل لازم يكون جعان.. الأم مش بتحب البامية.. اذن البامية مسرطنه وكلها امراض وبتتخن وسبحان الله.. العيال مش بتحب البامية ويبقروا منها رغم ان عمرهم ما أكلوها في حياتهم.. رب الأسرة دى هي الأم.. أبو العيال لو مات مش هيحصل اى تغيير يذكر في حياة البيت اللهم الا مساحة زيادة هيوفرها بموته.. بينما الأم لو رفدت يومين.. البيت كله يتشل.

قد يبدو الموضوع اني كرهت الست او عاديتها.. المسطحين هيقولوا أصل الرجالة بتغير لما تلاقي ست قوية والخيابة دى.. طبعا ده كلام فاضي تماماً.. احب ما على قلب الرجل هو ست قوية تشيل من على كتافه بس مترجش تعيط في الحمام.. البيت لازم يكون مسئولية الستات.. لكن ربنا خلق البيوت فيها عنصرين.. ذكر وانثى.. 50 50 في معادله متزنة.. الام بتشيل العيل 9 شهور في بطنها.. الا انه ينسب لأبوه.. الام بتشيل مسئولية الأسرة داخلياً.. الا ان الأسرة الكاملة لا تكتمل الا بوجود رب أسرة.. هكذا الحياة.. دور للرجل ودور للمرأة.. أحقق من يحاول المقارنة وعبيط من يحاول خداع اى طرف من الطرفين بإيهامه بانه اهم من الطرف الاخر.. ده أسلوب خرايين البيوت اللي شغالين على عقول البنات من مدخل الحقوق.. يمسكوا دماغ الرجل ويقنعوه انه

الكل في الكل.. ويمسكوا دماغ الست ويقنعوها ان طالما الرحم هو الى بيسوي الفراخ يبقي انى اهم.. والمهابيل العبط من الطرفين يصدقوا ويبدأوا يتصرفوا على هذا الأساس ويتحولوا الى العنصرية القذرة والمقارنات بدون وعى ولا منطق.

لوحدك انت اسمك أعزب.. مهما كنت غنى ومهما كنتى جميلة.. الراجل الى انتى هارياه ترياه على جروبوات الماميز ده هو الوحيد في الدنيا القادر على منحك لقب أم وكذلك حضرتك عمرك ما هتكون رب اسرة الا بالست الى انت شايفها مبتعملش حاجة دى.. خلق الله المرأة تربى بقوة الرجل وخلق الله الرجل يستعين على الحياة بعاطفة المرأة.

عندي حساسية مفرطة من اختلال الأدوار.. مش بحب البزرميط.. أحب كل واحد يعمل شغله.. الراجل له دور والست لها دور.. متوازيان زى شريط القطر.. فردتين شريط القطر اسمهم -مع بعض- قضبان يمشى- عليه الوابور علشان يحقق هدف وينقل الناس والبضائع من مكان لمكان.. فردة قضبان لوحدها اسمها خردة.. حتى لو كانت جديدة بتلمع.

طيب.. في البيت اللطيف ده.. الأب بيعمل ايه؟؟

نص ممول وكفى.

ايه ده!!!

ياخد مرتبه يديه كله لمراته.. وهي تتولي كل مهمات الحياة.. حتى التعامل مع الصنایعية وتعليم العيال.. معنديش اى موانع ان الستات تتولي الإدارة المالية للأسرة.. المهم انها تكون بتعرف تمسك فلوس ويكون ده الصالح فعلا مش مجرد تكبير دماغ.. اديها المرتب كله مفيش مشاكل طالما هي اشطر منى في الشراء والانفاق.. بس ده لا يعنى انى اشيل ايدي من البيت بكل تفاصيله.. صحيح دلوقتى بعد ما اتجوزت إجابتي على اى سؤال لعيالي "قولوا لماما".. بس ده علشان يتعودوا ان ماما لها شخصية قوية ولازم نسمع كلامها.. مش علشان هي بتدلع وتأكّل وتحمى تبقى هفأ وممكن نزعلها او نحط راسنا براسها.. بينما في الخلفية انا متفق مع مراتي على تفاصيل التفاصيل في كل شيء.

انعكس الكلام ده على شخصية الأولاد تماما.. البنات متحدثات منطلقات بينما الشقيق الأوسط ضايح خالص.. البنات مش متخيله ابدأ ان يعنى ايه انا مش موافق انها تشتغل.. او يعنى ايه كلمة مش موافق دى من الأساس.. مش قادرة تفهم ان "الرجل" له عليها حق من اى نوع.. مش متخيلة انى ممكن اسألها واحاسبها واعاقبها لو لزم الأمر.. مش متخيلة ان فى سلطة في البيت اعلى من سلطة أمها.. هي نشأت وترعرعت على ان الرجل ملوش دور الا التخصيب ثم التمويل من سكات.

في خلال فترة تعارف لم تتجاوز 3 شهور.. حصل بيني وبينها ما يقرب من 10 مليون مشكلة بسبب الجزئية دى.. لما اشد تزعزل وتنقمص.. وانا مليش خلق على قصص البنات.. اسيبها تخبط راسها في الحيط ولما ترجع تعتذر مقبلش الاعتذار بسهولة.. ببلغها بقرارات تخص مستقبلها دون انتظار رأيها في جزئيات معينة.. مش قادره تفهم انها مطلوب تخطط حياتها وتفاصيلها طبقا لمكان وجودي وظروف شغلي.. مش قادرة تفهم انى لما أقول انا مسافر للبلد الفلاني علشان الشغل.. فده يعنى ان الاسرة كلها هتسافر معايا.. مش قادره تفهم انها قصاص راجل عادى.. مش حالة خاصة زى ابوها.

انزعجت جدا لما أعلنت انى هتفك مع ابوها.. ابوها نفسه اتخض.. هي حسست وكأني أسعى الى كسرها واذلالها.. بينما الواقع مش كده.. انا شخص عادى جدا.. الغير عادى هو النموذج الى هي عايشه فيه – هكذا اظن- انا انسان عاوز يقوم بدوره كاملا ولا اتقبل ابدأ ان حد يعمل الى انا مفروض اعمله لأى سبب كان.

الوقت بيمر وانا مش شايف اى تطور.. شخصية الام الكاسحة طاغية على الكل.. هي هتتوفق اكيد مع شخص مش زيي.. المناسب لها هو انسان مسالم ضعيف الشخصية يقبل ان مراته تبقى الكل في الكل.. يقبل انها تبقى سي امينه وهو الانسة حنفي.. عن نفسي.. لم أخلق لمثل هذا اطلاقا.

وكان الصدام المتوقع بيني وبين الأم..

- يا جماعة الخير.. الكلام ده ميمشيش معايا
- انت معترض على ايه.. على الشغل يعنى؟؟
- لا يا طنط.. انا معترض على طريقة التفكير والتصرف.. الشغل ده امر منتهى مش مفتوح للنقاش أصلا..
- يعنى ايه مش مفتوح.. مين الى قال كده ان شاء الله؟

- انا الى قلت.. والي أقوله هو الى هيحصل.. مش هيمنع حصوله الا اني أموت.. وبعد ما أموت كمان مراتي مش هتكسر كلامي لأي سبب.. بس مش الشغل عموما هو المشكلة..
- امال ايه بقي؟؟
- اختصارا.. انا راجل احب ابقى راجل.. مش ATM. وصلت؟
- مسيرك تتجوز يا ابني وتعرف ان البيوت مش بتمشي كده.
- انا جاي من بيت مش من الشارع.. انتو هنا الى نموذج مش طبيعي.. او على الأقل انا مشفتوش في حياتي.. بالك انتي لو مراتي قالتلي فيوم قصاصد عريس بنتي اسكت انت شويه دلوقتي؟؟ وربنا لأقوم ادفنها بالحياة هي والبنت وعريس الغفلة وأمه وابوه مع بعض.. انا عندي اسره كبيره كلها بيوت ماشيه كده.. وعندي وصايا نبي امشي عليها
- طيب وهو النبي مش وصى على الستات؟
- جميل.. الله ينور على حضرتك.. وصى مين على مين؟ لما النبي يوصي الرجاله على الستات.. يبقى مين صاحب القوامه؟ لو طريقة حضرتك في التعامل دي صحيحة كان النبي وصى على الرجاله.. مش وصاهم.

الست فهمت اني مش عاجبي وضع ابوها في البيت.. فهمت رسالتي الواضحة الوقحة.. توقعت ان الراجل يقوم يطردني بره البيت.. حقه الصراحة.. لكن مفيش اى رد فعل منه.. طالما الست معملتش حاجه.. هو مش هيعمل حاجه.

اعوذ بالله.. ايه ده؟

مش كل الرجاله تقبل العيشة دي.. في الحقيقة.. لم احترم هذا الرجل ولا ربع ثانية.. بالعكس.. احتقرته جدا.. أمثال الشخص ده هما سبب ظهور المسترجلات.. والمسترجلات هما سبب ظهور جيل عديم التربية بهدل البنات في البيوت والمحاكم.. النوعيات دي عكست الآية وهما فرحانين بالمكسب القريب.. بس لما الزمن دار اكتشفنا ان اول المضارين منها هما بنات اللي نادوا بيها.. يعنى اللي عك فعليا مدفعش تمن العك بتاعه.. وده شيء مفيهوش اى عدالة.

شوية محاولات من الوسطاء لرأب الصدع الى حصل.. البنات فعلا كانت متمسكة بالجواز وبدأت تقدم وعود بالتغيير وأنها هتسمع الكلام.. لكن خبرتي في الدنيا علمتني ان محدش بيتغير.. هتسكن دلوقتي وبعد الجواز هتفرقع في وشي.. من موقعي هذا أرى محكمة الاسرة للمرة الثانية بمنتهى الوضوح.

طيب وعلى ايه.. يا نحله لا تقرصيني ولا عاوز منك غسل.. في رجاله كثير شخصياتهم تتناسب معاكي.. انا لأ.

بعد الحكاية دي بشهور اتجوزت جوازة على مزاجي.. زى ما دورت بالظبط الحمد لله – أخيرا – لقيت..

لحد كده الأمور عاديه جدا والحياة زى الفل.. لولا شوية أخبار وصلتي عن طريق السنة الناس الى هتخش النار ان شاء الله من حصاد السنهم دي.

العروس سالفة الذكر اتجوزت.. وهي وجوزها حاليا مطلولين للعدالة في قضية شيكات بدون رصيد.. صدر ضدهم أحكام علشان واخدين فلوس من ناس كثير بحجة التجارة والفيلم الحمضان ده.. الموضوع لفت انتباهي.. طول عمري أعرف ان التجارة كده.. مش معنى ان تاجر عليه شيك بدون رصيد يبقى حرامي.. السوق كله ماشي كده.. حبيت بس أعرف ازاى الأمور وصلت لكده.

عرفت ان جوزها كان موظف في مغلق خشب.. مستقيم الخلق وطول عمره فحاله.. نسخة من ابوها.. هي فضلت تزن عليه انهم يروحوا الصين يشتروا بضاعة ويبيعوها في مصر.. زى "فلانه" وجوزها ما عملوا.. هما الاثنان بطيخ في التجارة والسفر.. لا عمرهم سافروا ولا اتنيلوا.. الراجل كان غلبان شويه.. لكن انا اقدر ارسوم واتخيل الصورة بناء على اللي شفته.. وقد أكون غلطان والله اعلم.

اكيد "هي قررت".. واكيد "هي شافت" ان كده صح.. واكيد "هي خططت" و "هي عملت" زى أمها ما كانت بتعمل بالظبط مع أبوها.. والزوج في الحالة دي عبارة عن "زى ما تشوفي يا حبيبي".

والاثنين لبسوا في الحيط.

طيب هو الستات خايبه في التجارة او الشغل يعنى؟

اطلاقاً.. في ستات اعرفها بتلعب بملايين بسبب التجارة.. بس على رأى المثل.. الكتكوت الفصيح من البيضة يصيح.. لا تتوقع
من ابنك انه يقضى طول عمره بيجيب 60%.. وفي الثانوية هتحصل معجزة تخلية يجيب 95%.

وبالوالدين إحسانا

وَاحْفَظْ لَهُمَا جَنَاحَ الدُّلِّ مِنَ الرَّحْمَةِ وَقُلْ رَبِّ ارْحَمْهُمَا كَمَا رَبَّيَانِي صَغِيرًا

2005 كانت من اسعد السنين في حياتي.. الماجستير ماشى زى الفل وشغال في فكرة تكنولوجية هتخليني ملتي مليونير في اقل من سنتين.. شغلى العادي ماشى كويس.. وبعد الظهر كنت بدى كورسات في سنتر كبير في الدقي.. منه فلوس ومنه خبره.. وقي مشغول بشدة.. ولا مكان في برنامجي اليومي لأى ستات من اى نوع.. كنت بحاول احصن نفسي ضد هجمات كيوبيد وبدعي ربنا ليل ونهار انه يبعدي عنهم ويبعدهم عني..

لحد ما قابلتها في واحد من الكورسات اللى كنت بدرسها..

جمال هادئ ملفت.. أهلها عايشين في الشرقية وهي بتكافح مع أختها في القاهرة علشان مستقبلهم.. محترمة ومهذبة وجادة جدا.. لبسها محتشم وفحالتها.. لا تبدو بتاعة عط ولا تنطيط.. من البيت للشغل ومن الشغل للكورس ومن الكورس للبيت.. الويك اند في البيت عند أهلها.. يعنى تقريبا عايشه زي مع الفارق البيولوجي الطبيعى بين الرجل والمرأة.

تطور العلاقة بين الأستاذ والتلميذة وارد جدا.. في بعض الأحوال يتحول المحاضر الى سوبرمان في نظر الطلبة.. قصص الهيام بين الطلبة والمعيدين او الدكاترة ماله الكليات.. بعد الحكاية دى بقيت حريص على وضع حدود فاصلة بيني وبين اى طالبة في اى كورس بدرسه.. الموضوع ده خطر فعلا وممكن يؤدى الى بلاوي.

لا أنكر انها كانت من النوع المفضل بالنسبالي.. البنت عايشه حياه شاقة وجادة جدا.. حققت بمجهودها حاجات كتير كان ممكن تختصر وقتهم بجمال الوجه والجسد.. اقل منها في الأمكانيات العقلية وصلوا لمستوى اعلى منها بالطرق الملتوية.. هي رفضت الكلام ده وقررت ان الدلع والدلال مش هيبقي الا لرجل يربطها بيه رباط شرعي.

تطور الكلام بيني وبينها من المادة العلمية في الكورس الى الشغل ومشاكله.. ساعدتها تلاقى وظيفة أفضل وسكن أحسن ليها ولأختها.. مع الوقت بقيت سندها في العاصمة.. عرفتني بأهلها.. زيارة والثانية ولقيتهم فعلا ناس طيبين وفحالههم.. أبوها طريح الفراش نتيجة جلطة حديثة.. باين عليه اثار عز وصحة.. الراجل جسمه قوى ووشه كله شباب.. بس مش بيتحرك.. طريقة كلامه تقول انه ديكتاتور مربع.. شكله حديث العهد بالمرض.. لا ده جسم واحد بقاله كتير راقد ولا دى شخصية واحد مفروض انه المرض اقعه.

عندها 10 اخوات.. كل واحد منهم منعزل في وادي مستقل تماما لدرجة ان الأم متعرفش ان ابنها الوسطاني لسه في تانيه كلية ومفهمهم انه في اخر سنه.. البنت الصغرى منتقبه بينما الى أكبر منها بتلبس قصير.. بشكل عام أقدر أقول انها أسره مفككه بشكل كبير.. بيت يبدو غريب على واحد زى حالاتي خرج من اسرة كان بيخطر فيها مع امه ويتغدى عند خالته والعشاء عند جده.. ألف تفصيلة تفجر في الدماغ أسئلة بلا نهاية.. ومع ذلك تفكيرى منحصر في البنت نفسها.. هي أهم ما في الموضوع.. هي كويسة وفي مشاعر حلوه بيني وبينها.. يبقى اوجع دماغي بالأسئلة ليه؟

فاتحت ابويا وامي في الموضوع.. المسافة من طنطا للزقازيق مش كبيرة رغم الطريق المكسر.. شيء جميل برضه ان الواحد يتجوز من بلد تانيه.. اهو نبعذ عن مشاكل أمك قالتلى واختك كلمتني من تحت ضرسها وهي بتتك على حرف السين.

كنت فرحان جدا وانا بشترى الورد لزوم الزيارة.. خدت تريباه من اخواتي واهل منطقتي تكفييني 3 سنين.. صحيت من الفجر اغسل العربية وارتب في الورد واكوى في هدومي.. اهتمام غير عادى استفز امي جدا.. اشمعني دى الى انت عامل علشانها كده.. ده انا بتحايل عليك تغسل وشك وانت بترفض.

القعدة بين أهلها وأهلي مخدتش كتير.. انا ساكت تماما وابويا وامي هما الى اتكلموا.. البنت سقطت في اختبارات أمي للسيطرة تماما.. البنت حلوه صحيح.. بس كتير اوى قالت كلمات زى "لا" و"انا مش هعمل كده" و"انا حره".

وطبعا الكلام ده معداش من تحت ضرس امي ابداء..

مشينا من عندهم قبل ما أُمي تتهور على البنت وتقوم تجيبها من شعرها قصاد أهلها.. بابا كان متحفظ بشكل عام زى عوايده.. حاولت طول الطريق انى انكشه في الكلام لكن امي مسابتليش فرصه.. ساعتين كاملتين من "اتجوزها وقلبي وربي غضبانين عليك ليوم الدين يا احمد" و "اتجوزها يا احمد.. اقهر قلب أمك كمان يا احمد" و "كل العيال فرحت قلب اهلها الا ولادي انا ياربي".. مع تفاصيل من العياط والشحتفه ودموع التماسيح.. لما أُمي بتقفش على حاجه.. مش بيبقى قصادي غير حل من اتنين.. يا اما أنسي الموضوع كله او استنى ملاك من السماء يحل المشكلة.. بس برضه العقدة الكبيرة مش عند امي.. ابويا لو قال اه.. امي تلقائيا هترقع الزغاريط.

كان قرار صعب عليا جدا.. مش مقتنع بأسباب ابويا للرفض.. وأُمي معندهاش سبب الا ان البت دى لأ يعنى لأ.. كنت متعلق بالبت جدا.. بس عمري ما هعادي أهلي لأي سبب.. الموضوع مش مادي اطلاقا.. تكفى نظرة عدم رضى من ابويا علشان اجيب ورا فوراً.. علاقتي بأبويا كانت ثورة دائمة من ناحيتي.. بس من جوايا عارف انه دايماً صح.. عمري ما خالفته.. بس طلعت عين الي جابوه.

وقعت بين نارين.. نار الرغبة في الارتباط بالبت ونار قناعتي العقلية برجاجة عقل ابويا وتعلقي الشديد جدا بأُمي.. الصراع الأبدى بين القلب والعقل فرتك جتني في وقت انا محتاج فيه لكل ثانیه علشان شغلي ومشروعي.. مستقبلي كله على المحك ومفيش وقت للمحن ده.

وكان القرار الحاسم القاسي..

انا مش هكمل مع البنت دى.. قفلت باب الموضوع ده تماما وقررت أشتري رضا ابويا مهما كان التمن..

حاولت انسي.. بس البنت لأ.

محاولاتها المستمرة للتواصل معايا اربكتني.. لو وحشه او جسمها بايظ كنت قلت دى ما صدقت لقت عريس.. انما الواقع مش كده.. البنت خطاها كتير وهي الى بترفض.. متمسكة بيا بشكل غير طبيعي اثار دهشتي.. انا مش دون جوان يعنى علشان الأفلام دى كلها.. النسوان سر كبير لما بتحب وسر كبير لما بتكره.. مكذبش أبو الليف ابدا لما قال "دولا مجانيين".

تصرفات البنت بتقول بوضوح انها واقعه للنخاع.. من حظها وحظي اني من النوع الراض تمام لأى علاقة محرمة سواء بالتراضي او بالخديعة.. محاولتش اتسافل معاها خالص رغم اني كنت بتخبط من جوا.. كل الى فكرت فيه وقتها أُنِي عايش قصة رومانسية جميلة سعيد بيها وبتفاصيلها.. قصة محترمة بدون أي امل في أي نهاية محترمة رغم محاولاتي العديدة مع اهلي بعد كده.

الوقت بيمر.. كل شهر خسارة للبنت اكر منى.. أهلها هيتجننوا من رفضها المستمر لعrsan مترفضش.. في المدن الصغيرة حرية الرفض مش مكفولة لأى حد.. لازم سبب مقنع وقوى علشان تقول لأ وتتجنب السنة الناس الى مش هترحمها.. لو رفضت اكر من مره بدون سبب قوى يبقى اكيد البت دى فيها حاجه وخايفه من الجواز.. السنة الناس لا تسكت الا بسكوت أجساد أصحابها الأبدى.

أبو البنت وخالها كلموني.. او بالأدق كانوا بيتخانقوا معايا وبيتهموني اني السبب في وقف حالها.. الصراحة عندهم حق.. الناس عملت الى عليها ورحبت بالجواز بشرط موافقة أهلي.. انا والبت عاوزين.. العقدة كلها في أهلي الى رافضين بقوه.. موقفى انا والبت انساني لكنه مش سليم.. كان لازم نقطع العلاقة دى تماما طالما مفيش أمل في الارتباط.. خطأ مشترك انا اتحمل الجزء الأكبر منه لأُنِي طنشت حقيقة واضحة زى الشمس وسبت نفسي اتعلق بالبت زيادة وهي تتعلق بيا لدرجة الجنون.

الأمر تتطور من سيء الى أسوأ بين أهلي وأهلها.. كلام أُمي نازل عليهم زى الرصاص.. أبوها وأبويا بدأوا يستخدموا معارف من ذوي الوزن الثقيل علشان يأتروا علينا.. مره بالإغراء ومره بالتهديد.. الكبار مولعين في بعض وانا والبت عايشين في عالم تانى خالص.

الأخ لجأ الى تصرفات عنيفة.. بلطجية يكسرولي العربية.. عنف بدنى مرعب مع اخته.. حبسها في البيت تماما ولا شغل ولا دراسة.. مفيش تليفون ولا موبايل ولا انترنت.. هتتجوزي اول واحد يخبط على الباب ورجلك فوق رقبتك.. كمية قهر غير عاديه للبنت.. قبل ما تلومه فكر كده ان اختك بتحب واحد مفيش أمل انه يتجوزها.. عمرها بيعدي والناس بدأت تتكلم.. كل أنواع النقاش المنطقي فشل انه يرد البنت عن موقفها..

طيب الجدع يعمل ايه وابوه مرعي مريض والبيت كله في رقبته؟

انا لو مكانه.. مش هعمل اقل من كده.

مع تأزم الموقف.. البنت عملت تصرف جنوني زود الطين بلل على دماغ الكل.

في يوم عادي جدا غفلت الكل وشربت صبغة يود بكمية كبيره.. والغرض طبعا معروف.

يا لهوى.. هو في كده!!!

ايه الأفلام دى.. انا فاكركلام ده في السينما بس.. انا ايه الى وقعني في المصيبة دى.. البنت دى لو حصلها حاجه هبقى انا الملام رقم 1.. لو فلت من ضميري اكيد مش هفلت من أهلها.. ولو فلت من الاتنين يبقى هروح فين من ربنا؟

قدر ولطف.. لحقوا البنت قبل ما تفتس.. عيطوا حواليا شويه لكن العنف والحبس ما زال مستمر.. مش هيرفعوا الحصار الا لو أعلنت انها وافقت تتجوز حد غيري.. ولتاني مره بقول.. عندهم ألف حق.

بعد محاولة الانتحار أدركت البنت ان العافية مش نافعه فلجأت للحيلة.. خرجت من المستشفى وأعلنت انها موافقه على اول واحد يدق الباب.. اتخطبت ولبست الدبلة في يوم كنت انا فيه بره مصر.. الخبر نزل عليا من اختها زى الصاعقة.. ولكن تمنيت لها كل خير.. معرفش ليه اختها قالتلى.. مش انا وهى بس الى كنا غلطانين في الموضوع ده.

تقوِّعت مع نفسي وانا شمتان فيا.. أحسن.. استأهل.. أدى اخرة الجري ورا النسوان وحواراتهم الخابية.. نسوان ايه وكلام فارغ ايه وانا ورايا شغل وهم ما يتلم.. ما أتتيل أركز في مستقبلي بدل المحن ده.. كنوع من أنواع معاقبة النفس على التقصير.. ارهقت نفسي في الشغل والمذاكرة زيادة.. كنت بعاقب نفسي على كل ساعة ضيعتها في الموضوع ده بساعات شغل أكثر وحرمان من الترفيه.. نجحت في امتحانات الماجستير.. نلت رضا أبويا وأمي.. زدت 10 كيلو بتأثير الأكل.. على فكره.. الإفراط في الأكل بيبقى نوع من أنواع الهروب من فشل ما.. انتصار للعقل الباطن بالحصول على السعادة بطريق آخر.

مرت 6 شهور على خبر خطوبتها.. بدأت أتعافى من الموضوع وارجع لحياتي الطبيعية الساخرة من المرأة.. بدأت اخس واضحك تاني بعمق رغم الأحباط الى بقاله في تنفيذ مشروعي.. لفيت في ساقية الحياة لحد ما في يوم باب بيتي خبط الساعة 6 الصبح.

خير يارب.. الى جاي ده اكيد يعرفني ويعرف انى بصحي بدري.. ده لا معاد الزبال ولا معاد بتوع الفواتير.. جازي حد من صحاي استقرب البيت وجه ينام عندي بدل ما يروح.. فتحت الباب بدون اهتمام.. نظره واحده للزائر.. صعبت بعدها صعقة وكأن تيار كهرباء قوته 1000 فولت من الى كانوا بيعذبوا بيه ناديه الجندي عدى في جسمي..

كانت هي..

يمكن لدقيقتين او ثلاثه واقفين بصمت تام.. مجاش فبالى الجيران ممكن يقولوا ايه لو شافوها او هل في حد شافها أساسا وهي طالعه وللا لأ.. جبراني سخفاء جدا.. الحمد لله سمعتي كويسة في العمارة والمنطقة.. لكن زيارة زى دى ممكن تدمرني تماما.

طلبت منها تنتظرني تحت البيت.. لبست هدومي على عجل ونزلتها.. لفت نظري ان صوابها مفياش دبله.. استنتجت ان حصل الى كنت متوقعه ولا اتمناه.. يبدو ان في كارثة جايه في الطريق.

- خير يارب.. ايه الى حصل
- احمد.. انت لسه بتحبيني؟
- لزومه ايه الكلام ده دلوقتي.. انتي مرتبطة بأنسان تاني.. وجودك هنا أصلا مش صح.. ارجوكي بلاش مشاكل.
- ولا تاني ولا تالت.. انا مش قادره أكمل.. انا جبت أخرى
- وبعدين؟
- مش هينفع أكون لحد غيرك.. وانت عارف كده كويس
- انا مبقيتش عارف الا ان اهلى واهلك مش موافقين
- طظ.. انت أهلي كلهم.. انا حره ومش صغيره.. احنا مش صغيرين علشان حد يتحكم فينا كده..

كده الكلام ميظمنش..

خدت واديت معاها في الكلام علشان اعرف ناويه على ايه.. البنت جاده لدرجه تخوف.. لدقائق الموضوع بدا في نظري ممكن.. الشقة موجودة وانا فعلا بشتغل وأقدر افتح 3 بيوت مش بيت واحد.. انا وهي مش قصر.. وعندي مدخرات تكفييني اعمل كل حاجه.. موقف أهلي وأهلها اكيد هيتغير مع اول طفل لما نحطهم قصاد الأمر الواقع.

لكن طاف في خيالي صور أخواتي البنات..

يا تري موقفي هيبقى ايه لو واحد منهم عملت كده؟؟

يا خبر اسود.. ده انا ممكن ادفنها بالحياة..

يبقى ليه اعمل كده في اخت واحد تاني؟؟

بيني وبين نفسي قررت اني مش هشاركها في الجنان ده.. لكن يلزم التصرف بحكمه.. الله اعلم هي واقفه على انهي عتبه من اعتاب الجنون دلوقتي والله اعلم ايه نوع الأذى اللي ممكن تسببهولنا بدون ما تحس او ما تقصد.

خدتها على اد عقلها.. حجزتها في اوتيل في مصر الجديدة على أساس انها تهدى شويه وترتاح.. سيبتها في الاوتيل ورحت اتصلت بأخوها.. بعد نص ساعة شتمة فيا وفي أهلي بدأ يسمع.. شرحته الموقف كله وطلبت منه ييجي ياخذها بعد ما وعدني واقسم بالله انه مش هيلمسها.. اقل من ساعتين ولقيته قصادي.. الولد طلع بيفكر كويس وجه لوحده.. منظر البنت لما شافت اخوها ونظرة عينها وعينه وعينيا صعب اوى حد يقدر يوصفهم.. موقف الجميع فيه مكسور..

أخ حاسس انه مطعون في كرامته..

بنت حاسه بالخوف والغدر..

انا حاسس بالعجز والنذالة..

البنت رفضت تروح معاها.. طبعا هي عارفه انه ممكن يموتها.. انا واقف مش قادر اعمل حاجه ولا قادر أتكلم.. مليش أصلا اني أقول اى حاجه.. اخ واخته وانا غريب وسطهم.. قررت ان أفضل حاجه اعملها اني أمشي.. انا كده عملت اللي عليا.. تصرفي صحيح رغم نذالته.. اقرنت الفكر بالفعل.. استأذنت ومشيت.

مكالمة تليفون من أبوها بعد أسبوع فهمت منها كل اللي حصل.

البنت قبلت الخطوبة علشان تشتري حريتها وترجع شغلها من تاني.. بس مقدرتش تفهم ان الخطوبة ما هي الا مقدمه للجواز.. الوقت عدى والشقة جهزت والعريس طلب يكتب الكتاب.. مفيش ما يمنع.. ابوها حدد المعاد بالفعل.. كان بعد أسبوعين من زيارتها ليا.. البنت فضلت ساكتة ولما الموضوع دخل في الجد.. انفجرت.

اخوها صدق في كلامه معايا.. مضربهاش ولا اذاها.. بس كلهم في البيت بقوا يعاملوها انها جرثومه.. أدى اللي كنتي هتخطي راسنا في الوحل علشانها.. طلع ندل ومريضيش يطاوعك في جنانك.. ابوها كان صعبان عليا اوى وهو بيكمني.. موقف زى ده لو كان حصل وهو بصحته كان زمانه حرق الكوكب باللي فيه.. اذيته من غير ما اقصد وبنته كسرتة من غير ما تدري.

كبرت في نظره ونظر نفسي وطبعا نزلت في الأرض في نظرها.. الأيام عدت وانقطعت اخبارها.. أو انا تعمدت اني اقطع اى صله ممكن توصلني بيها تاني.. سافرت ورجعت وغيرت السكن والتليفون والشغل اكثر من مره.. خطبت بعدها 5 مرات واتجوزت وانفصلت مره.. ميقاش فاضل من الحكاية دى الا ذكريات.. عدى على الموقف ده اكثر من 15 سنة.. بعد ما سابت فيا الحياة اثر الخبرة لا املك الا اني أقول "الله يرحمك يابا.. كان عندك حق."

أوقات كتير بتبقى مش فاهم ابوك بيعمل كده ليه.. اذا غم عليك الامر.. اسمع كلامه من سكات.. هو صح.

المرآة

ان الفتى من يقول ها انا ذا *** ليس الفتى من يقول كان أبى.. "الامام على"

البطل المره دى مش أنا خالص..

دى أمى..

أحداث الحكاية دى كانت سنة 2006.. وقتها كنت بصارع الحكومة والروتين والفساد علشان اخد رخصة تشغيل لمشروعى التكنولوجى اللى كان هيشيلنى من خانة الشحاتين ويحطنى في خانة امراء الممالك أصحاب القصور والجواري.. في الوقت ده كنت لسه عايش روعة البدايات في كل شيء.. بتعلم كل يوم حاجه جديدة ويتعرف على ناس من الأكابر في مصر- او هكذا كنت اظنهم - كل يوم بخطى في مستقبلي خطوات كبيرة.. كورسات.. لغات.. شهادات احترافية.. خبرات عماله تتكوم في السي في بتاعى.. المعنى الحرفي لشخص بيبنى مستقبله بمنتهى الهمة والنشاط.

كنت مقسم يومي كويس.. 16 ساعة شغل.. 4 ساعات نوم.. 4 ساعات هلس.. ابويا انهى رسالته الوظيفية في الدنيا بكل كفاءة وتفرغلي علشان يشتغل معايا في المشروع بتاعى.. هو اشطر منى في موضوع الأرقام والفلوس ده.. انا اى رقم اكتر من 3 اصفار بيخلي وداني تصفر.. بينما هو متعود على الأرقام الفلكية دى.

أمى أصبحت مشكلة كبيرة بعد ما اصابها مرض نفسي مشهور بييجي للسيدات المصرية من سن 40 الى 60.. مرض ربنا يحفظنا منه ومن شروره اسمه عايزه عروسه لأبني.

وصلت مضاعفات المرض ده عند امى للدرجة الى تخليها تشوف اى بنت في اى مكان فتبدأ تقيمها كعروسة محتمله ليا.. بنت معديه في الشارع.. مذيعة في التلفزيون.. ملكة انجلترا.. بنت حد من صاحباتها.. اى حاجه حريمي بتتحرك تبقى عروسه علطول.. شيء مفزع لما تلاقي نفسك تحت الميكروسكوب 28 ساعة في اليوم.. عرض بعروسة جديده كل 5 فيمتو ثانيه.. الامر الى خلاني أتساءل بقوه.. هو مصر معادش فيها رجاله للجواز غيرى؟

الناس خلفت البنات دى كلها امتى وأزاي.. فين المواليد الذكور.. هو البلد كلها بقت ملبن خلاص!!!

غصب عني تحولت الى ابن عاق مش بيرد على تليفونات امه.. كرهت زيارة البيت وكرهت الأكل البيتي النظيف وكرهت وطنطا بسبب حصار امى.. ابويا مؤيد لموقفي تماما.. الجواز في الفترة دى كان هيبقى كرسي في كlob مستقبل.. الى في الظروف دى لازم يبعد عن حاجتين كل البعد علشان مستقبله.. المخدرات والسيدات.. الاتنين لهم نفس التأثير.. سعادة مؤقتة يعقبها ندم طويللييييييييييييل.

رفضى للموضوع مكانش تكبر.. انما قلة وقت وضيق خلق.. مش فاضي خالص لمكالمه مدتها نص ساعة علشان اعرف هي لابسه ايه وللا اتعشت ايه.. ما تطفح اى حاجه من سكات ما هي كلها نعمة ربنا.. انا أساسا شخص بيتخنق من الرومانسية.. لما بسهر في الشغل ومراتي تسألني كلت ايه طول النهار يبقى عايز اقولها وانتي مالك أمك؟

الجواز مش بس قدرة مادية.. الفلوس مهمه صحيح لكن الأهم منها هو المرارة البلاستيك الى تخليك تقدر تتعامل مع ست لمدة ساعة من غير ما تكتم نفسها بالمخدة.. الفلوس بتروح وتيجي.. انما الطباع لا.. لما يبقى عندك دماغ للسيدات وحواراتها.. ابقي اتجوز.. والا متظلمش واحده معاك.. انت كده برنس اقسم بالله.

من وقت للتاني كنت بنهزم قصاد أمى.. الأمهات عندها سلاح فتاك اسمه "اطمن عليك قبل ما اموت".. كلمة الموت في حد ذاتها بترعبك.. اعوذ بالله.. لا لا.. انا هتجوز يامه ولا تزعلي نفسك.. ال يعنى هي كانت هتموت وجوازك هو الى منحها قبلة الحياة.. الاصح انها تقولك خليك يا ابني عازب علشان أفضل مطمئنك عليك.

محدث يقدر يقاوم دموع أمه ابد.. رغم انى عارف انها دموع تمثيل.. بس صعب اوى اصدها.

زقنتى امى كالعاده في خانة اليك. بنوته ليسانس آداب اصغر مى ب 5 سنين.. ابوها رئيس محكمة وأمها ربة منزل.. وحيدة على 3 اخوات صبيان كلهم وكلاء نيابة.. فيلا كبيرة في بلد ارياف جمب طنطا.. ارض زراعية ترمح فيها الخيل.. ده غير 500 راس عجول..

وضحكت عليا أمي للمرة الـ 9 مليون الشهر ده.

اول شيء لفت نظري في بيت النسب السعيد هو ينعل ميئين ام الفساد والحكومة مع بعض.

حضرتك مستشار.. رئيس محكمة.. وزير العدل حتي.. ولا مؤاخذه طلعت وللا نزلت انت ليسانس حقوق.. موظف ميري.. مفيش وظيفة ابدأ تعمل كل ده.. ده بيت باشا من بتوع زمان.. مش ناقص الا انى الاق ليلي مراد نازلة على السلم تغني ابجد هوز حطى كلمن.

امال صحابی المحامین شحاتین لیه؟؟

قرررت فعلا من قبل ما اقعده معاھم.. اكيد الناس دی ايديھا طويله او على الأقل بتتريح من مناصبھا.. يعنى فلوسھم سحت وحرام.. لكن نصبر شويه.. لعلی اكون غلطان.. ممكن مثلا مراۛه تكون من اسره غنيۛ او ھما اشراف فعلا.

سرطان تعيين أبناء العاملين بينخر في المجتمع.. بعض الوزارات اقرت المبدأ ده بنسبة 10%.. وبقي الواحد من دول يقدم لبنته او ابنه حامل ليسانس الآداب قسم تاريخ او اجتماع في شركة الكهرباء او البترول وهو بيقولك بقلب جامد وعيون قويه.. ده حقي.. أبناء عاملين.

بشكل شخصي رفضت الموضوع ده تماما.. اتخرجت من الكلية وابويا في قمة هرم حياته الوظيفي.. وتخصصي كان مطلوب عندهم بشده.. لكني أعلنت في منتهى القوة اني مش هشتغل مع ابويا ايدا.. مهما بلغت من التفوق محدش هيفهم الا اني خدت الوظيفة بالواسطة.. ومهما عملت كل شيء هينسب ليه رغم انه هو مهندس كهرباء وانا مهندس كمبيوتر.. طول ما هو في الخدمة انا ابن الباشا.. وأول ما يخرج.. هبقى ابن الكلب.. في مثل مهم اوى بيوصف الموقف ده بيقول كلب العمدة مات.. رحنا عزينا.. العمدة نفسه مات.. والله ما درينا.. وانا محببش أكون لا كلب العمدة ولا ابن العمدة ولا العمدة نفسه.

الراجل اتصدم وانا بقوله الكلام ده.. ازاى ارفض تعيين في الحكومة.. أولاده بصولي بسخرية وافتكروا اني رفضت لان ابويا مقدرش.. لكن ردودي الساخرة من مرتباتهم الهزيلة مقارنة بمرتبي في القطاع الخاص اخرست لسانهم الى حد ما.. ما انا كنت اهل بقي وفاكر انه صحيح انما المرء من قال ها انا ذا.

هما اه صحيح اغنى منى بمراحل.. لكنهم معملوش حاجه علشان يوصلوا للمستوي ده.. مبدلوش مجهود.. لم يخوضوا اختبار حقيقي في الدنيا.. انا أخاف اجوز اختي لواحد من العاطلين بالوراثة دول.. الواحد منهم خرج للدنيا لقي ابوه كده.. ورث الباشوية من ابوه وبقي باشا زيه.. طيب حضرتك.. انت نفسك.. عملت ايه؟ أنجزت ايه؟ لو حببت تكتب سي في.. هتكتب فيه ايه؟؟ وزيهم كانت البنت..

صاروخية الجمال بلا ادنى قدر من المبالغة.. ممشوقة القوام مفهياش ريع جرام زيادة.. مش بتفكر تشتغل ولا عايزه.. ملهاش اى طموح في اى شيء الا الاستمتاع بالحياة.. المكتبة الطويلة العريضة دى بالنسبالها "كراكيب".

مش أزمه.. اغلب البنات ممكن تبقى كده.. ده فحد ذاته ميزه لواحد زي شرطه الاساسي ان وظيفة مراته تبقى هو والعيال.. شبه متفقيين على الحياه وشكلها فيما بعد.. كلام عادى وعابر عن الكلية ومغامرات السفر.. شغلى وظروفه.. شقتي وفرشها.. اى حاجه نسلى بيها الوقت.

لاحظت ان البنت بتقوم كل 5 دقائق تقريبا.. زى ما يكون عندها اسهال مثلا او سايبه لبن على النار.. كان الامر ملفت لدرجة ان انا وامي لاحظنا.. في سر في الموضوع ده لازم اعرفه.

امى ست شقيت كتير جدا في حياتها.. قاست في بداية جوازها من ابويا علشان بينوا حياه مستقرة.. قصص كفاح حقيقيه مش اونطا زى ما بسمع في أحوال كتير.. حرمان حقيقي.. امى زى كل الأمهات الى زيتها اهلكت صحتها علشان توفر للبيت.. كانت تجيب طلبات البيت من سوق يبعد عن البيت 5 محطات اوتوبيس لا لشيء الا ان السوق ده ارخص 10% في أسعاره من السوق الى تحت البيت.. المواصلات للمشاورير الى أكثر من 3 محطات اوتوبيس.. اقل من كده يبقى المشى رياضه وصحة.. فرش الانترنت داب يبقى يتقلب على الناحية الثانية.. تفصل هدموها بنفسها اجدع من اى خياطة وعلى احدث خطوط الموضة والفضل لمجلة الماني رخمة اسمها بوردا مودن.. المربات والمخللات واللانشون والجينة الرومي وكل أنواع الاكل الجاهز ده كانت بتعمله في البيت بكفاءة ونظافة وتوفر.. لوحات التجميل المتعلقة على الحيطان في بيتنا كلها شغل امى اليدوي "كانفاه".. كانت هواية وتوفر في نفس الوقت.. كل حاجه يندفع فيها فلوس امى كانت بتعملها محليا في البيت بمنتهى الكفاءة.. ست حطت كل طموحاتها وحياتها على جمب علشان توفر اكبر قدر ممكن من الفلوس لبيتها وجوزها.

ولك ان نتخيل بقى حوار بين واحده ست اشتراكية من جيل عبد الناصر الى اترى على الكاستور وشايف ان الحياه كفاح وبين بنت شايفه ان الحياه زيتها زى دريم.. الاتنين بيجيبوا توك شو.

- واني بتقضي ايامك ازاى بقى يا عروستنا؟
- بروح النادي كل أسبوع.. والكوافير مره كل أسبوعين.
- كوافير ومره كل اسبوعين؟؟ ليه يا حبيبي؟؟ اذا كان الرجالة نفسهم بيجلقوا مره كل 6 شهور.
- يعنى.. بحب التغيير.. مره صبغه.. مره سكراب.. مره باديكير.. كده يعنى
- اه.. طبعاً دى حاجه مهمه.. كله الا الاسكراب ده.. بتعرف في تطبيخي بقي؟
- لا لا.. مش بطبق المطبخ ده.. الطباخ بيعملنا كل حاجه

- وهو ينفع الرجل يأكل من ايد غريبه.. لازم تأكله وتعلفيه.. لازم تملي كرشه والا هيبص بره.
- وانا اهلك حياتي وابهدل جسمي في المطبخ ليه بقي.. لا لا.. انا أساسا مش بحب الطبخ

واستمر الحوار سجلال بين بنت المستشار.. وبنت المجاهدن.

من وقت للتاني كانت ام البنت تتدخل في الحوار علشان تثني على جمال بنتها وحلاوتها.. اى حوار حوالين اى شيء الا جمالها كان بيتقطم علطول.. انما ممكن يمتد الكلام لساعات لو بنتكلم عن ندرة لون عينيها الى اكتشفت بعد كده انها عدسات.

اخر حمولة مرارتي لما عرفت انها بتقوم كل 5 دقائق علشان تصلح ماكياج.. أخيرا عرفت يعنى ايه تصليح الماكياج ده.. كنت هموت واعرف فين التوكيل الى بيصلحو فيه ده جايز يعرف يظبطلى ال Injection بتاع عربي.. خبطت على كوبايتي 3 مرات.. الاشارة المتفقه عليها بيني وبين امي علشان نخلع.. ملهاش لزوم القعدة اكر من كده.. من الأول مكنتش متحمس ودلوقتي تأكدت ان الموضوع ده مش مناسب لواحد زي.. مقدرش احط ايدى في ايد واحد انا شايفه حرامي.

بعد ما رجعت من السفر جمعتني سفرة الغداء مع اهلي.. واحده من اخواتي فتحت الموضوع علشان تعرف من ماما رفضنا نكمل ليه.. من على السطح كده النسب يبدو كويس والبنت جميلة.. ويبدو ان امي لقتها فرصه مناسبة علشان تعلم اخواتي درس ينفعهم خصوصا ان الكبيرة كانت اتخطبت.. بدأت تتكلم بعد ما لبستها روح الواد ابن بتاع البسبوسة في فيلم الايدي الناعمة.

شوفوا يا ولاد..

الانسان حصيلة ما صنعتة ايد.. ممكن ربنا يوهبك جمال.. بس الناس مش هتحبك علشان انتي جميلة.. انما هيحبوكي لو طبعك حلو.. ممكن ملكة جمال تتجوزك علشان فلوس ابوك.. بس من جواها مش هتحترمك لو بتاخذ مصروفك منه.. لما تقف وتقول انا جد بابا كان باشا وللا كان وكيل وزارة.. ده شيء نعرف منه انك اتربيت في بيت بياكل لحمه كل يوم.. لكن ده شيء ملوش اى وزن لو حببت اقيمك كزوج لبنتي.. ممكن جدا ابوك يساعدك ويجيبلك شبكه غالية.. ولكن اول خاتم انت تشتريه لخطيبتك هيبقي له دايم ذكرى لا تنسى.. الشخص العظامي "المعتمد على عظام اجداده" ينفع صاحب حلو.. لكن الشخص العصامي يصلح شريك حياة.

البنت الجميلة ملهمه للشعراء.. لكن الست الشاطرة هي الى بتعمر البيت.. ديانا سينسر اتطلقت رغم انها كانت متجوزه ابن ملوك.. بينما خدامتها متطلقتش رغم انها متجوزه سواق.. مينفعش تبقى كل مؤهلاتك في الحياه انك ابن فلان.. او انك جميلة.. انت نفسك فين؟ انت مين.. عملت ايه.. اخرجت بتقدير ايه.. حضرت دراسات عليا وللا لأ.. اخدت كورسات ايه.. تمتلك ايه من المهارات.. تقدر تقدم ايه لغيرك.. تقدر تشيل ايه من مسئوليات الحياه؟

ربنا وهبك القدرة على انجاب الأطفال.. دى مش ميزه اطلاقا لانها هبه من ربنا.. لما تولدي.. انتي كده معديتيش المانش ولا عملي انجاز.. انما لما ابنك يكبر بصحة كويسة ويتفوق في دراسته وتكون اخلاقه كويسة.. الناس هتقول يا زين ما ربيتي.. هو ده الإنجاز..

من هذا المنطلق نقيم البشر..

فلان عمل وللا ورث؟

فلانه جميلة وللا مهتمة بنفسها؟

فلان اتعين في النيابة علشان هو اول دفعته وللا علشان ابوه مستشار؟

انا طبعا بسمع ومش مصدق.. الله اكبر.. هو ده بالظبط الى انا حسيته ناحية البنت دى بس معرفتش أعبر عنه.. حسيت ان حياتها منحصرة في المراية.. هي بتتفرج على نفسها بس وفرحانه بهبة الخالق.. والمراية دايمًا بتكذب لأنها بتوريك الوش بس.. وشك انت لوحدك.

- ينصر دينك يامه.. وربنا هو ده الكلام.. صح كده.

- ماشى يا موكوس.. خلص بقى اكل بسرعه علشان تلحق تستحمي.. عندنا معاد النهارده بليل

- كح كح كح.. لا إله الا الله.. انا شرقت وبقيت أطرش.. اهههه.. انا مش شايف.. حد يناولني كوباية ميه.

معالي الوزير

مهم اوى تعرف حجم لحافك علشان تعرف بالظبط هتمد رجلك لحد فين.

.....

أبويا الله رحمه كان موظف كبير.. بس منظر على الفاضي.. هيلمان وسلطة وعربيات رايعه جايه وطقم سكرتارية وتصريحات في الجرايد وعلاقات ملهاش اخر.. بس من غير فلوس.. الشغلانة دى اخرها مرتب الحكومة.. لما تعمل فلوس من منصب زى ده يبقى ملهاش الا تفسير من اتنين..

- يا انت بتتربح من منصبك.. ودى ليها الف طريق قانوني تماما
- يا اما انت بتاخذ رشاوي صراحة

الطريقة الاولانية مكانش فيها اى خطأ قانوني.. ولا اتخن نائب عام مكشوف عنه الحجاب يقدر حتى يسأل من اين لك هذا.. اغلب الى مسكوا الشغلانة دى قبل وبعد ابويا عملوا كده.. بس هو الله يرحمه كان دايم يقول حديث الرسول عليه الصلاة والسلام "هلا جلست في بيت امك؟"

بابا كان بيكره الفلوس والفلوس بتكرهه.. كل الفرص الى قابلته في حياته علشان يبقى مليونير اداها ضهره بمنتهى الاريحية.. يا اما شاكك.. يا اما قصور نظرك.. يا اما نصيبك.. المحصلة النهائية انه عاش مستور.. ومات في هدوء من غير ما يسبب اطيان ولا ميراث ممكن نتسند عليه طول العمر.

هو نشأ في اسرة فقيرة جدا.. واعتقد ان النشأة دى اثرت عليه.. مكانش متخيل ان الى زيه ممكن يمسك ملايين.. او يمكن كان عنده مستوي غير طبيعي من الزهد والرضا.. كان مقتنع تمام الاقتناع ان ملوش من الدنيا الا ما اكل فأفنى وما لبس فأبلى.. وان طالما الصحة عال والعيال كويسين.. يبقى احنا في جنة مصغرة تستاهل شكر الله عليها كل دقيقة لحد ما نروح الجنة الكبيرة ان شاء الله.

في يوم لطيف جتلي مكلمة منه.. اكيد في حدث جلل.. بابا مكانش بيستخدم التليفون الا لو القيامة هتقول فعلا..

- احمد.. ظروفك ايه يوم الخميس الجاى؟
- خير يا هندسة.. مزز وللا ايه؟
- لا يا فالح.. عندي فرح واحد صاحبي وعاوزك تيجي توصلني.
- واحد صاحبك ولسه بيتجوز.. ما تصلى على النبي فقلبك كده يا عم الحاج..
- امال ايه يا ض.. انت فاكرني عجزت وللا ايه.. انا بس اجوز اخواتك وهتشوف.. هخريها.
- اللعب يا سمك.. اقعد انت سخني كده زى كل مره.. وقصا ماما تبقى الرجل المثالي واطلع انا توفيق الدقن.. تاكل انت المكرونة بالبشاميل وتاخذ الريموت.. وانا اتهازأ.
- ابقى تعالى معايا الفرحة ونرجع طنطا سوا
- حاضر يا باشا.. انت تؤمر.

أنا في العاده مش بحب الافراح.. مش شايفها الا انها مناسبة للشقطة والنميمة مش اكثر.. العروسة للعريس وخلصنا على كده.. فلوس الفرحة دى ممكن ندبح بيها لله.. نأخذ ثواب لما نأكل الفقراء بدل ما نأكل الناس الى هيتكلموا علينا.. كمان نرحم "جسم" العريس من الى صاحبه بيعملوه فيه.. شيء قاسى جدا والله.

بس فرح في الماريوت اكيد هيبقي غير اى فرح.. العريس ابوه فريق في الجيش وهيحضر.. لفيف من كبار رجال الدولة.. يعنى حاجه امثالي يشوفوها في المسلسلات بس.

في اليوم المحدد اخدت ابويا وانطلقت على الزمالك.. حاولت كثير انى اتصرف زى ولاد الاكابر لما الساييس طلب منى مفتاح العربية علشان يركنها.. كنت واقف براقبه.. اضمنه منين انا.. ما جاز ياخذها ويجري.. اى نعم كانت ازبل عربيه فى الموجودين.. انما اهو.. محدش يضمن.

دخلنا القاعة من هنا.. وجالي انبهار عصبي من هنا..

يا دين النبى.. هو ده فرح؟

الى يصرف كل ده فى فرح واحد.. يبقى معاه كام؟

يا تري الفرغ ده على العريس وللا العروسة.. والسؤال الأهم.. القايمه بكام على كده؟

الناس دى بتجيب الفلوس دى كلها منين؟

فلوس الفرغ ده مش بس تجوزني مرتاح.. دى تجوز شباب بلدنا القبه كلهم مرتين على الاقل.. البوفيه ده مش بنشوفه الا فى الاعلانات.. فى حيوان كبير اوى محطوط وسط البوفيه.. مش عارف ان كان ثدييات وللا طائر.. اللحمه دى كمان غريبه اوى.. اللحمه الى اعرفها يا حمراء وسط الطبخ.. يا اما مشويه لوحدها او بفتيك لو أمى راضيه علينا.. انما الالوان دى اول مره اشوفها.. ده غير الأسماء الغريبه.. حاجات كده اخرها يا اما "بالمشروم" او مش عارف ايه كده صوص.

اسلم حل هو الجمبري.. اى نعم معمول بطريقة غير الى اعرفها.. انما هو هو نفس الحيوان.. مليت طبق محترم وبقيت عامل زى عادل امام فى اللعب مع الكبار..

لابس ومتأنتك.. ترارام

متأنتك ولابس.. ترارام

الفرح كان فيه مطربين مشهورين.. مدحت صالح وحكيم ودينا الرقاصة.. يخرّب بيت اهلك وليه.. انى لسه ليكى عين تواجيى المجتمع بعد مصر كلها ما شافتك من كام يوم وانى بتغسل المواعين بتاعة حسام أبو الفتوح!!!

اتعلمت فى الفرغ ده دروس كثير اوى.. منها مثلا ان الصبر والمثابرة والعمل الجاد.. اكيد هتوصل بيهم لمكانه محترمة.. اشتغلت كثير وصبرت فى حياتي.. والحمد لله اديني اتصورت مع حكيم اهو.. عسل على الطبيعة ابن الايه.

وأنا واقف قصاد البوفيه ضايح وتايه وسرحان وبفكر فى وجوب التأمين ومبدأ التوزيع العادل لثروات الشعوب خبطت غصب عنى فى صاروخ نووي.. حاجه محصلتش فى التاريخ ولا الجغرافيا.. كتكوته دقيقة الملامح والصوت.. حاجه كده نانسي-عجرب على حته من صباح على تننوفه من شاديه.. والتقفيل النهائي قالب على فائن حمامه.

اعتذرت بمنتهي الأدب.. المفروض انى كنت اقولها اخبطني تانى يا جميل انت يالى زى كباب الحلة.. بس لا المكان ولا الظروف تسمح بالتحرش ده.. لازم امسك نفسى شويه والا هتفضح انا والراجل الطيب الى جانبي معاه المكان الفخيم ده.

من محاسن الصدف ان الصاروخ ده وابوها كان مكانهم معانا على نفس الترايزه.. فى الافراح دى كل واحد من الحضور له مكان مخصص وغير مسموح باصطحاب الاطفال.. يعنى تنسى-الجو بتاع العيال الى سارحه فكل حته توقع الاكل على كل شيء وتجري تروح تقعد مكان العريس دى.. انا سبت ابويا لوحده رجعت لقيت معاه ناس اكابر من الى ينشوفهم فى التلفزيون ويقولوا تصريحات فى الجرايد.. اعرف منهم بعض الناس.. فى منهم وزراء وناس تانيه بتوع سياسة وحاجات كده.. ايه المنزلق ده.. الواحد هيبقى قاعد منشى-اوى والكلمة بحساب.. كمان هيقعدوا يكذبوا بقى وكل واحد فيهم يتكلم عن انجازاته ومعاناته فى خدمة الشعب وبطولاته فى مقاومة الفساد وازاى الوظيفة مش سايباله وقت علشان يعمل شوبنج زيه زى اى مواطن عادي.. يا مرارى يامه.

طنشت كل الناس وركزت مع الصاروخ دقيقة الملامح.. مالي والعواجز دول.. خليني مع القطه دى.. النبى حلوه.. مش لاقى فارق حقيقي بين صوابها وبين صواب الموز ابو نقطة.. كلمه فى ضحكة فى حدوته.. قدرت احوز على اهتمامها.. انا اه تعليم حكومي بس كنت متفوق.. ومن ناحية الثقافة.. فالحمد لله عندي تخمه.. قدرت ابهر خريجة الجامعة الامريكية وابوها.. خصوصا لما اتكلمنا فى تاريخ الوزارات المصرية.. الله يستره يونان لبيب رزق.. كان ايامها بينزل حلقات فى اهرام الجمعة عن الموضوع ده.

خلص اليوم بدون فضائح وانا معايا رقم تليفونها.. نظره سريعة من بابا فهمت منها انه معايا على نفس الخط.. نتكلم لما نروح بقى.

يبدو في اليوم ده انى كنت مفقوس اوى.. بابا مقالش نص كلمة.. لكن بعد كام يوم عرفت اننا مدعويين عند القطة في بيتهم.. يا مسهل الحال يارب.. قشطة جدا.. وطب وربنا كنت عارف ان الوان مان شو تأثيرها على المزج خرافي.

- أحمد.. فضيلي نفسك.. عندنا زياره مهمه للوزير "...."
- طب وانا مالي يا حاج.. انت رايح تقابل الوزير.. انا هاجى معاك اعمل ايه.. ده انا اعرك.
- ماهو يبقى ابو البنت الى انت قعدت ترسم عليها في الفرح وفاكرنا كلنا قاعدين قتل..
- حلاوة.. البت ام صوابع موز ابوها طلع وزير مره واحده!!
- ابسط يا عم.. شكل دعوة امك مستجابة
- دى بنت وزير.. عارف يعنى ايه بنت وزير
- انا اعرف ان ابوها راجل مستقيم.. لو على الامور المادية هنساعدك أكيد.. الدور والباقي عليك انت.
- الدور عليا انا ازاي يعنى.. انا علشان اتجوز البنت دى لازم ابقى رشدي أباطه مع تاتش عمر الشريف على مخ احمد زويل مع بعض.. بدمتك دى هتعيش في العصور وللا تقعد في البيت تربي العيال؟ بقى دى ينفع اقولها قومي يا وليه اعمليلي شاي وللا اعدلها في البيت بالكسون؟؟
- الراجل عازمنا من غير اى التزام.. هو بقاله فتره بيحاول يفتح معايا علاقات وتعارف اسري.. تعالى.. مش هتخسر— حاجه.
- ماشى يا هندسة.. الى تشوفه

ورحنا بيت معالى الوزير..

توقعت انى الاق فيلا كبيرة.. قصر.. خدم وحشم ومتاريس.. توقعت انى معالى الوزير هيقابلنا بروب حرير قصير وهو بيدخن سيجار.. ونبدأ نتكلم الكلام ايه..

- شوف يا دولة الباشا.. انا رأيي ان الديموقراطية هي الاساس..
- اسمحلي اختلف معاك يا سعادة البك.. لا.. الأساس هو الديموقراطية..
- عندك حق فعلا.. الاشتراكية العلمانية هي الحل في مواجهة تيار الفكر الأصولي الشيوعي
- مطبوط.. ويبقى كده حققنا العدالة والتنمية وقضينا على كل التحديات.

بس انا كنت غلطان..

راجل بسيط جدا.. بيت عادى زى اى بيت مصري في حدود انه وزير.. الرجل لم يكن من الوزراء السياديين ولا الوزراء النجوم.. موظف كبير مجتهد مسك المنصب بتاريخه وشهاداته.. الوزارات الى زى دى بيبقى منصب الوزير فيها بالدور مش اكر.

ام العروسة من اسره غنيه جدا.. انفقوا كتير في تعليم الاولاد.. وجهة نظر تحترم جدا.. التعليم ده استثمار مش مصاريف.

اصول الزيارات ان الانسان ميطولش.. يا بخت من زار وخفف.. مشينا من عند الناس وانا اكثر حيره.. وبابا كالعاده رافض يديني اى تعليق او نصيحه الا لما انا اخذ القرار النهائي واصر عليه.

اسابيع وانا متخبط.. مش عارف اعمل ايه ولا اقرر ازاي.. صحيح الموضوع مشجع اوى اوى.. بس انا من جوايا مقتنع ان مش دى حياتي ولا انا الشخص ده ابد..

اتوكل على الله وابدأ.. رغم الفارق الاجتماعي بيني وبينها؟؟

انسى الموضوع كله؟ طب وامي الى عماله تزغرت مره كل 3 فيمتو ثانية دى.. دى ممكن تروح فيها.

النظرة السطحية تقول ان دى جوازة العمر.. حمايا هيبقي وزير عصامي.. سنتين تلاته وهيخرج من الخدمة.. ويفضل من سيرته النسب والعلاقات.. الكيد هستفيد.. الصيت ولا الغني بالرغم من ان أمها تملك شيء كثير اوى.

بس هو انا هقبل انى اخد فلوس من حماي؟؟

اذا كنت مش بقبل هدايا عيد ميلادي.. ده انا لو حد عزمي على القهوة او الغداء بحس بنار في جيتي.. قوم اقبل مساعدات وفلوس من نسايي؟؟

اصحابها غير اصحابي.. هواياتها غير هواياتي.. الوسط الى هي عايشه فيه كله يختلف تماما عن الوسط الى انا عايش فيه.. مش بس فكرة فلوس.. المستوى الاجتماعي العام والذوق والهوايات والمشاكل والاهداف.. احنا مختلفين في كل شيء تقريبا ولا نتفق في الا انها صاروخ.

هي مش غلط.. انا مش غلط.. بس احنا متوازنين زى قضبان السكة الحديد..

قطر بخاري ببجى يمين وشمال في دماغي.. نافوخي بيون.. كلام الستات شغال من تحت لتحت.. عقبال فرح البشمهندس الصغير.. لا لا لا متقوليش بقي.. دى عروستنا تخطف خطف.. مين ده الى امه داعباله وياخد بالقمر ده.

بعد 1000 ركعة استخارة.. وصلت للقرار النهائي..

نو وومان نو كراى "بوب مارلي"

انا لا اصلح زوج للبننت دي.. انا غير مناسب لها اجتماعيا ولا ماديا ولا حتى سوريا.. لو اتجوزتها هظلمها واطلم نفسي.. هيبقي اراهاق مادى واجتماعي عليا ووعليها.. دى لو اكلت سندوتش كبدة من الى انا بتغدى بيهم كل يوم ممكن تموت.

اعلنت القرار ده من هنا.. وانفتحت عليا ابواب الجحيم من هنا.

مش هرکز في شتائم جدى.. كده كده لما بيشتمنى بالأم.. امى دى تبقى بنته وهو حر معاها.. اهي تربيته في الاخر.. امى نفسها لما تقولي يا أبن كذا.. كذا ده يبقي جوزها والداخل بينهم خارج.. يصطفوا مع بعض بعيد عني.. مش معني ان اخواني وصفوني بأنى وش فقر يبقي انا فعلا كده.. بنات ويبتدعوا على اخوهم الكبير.

وش فقر علشان كنت واضح مع نفسي؟

وش فقر علشان عرفت قدر نفسي؟

مرت الأيام وعرفت ان البننت اتجوزت شاب اقل منى في امكانياته وشهاداته.. وانفتحت عليا ابواب الجحيم تانى.. مش كنت انت اولى يا بأف.. اديك ضيعة فرصة الحمر يا حمار.. يوم فرحها كان مأساة في بيتنا حقيقي.

هل معنى انها اتجوزت حد اقل منى.. ان كان جوازنا هينجح؟؟

لم اخوض في الموضوع ده معاهم في أى نقاش.. هي دلوقتي متجوزه وميصحش نجيب سيرتها.. تذرعت بالأخلاقيات علشان اهرب من التهزيء.. مش قادر احكم حقيقي ان كان عندهم حق وللا لأ.

تمن الموقف ده كان غضب عام عليا في الأسرة.. محدش كان في صفى الا خالي الاكبر الراض لفكرة الجواز من اساسها.. اصحابي مكانش فارق معاهم الا انها مزه.. بقيت متهم بالغرور وان مناخيري في السماء وميعجبنيش العجب.

بعد ما الايام لفت واتجوزت وشفتني كزوج في البيت.. اقدر اقول بكل اريحه انى كنت صح لما رفضت.. انا انسان بوهيمي عشوائي يفعل ما يحلو له في اى وقت واى مكان.. مراي لازم ترجع حياتها كلها على ظروفى انا ومستقبلي انا.. عندي خطة لمستقبلي واولادي.. مش عاوز نصايح ولا عاوز اراء الا لو طلبت.. محتاج حد يساعد من غير هرى ووجع قلب.

صح.. غلط.. مش مهم

هذا انا.. ولا انوى التغيير ابدأ لأى سبب..

اهم ما في الموضوع ان الانسان يكون واضح مع نفسه ويبقى عارف كويس هو عايز ايه..
عايز واحدة منتقبه.. يبقى من الأول اصطاد من بحر المنتقبات.. متروحش لواحدة كاشفه راسها وتقول انا هاخذ فيها ثواب..
الحقيقة انك هتاخذ في سنانك..
عايز ست بيت.. يبقى من الأول روح لواحدة قاعدة في البيت واتفق معاها على كده من الأول.. مفيش شغل يبقي مفيش شغل..
متاخدهاش بتشتغل وتقعدها بالأمر.. ده غباء هتدفع ثمنه غالى اوى بعدين..
لازم الانسان يكون شفاف تماما ويعلن عن كل رغباته بمنتهى الوضوح.. محدش بيتجوز مرات حد الا العمدة عثمان في الزوجة
الثانية..

سو.. وات؟؟

ما دام الموضوع ان بابليك.. ومفيهوش فيلينج.. يبقى سو وات "كابتن ميشو – طير انت"

الرجالة دول كائنات غريبة جدا.. كل واحد اتجوز واحدة عايزها ليه لوحده.. شيء فوق الفطيع يعني.. انانية مفرطة.

حياة السفر والتنطيط الى عشتها بالإضافة الى قناعاتي الليبرالية للأسف في بعض الأحوال بتدى انطباعات مسبقة عند بعض الناس.. أوقات بصطدم بتوقعات ناس انى ممكن اقبل حاجات اوفر ضد الشرع والعرف لا لشيء الا انى بسافر وبلف وبشوف.. بعض الناس عندها خلط بين كونك عايش وسط الأجانب وبين كونك منسلخ من هويتك.

احنا دلوقتي سنة 2008.. اخر سنة ليا في مصر.. قبل قرار الهجرة النهائي.. كانت من أسوأ السنين في عمري.. دى السنة الى تأكدت فيها ان مليش مستقبل في مصر.. دى السنة الى فشلت فيها كل محاولاتي علشان اخذ الرخصة القانونية لتشغيل التكنولوجيا الى كنت شغال عليها في مشروع عمري.. دى السنة الى كنت فيها مهممل في كل شيء في حياتي.. بمشي.. في الشارع تايه زى السكران.. فلوس بتقع من جيبي من غير ما احس.. اعمل حوادث غريبة بالعربية.. وزنى زاد بشكل ملحوظ.. دقنى طويلة باستمرار.. بالإضافة الى 3 علب سجائر يوميا.

شعور مرعب عنيف بالإحباط.. بدأت المشروع وكلي أمل.. حلمت بالنجاح والملايين.. قبضت اول دفعة من قيمة اول مشروع هنفذه فعلا لمصنع أجهزة كهربائية كبير.. اشتريت منه عربية BMW وذهب بالهبل لأمي واخواتي.. ولما فشلت اخذ الرخصة أصبحت مطالب برد المقدم الى خدته.. لأول مره في حياتي أصبحت مديون بمبلغ يفوق الخيال.. اضطريت اخذ قرض علشان اقدر اكمل المبلغ لصاحب المصنع كتر الف خيره على صبره عليا.. تعثرت في سداد أقساط القرض وأصبحت مهدد بالسجن.. كل ده علشان فكرت وحلمت في بلد مليش فيها مكان.

في رحلتي للحصول على واسطة تساعدني في الحصول على الترخيص قريت شخصيا من واحد من زملاء العمل.. ابوه كان فريق في الجيش.. في يوم كنت عنده في البيت وابوه سمع الحكاية.. الراجل عجبته الفكرة والتصميم بعد ما عرف انى قابلت وزير الاتصالات وبعده رئيس الوزراء واشتكت لرئاسة الجمهورية وحاليا بدور على طريقة أوصل بيها لعمر سليمان.. الراجل مشكورا عرض انه يساعدني.. هل كان طمعان في نسبة من الأرباح او شراكة.. الله اعلم.. انا كنت مستعد وقتها ابيع روجي للشيطان نفسه زى فاوست.. بس اخذ الرخصة.

- بص يا واد يا احمد.. عندي لواء معرفة.. اكيد هتلاقي عنده الحل
- وهو لواء هيقدر يعمل ايه؟؟ انا قابلت لواءات كتير وقابلت رئيس الوزراء نفسه.. انا متهيألى ان بوش نفسه هو الى واقفلي في الموضوع ده
- لا يا عبيط.. ماهو مش اى لواء يبقي لواء.. الجيش فيه خيار وفقوس على فكرة
- يا سلام!! معقول الكلام ده؟
- اسمع منى بس.. انا هرتبلك معاه معاد.. بس على الله ترفع راسي
- ايدى على كتف حضرتك وانا مش بس ارفع راسك.. انا هدخلك التاريخ.

وصدق والد صديقي فعلا واخذت معاد من سيادة اللواء في نادي الجزيرة.. يوم ما رحل النادي ده كان يوم مشهود اقسم بالله.. بس دى تفاصيل نحكيها في موقف اخر.. تعددت اللقاءات بيني وبين سيادة اللواء.. عرفت ان الراجل محتاج يتكلم مع شعير ابيض.. انا بالنسبة طلعت او نزلت.. مجرد عيل.

معنديش غير ابويا رحمة الله عليه.. هو الى بيعرف يتكلم مع الناس دى.. كمان خدمته في القوات المسلحة والنياشين الى واخدها من أيام حرب أكتوبر اكيد هتخلى في طريقة للتفاهم مع الجماعة العسكرية دول.. وقتها طبعاً كنت مليان حب وتقدير لقوتنا المسلحة أمن وأمان مصر.. كنت عادى يعني.. حمار زى اى حمار.. ابويا نجح ان يضرب صحوبيه مع الراجل حتى ان لقاءاتهم أصبحت بشكل دوري.. انا طبعاً كل ده على اعصابي عاوزهم يتفقوا وينجزوا علشان نخش في المهم.. عاوز اشتغل يا ناس..

وفي واحد من اللقاءات الاسرية كان اول احتكاك ليا بالطبقة دى في مصر.

قصر- كبير وفخم جدا.. 50 الف متر مربع يسكنهم اسرة واحدة.. جنينه تبدو بلا نهاية.. عربيات من كل الموديلات واقفة في كل مكان.. عمال في الجنينة وعمال داخل البيت.. عدد مهول من الكلاب يمرح بمنتهي الاريحية في القصر.. بيت الكلاب لوحدة كان مساحته 250 متر وفيه ميه وكهرباء وتكييف.. واجهة القصر مليانه تماثيل.. نخل عالي اوى بطول الاسوار علشان الخصوصية.. نافورة مية مرمر في وسط الجنينة.. عصافير بتزقزق على الشجر.. الجنينة نفسها مهذبة في عناية شديدة.. أخاف انام على النجيلة دى بهدومي لاحسن اوسخها.. النجيلة طبعا مش هدومي.

داخل البيت ما لا عيني رأت قبل كده.. الأتريجات بالألوان.. لوحات عليها توقيع كبار الفنانين المصريين عرفت منهم لوحة لفاروق حسني لأنى مفهمتش فيها حاجه.. موبيليا فرنسية الطراز واد الداهية.. الارضيات رخام والله اعلم او بورسليين بيمسحوه كل 5 ثواني بالديتول.. كل تفصيله وكل ركن في البيت عليه خاتم الثراء الفاحش.. ما شاء الله.. والله ما كنت اعرف ان الكلية الحربية بتعمل كل ده.. انا اعرف ان الجيش بيوفر شقق وعربيات للضباط بالقسط صحيح.. انما قصور كمان؟

عمار يا جيشنا..

ولا همني.. ايه يعنى.. انا واد حلو برضه وطلعت السابح على المحافظة في الاعدادية واتصورت مع المحافظ.. في اليوم المحدد للزيارة كنت هناك انا وابويا وامى وجدى حبيبي.. الرجل الى جه مخصوص لما عرف ان سيادة اللواء عنده بنت على وش جواز.

واثق القعدة اجلس على كرسى فوتيه تمنه يفتح 3 بيوت.. حاطط رجل على رجل بأرستقراطية مصطنعة.. شكلي باين اوى انى عربي يدعي انه بيه.. بدأ توافد الأسرة واحد ورا الثاني.. ناس هاديه جدا فيهم ثقة من يقدر على كل شيء.. كلمات ترحيب بسيطة تقول ان الناس دى من أصول غير ريفيه.

حوار عادى بسيط عن أحوال البلد المتقلبة والجيش المستعد دايما.. حبيت استخف دمي واهزر مع سيادته..

- يعنى ايه يا جنرال.. جمال هيمسك وللا ايه؟

- يمسك مين؟ ده عند امه.. برقبنا.

وخبط على رقبته 3 مرات.

مكانش في دماغه وقتها خالص انه بيتكلم جد.. اهو اى كلام بنسلي بيه القعدة.. بعد 3 سنين عرفت ان الراجل مكانش بيهزر فعلا.

رن جرس الباب.. يبدو ان الجمعة عندهم موعد لتجمع اسرى.. انفتح الباب ودخلت اسرتين من الحجم الكبير.. رجاله وستات وشباب وبنات من كل الاعمار.. تجمع اسري عادي في بيت سيادة اللواء.. الى هو شكلة كده كبير عائلتهم.. ان لم يكن بالسنة.. فبالمقام اكيد.

الدخان المتصاعد من الشواية العملاقة في جنينة البيت وحركة الخدم تقول انهم متعودين على كده كل جمعه.. الأطفال لطاف اوى.. عيال ملونه من بتوع انكل وطنط مش القاذورات الى احنا بنخلفها.. عيال واضح عليهم مدارس اللغات فعلا.

اوعدنا يارب..

لحد كده والأمور عاديه..

بدأ السلام والتحيات من الزائرين والترحيب من اهل البيت..

وانا تنحت..

كل الرجاله بأسواكل الستات.. كل الستات اتشعبطوا في رقبة كل الرجاله.. كل ذكر في البيت أو من الزائرين باس كل ست موجوده على خدها مرتين وثلاثة.. وبعضهم كان بالأحضان.. كله بمعنى كله.. لو قلنا ان كان في 6 رجاله و6 ستات.. يبقى حصيلة السلام الحار ده ما يقرب من 360 بوسه.. البوس كان بدمه اوى.. في بنت شفت رد فعلها لما شافت واحد معين راحت جايه

جوزها!!!

ده انت لو سألْت ای واحد متجوز بقاله 10 سنين یمکن مش هیطلع باس مراۃ بالکم ده کله..

یا دین امی.. هو فی ایه!!

احيه.. يكون ده تبادل الزوجات اللي بيقلوا عليه!!!

انا قاعد متنح.. بصيت لأمي اشوف رد فعلها ايه.. لقيت على وشها تعبير يموت من الضحك.. امى اخيب خلق الله في التمثيل او إخفاء المشاعر.. وشها ماري منيب خالص وملاحها بتقول جرى ايه يا بنت المفكوكة منك ليها.. ما تمسكوا نفسكوا شويه.. ايه.. اول مره تشوفوا رجالة!!

جدى هاج وماج وارغي وازيد وزاط في الليلة دى ولا كآنه مشجع اهلاوي استلم زملكاوية صباحية ماتش بيبو وبشير.. دخل وسط المعمعة يسلم مع الى بيسلموا وينوس مع الى بيبوسوا.. الرجل معذور.. مراته متوفيه من فتره وهو برضه محتاج لست في حياته احسن ما ينحرف.. المراهق في الثمانين من العمر يبيقي خطر اوى لو عاش لوحده.

سلمت على الناس وأنا متنج.. مش عارف أقول ايه.. ابوس زيهم وللا امي هتتفخني.. مين يقرب لمين ومين يببوس مين ليه وعلشان ايه.. الأكيد ان مش كل دول محارم لكل دول.. أصلا فكرة ان راجل ببوس واحدة مش مراته دى صعبه عليا اوى.. طب وربنا نكدت على مراتي يوم خطوبتنا لما عمها باسها وهو يقولها مبروك يا بنتي.. كنت هفرکش الخطوبة كلها لما لقيتهم اسرة منحلة كده.. ايه بعني عمها.. ببوسها ليه مش فاهم انا.. هفأ انا مثلا مش مالي عينه علشان ببوس الحزمة بتاعتي وانا واقف !!!

الموضوع قلب معايا بسخرية.. بمقيتش شايف الناس دى الامقاطف.. كل ما واحد فيهم يتكلم ابقى عايز أقوله "مش البيه خرونج برضه" بصوت سرحان عبد البصير.

انا مكنتش فاهم الى بيحصل.. ابويا هو الى لقط الفكرة رغم ان مفيش حاجه اتقالت صراحة.. قالى شكل الموضوع هيمشئى كده.. انت تاخذ بنت اللواء.. وهو هيبقى ضهرك في مشروعه.. هو هياخد صينية الأكل كلها ويسيلك شوية الرز بالمكسرات مع فرايت اللحمه الى بتبقى على الأطراف.. هتعيش برنس طول ما هي سعيدة وبتبتاس براحتها.. ويوم ما يغضب عليك - لو هو محترم- هيرميك في الشارع يا مولاي كما خلقتنى.. العادي انك تلاقي نفسك في السجن.

قراري كان محسوم.. محييتش فكرة اني أعيش بقرنين في مقابل نجاح المشروع.. ممكن اتقبل ان حمايا يوبس مراقى اه.. ابوها برضه مهما كان وير الاب واجب.. انما ابويا لا.. وطبعاً العروسة المحتملة مفلتتش من جدى الى فقد عقله في مهرجان البوس للجميع ده.. الراجل اتجنن يا عيني مع كل هذا الكم من اللحمة لدرجة اني قتلته بقولك ايه يا حاج.. في اوتيل قريب.. اخطف رجلى احجزلك اوضه بمنافعها تشقظ فيها المزى دى؟؟

ويا ريتها جت على البوس..

لما بدأت حفلة الشواء قمت اشترك معاهم.. انا أستاذ في طرق الشواء وخبير في أنواع الفحم.. انا قلت طالما الجوازة فكست.. ناكل بقي علشان نحلل الزيارة.. مش هيبقي المشوار كله بلع يعني.. ده انا جايب شوكلاتة سويسري لو امي عرفت تمنها ممكن تروح فيها.

لقيتهم بيحطوا سائل شفاف كده على اللحمه.. سألت من باب الفضول لا اكثر..

- ايه ده يا جماعه؟
- شاتو لافيت.. من مصانع روتشيلد.. فرنساوي
- اه عارفه.. بجيبه من كارفور علطول.. ده بيخلي اللحمه تستوى ايه.. هوا
- بتجيب ايه من كارفور؟
- الشاتو ده.. عارفه على فكره.. دى أصلا توابل بتيجي من الهند على فكره.
- توابل!!! ههههههه
- امال ايه يا جدعان.. هو اكيد مش خل؟ مفيش خل لونه احمر تقريبا.
- يا ابني لا.. ده Vin rouge.. بيبجي من بوردو مخصوص
- لا اله الا الله.. Vin !!
- وفيها ايه.. ال Vin بتاع اللحمه لازم بيبجي احمر.
- مش عارف والله.. ال Vin بتاعنا بيبقي في قعر طبق السلطة.. ويبقي حراق كده بس ايه.. بيفتح النفس تمام.

اه يا ولاد المجانين.. هوب هوب.. على الأكل!!

في أثناء الشواء وانا واقف متتح وبحاول امسك نفسي.. من الضحك.. كلمتين خطف كده بيني وبين بنت سيادة اللواء.. الموضوع بايظ بايظ.. انا بس حببت اسجل في تاريخ حياتي اني اتكلمت مع بنت بتاكل اللحمه بمنقوع البراطيش..

- انا كنت مخطوبة اه.. بس سينا بعض.. هو كان فرفور اوى..
- فعلا؟؟ طيب وكنتوا بتبوسوا بعض وكده
- اه.. عادى.. كان بيبجي البيت هنا كثير.
- وسيادة اللواء يعرف؟؟
- اه طبعاً.. امال هيبجي من وراه؟
- لا صح.. انا اسف معذرة.. اصلى اول مرة اعرف لواءات.

نص ساعه وحسيت ان الدم ضرب في نافوخي.. بتقول ايه البت دى.. انا دى اتحرق من مجرد كلامها.. تصورت نفسي.. متجوزها وبسبح في بحر الملايين وعامل بارتى كبير علشان عيد ميلادي وكده.. والرجالة نازله تبوس في مراقي من باب التحية.. ومش بعيد حد يحب يجاملني فيقول "احبيك على ذوقك.. مراتك ايه.. ملين"

رفضت اكل طبعاً.. حتى الشاي مشريتوش.. الزيارة انضريت وراح عليا تمن الشوكولاتة.. الهى ما يوعوا يطفحوها البعدا.. هسيب لخيالك بقى تخيل باقى اليوم وكمية التحفيل اللى حصلت على جدى منى ومن امي وابويا طول الطريق من المريوطية الى طنطا.

خلص اليوم وفضلت السؤال المهم..

اهرب من الليلة دى كلها ازاي؟

سيادة اللواء اكيد مش هيتخيل ان حد ممكن يقوله لأ.. ومش هقدر اختفي مره واحدة كده بعد ما لجأته علشان يساعدني وزى العبيط شرحته الفكرة كلها وهجيب الأجهزة منين وهعمل ايه بالمشروع وهشتغل مع مين وكل التفاصيل دى.. سلمته رقبتي تماما وكلى ثقة في رجال الجيش.. دلوقتي اصبح الهروب سالما هو كل املي.

ممكن اقبل.. هتجوز بنت لواء من اقوى لواءات الجيش.. هبقى مليونير ومشهور.. شركتي هتكبر ومستقبلي المادي هيبقي تمام.. ولادي هيتعلموا في احسن مدارس وهسكن في فيلا او قصر.. مراقي هتبقى سيده مجتمعات وبيتي مش هيتخلى من الزوار والحفلات.. بس في تمن لازم ادفعه.. هبقى محجوب عبد الدايم..

لو رفضت.. يبقى هكمل حياتي زي ما انا.. موظف بتنقل من شركة الى شركة.. أخرى معروف حتى لو كنت بشتغل في مالي ناشونال..

يا ترى الميزان هيقول ايه؟؟

ابقي كذاب لو قلت اني قررت بسرعة او القرار كان واضح في دماغي..

انا اخدت اكثر من شهرين بتقلب على الجنين علشان احدد بالظبط انا هعمل ايه..

فجأ لقتني بقول طظ..

طظ في كل شيء..

طظ في المشروع.. في الشغل.. في الجواز.. في البلد.. في الكوكب كله..

طظ في الحياة نفسها..

بعد 3 شهور بالظبط.. كنت على سلم الطائرة في الطريق الى خروج نهائي بلا اي نية في العودة الى بلدي تاني.. بلدي اللي خرج منها نبي خائف يترقب واتحبس فيها نبي اخر وشبابها بيرمي نفسه في عرض البحر.. بس علشان يلاقى فرصة في ارض الله الواسعة علشان ياكل وينام في امان.

برضه طظ..

الفلوس مش كل حاجه.. صحيح معنديش منها كتير علشان اعرف هي كل حاجه وللا لأ.. وصحيح ده كلام الشحاتين اللي زيي بينما الى معاهم الفلوس بيقولوا كلام تاني خالص..

بس برضه طظ..

الموت اهون من العيشة بالقرون

الفيمينست

"لا أستطيع تدخين سيجارة لتهديئة أعصابي حتى لا يتسلل دخانها إلى حيث يجلس الرجال فيعرفوا أنه دخان سيجارة السيدة حرمه.. إلى هذا الحد كانت التقاليد تحكم بالسجن على المرأة.. وكنت لا أحتمل هذا العذاب ولا أطيعه"

هدى شعراوي تحكي في مذكراتها معاناتها مع المجتمع الذكوري

بعد ما ليست في الحيط بسبب زواج فاشل اجبرتنى عليه ظروف الغربة.. دخلت في مرحلة مرعبة من الإحباط والعداء المستحكم ضد كل ما هو نسائي في هذا الكوكب.. كرهت الستات وكل ما يتعلق بهن.. كل مؤنث في هذا العالم كان في نظري شر مستطير.. تعمقت في قراءة قانون الأحوال الشخصية وتتبع قصص الطلاق لحد ما نفسي.. اتملت طاقة سلبية وغل غير طبيعي ضد الستات بشكل عام.. كرهت تاء التأنيث لدرجة اني بقيت أقول على عربيتي "موتور" زى الخلايجة بس علشان اتفادي استخدام اللفظ المؤنث.. كنت ذكوريست متحيز بشكل مرعب يفوق اقصى.. ما وصلت اليه اعنى فيمينست في التاريخ.. وبما ان التاريخ لعبتي.. فكان سهل عليا اوى اثبت تاريخيا ان المرأة هي سبب ضرور كل هذا العالم.

مع مرور الوقت ادركت اني الخاسر الأكبر في الحرب دى.. لم يخلقنا الله لهذا العداء اكيد.. صحيح تجربتي في الانفصال مأساوية.. لكن في غيرى ملايين عايشين مبسوطين مع زوجات صالحات.. الخطأ والإحسان سلوك فردي لا يصح ابدا اننا نعممه او نعكسه على الكل.. علشان كده قررت ارمي كل الأفكار دى من دماغي وقاطعت كل مجالس الشحن النفسي- وقصص محاكم الأحوال الشخصية.. بدأت افتتح تانى على الناس واتعامل مع الستات زى اى انسان طبيعي.

المرة دى نزلت مصر- بمشاعر عادية.. لا متحمس ولا متحفز.. ان طلعت كويسة ماشي.. ان طلعت سيئة ميضرش.. مش هأخذ اى خطوة الا بعد التأكد التام انى مش هلبس في الحيط تاني.

ملفتش نظري في البيت ده الا شيء واحد..

العروسة المقترحة نفسها..

عيون مركزة وشفايف مزوممه مع نظره قوية تحسسك انها داخله خناقة.. هناك شيء ما اخفوه عني كالمعتاد.. المنظر ده منظر واحدة داخله تعمل محضر مش واحدة قاعدة مع عريس محتمل.

حوار ممل معتاد في البداية.. الطلاق علمني اشترى كثير وابيع قليل.. وزى ما تكون البنات نفسها حسيت ان عندي كثير.. فبدأت تنكشني..

- بشمهندس.. أيه رأيك في وضع الستات في مصر؟
- المرأة المصرية زى الرجل المصري.. الاتنين واكبين بالجزمة على قفاهم.. حظ الأطفال ان وضعهم مختلف شوية ازاي؟
- واكبين بالجزمة على قفاهم وهيلبسوا كوز لانشون لما يكبروا
- يا ريت توضح
- انا وضحت خلاص.. مصر- بلد الظلم.. بلد مفياش حد برئ.. كل من فيها مظلوم لصالح طرف اخر هو نفسه ظالم ومظلوم في وقت ومكان تاني.. في حد في شغله يبقي ظالم وفي بيته مظلوم.. البيت في حد مظلوم بيروح يظلم حد تاني في مكان تاني.. المكان الثاني فيه مظلالم بيعتدوا على طفولة الى هيبقوا ظلمة المستقبل.. مسحوق الظلم اترمي في النيل والناس شريته وهضمته واجادت التعامل معاه حتى انها برعت في ابتكار ما يؤيد الظلم وتفننت في التأصيل الشرعي للظلم تحت مسميات كثير.
- يعني حضرتك مش متفق معايا ان الرجل هو سبب تعاسة المرأة؟
- اه ولأ
- طيب لما هو اه.. حضرتك ناوى تكون سبب تعاسة انسانه تانيه ليه؟

- طيب.. هنا نقف شوية.. انا برد على كلامك ردود مباشرة في حدود السؤال نفسه.. بينما السؤال وراه حاجات تانية كثير تعمدت انى اتجاهلها في انتظار انك تصرّحي بيها علشان مبقاش افترضت شيء مش موجود.. وبما انك صرحتي ببقى الرد واجب.. اه طبعاً ده بيحصل.. ولكن ليه وازاى.. هنا في تفاصيل كثير اوى..

حضرتك بتتري على ان الرجل هو عفريت المصباح.. بكرة تتجوزي وجوزك يعملك.. لما تتجوزي ابقى اعملى ما بدالك.. بكرة جوزك يجيبلك ويوريكي الى عمرك ما شفقيه.. الرجل لازم يتحمل كل حاجه علشان هو راجل.. الرجل الصح هو الى يخلّى مراته ملكة إنجلترا.. واشياء كثير من هذا القبيل.. سقف طموحات البنات بيعلى عن حدود قدرات سوبرمان نفسه.. بيساهم في المفاهيم المغلوطة دى اهالي ضعيفة الإمكانيات بتلجأ الى حذف الكره في ملعب زوج المستقبل.. ده غير صديقات السوء الى بتلعلع في سماء جلسات النميمة وتفضل تحكي للمغفلات عن حنية جوزها وروعته وأد ايه هو متفهم وعنتيل وما الى ذلك من أكاذيب تؤكدها صوابع ايديها الخالية من ذهب الشبكة الى اتباع اوام بعد الفرح او هدومها الى الوانها راحت من كتر الغسيل او قفاها الواضح عليه 5 صوابع لا يمكن الا انها تكون صوابع رجالي مش حنية اطلاقاً.. بنات كثير بتتري على الانانية الى تخليها مش شايقه من الكون الا نفسها وان كل حدث لازم يبدأ وينتهى عندها وان الملائكة بتبات تعيط عليها لما تضايق وكل الأفكار الهابله دى.. انتو بتكذبوا على بعض وتحملوا الرجل مسئولية الأكاذيب وتبعاتها.. بيعملوكوا ان الجواز ان في حد هيعملك.. بس للأسف سقط منهم يعلموكوا ان الجواز في طرف تانى كمان منتظر انك تعمليله.. وتعمليله كثير.. بيعلموكوا ان الجواز فيه حقوق للسيدات.. وسقط منهم يفهموكوا ان مفيش حق مطلق.. كل حق قصاده واجب تأديته الأول وبعدها تقولي حقوقي..

التعاسة هنا مصدرها العقل الى فشل في فهم صحيح الأمور بعيداً عن نوع صاحب العقل ده كان ذكر أو انثى.. وصلتك وجهة نظري؟؟

قلبة وشها تقول ان كلامي معجبهاش.. متوقع طبعاً.. النوعية دى حافظه مش فاهمه.. بانيه تصورات وافكار على منطق مختل.. هي مش عايزه حد تتناقش معاه ولا عايزه زوج أساساً.. هي عايزه شخص تفرغ فيه شحنة غضب الله اعلم سببها ايه.. البنات دى مظلومة بسبب سوء التربية أولاً.. وبسبب المجتمع الباحث عن الترنندات ثانياً وظلموا أنفسهم بسبب ودانهم ثالثاً.

تسلحت البنت بكم مهول من المواقف والتفاسير المغلوطة والآراء الشاذة.. ريحة نوال سعداوي فايحة بقوه من الكلام.. فضلت تتكلم تقريبا لمدة 45 دقيقه وانا ساكت تماماً.. بتقول نفس كلامي اول ما خرجت من تجربة الزواج الفاشل لكن بالعكس.. الموضوع مش محتاج توضيح.. البنت دى كده غير صالحة للجواز.. تمام زى مانا كنت انا غير صالح للجواز بعد فشل تجربتي.. الأول لازم تنضف نفسيته وتوزن الأمور بحياديته.. وبعدها تفكر في الجواز.. المنظر ده مشروع طلاق سريع جدا.

- ساكت ليه يا بشمهندس.. كلامي صحيح.. مش كده؟؟
- لا خالص.. انا ساكت علشان اتعودت احترم الى بيتكلم ومقاطعوش.. مش معنى انك قاطعتيني 13 مرة مره انى اعمل زيك.. انا ساكت علشان افهم الفكر وأرد على الفكر الخطأ الرد المناسب مش رد بالصوت العالي والأى كلام.. كلام حضرتك من اوله لآخره مفيهوش كلمة واحدة صح.. كل ما ذكرتي مردود عليه بالأرقام والادلة والاحصائيات الرسمية لو تحب.. حظك السيء انى راجل مبحش الهدب واحب لما أقول معلومة.. تبقى معلومة واضحة موثقة.. مش حكاوي مصاطب بنظام مرات خالتي حصلها وجوز عمي اتبهدل في المحاكم.. انا رديت بالفعل على بعض الأخطاء الى انتى وقعتي فيها ولما خدتي بالك انى قفشت الأخطاء.. بقيتي تغيري الكلام بسرعة.. ده غير ان تكرار الكلام يعتبر من اكبر الأدلة على افلاس المنطق.. واذا افلس المنطق.. وجب على الانسان مراجعة أفكاره.. ده لو هو عايز فكر مستقيم سليم فعلاً مش عايز يهري وخلاص.. بس عموماً.. لا ده الوقت المناسب ولا ده المجال الى استغله علشان اثبتلك بمنتهى البساطة ان كلامك ده كله غلط.. ده غير انى متأكد ان الف نبي مدعين بألف حجة الهية مش هيعيروا في تفكيرك الخاطى حرف.. اعتقد الوقت اتأخر واننى وراكي شغل بكرة.. مش كده؟
- فهمت.. حضرتك فشلت ترد عليا فقررت الهروب.. ده من صفات الرجل الضعيف عموماً.. عادى.. متعودين منكم على كده.
- ضعيف اه.. شكرا

في ظروف أخرى كانت هتدفع تمن الاستفزاز ده غالى.. لكن من حظها انى وقتها كنت في مرحلة السلام البرنسي.. شفتها مجرد واحدة في طابور بنات قررت انهم غير مناسبين.. ها.. الى بعده.

وخذت بعضي ومشيت وانا بحبيها بأسخف ابتسامة ممكن تشوفها في حياتك.

خرجت من عندهم وانا على قناعة تامة ان الموضوع ده بلح.. اتصلت بالست الى كانت متوسطة وبلغتها قرارى.. الموضوع مش مناسب وكفى.. رجعت على البيت علشان الحق عشاء ما قبل السفر مع اهلى.. تليفوني رن.. لقيته ابوها.. يبدو ان الراجل – أخيرا – خد باله ان بنته كانت في منتهي قلة الذوق.. فحب يعتذر وحلف عليا الف يمين انى لازم اعدى عليه قبل ما أسافر.

طيارتي كانت بعد نص الليل.. ملقيتش ضرر انى اعدى على الراجل واصفى النفوس بينى وبينه.. وصلت عنده البيت ومكانتش البنت موجوده.. لم اهتم الحقيقة ومسألته.. بالنسبالي الموضوع منتهى.. كلمتين مع الراجل نصفى بيهم النفوس وخلاص..

واحنا قاعدين جت البنت من بره.. انا متجاهلها تماما وكأني مشفتهاش قبل كده.. بدأت الكلام بعنف اعتقد سببه تجاهلي الواضح ليها..

- على فكره.. حضرتك انا بلغت مدام "فلانه" ان مفيش نصيب.
- امي الكلام ده؟
- يا دوب من ساعتين.
- اه.. طيب.. هي كان مفروض تقولك انى كلمتها امبارح بعد ما نزلت من عندكوا وقتلتها ان الموضوع مش مناسب.. اعتقد انها محبتش تضايقك بس مش اكرت.. والدك هو الى دعاني للزيارة النهارده لأنه – حسب ما قالى – اتضايق من كلامك امبارح وحب يلطف الجو.. بغض النظر بقي انتى قلتي ايه لمين.. انا غير مهتم بيه اطلاقا.
- مش مهتم بكلامي!! حد قالك انك قليل الادب؟
- لا والله محدش قالى.. بس قالولى ان اكرام الضيف واجب ولا تصح اهانتته ابدا.. شكرا على كل حال.. استأذنكم علشان الحق طيارتي.
- المركب الى تودى.
- شكرا.. سلام عليكم.

واترزع الباب ورايا وابوها ساكت سكوت غريب.

نزلت على السلم وانا ميت من الضحك.. البنت دى مسكينة جدا.. كنت هعذرها لو مطلقة مثلا.. لكنها حسب ما قالت بدون تجارب.. مش هقتنع انها عدوانية علشان بتعرض لضغوط في الشغل وتحرش في الشارع.. لو فكرنا كده يبقى نص ستات مصر لازم تتحول الى فامبايرز.. مع شخصية الاب الضعيفة جدا والام المتوفية لازم الى في ظروفها تبقى ام ابوها.. اكثر حنانا ووداعة وصلابة.. مش بلطجة.

خرجت من باب العمارة وانا بفكر اخد بيجو مخصص للمطار علطول علشان الحق وقتي.. سمعت صوت خروشه وبعدين حابه ثقيلة هبتت على رأسي لدرجة انى وقعت على الأرض.. تقريبا هرب الوعى منى لثواني.. قمت بعدها من على الأرض انفض هدومي وابص اشوف ايه الى وقع على رأسي من فوق ده..

لقيته كيس زباله..

مصدقش عينيا في الأول.. ركزت اكرت.. دى زباله فعلا.. بقايا اكل وقشر – باذنجان وبطاطس في كيس اسود ريحته مش تمام.. ايوه.. ده كيس زباله.. بصيت لفوق استطلع الموقف.. معقول في ناس بترى زبالتهما بالطريقة دى في الشارع.. هو البلد دى مش هتنضيف أبدا..

لقيت البنت إياها واقفه في البلكونة بتبصلي بنظرات متشفية..

الله يقرفك.. يعنى قليلة الأدب وكمان مش نظيفة..

كنت همشي عادي لولا ان صوتها كان عالي وهي بتتكلم من البلكونة:

- ابقوا نظفوا نفسكوا الأول يا عرر قبل ما تيجوا تخطبوا بنات الناس.. بلا قرف..

ايه ده!! هو كيس الزباله ده اترى عليا بالقصد؟؟

طَب لِيَه!!

انا مكنتش سافل ولا قليل الادب رغم اني مشيت شبه مطرود من البيت الى انتوا دعيتوني لزيارتہ.

انا ترمي عليا زياله؟

يا بنت الكاكاكا... الب

محسّتش بنفسي.. وانا طالع سلاله البيت زى الصاروخ.. وقفت شويه قصاصد باب شقتهم علشان اتحكم فى الادرينالين الزيادة اوى فى جسمي.. ايدى بتترعش بقوه وقلبي بيدق بعنف.. خبطت على الباب.. او بالأدق.. رزعت على الباب.. ابوها فتح الباب مخضوض.. الساعة عدت 10 مساء.. مش وقت زيارات خصوصا فى ديسمبر.

ابوها شافني سكت وحط عينه في الأرض.. دخلت البيت دخلة رفاعي الدسوقي.. وقفت في نص الصالة والدخان طالع من وداني.. طلعت البنت من اوضتها تشوف مين.. شافتي وكأن مسها عفريت.. الزبالة الى رمتها عليا لازقه في هدومي.. بصيت لأبوها وانتظرته يتكلم.. لكنه فضل ساكت.. قتلته انت عارف ان بنتك رمت الزبالة عليا من البلكونة؟؟

لسه ساكت مش بيتكلم.. اتكلمت البنّت.. لسه هتبدأ تجعري.. رحت فارد دراعي اليمين لآخره وبكل ما اوتيت من قوه نزلت على ووشها بقلم اقل ما يقال عنه انه قلم خدامين.. قلم ميقدرش عليه مخبرين أمن الدولة.. قلم مفاجئ مربع من قوته ابوها اتخض واتنفض.. هي وقعت على الأرض متكومة زى كيس الزباله الى حدفته عليا.. لا اعتقد ابدًا انها كانت متوقعه رد الفعل ده.. غير قوه القلم صوته كمان كان عالي.. خط احمر في طرف شفرتها مفيش شك انه بتأثير القلم ده.

عمری ما کنت اتخيل ايدا انی اضرب واحده ست.. طليقتی نفسها معملتش معاها کده رغم ان اهلها نفسهم وهما بیستلموها من عندی محدش فيهم کان مصدق انی مضرتهاش بعد الی عملته.

البنّت واقعه قصادي على الأرض.. ابوها جرى عليها يقومها.. غضب مرعب مخيف على وشي.. عينا حمراء زى الدم وعروق رقبتي نافرة بشده.. منظري فعلا يخوف.. شكلي كده داخل على جريمة ومش باقى على حاجه..

بلهجة مرعبة بطيئة وصوت تعمدت انه يكون عالي فرغت شحنة غضبي فيهم..

الزبالة دى تاكلوها انتم.. مش علشان ابوكى راجل هفأ.. ببقى الرجالة كلهم هفأ.. واللى خلق الخلق.. لو نطقتي كلمة واحدة.. كلمة واحدة بس.. حتى لو قلتي انا آسفه.. لأكون ساحبك انتى واللى معرفش يربيكى ده على المديرية حالا واعملكوا 5 قضايا تندفونوا فيهم بالحياة.. وهناك يا سفله هتعرفوا انا مين.. القلم ده هيعلمك انك تحتري الناس يا قليلة الرباية.. اتفوه.

في طريقى للخروج من البيت كان قصادي كرسى.. رفسته بقوه في النيش على سبيل الانتقام المزدوج من البنت والنيش مع بعض.. خرجت من البيت بنفص هدموي ومستعد أعمل اى مصيبه ثانية.. اكيد الموقف ده مش هيعدي كده.. الطيارة راحت عليا وخراب يا دنيا خراب.. افتتح باب شقة في الدور الى تحتهم.. ست وراجل شكلهم فضولين.. مسكوا فيا بقوه وهات يا الف مليون خلاص بقي صلي على النبي.. الست جريت على المطبخ جابتلى عصير ليمون.. كان في شاب في البيت اعتقد ان ابنهم دخل جابلى بلوفر من بتوعه بدل الى اتبهدل.. اتوترت زياده.. انا معرفش مين الناس دى وتوقعت منهم شر.

في كلمات سريعة مقتضبه حكيت الى حصل.. ابنهم طيب خاطري وضحك معايا.. قالى يا اخى انت سبحان الله.. بقى من بنات طنطا كلهم.. ملقيتش الا دى!! الشارع كله عارف انها مهبوشه يا عم الحاج.. ده احنا مبزدرش عليهم حتى السلام وانت رايح تتجوزها!! انت ايه يا عم.. معندكش مراية فى بيتكوا؟؟

هديت شوية.. كلمتين شكر للناس الى استضافوني.. دخلت الحمام غسلت وشى ونظفت هدومي.. وبعدين استأذنت وطلعت على المطار رأسا.

لما بفتكر الموقف ده بغلط نفسى- انى قبلت الزيارة الثانية.. المفروض الانسان يكون موضوعي وعملي اكثر من كده.. الموضوع خلاص فكس.. كان كفاية تلففون وبلاها الزيارة خصوصا ان بوادى قلة الذوق ظهرت من زيارة اليوم الى قبله.

طيب هو ايه الى وصل البنت للمرحلة المربعة دى من العدوانية؟؟

الإجابة ببساطة هي سلم ودانك للأعلام والسوشيال ميديا وصدق كل الى بيتحكي وانت هتبقى زيتها واكثر.. بعد ما عدت سنين بدأت انتبه فعلا لخطورة القصص المزيفة الى عماله تنتشر- يمين وشمال بدون حسيب ولا رقيب.. تشويه مستمر للعلاقة السوية بين الرجل والمرأة والتأصيل لفكرة تقديس الذات.. أفكار شاذة بينشرها جماعات معينة لا هما أصحاب علم ولا أصحاب دراسة.. كلام مكرر مردود عليه من أيام الامام ابن تيميه.. كلام يرعاه الملحدون وأصحاب المصالح.. ناس انتفضت بمنتهى القوة علشان واحدة رقصت في رحلة وخرسوا تماما لما غرقت طفلة ضمن 24 طفل اخر في ترعة اثناء رحلتهم اليومية للبحث عن لقمة العيش.

هل معنى كده ان الواحد يبقي ضد حقوق المرأة؟؟

اطلاقا.. المفروض كلنا نبقي في صف حقوق الانسان.. ازاى نفكر في حقوق طرف ونظلم طرف آخر.. ايه فائدة ان المرأة تاخذ مكنتسات على حساب إهانة الرجل؟؟ ما هما بقالهم كتير بيتكلموا في الحكاية دى وخذوا مكنتسات كتير فعلا.. ومع ذلك لسه بيشتكوا ويصرخوا ولسه حالهم زى الزفت.. السبب بمنتهى البساطة ان الحقوق الأساسية الى تستحق الكلام عنها "زى المسكن الآمن والتعليم والعلاج" محدش بيتكلم فيها لأنها هتفتح العيون على نظام فاشل بيغتصب حق الجميع بدون استثناء.. التركيز كله على نصرة طرف في مواجهة طرف حتى لو بالباطل.. ده الى بيعمل سوكسيه ويجيب لايكات.. الف مليون خيبة على الى افكرت نفسها انتصرت لما خدت منه العيال والقايمة.. فالحه.. لبستي عياله لوحداك.. مترجعيش تشتكى بقى من قسوة الحياة والمسئولية الى تهد جبل.

الى يوجع القلب فعلا ان الى بيدفع تمن النفخ في النار ده بنات مساكين لا ليها في التور ولا في الطحين.. بنات هابله زى صاحبتنا دى.. لا شافت ولا تعرف حاجه.. انما بتزيط في الزبطة وخلص.. مصيبتهم الكبيرة هتبان بعدين لما تكسر الأربعين ويموت الاب وينفض من حوالهم كل الى كان بيسممو دماغهم واولهم المتزوجات.. وقتها هتعرف كويس اوى انها – والى زيتها – ضيعوا أعمارهم في كلام فارغ.. وان الوحيدة الى كسبت هي الى قفلت ودانها ورفعت راية الاستسلام قصاص فطرة ربنا في الخلق.

خطبتنا

يمكنك أن تخدع كل الناس بعض الوقت.. وبعض الناس كل الوقت.. لكنك لن تستطيع خداع كل الناس كل الوقت "ابراهيم لينكولن"

الحكاية دى ممكن تكون قاسية شوية..

اشتغلت في قطر سنة 2011 بعد ما خرجت من السعودية مؤقتا.. قطر دولة لطيفة شعبها شديد التهذيب.. لكنها لا تصلح لأمثالي ابداء.. دى بلد اوضة وصالة وانا راجل متربي في البراح.

الترشيح المرة دى كان عن طريق صديق بيشتغل في قطر.. هي تبقى صاحبة اخت مراته الانتييم.. شفتها وشافتني في مناسبة عائلية عند صديقي.. قررت ادخل البيت من باب.. ابويا تحامل على نفسه وحضر معايا أول زيارة ثم الخطوبة.. كانوا من فيصل.. أسوأ شوارع الكون.. شارع فيصل كان من أسباب سعادتي ان الموضوع ده باظ.. كفاية اوى اني مش هروح الشارع ده تاني ابداء.

مقدمات عادية لا تحمل اى تفاصيل مهمة حصلت بعدها خطوبة في بيتهم.. ابوها طريح الفراش وشبهه بيموت.. أمها ربة منزل.. اخت اكبر منها منفصلة واخ من سنى متجوز وعنده اسرة.. حبيته جدا من اول مره شفته فيها.. حتى اننا بعد الخطوبة نزلنا انا وهو سهرنا على القهوة للصبح وكأنا أصدقاء طفولة.

مكانش عندي اى ملاحظات غير ان البنت كانت متطلعه بزيادة.. مفيش اى عيب في ان الانسان يحلم ويحط لنفسه خطط ويبص على كل شيء حواليه ويتطلع الى افضل شيء في الدنيا بشرط انه يبذل المجهود المقابل ويكون مستعد لدفع الثمن ويبدأ يشتغل فعليا في خطة وطريق وصوله الى تطلعاته.. انا شخصيا عملت كده لما اتخرجت لحد ما خدت على قفايا في مصر.. فقررت الهجرة.

هي مكانتش كده.. كانت عاوزه كل شيء بسهولة ودلوقى.. احلامها كلها مشروعة صحيح.. لكن يلزمها عفريت المصباح.. هي معندهاش اى استعداد تعمل اى شيء ولكنها عاوزه كل شيء دلوقى.. يعنى مثلا بتحلم بشقة تملك في حي راقى في القاهرة.. طيب ازاى؟

- بسيطة.. مش انت عندك شقة؟ اكتبها بأسمى
- وهو اسمي وحش!!
- لا.. بس انا عاوزه شقة باسمي.. وانت عندك شقة فعلا.
- طيب لو مفيش انا.. هتجيبى الشقة دى ازاى..
- مش مشكلة.. اللى هتجوزه لازم يجيبهاالى..
- اااااه.. طيب

لازم تعلمني السواقة.. لازم تجيلى عربية.. لازم تعلمني لغات.. لازم تسفرنى بره.. لازم تأمنلى مستقبلي.. وتفاصيل تانيه لما ركزت فيها لقيت ان اخرها هو الطلب وبس.. غير مستعدة ابداء للسعي في اى اتجاه علشان تحقق هدفها.. مقدرش أقول طماعة والا ابقى ظلمت الطمع والطماعين.. هي بتتصرف ان كل ما املك فعليا اصبح ملك لها.. حكيت لها في يوم ان جالي عرض شغل في السعودية براتب اعلى.. لقيتها بتتكلم علطول في مستوى مصروفاتها الجديد.. وكأني هوا.. مش موجود أصلا.

شفت مشكلة كبيرة في طريقة تربيتها.. واضح جدا ان ابوها مكانش بيقولها لأ على اى شيء فنشأت شديدة الأنانية.. اباء كثير بيقعوا في الخطأ ده.. خد بالك ان كلمة يدلل بالإنجليزي يعنى Spoil.. وكلمة يفسد برضه يعنى Spoil.. ممكن نفهم من كده ان الانجليز اعتبروا ان التدليل ما هو الا إفساد.. النوع ده متعب جدا.. مش انا الراجل اللى يتحمل الكلام ده.. انا راجل شقيان عايز واحدة تشقى معايا.. معنديش اى مانع اجيب لمراتي لبن العصفور.. بس انا اجيبه هدية وتقدير.. مش بالطلب.

بعد 3 شهور خطوبة كنت بدأت استقر ان الموضوع مش نافع.. لكن كوني مطلق كان مخلى قراراتي بطيئة جدا.. خطبت 6 مرات وطلقت مرة.. خلاص.. مبقاش حد يباركلي على اى شيء.. كله قالك حسنى ده مش بيعيشله حريم.. لما يخلف.. نبقي نباركه على الجواز.

كنت واضح جدا معاهم من الأول.. انا عايش بره مصر ومعنديش اى خطة للعودة.. أمثالي مصر خطر عليهم ومريمين في سجون النظام.. كمان العيشة بره اجمل واسهل.. هما وافقوا وباركوا.. وهى تحديدا كانت سعيدة جدا بالحكاية دى.. فجأة انقلب الحال.. بقى الكلام انى لازم اخد لها شقة جنب أمها في فيصل.. انا عندي شقة في القاهرة بالفعل.. ايه الداعي لشقة تانية في نفس المدينة.. وفي الشارع الموبوء ده كمان؟؟

ممكن افكر اخد شقة تانية او شقة اكبر.. بس يبقى التفكير صح.. اشتري في التجمع مثلا.. مدينتي.. الشيخ زايد.. اى حته بعيد عن خنقة القاهرة وزحمتها.. استحالة في يوم من الأيام هعيش في شارع فيصل ده ابدًا.. بسبب شدة زحام الشارع ده كل الخدمات فيه متهالكة.. ساعات كنت بحس ان الناس اللي في شارع فيصل لوحده اكر من اللي في قطر كلها..

- بس انت عارف ان بابا تعبنا وانا لازم ابقى جمبهم
- طيب ما تقعدني معاهم براحتك وانا ابقى انزل عندكوا اجازات.. كده كده أجازاتي مش طويلة
- المفروض انى هبقى متجوزه.. اقعد في بيت اهلي ازاي؟
- ماهو جوزك مش موجود.. مفروض تقعدني في بيتك صحيح.. وبيتك موجود.. بس في عندك ظروف خاصة تتطلب انك تكوني معاهم 24 ساعة..
- لا.. انا عاوزة شقة جنب ماما
- يبقى مش موضوع بابا بقى.. مش لاقى منطق خالص انى اربي فلوسي في شقة زى دى.. فكرى تاني وشاوري مامتك.. شوفي هتقولك ايه.
- هو مش مفروض ان محدش يتدخل بين راجل ومراته وللا ايه؟
- صحيح طبعا.. بس انتى لسه مش مراتي.. وانا هتفق مع اهلك مش معاي.. انا مش واخذك من الشارع.
- لا.. انا مصممة
- صممي براحتك.. ولا كآني سمعت حاجه

انتهى الحوار بالفقش.. اكر من 10 أيام مش بعبرها خالص.. تجاهل تام لكل اتصالاتها ورسائلها.. عملي قرد على صفحتي علشان ارد.. وانا ولا انا هنا.. وسطت اختها بيني وبينها.. قبلت الوساطة وكلمتها تاني بعد ما اعتذرت وتعهدت انها هتغير الأسلوب ده.. صدقتها ظاهريا.. بس ببني وبين نفسي كنت مقتنع ان مفيش حد بيتغير.. المسألة مجرد وقت مش اكر قبل ما نعلن الانفصال النهائي.

رغم انى غير متحمس للموضوع ومقتنع انها مش نافعه.. الا انى لم ادخر جهد ابدًا في محاولة إعادة ضبط طريقة تفكيرها علشان تتمشي معايا.. غلط جدا انا عارف.. حتى لو غيرت دلوقتي.. بعد كده هترجع تاني تفكر وتتصرف بنفس الطريقة والبس انا في طلاق تاني.. طول عمرى من اشد أعداء الامل الزائف ده وطول عمرى بشوط في اى واحدة تطلب منى اى نوع من أنواع التغيير علشانها.. لما احب اغير تصرف ما يبقى بمزاجي وعلشان نفسي انا.. انتى بره الحسبة خالص.. في نفس الوقت مكنتش اناني اطلاقا وطبقت نفس المنطق على الطرف الاخر.. انا لا عايز اربي ولا عاوز اوجع دماغي.. انا عايز واحدة زى ما هي كده بإعدادات المصنع.. لا افكر الزمها بحجاب ولا اجبرها تقعد في البيت ولا اجري وراها بالعصاية علشان المصاريف ولا اروح اجيبها كل شوية من بيت أهلها.

بدأت لاحظ بعض الأنشطة الغريبة على صفحتها.. في شخص دايمًا بيظهر مع اى شيء بتنزله.. نزلت اغنية يحط لايك.. نزلت صورة يديها ايموشن.. عملت شير يروح داخل معلق.. اى شيء وكل شيء لازم هو يكون موجود.. بشوية تجسس على صفحته لقيت رسائل مخفية في اى بوست بينزله.. معنديش دليل صحيح.. بس الكلام اللي هو بيعمله ده بنعمله لما نحب نعلق مزز.. انا نفسي عملت نفس الكلام مع ام حمزه علشان تقع.. بس هي كانت فاضية مش مشغولة زى صاحبتنا دى.. لما تلاقي راجل منزل بوستات محن.. اعرف ان الكلام ده رايح لحد بعينه.. الرجالة بتنزل بوستات يا عن الكورة يا عن السياسة.. الى انا شايفه ده شغل سقط مش اكر.. تأكدت شكوكي لما لقيتها بتعمل على صفحته نفس الكلام.. وكأن هو خطيبها مش انا.. اكيد لو دورت في رسائلها هلاقى بلاوى بينها وبينه واكيد لو راقبتها هلاقىها بتخرج معاه.. ومش بعيد كمان تكون بتعزمه بفلوسي.

المواجهة هنا حماقة.. لو متخيل انك لما تروح لواحدة تواجهها بصورها مع واحد تاني فهي هتقولك سوري.. انا غلطت سامحني.. تبقي مجنون.. مفيش ست في الدنيا بتعترف انها غلطانة ابدًا.. احنا وصلنا الى مستوى مربع من فساد المنطق وانكار الشرع لأنه لا يتناسب مع الأفكار الخربانة في عقول البعض.. طالما ست يبقو الى ف دماغها هو الى صح وكل الكون غلط.. حتى لو لقيتها نازله من اوضة نومك مع راجل غريب.. هتهاجمك وتقولك في ايه.. انت اتجننت.. ده هاني.

مكنتش مرتاح في قطر.. استقلت من شغلي ونزلت مصر نهائي.. بقي عندي وقت كويس علشان اشوف من قريب.. كتمت خبر نزولي عن كل الناس واولهم هي.. احتفظت بتليفوني القطري علشان تفضل فاكره اني في قطر.. وكده كده كنا بنتكلم عن طريق الانترنت.. قررت اني مش هواجهها بأى شيء.. انا هواجهه هو.

هو وقع في خطأ شرعي.. أبو هريرة روي عن سيدنا النبي قوله "لا يخطب الرجل على خطبة أخيه حتى ينكح او يترك".. بس انا مليش اني احاسيه.. كمان معرفش ان كان هو فعلا عايز يخطبها او عايز يشقظها وبس.. كل هذا لا يعني.. هو قالي ببجاجة انهم اتخطبوا واكرم ليا اني انسحب بهدوء لأنها مش عاوزاني.. لم تنجح كل محاولاته لاستفزاني.. عرفت الى عايز اعرفه خلاص.. قفلت معاه وطلعت علي بيتها مباشرة.. كانت مفاجأة ليهم اني في مصر.. أخوها تهرب من مقابلتي ولقيت قصادي أمها واختها.. مرغيتش كثير..

- يا جماعة اعتقد ان النصيب وقف لحد كده.. انتو خطبتموها فعلا لواحد تاني.. مش عارف ازاي تعملوا كده وهي مخطوبة فعليا.. بس أهو حصل..
- لا ابدأ.. مين اللي قالك كده؟؟ هنخطب البنت مرتين؟
- مفيش اى داعي للكذب.. انا كنت لسه معاه دلوقتي وهو اكد كل حاجه
- مين ده اللي كنت معاه.. بنتنا متعرفش حد.. حاسب على كلامك

كنت متمالك اعصابي لأقصى درجة.. في وسط الكلام خطفت تليفون أمها فجأة بحركة سريعة وطلبت رقمه.. فتحت ال Speaker ووقلت المايك.. هو مشكوراً رد من اول رنه وعلطول بدأ يتكلم.. كلمتين منه كانوا كفاية اوى علشان وش أمها يبقي زى الكركم وصوتها يعلي.. وصوتها العالي كان كفاية اوى كدليل يؤكد كل الى انا قتله.

طلبت شبكتي بمنتهى الهدوء.. انا مش ناوى على اى مشاكل.. كل شيء بالخناق الا الجواز بالاتفاق واحنا مش متفقين.. هي بقي بصت لواحد تاني وللا قرطستني.. كل ده كلام هري ملوش اى لزمه.. باي مفتوح دايماً لأى واحدة عايزه تخرج في اى وقت.. مع الف مليون سلامة وحساب التاكسي عليا.. الى تقعد في بيتي تقعد برغبتها الكاملة.

زى ما توقعت.. ماطلوني في رد الشبكة.. لا اعتقد ان شغل العافية ممكن ينفع.. علطول هبقى انا الغلطان اني اتهجمت على بيت فيه راجل طريق الفراش.. نزلت من بيتهم والغضب عاميني لكني متماسك.. القاهرة مش زى طنطا.. ولا اظن حتى ان الناس دى ممكن ينفع معاهم طرق الضغط والتهديد بالفضيحة.. كلمت صديقي الى عرفني بيهم استشير.. انكر عليهم تماماً الفعل ده ونصحني بفكرة جهنمية.. كانت هي الفصل فعلا.

بعد ما نزلت من عندهم رحت على بيت الشخص التاني مباشرة.. مكانش موجود.. قعدت مع ابوه وامه وشرحتهم كل شيء.. الراجل اقسام الف مرة انه مكانش يعرف الكلام ده.. امه كانت على كلمة واحدة.. كان قلبي حاسس.. مكنتش مرتاحة ابدأ للبت دى.. ابوه اتضايق جداً انهم ازاي يخطبوا بنتهم وهي مخطوبة فعلا.. من حظي ان الراجل كان متدين ويعرف ربنا.. اتصل بأبنه قصادي وواجهه بالكلام ده.. ابنه انكر انها مخطوبة.. هذا شأنهم ولا يعني.. الراجل قضى أكثر من ساعة يعتذر.. وقام لبس هدومه واصر انه يبجي معايا عندهم علشان يرجعلي حقي.. لم اعترض.. هو ده كان مرادي فعلا.

الموقف وانا واقف على باب بيتهم مع نسايبهم الجدد مش محتاج اى وصف.. الراجل مصدقي تماماً وانا معايا أكثر من اثبات على صحة كلامي.. بغباء منقطع النظير انكروا كل كلامي وادعوا اني انا اللي بطاردها.. كان سهل اوى اثبت انهم بيكذبوا.. ام الواد الصراحة كانت سفاحة.. الست شافت نفسها في نفس الموقف واشتغلت على كده.. راحة من النوع الأصلي بتاع يا ابرة مصديه جمب الحيط مرمية وشووووووبالاش.. اخدت كورس مجاني في أصول الردح والشرشة وانا قاعد ساكت مش بنطق ولا كلمة.. كنت بتدخل بس علشان انكش ام العريس التاني لما الاقيها هديت.. ابوه كان حاد جداً معاهم.. كتر الف خيره اجرهم يرجعولى حاجتي.. انا اخدت الحاجة من هنا.. وسلامو عليكم من هنا.. كده حلو اوى.. مكنتش عاوز أكثر من كده.

سقطت الموضوع من دماغي خالص.. محاولتش افكر هي عملت كده ليه ولا فقدت ثقتي في نفسي ثانية واحدة.. شارل هيلوبيت كان ملازم تافه.. ومع ذلك جوزفين فضلته على نابليون الى كان منيم أوروبا من المغرب والى هي نفسها حفيت علشان.. رفضت كل المحاولات الى اتعملت علشان نرجع المية لمجاريها حتى ان اختها قالتلى مرة انت زى ما تكون ما صدقت.. وعندها حق فعلا.. انا ما صدقت قفشت الغلطة دى علشان افركش.. كتر الف خيرهم انهم ساعدوني بغلطة لا تغتفر.

عرفت ان خطوبتها اتفركشت بعد ما ام الواد لعلعت معاهم.. تصرف طبيعي جدا تعمله اى ام سواء كانت هانم او شرشوحة.. لا انكر بدا ان ده كان من الأسباب الرئيسية انى اروح لأبوه البيت.. الشبكة كقيمة في حد ذاتها لا تعني ابدأ.. بعد ما اخذتها بعثها وطلعت تمنها لله على سبيل التخلص من اى ذكرى لها معايا.. صديقي اجبر مراته ان اخذتها تقطع علاقتها تماما مع البنت دى او هي تقطع علاقتها مع اختها.. هما اخرجوه معايا بدون اى داعى.. صحيح هو ملوش دعوة بسلوكها بعد كده.. انما الى ظهر منها يخليه يخاف منها على بيته.. كرجل متزوج اشوف النوعية دى من البنات خطر جدا على البيوت المستقرة.

هي خسرت العريسين وخسرت صاحباتها واتمسح بيهم البلاط في بيتهم وفضيحتهم كانت من اخر الحاجات الى ابوها شافها وهو على سرير المرض مش قادر يتحرك.. طليق اخذتها استغل الموقف أسوأ استغلال ودار وراهم بطيلة ورق علشان ياخذ منهم ابنه.. واضح انه كان عربجي راخر.. ده غير طبعا الى منتظرها من مرات اخوها.. اهو دى بالذات انا مستعد ابيع نص عمرى وارجع اشوف عملت معاهم ايه.. الستات لما تشرح لبعض ببعدوا ولاد اللذينا.

بعد شهر وشوية جتلى رسالة منها على الماسنجر مكتوب فيها "متشكره جدا انك بوظلتى حيايى.. انا عملتلك ايه علشان كل ده.. هو الجواز بالعافية.. حسبي الله ونعم الوكيل فيك يا شيخ.. بكره ربنا يجيبلى حقي منك".. ملقيتش افضل من صورة نجمة إبراهيم في ريا وسكينة تعبر عن الموقف.. بعثتها الصورة وتحتها "الولية وانى بنخنقها عضت ايدى.. تقولش عدوتها".

خدت كل الكلام ده وبعته سكرين شوتس لأختها واخوها.. اشتكيت لهم انها بتطاردي.. عرضت عليهم انى ابعتها فلوس كل شهر كمساعدة يعني.. بس جواز لا.. ضحكة خبيثة بعدها البلوك المتين.. وانتهت القصة للابد.

كان كفاية تليفون تقولي فيه كل شيء نصيب وانا كنت هتمنالها كل التوفيق والشبكة هدية من عندي.. وتتخطب براحتها ان شالله 500 مرة.. ولكنها النفس الدنيئة الى كبرت على حب امتلاك كل شيء.. هي أعطت لنفسها كل الحقوق تفعل ما تشاء.. ومتصورتش ان اى حد ممكن يدبجها لأى سبب.

اشتغلت كام شهر في مصر تأكدت فيهم ان السجن مصيري لا محالة في أيام السيسي.. رجعت تانى السعودية.. بس قبل ما ارجع كان القدر شايلى اجمل مفاجأة في عمرى كله.. مفاجأة مسحت كل ما قبلها باستيكه روترنج من بتاعة الهندسة الوصفية..

عرفت ام حمزه..

يااااه يا عبد الصمد..

لقد هرمنا من أجل هذه اللحظة..

ونشوفكوا في اخر حكاية.

وختامها مسك

الشرقية.. بلد مش الها حل الله الوكيل علاولة "أحمد عراي"

32 سنة..

نفسيتي تحت الارض ب 3 شويات.. كل حاجة في حياتي عكس ما كانت المفروض تكونه خالص..

ابويا في اخر 100 متر من عمره.. بدأ يوصيني على اخواني وامي.. قالوا ان الميت بيحس بقرب الأجل.. الله اعلم بصحة المعلومة.. بس أبويا فعلا كان حاسس انه مش هيكمل معانا لآخر السنة.. وده اللي حصل.

بدأنا نتأقلم مع الوضع الجديد.. انا هبقي السند علشان البنات يلزمهم راجل.. كبرت 50 سنة فجأة.. يا اخي طول ما انت بتقول كلمة بابا.. هتفضل عيل حتى لو وصلت 90 سنة.

حالة وفاة عند صديق مقرب.. العزاء في مدينة اول مره اسمع عنها في محافظة الشرقية.. جلسات العزاء تتشابه.. ترحم على الموتى وذكر محاسنهم.. دموع متحجرة في العيون.. كلمات في العاده لا تغنى ولا تسمن.. ينتهى اليوم وكل انسان على بيته.. ويتبقى صاحب المصيبة يجتر أحزانه منفردا.

الكوابرية "اهل أبو كبير" ليهم عادات هي خليط من عادت الصعايدة والبدو.. العزاء للرجال فقط.. اديت الواجب وبدأت أستعد للمغادرة.. منتظر دوري علشان اسلم على صديقي وأواسيه..

وفجأة لمحتها..

زى الطيف خرجت من بيت دخلت بيت مجاور.. عرفت بعد كده ان الشارع كله أسرة واحدة فلسطينية لقت الأمان في العيش متقاربين مكانيا في بلد يعتبرهم إلى حد ما أجنب.

مجرد ما شفتها.. قلبت على الأعشى علطول..

كأن مشيتها من بيت جارتها ** مر السحابة لا ريث ولا عجل

تحت تننيحه عجيبة.. صاحبي مادد ايده منتظرني أقوله البقاء لله.. انا مطمئنه تماما ومركز معاها.. صاحبي بدأ ينهني..

-ايه يا اخينا.. انت جاي تعزى ولا جاي تبصص.

-لمؤاخذه.. البقاء لله..

بدل ما اعتذر واصلح ما افسدت.. لقيت نفسي بسأله بفضول مرعب.. قولى يا معلم.. النخلة دى تقربلك؟

الراجل اتضايق طبعاً.. قاللى من تحت ضرسه ايوه.. تبقى بنت خالي..

اخص.. كده وقعت في مزق.. مش هينفع طبعاً اروح اكلمها.. الكوابرية دماغهم ضيقة اوى في الحاجات دى..

اذن تلزم الحيلة..

سلمت بسرعه ومشيت.. وصلت لحد اول الشارع.. انتظرت لما العزاء انفض.. ورجعت تانى اقف قصاد بيتهم.. زى اى عيل مراهق بالظبط.

الشارع هادي وسكانه معروفين.. مش هينفع اقف كتير كده..

اعمل ايه؟

جيت حصوات صغيره وبقيت احدها على شباكهم واجرى استخبي.. عاوزها تطلع بس علشان اتأكد انها ساكنه هنا.. ايه الى هيحصل بعد كده.. الله اعلم.

عدت ساعة.. ساعتين.. طوب الشارع خلص.. هي العالم دى ماتت وللا ايه.. اجيب نص قالب طوب طيب واربط فيه صاروخ واحده في البلکونه بتاعتهم علشان يصحوا؟

زهقت من الوقفة فخذت بعضي وخبطت على الباب والى يحصل يحصل.. مش محضر اى كلام أقوله.. فتح الباب رجل وقور جدا.. اصلع الرأس.. لابس نضارة عنيفة.. راجل مكتوب على وشه انا قارئ عميق ومثقف بشع..

-سلام عليكم.

-عليكم السلام.

-حضرتك انا جيت عزيتكوا النهارده

-عظم الله اجرک.. شکرا

-اه والله.. كنت في العزاء..

-طيب.. ايش بدک

-حضرتک.. في واحده دخلت هنا مش شوية.. طويله كده.. دى تبقى بنت حضرتک؟

فجأة الثقافة الى على وشه طارت وحواجه ركبت على بعض.. تقريبا كان بيدرس الفرق بين حجي وحجمه علشان يشوف هيلطشني بالألم وللا يديني بالشلوت..

-خير؟

-انا عاوز اتجوزها

-مين انت؟؟

-اسمى احمد.. مهندس كمبيوتر.. حضرتک الاول اعزمنى على شاي.. ونتکلم براحتنا

-شاي؟ شو بک يا زلمي.. تدري كم الساعة هلا؟

-عادی حضرتک.. انا بسهر

-فکروا الراجل عمل ايه؟؟

-طردني..

الصراحة عنده الف حق.. انا لو مكانه كنت اغتصبتني وبعدين قتلتني وبعدين سلمتني للبوليس.. موقفى غلط تماما.. بس انا جيت أخرى خلاص.. انا همشى من البلد دى يا متجوزها يا خاطفها..

رحت لصاحبي الى كنت بعزیه من ساعتين علشان امه لسه ميتة الصبح.. شرحته الموقف وطلبت وساطته.. الراجل عارف اني مش بتاع عط.. بس الساعة قربت على نص الليل ومينفعش نخبط على الناس دلوقتي..

تناحة الدنيا نزلت عليا.. سحبته من ايده ورجعنا للراجل تانى.. المرة دى ربنا ستر ومطردينش.. سمعني لمدة 3 دقائق من على الباب وبعدين طلب منى اعدى عليه تانى يوم.. مفيش مكان ابات فيه.. خدت بعضي على اقرب جامع.. قضيت فيه الليل بعد ما عكمت خادم المسجد تعكيمه حلوه.. الفجر غسلت وشى وصليت وطلعت على الراجل مباشرة.. الساعة 6 الصبح.

حظى انه كان بيصحي بدرى.. عزميني على الفطار وطلب فرصة يسأل عليا وطلب كمان انى اطلبها من كبير عائلتهم..

-طيب يا عمي.. كبير هواره ده مكانه فين وانا اروحله.. انشالله يكون في بلاد تركب الافيال..

-مش بعيد.. هو في غزه..

احيه.. غزه!!!!

الحكومة بتعامل الى بيروحوا هناك على انهم كفار.. طب انا اقولهم ايه.. رايح اتجوز؟

ولا همنى.. خدت التصريح من المجمع وطرت على معبر رفح.. ومن هناك على كير العائلة..

اسئلة وحوارات ومناقشات مفيهاش نص كلمة عن الفلوس والمستوي المادي.. مرت المقابلة سريعا ورجعت على أبو كبير تاني يوم وانا معايا مباركة الكاير..

في البيت عندهم حمايا اصر على الرؤية الشرعية.. هي دخلت سلمت بأدب.. وانا مرديتش السلام..

الراجل يكلمني..

حماتي تكلمي..

صاحبي يکمني..

اختها تكلمني.. عماتها.. افضل الشاي.. افضل كنافه.. افضل من غير مطرود..

وانا مش برد علی حد خالص..

باصللها وبس..

اتكسفت المسكينه وقامت.. لا اعتقد ان في بنت تتحمل ده ابدًا.. لما خرجت بره الصالون لمحت في عينها ابتسامه القبول..
قسطا... كرتونه الكيوي اللى كنت واخدها معايا عملت شغل.. يسقط لابوار وبحيا الكيوى.. تحيا الفاكهة كلها..

اهلی ولا یعرفوا ای حاجه لسه..

لجل حظي الذكر.. جالي سفره تبع الشغل الى تنزانيا وعقد عمل في السعودية.. مطلوب اني اسافر تنزانيا كهدية وداع لشركتي المصرية وارجع على السعودية جري.

طب و البنيه اللى حبتنى من اول حباية كيوي دى.. هعمل معاها ايه؟

اهلى مش عارفين حتى انى رايع السعودية.. لازم اقفش ابوها قبل ما البت تطير.. طبيت عليهم فجأة بدون معاد.. اتصدمت لما أمها قالتلى ان ابوها راح إيطاليا علشان هيلقى محاضرات هناك تبع الجامعة والبنت راحت معاه..

احيه.. ده هيرجع امتي ده!!

انا مسافر کمان 5 أيام.. أكيد لما يرجع هکون سافرت..

اعمل ايه؟

خدت عنوانه في ايطاليا من أمها وهي بتضرب كف على كف.. طلعت من بيتهم على المطار.. لقيت طيارة طالعة روما تاني يوم الصبح.. حجزت فيها وقضيت الليل في المطار اعد الساعات.. من مطار فيوميتشينو على الاوتيل بتاعهم عدل.. الرجل مصدقش نفسه لما شافني.. الأول كان فاكرني عبط.. اعتقد انه كده اناأكد..

-سلام علیکم یا عمی.. هو طلباتکم ایہ للجواز؟

-وانت جای ورا یا لحد روما علشان تقولی ایش طلباتنا!!

-واروح وراكوا المريخ لو لازم..

-ایش بیک یا ابی!!

-مفيش.. طالب النسب ووقتي ضيق.. متسألنيش انا بعمل كده ليه.. والله انا نفسي ما اعرف..

الراجل ابترسم لثاني مره تقريبا في حياته وبدأ يفك معايا في الكلام.. متكلمش كتير.. لكن كلامه كان مطمئن.. وصاني على البنت ودعاني لزيارتهم تاني لما نزل مصر.

لما رحلتهم البيت بعد ما رجعنا من ايطاليا كانوا عاملين مقلوبة.. كانت اول مره اشوف الاكلة دى.. ريحتها رهيبه واصله لحد اخر الشارع.. عمي عزم عليا اتغدى معاها.. قمت اجري على السفرة قبله وانا بقوله لا والله يا عمى مش هقدر.. انا لسه متغدى.. اكلت كمية مهولة.. بعد الاكل قعدت في الصالون انتظر حمايا والقهوة وكده.. يظهر انهم كانوا حاطين في المقلوبة منوم علشان يقلبوني.. ما انا جايب كرتونة كيوي بقي.. نمت على الكنبه زى القتيل.

ساعتين كاملين يحاولوا يصحوا فيا.. ولما الراجل زهق.. جاب بطانية وغطاني وطفى النور وخرج بره الأوضة يحسب عليا.. صحيت من النوم شربت الشاي ومشيت.. ولا كآني عملت اى حاجه.

سافرت بعدها تنزانيا علشان الشغل.. للأسف حمايا توفى وانا هناك.. الدنيا اسودت في عيني.. توقعت ان كل الكلام اللى حصل في الهواء.. امها بقي هتقعد تبيع وتشتري فيا وانا أصلا مش بحب اتفق مع ستات.. لكني كنت غلطان.. حماي طلعت اطيب ست في الكون.. لحد يومنا هذا لا اخفى ابدا ان من اسباب تقديري لأم حمزه هي امها..

تم الاتفاق زى ما انا عاوز بالظبط.. اختلفنا بس ان العروسة مكانتش عاوزه فرح وانا الى اصريت.. نفسي اعرف جبت الثقة دى منين وانا جيبي مكانش فيه تمن علبة سجابر حتي..

مش مهم.. هستلف..

الفترة دى كنت بدأت أتكلم معاها على خفيف.. ضيفتها عندي على الفيس بوك وبدأت افهم دماغها.. لقيت صفحتها كلها ادعية وحكم ومواعظ.. بس كده.. فهمت..

كلمت واحد صاحبي.. كان زميلي في رحلة مشروع العمر الى فشل.. هو سلفي اه.. بس حبيب ورومانسي قديم.. اتجوز عن قصة حب.. كانت وجهة نظره ان كل متع الحياة متاحة بالحلال.. لا مانع من المحن ابدا ان كان الهدف نبيل..

-الحقني يا اشرف.. البت طلع ليها في اللون السلفي..

-عيب عليك.. متقلقش.. كله موجود

-هنعمل ايه طيب؟

-اتقل تتكيف.. هبعثلك تشكيلة النهارده

وبدأنا رحلة المحن الإسلامي..

كنا نسهر نصمم في صور المحن اللى بتشوفوها دلوقتي.. شاب بدقن ببسقي واحدة محجبة شوية مية من طربمه وتحت الصورة كلمتين من نوعية "اختاري اللى لما تبقي عطشانة يعملك ايده كوباية".. او واحد عجوز ماسك ايد واحدة عجوزة مع كلمتين زى "رب هب لي الرفيق قبل الطريق".. قصص الحب الخالدة من التراث زى قصة السيدة زينب بنت سيدنا النبي مع زوجها أبو العاص بن ربيع.. كنت جايها من كتاب اسمه عرف الزنوب في بيان شأن السيدة زينب.. وحاجات هابله كتير من الى البنات بتحبها.. صفحتي كانت وليد خيرى خالص.. كانت الصورة تنزل من هنا.. وانا مستني اللايك من هنا.. تمام.. كده الرسالة وصلت.. طبعا مكنتش مقنع ابدا لصحابي.. اتهرت الش وتريأه.. انا نفسي كنت بتخفق من الحاجات دى اوى.. بس اهو.. لجل الورد.

كده مش فاضل غير الخطوات العملية..

في نفس التوقيت.. حصل عندها ظرف طارئ..

اختها الكبيرة على وش ولادة في الامارات وهي لازم تبقي جمبها وانا سافرت السعودية فعلا علشان الشغل.. يعنى بالميت فيها تأخير 5 او 6 شهور كمان..

ايه الغتاته دى!!

يعنى بقالها 9 شهور حامل.. وحبك تولد دلوقتى!!

يا باااااى..

هنا التهور مطلوب..

سافرت وراها الامارات.. قابلت عمها واتفقنا على خطوبة في بيته.. كانت يوم 6 ابريل.. يشاء المولى ان اختي الصغيرة كان كتب كتابها في مصر في نفس اليوم.. ابويا ابتسم على فراش المرض.. الكبير بيخطب في الامارات واصغر البنات بتتجوز في مصر.

الفقي لما يسعد..

لم اكن املك ايامها الا تمن الشبكة بالعافية.. حتى فستان الخطوبة مدفعتش فيه ولا مليم.. شكلي كان زفت خصوصا ان مرات عمها أرشانة تركية من العالم العثمانيين اوى.. النسوان بتاعة امان ربي امان.. شوكلاتات يوك.. فستان خطوطات يوك!!! مكانش معايا الا فرحتي وانا داخل بيت عمها وشايل تميمة البركة والسعادة..

صندوق الكيوي..

وتمت الخطوبة على خير..

ابويا شافها مرتين وهو على فراش الموت.. تاني مره فيههم ابتسم وقالى البنت دى كويسة.. خد بالك منها.

ودى كانت اول مره يشكر في اى بنت شفتها..

وأخر مره..

أهلها كانوا سعداء بيا وبيعاملوني معامله ممتازة لا زالت مستمرة لحد النهارده.. وكأني جيت شبكة 10 قراريط الماظ او جبتلها الديب من ديله.. مع الوقت اكتشفت ان طبعهم كده.. الحريم الفلسطيني قوي وصعب ترويضه.. لا تمد ايدك ولا تطول لسانك وسيبها تخلف وانت هتبقى ملك زمانك.. ستات يعتمد عليهم بجد.. يا ويلها من أهلها الى ترفع عينها في جوزها.. ويا ويلك لو حاولت تكسرها.. كانوا ولاد العم فلحوا.. انت بتتعامل مع صلب لا بصدأ.. معدن اصيل يظهر في الازمات.. طبيخ ابن حرام يجيب اتخن دكر على بوذه.. اعتقد ان اغلب الستات "المترية" كده مش بس الفلسطينيات.

الأمر كانت سهله جدا.. حماقي مش في دماغها الا هنخلف تاني امي.. هي مش فاهمه اى حاجه في الدنيا الا اننا لازم نفضل نخلف لحد ما الرحم بتاع البت يتبرى ويقع في الحمام.. الست دى لو مفيش حواليتها بنات حوامل بتبقى عامله زى المدمنين.. لحد النهارده معدناش شقه جاهزة للسكن في مصر.. لحد النهارده بنتننطط في كل بلد شويه.. لا عمر حد منهم سألني اى سؤال محرج ولا عمر حد فيههم اتدخل في حياتي.. محصلش ولا مره انها نامت غضبانة.. محصلش ولا مرة ان أمها اتدخلت تصلح بينا.. معاملتهم المحترمة زادت كمان بعد ما بقيت أبو حمزة..

كل ده وانا مستلف منها المهر بتاعها علشان اعمل الفرح..

اتجوزتها وانا شحات.. بعد شغل 10 سنين عملت فيههم كل شيء ممكن يتعمل.. وقفت عند نقطة البداية تاني..

لكن سبحان الله.. الخير على قدوم الواردين..

شركة مكنتش احلم بيها طارين بيا السماء.. فلوس نزلت على دماغي زى المطر من حيث لا أتوقع.. فهمت ان ده رزقها.. فهمت ان ربنا راضي عن الجواز دى فبيساعدني.. فهمت ان شكر النعمة هو الحفاظ عليها.. شكرت ربنا كثير وحافظت علي نعمته..

اي نعم بعد الجواز هي استردت الفلوس الى سلفتها الى بفايظ ميحلمش بيه روتشيلد نفسه..

ای نعم الحياة لا تخلو من المنغصات.. هي ست زی ای ست عندها الاهتمام ميبتطلبش برضه..

الا اني حزين لأنني معرفتهاش من بدری.. كان المفروض قابلتها قبل كل التجارب اللى شفتها.. لو رجع بيا الزمن هروح على بيتهم علطول اول ما اتخرجت واختارها هي.. بس المره دى هكتفى ب 2 كيلو كيوي بدل الكرتونة لأنها كانت ثقيلة اوى.

ساعات بسأل نفسى.. ايه اللى يخلى اسرة منغلقة على نفسهم زی دول يدوا بنتهم لواحد ميعرفوش عنه حاجه ومفلس؟

ايه اللى جاب الطنطاوي للشرقاوي وايه اللى لم الشامي على الفينو؟

قبلها كنت بدقق مع العرايس واهاليها.. احلل في تفاصيل واحد بالى من هفوات..

اشمعنى معاها لأ؟

رحنا الصاغة نشترى الشبكة بدون اتفاق.. هي تختار وانا ازود.. مسألنش هي عاوزه مهر اد ايه وهي مطلبتش.. دفعت اللى قاله موظف الشهر العقاري يوم كتب الكتاب من خبرته في الحالات اللى زی دى.. كان عندها عزة نفس مستفزه في موضوع الفلوس ده.. بس للأسف بعد الجواز راحت عزة النفس دى في ستين داهية..

اشمعنى المره دى الأمور سهلة كده؟

لا جواب الا النصيب..

هل كل الفلسطينيين كده؟

خد عندك.. يوم ما كنت رايح اكتب كتابي.. كلمت صديق مراته فلسطينية برضه علشان ييجي يشهد على العقد.. لقيته في المحكمة هو وهي عندهم جلسه ومقطعين بعض.. هو ضربها على وشها وهي راحت ضارياه باللاب توب بتاع الشغل على دماغه كسرتة وفتحت نافوخه.. المصيبة ان مكانش عنده اى نسخة احتياطي من الشغل اللى على اللاب توب.. يعنى جرح في الكبرياء والشغل مع بعض..

صباح التفاؤل..

كتبنا الكتاب وعملنا الفرح.. خدتها وسافرنا نقضى شهر العسل.. تالت يوم جواز حماتي سألتني.. ها.. مفيش حاجه جايه في السكة؟

ايه الولية دى!!

طيب.. ليه الناس بتعمل اللى انا شفته ده كله مع العرسان؟

من تجربتي.. الناس بتبقى خايفة ومليانة طاقة سلبية من اللى بيسمعوه.. للأسف بعض الناس يصبر على طرح تجربته وكأنها قانون عام لا يقبل النقاش.. تتكلم مع حد.. يقولك النسوان دول ولاد كذا اسمع مني.. تتكلم مع واحدة تقولك كل الرجاله كلاب اسمع مني.. الصح انك متسمعش من دول ولا دول.. كل دى حالات خاصة وتجارب شخصية أصحابها المفروض يتقوا الله ويخرسوا ويمسموش ادمغة الناس..

بعد الجواز هتكتشف ن الست بتنتمي ليك انت.. بتنكسر وتضعف قصادك.. انت الاقوى رغم كل قوانين الأحوال الشخصية.. رغم كل قصص الإحباط والقرف اللى بنسمعها.. انت الأقوى في كل شيء..

والأقوى لازم يلم.. مش يفرکش.

ارمي كل كلام النسويات في الزبالة.. لما تلاق واحد بتتكم عن الرجاله بعنف اعرف ان مفيش في حياتها راجل.. اتمناها التوفيق لانها لما تتجوز هتعرف ان كل اللى بتقوله ده هبل.. الحياة عمرها ما كانت صراع ابد الا في ادمغتهم المريضة..

كل اللى انت عابزه من دلع وهيء وئ هيجصل..

مراتك هتطيع كل أوامرك.. هتمشى على الخط الى انت هترسمه وهتقولك حاضر ونعم وآمين.. هتبقى انت السيد فى البيت بلا منازع.. صباح الخير منك هتبقى بالنسبالها الدنيا وما فيها.. لو قتلها الاكل حلو النهارده حتى لو بالكذب يبقى هتنيمها سعيدة.. كلامك هيبقى قرآن واحلامك أوامر.. ولو حبيت كمان طشت الميه والملح والمساج.. كله موجود.

وازيدك من الشعر بيت؟؟

كل ده وزيادة هتعمله بمزاجها ورغبتها الكاملة بدون اى طلب ولا تدخل منك..

طب ليه؟

طبيعة الأثى كده.. ربنا خلقها تسعد بإسعاد الغير..

هتفضل تسعد فيك وفى الى جابوك لحد ما تلاقيها جابت الى فبطنها وبتقولك آآآآه نفسى فى الكابوريا..

بس كده..

انسى كل الى فات ده.. واستعد لنوم الكنية وحياة من نوع اخر انت فيها رقم 4 او 5..

مفيش جلابية هياثم وهتاكل بواقي الاكل وهتعوم فى بحر من البامبرز وهتصرخ من خرم الأوزون فى محفظتك..

هتبقى اسعد انسان فى الوجود وانت بتحدف ابنك فى الهواء.. وهو يعملها على وشك.

عقبال الجميع يارب.

(تمت بحمد الله)